

Quant dieus vist Adam soul estier,
Lors dist *que* bon ne serroit mie
L'omme estre soul en ceste vie,
Et pour ce dieus de faire afe
Fist *femme* a l'omme associer.
Ce que dieus fist nous signefie,
Qui la puet avoir bien norrie
Bon est de *femme* acompaigner.
La cause q'est seconde apres,
Dont l'en tient mariage pres, 17210
C'est pour estraire en no nature
Des fils et files tiel enress,
Dont dieus leur creatour ades
Soit loez de sa creature:
Ensi tesmoigne l'escripture,
Quant *homme* et *femme* en *leur* figure
De dieu primer estoient fetz,
Dieus dist, 'Crescetz en vo mesure,
Empletz la terre d'engendrure,
Dont *femme* doit porter le fes.' 17220
La tierce cause en son aprise
L'apostre dist, dont *femme* ert prise:
C'est q'om doit bien espouse prendre,
Quant il ne puet *par* autre guise
Garder son corps en sa franchise
Sanz leccherie de mesprendre.
Ce sont les pointz, tu dois entendre, f. 96
Que Matrimoine font comprendre;
Et qui le *prent* de tiele enprise,
Et multepie de son gendre 17230
Des fils ou files q'il engendre,
Molt est l'estat de belle assise.
Cil qui bien vit en la manere,
Il doit relinquir pierre et mere,
Et adherer sanz variance
A sa muler, et tenir chiere;
Ne la lerra de sa costiere,
Car dieus en fist celle ordonnance.
Car dieus ont soul du bienveillance
Lors quant om soul du plesance 17240
Prent une espouse a sa plesance
Et covoitise est a derere,
Dieu *prent* en gré la concordance;
Mais quant argent fait l'alliance,
Ne sai quoy dire en la matiere.

17238 en fist

17241 aderere

17273 enest

Par Matrimoine, q'est divin,
De la voisine et le voisin
L'en solait prendre mariage
Par bon amour loyal et fin,
Sanz covoitise ou mal engin
Ou de richesce ou de brocage: 17250
Mais ore est *tourne* cel usage,
Car bon et bel et prous et sage,
S'il ait ne terre ne florin,
Combien q'il soit de halt *parage*,
Trop porra faire long estage,
Ainçois q'amour luy soit enclin.
Om dist, 'Tant as tant vals, et
tant
Vous aime'; et c'est du meintenant
Entre les gens costume et us,
Si tu n'es riche et bien manant, 17260
Combien que soietz avenant
Du corps et riche des vertus,
Pour ce ne serras retenus;
Ainz uns vilains q'est mal estrus,
Q'est des richesces habondant,
Quant tu as meinz et il ad plus,
Il ert amez et tu refus;
J'en trai le siecle en mon garant.
Mais tiel contract q'est fait pour
gain
N'est mariage, ainz est bargain, 17270
Non pour le corps mais pour l'avoir:
Pres s'entrasseuront main au main,
Mais trop en est le cuer longtain
Pour bien amer du *franc* voloir;
Ainz pour l'amour de beal Manoir,
Ou pour *grunt* somme a rescevoir,
L'en *prent* plus tost pute ou vilain,
Quant om les voit richesce avoir,
Que celly qui l'en sciet du voir
Estre des bonnes mours tout plain.
Comme fol qui sa folie enprent 17281
Et fol l'achieve, ensi qui prent
Le mariage sanz amour:
Richesce om voit faillir sovent,
Mais bon amour certainement
De sa vertu ne falt nul jour;

Om puet bien estre conquerrouer
Par ses vertus de tout honour,
Mais tout l'avoir q'au siecle appent
Ne puet conquerre la menour 17290
Des vertus, mais de sa vigour
L'orr ad les cuers au temps present.
Q'ensi *prent* *femme*, plus *que* cire,
Quant est de la richesce sire,
L'amour se guaste en petite hure;
Car quant il ad ce qu'il desire,
Et sanz vertu le corps remire,
De la *personne* ne tient cure:
Ensi toutdis apres endure
La paine et la desaise dure 17300
Du mal, dont il ne trove mire;
Car vuille ou noun, la noet obscure
La *femme* clame sa droiture
De ce dont il ne puet souffire.
Meulx luy valdroit nul vou de faire
Que de vouer et nient *parfaire*,
Ly sages ce nous vait disant:
Q'est trop *prent* hardy de mesfaire,
Quant il sa soy en saintuaire
Donne a sa *femme*, et jure avant 17310
Pour bien amer tout son vivant;
Mais certes c'est un fals amant
Du corps donner et cuer retraire.
Mais tiel y ad, qui nepourquant
Vait plus richesce covoitant
Que la beauté de son viaire.
Droit Matrimoine ne s'asseine
Pour espouser le sac du leine,
Ne pour richesce plus ou meins:
Mais nepourquant, qui bien se meine,
Et est bien riche en son demeine, 17321
S'il soit auci des vertus pleins,
Tant valt il meulx, j'en suy certains;
Mais l'omme q'est du vice atteins,
Combien q'il ait sa coffre pleine
Et ses chastealx et ses gardeins,
Depuisq'il est en soy vileins,
Q'au tiel se *donne* est trop vileine.
Et nepourquant j'ay bien oi
Sovent les dames dire ensi, 17330

Q'avoir vuillont *par leur* haltesce
Un gentil *homme* a leur mari:
Mais certes endroit moy le di,
Ne say q'est celle gentilesce;
Mais d'une rien je me confesse,
Quant Eve estoit la prioesse
Du no lignage en terre yci,
N'y fuist alors q'ot de noblesce
Un plus *que* l'autre ou de richesce;
Ne sai comment gentil nasqui. 17340
Tous nous faisoit nature nestre,
Ensi le servant comme le mestre,
Dont *par* nature ce n'avient;
Ne du *parage* ce puet estre,
Car tous avoions un ancestre,
Par celle voie pas ne vient;
Et d'autre *part* bien me sovient
Que *par resoun* ce n'appartient
A la richesce q'est terrestre,
Q'est une chose vile et nient: 17350
A sercher plus avant covient
La gentilesce q'est celestre.
Nature en soy n'ad quoy dont fere
Un gentil *homme* ne desfere,
Ainz dieus qui les vertus envoie
Cil puet bien de sa grace attrere
Un *homme* de si bon affere,
Si vertuous, tanq'il en soit
Verrai gentil et a bon droit:
Mais quant a ce, sovent l'en voit, 17360
Des bonnes mours qui voet enquere,
Q'un *homme* povre les reçoit
Plus largement en son endroit
Que cil q'est seignour de la terre.
Mais sache dieus ja pour cela
Les dames ne se tienont la,
Le povre ont ainçois en desdeign:
Combien q'il vertuous esta,
Povrte le departira,
Q'il n'ose mettre avant la mein, 17370
Pour ce qu'il est du povre grein;
Mais cil q'est riche capitein
Tant vicious ja ne serra,
Qu'il n'ert amez ainçois demein:

17323 iensuy

17351 plusauant

17358 ensoit

17363 Pluslargement

Mais certes trop *perest* vilein
 L'amour q'ensi s'espousera.
 Nature, qui de sa mamelle
 Paist toute chose laide et belle,
 Nous donne *essample* bon et bell;
 Car soulement deinz la praielle 17380
 N'ad fait morell pour la morelle,
 Ainz la griselle pour morell,
 Et la morelle pour grisell,
 Et la liarde pour favell,
 Et le liard pour la favelle;
 Ensi sanz vice et sanz repell
 Voelt bien *que* quelque jovencell
 S'espouse a quelque jovencelle.
 Puisque des membres ressemblable
 Et du corage resonnable 17390
 Tous susmes fait, di lors pour quoy
 Ne susmes de reson menable,
 Ainz nous nous faisons dessemblable.
 Car de nature et de sa loy
 Chascune femme endroit de soy,
 Q'est bonne, est able et digne au
 Roy;
 Et chascun homme veritable,
 Combien q'il ait ou nient ou poy,
 Au quelque dame en droite foy
 Par ses vertus est mariable. 17400
 Mais halt orguil, qui point ne cure
 De la simplesce de nature,
 Desdeigne a garder l'observance
 De sa justice et sa mesure;
 Ainz quiert avoir par demesure
 Du vain honour ou la bobance,
 Ou du richesce l'abondance,
 Ou de son corps quiert la plesance
 Par foldelit; mais la droiture
 Du mariage est en balance, 17410
 Car les vertus n'ont de vaillance
 Plus *que* du chiffre la figure.
 Ne fait pas bien qui se marit
 Pour beauté soule ou pour delit,
 Car ce n'est pas la dieu plesance,
 Ainz il en tient molt grant despit:
 Car pour cela, je truis escrit,

17416 entient

Les sept barons de sa vengeance
 Faisoit tuer, *que* par souffrance f. 97
 De luy le deable en sa distance 17420
 L'un apres l'autre tous occit:
 Chascun par fole delitance
 Espousa Sarre en esperance
 D'acoler et baiser ou lit.
 Je truis escrit en le decré:
 'Vil est a l'omme marié,
 Et trop encontre loy divine,
 Qu'il du sotie et nyceté
 Soit de sa femme enamouré,
 Ensi comme de sa concubine': 17430
 Mais om doit bien par juste line,
 Sicomme la lettre nous diffine,
 Avoir sa femme abandonné
 Pour faire toute sa covine
 D'oneste voie et femeline,
 Nonpas comme pute acoustummé.
 Om doit sa femme bien cherir
 Pour leccheries eschuir,
 Nonpas pour leccherie faire:
 Car qui la *prent* par fol desir, 17440
 Grans mals en porront avenir,
 Assetz avons de l'essamplaire.
 Mais cil q'ad bonne et debonnaire,
 Molt la doit bien cherir et plaire;
 Car ce n'est pas le desplaisir
 De dieu, ainz sur tout autre affaire
 Molt est a l'omme necessaire
 La bonne, qui la puet tenir.
 Diverse sort diverse gent,
 Solonc q'ils bien ou mal regent 17450
 Se sont envers leur creatour.
 Il leur envoie diversement
 Ou de bien estre ou malement;
 La bonne femme au bienfesour
 Donne en merit de son labour,
 Du male femme et la douleur
 Par sort verraie et jugement
 Eschiet sur l'omme pecheour;
 Dont est en peine nuyt et jour,
 Mais l'autre vit joyusement. 17460

Grant bien du bonne femme vient:
 17441 enporront

Essample avons, bien me sovient,
 Dedeinz la bible des plusours:
 Par bien *que* de Judith avient
 Jerusalem au pees revient;
 Hester auci fist beals socours,
 Quant Assuerus tint ses courtz,
 A Mardochieu des grans dolours
 Queux Naman l'ot basti pour nient;
 Molt enporta Susanne honours, 17470
 Quant dieus de ses accusatours
 Par son miracle la retient.
 Abigail la bonne auci,
 Au quelle Nabal fuist mari,
 Au Roy David appesa l'ire,
 Q'estoit vers son baron marri,
 Et tiele grace deservi
 Dont puis fuist dame de l'empire;
 Et qui du Jahel voldra lire,
 La femme Abner, porra bien dire 17480
 Q'il ot molt belle grace en luy,
 Quant Cisaré faisoit occire,
 Qui d'Israel par son martire
 Les gentz volt avoir malbailly.
 Dedeinz la bible escript y a
 Auci du bonne Delbora,
 De sa bounté, de sa vertu;
 Jabins le Roy de Canana,
 Cil q'Israel lors guerroia
 Et la volt avoir confondu, 17490
 Fuist mesmes en la fin vencu.
 C'estoit la volenté de dieu,
 Q'as femmes la vertu donna;
 Par tout le monde en chascun lieu,
 U leur histoire serra lieu,
 Des femmes om se loera.
 La bonne fait bien a loer,
 Et bon est du bonne espouser
 A l'omme qui voet femme avoir:
 Ly sages t'en fait doctriner, 17500
 Si bonne femme puiss trouver,
 Ne la laissez pour nul avoir;
 Ainçois la dois sanz decevoir
 Amer, cherir sanz remouvoir,
 Car tout le bien q'est seculier
 Vers sa bonté ne puet valoir':

Qui tiele laist a nonchaloir
 Je ne l'en sai pas excuser.
 Molt doit joyr en conscience
 Qui par divine providence 17510
 Au tiele espouse est destiné;
 Et molt la doit en reverence
 Traiter, sanz point du violence,
 D'orguil ou d'autre malvoisté:
 Comme sa compaignie et bien amée
 Cherir la doit en amisté;
 Car un corps sont, comme nous ensense
 Du sainte eglise le decré,
 Dont bien doivent en unité
 Avoir un cuer sanz difference. 17520
 Sicomme le livre nous devise,
 De la costée d'Adam fuist prise
 La femme, quant dieus la fourmoit;
 Non de la teste en halt assisse,
 Car dieus ne volt par tiele guise
 Que femme pardessus serroit;
 Auci du pié fourmé n'estoit,
 Car dieus ne volt par tiel endroit
 Que l'en sa femme trop despise:
 Mais la costée my lieu tenoit, 17530
 En signe *que* dieus les voloit
 Estre compains du sainte eglise.
 Et nepourquant l'original
 Pecché dame Eve estoit causal,
 Dont dieus voet femme estre soubgite
 A l'omme en loy judicial,
 Issint q'il serra principal
 Et compaignoun; dont grant merite,
 Puisque la femme est meinz parfite,
 Om puet avoir, s'il se delite 17540
 En governance bien loyal;
 Mais jammais celle loy fuist dite,
 Que l'omme ait femme trop despise
 En l'ordre matrimonial.
 Qui sagement se voet tenir
 Legierement ne doit hair
 Sa femme, car qui la guerroie
 Ne s'esjoyt au departir,
 Car a soy mesmes sanz partir
 Prent guerre sanz repos ne joye. 17550
 Si m'est avis q'il trop foloie

Quant ce q'il par si bonne voie
 Achata tant a son plesir,
 Le quiert apres hoster envoie :
 Quant homme ad paié sa monoie,
 Quoy valt ce lors a repentir ?
 Haïr ne doit om sa compaigne,
 La quelle falt qu'il acompaigne,
 Ne trop amer la doit om mye ;
 Car trop amer est chose vaine, 17560
 Si fait venir la nyce paine,
 Dont cuers deschiet en jalousie.
 C'est une ardante maladie,
 Tout plain du sote fantasie
 Sur cause que n'est pas certaine :
 Cil q'est espris de la folie
 Resemble au fol q'en ceste vie
 S'occit de son coutell demaine.
 Fols est qui jalousie pense,
 Car ove son propre cuer se tence, 17570
 Dont mesmes souffre le peiour ;
 Et molt sovent par sa defense
 Fait que sa femme contrepense
 Ce que devant pensa nul jour,
 Du rigolage et fol amour :
 Ensi le fol de sa folour
 Donne a sa femme l'evidence
 Dont elle essaie cell erreur,
 Le quel apres pour nul clamour
 Ne sciet laisser quant le commence. 17580
 Et nepourquant sanz jalouser
 Om porra bien amonester
 Sa femme en cause resonnable,
 Siq'elle a son honour garder
 Le siecle vuille regarder,
 Et laisser que voit descordable
 A son estat ; et lors si able
 La trove, preste et entendable,
 Charir la doit et molt amer ;
 Et autrement s'elle est coupable, 17590
 Comme cil q'est sire et connestable
 La doit punir et chastier.
 Roy Salomon, q'estoit bien sage,
 Dist que la femme en mariage
 Ne doit avoir la seignourie

17570 le

17626 ensoit

17632 endonna

De son mari ne le menage ;
 Car s'ensi soit, de son oultrage
 Avient mainte malencolie.
 Qui femme ad pour ce la chastie,
 Tanq'en tous pointz la souple et plie,
 Pour peas avoir en avantage ; 17601
 Car dieus ne fist les femmes mie
 Pour guier, ainz voet q'om les guie
 Par sobre et juste governage.
 Femme a son mari doit honour,
 Sicomme soubgite a son seignour,
 Sanz luy despire ou laidenger :
 Je trai la bible a mon auctour
 Du Roy David, qui pour l'amour
 De l'arche dieu se fist danccer, 17610
 Trecher, baler et caroler f. 98
 Entre les autres communer ;
 Mais pour ce que de tiel atour
 Michol sa femme reprover
 L'en fist, dieus pour soy revenger
 La fist baraigne puis tout jour.
 Mestre Aristotle et danz Catoun
 Et ly Romeins, Senec par noun,
 Chascuns endroit de sa clergie
 Escript des femmes sa leçon : 17620
 Ne sai si le dirray ou noun ;
 Et nepourquant l'umaine vie
 Falt enfoumer d'essamplerie,
 Et pour cela vuil en partie
 Moustrer la declaracioun,
 Si que la gent en soit guarnie,
 Nonpas pour autre vilainie,
 J'en fai ma protestacioun.
 Mestre Aristole dist primer,
 Que femme ou mal conseil donner 17630
 Veint homme : et au commencement
 Dame Eve en donna l'essampler ;
 Et puis apres, qui voet sercher
 Trover porra comme faitement
 Achab par le conseillement
 Du femme tricherousement
 Faisoit le bon Naboth tuer :
 Pour ce le livre nous aprent

Que l'en ne doit legierement
 A leur conseil trop encliner. 17640
 Catoun m'aprent par autre voie
 Que je ma femme aici ne croie
 Des pleintes dont me fait eschis ;
 Car si du legier la creeroie,
 Sovent pour nient me medlerioie
 Ove mes servantz et mes soubgitz.
 L'en voit du femme plus haïz,
 Que son mary plus tient amis ;
 Ne di pas q'ensi fait la moie,
 Et nepourquant a mon avis, 17650
 Si du Catoun ne soie apris
 Quant a ce point, fol en serroie.
 Ce dist Senec, que sanz trespas
 Tout ce que femme ne sciet pas,
 Ce sciet celer. Et par semblance
 Di si tu balsme verseras
 El cribre, o si tu quideras
 Q'il doit tenir : noun, sanz doubtance.
 Nient plus, je t'en fais assurance,
 Les femmes ont en retenance 17660
 Le conseil quel tu leur dirras :
 Si voels sercher sanz variance
 Le papir de leur remembrance,
 Escript au vent le troveras.
 Par ce q'ai dit om puet aprendre
 Et aviser et garde prendre
 De la doctrine au sage gent :
 Car lors ne doit om pas mesprendre,
 Dont par resoun soit a reprendre, 17670
 En reule et en gouvernement
 Devers sa femme aucunement.
 La femme aici qui tielement
 Voet bonne aprise en soy comprendre
 Pour vivre debonnairement,
 Lors porra bien et seurement
 L'estat du mariage enprendre.
 Si je les fols maritz desprise,
 N'est pas pour ce que je ne prise
 Les bouns, et si je blame aici
 Des males femmes la mesprise, 17680
 Ce n'est chalenge ne reprise
 As bounes, ainz chascuns par luy

17652 enserroie

Enporte ce q'ad deservy.
 Mais tous savons q'il est ensy,
 La femme q'est du bonne aprise
 Est don de dieu, dont son mary
 Vit en quiete et joye yci
 Selonc la loy du sainte eglise.
 L'omme ert loyal en governance,
 Et femme aici de sa souffrance 17690
 Ert vergoignouse et debonnaire
 En fait, en dit, en contenance,
 Sanz faire ascune displaisance
 A son mary ; ainz pour luy plaire
 Doit, quant voit temps, souffrir et taire,
 Et quant voit temps, parler et faire,
 Sicomme meulx sciet, a la plesance
 De son mary sanz nul contraire :
 Car femme q'est de tiel affaire
 Tient d'espousailles l'observance. 17700
 Je truis dedeinz la bible ensi,
 Que Raguel et Anne aici,
 Leur file Sarre en mariage
 Quant prist Thobie a son mary,
 Des cynk pointz la firont garny,
 Des queux elle devoit estre sage :
 Primer q'elle a son voisinage
 Soit amiable sanz oultrage,
 Dont l'en parole bien de luy,
 Et d'autre part sanz cuer volage 17710
 Doit son baron du bon corage
 Avoir sur tous le plus cheri :
 Auci que femme n'ert oedive,
 Ainz tout ensi comme l'omme estrive
 Et quiert es champs sa garison,
 Et labourt, siq'il ait dont vive ;
 Ensi la femme ert ententive
 Pour saulz garder deinz sa mesoun
 Sanz guast et sanz destruccioun ;
 Car ja n'y puet avoir fuison 17720
 Le bien, u femme ert excessive :
 Parmy le cribre porroit on
 Verser sanz nulle aresteison
 Trestoute l'eaue de la rive.
 Soubz main du femme gasteresce
 Ne puet durer, ainçois descesce
 17712 pluscheri

Le bien *que* son baron adquiert ;
 Mais celle q'est la bonne hostesse
 Molt bien fait garder la richesse,
 Et auci, qant le temps requiert, 17730
 Descendre ensi comme meulx affiert :
 En son hostel molt bien appiert
 Et sa mesure et sa largesce ;
 Ja soubz sa main nul bien depiert,
 Car son grant sens si pres le quiert,
 Qe riens ne laist par oedivesce.

Au Sarre auci ly dui parent
 Donneront pour enseignement,
 Qe sa famille bien survoie,
 Et les governe tielement, 17740
 Qe chascuns bien et duement
 Le fait de son mestier emploie :
 Car femme qui par tiele voie
 Guart son estat et ne desvoie
 Envers son dieu n'envers la gent,
 Et lors, si l'omme ne foloie,
 Molt porront demener grant joye
 Et l'un et l'autre ensemblement.

Ore dirra de la quarte file de
 Chastité, quelle ad nonn Conti-
 nence, contre le vice de Incest.

Encontre Incest q'est plain d'offense
 La belle file Contenance, 17750
 Naiscant du fine Chasteté,
 Guerroie, et fait si bon defense,
 Qe corps et cuer et conscience
 Maintient en pure neteté,
 Que ja ne serront avilé
 Par les ordures du peccché,
 Dont Leccherie nous ensense :
 Seconde apres Virginité
 C'est Contenance en son degré,
 Pour servir en la dieu presence. 17760

Mais Contenance nepourquant
 En la virgine est plus vaillant ;
 De ce ne dirray plus icy,
 Car des virgines pardevant
 J'ay dit : pour ce le remenant
 Dirray de ceste cause ensi,
 Qe chascun homme et femme auci

17735 sipres

Combien q'ils soient desflouri,
 S'ils puis en soient repentant
 Sanz estre jammais resorti, 17770
 Dieus mesmes les tient a guari,
 Car Contenance est leur garant.

Quant peccché l'omme avra laissé,
 Ainçois *que* l'omme laist peccché,
 Cist homme n'est pas continent ;
 Mais ja n'ait homme tant peccché,
 S'il laist, tant comme ad poesté
 De plus pecccher, et se repent,
 Et puis toutdis vit chastement,
 Tous ses peccchés du precedent 17780
 Luy sont devant dieu pardonné,
 Et combien q'il vient tardement,
 Du Contenance nequedent
 Apres sa mort serra loé.

Le saint prophete Ezechiel,
 Qui la doctrine avoit du ciel,
 Dist, qant mal homme en bien s'es-
 table

Et se convertit en droitieriel,
 Trestout le mal nonndroitieriel,
 Dont ad esté devant coupable, 17790
 Dieus, qui sur tous est merchieable,
 Pardonne, et le prent acceptable
 A demorer en son hostiel :
 Pour ce je sui tresbien creable
 Qe contenance est molt vaillable,
 Qant om par temps voet estre tiel.

Du Contenance le bienfait
 Ascuns sanz vou du gré le fait,
 Ascuns par vou le fait ensi
 D'ascun saint ordre q'il attrait. f. 99
 Cil ad del jeu le meillour trait 17801
 Et par reson plus ert cheri ;
 Droitz est q'il plus soit remeri
 Qe l'arbre ove tout le fruit auci
 Ensemble donne sanz retrait,
 Qe cil qui donne soul par luy
 Le fruit ; et nepourquant vous dy
 Qe l'un et l'autre est molt bien fait.

L'evesque vait amonestant
 Au prestre en luy saintefiant, 17810

17769 ensoient

S'il chastes pardevant ce temps
 N'avera esté, de lors avant
 Soit continent, et l'autre atant
 S'oblige et fait ses serementz.
 Sollempnes sont les sacrementz
 De tiel avou, dont continens
 Serra depuis tout son vivant :
 Ne sai s'il puis en ait dolens,
 Mais tant sai bien, *que* je ne mens
 De ce que vous ay dit devant. 17820

Auci toute Religioun
 Du frere, moigne, et de canoun,
 Et du nonneine, a dieu servir
 En faisant leur profession,
 De vou solempne et d'autre nonn
 Sont obligez a contenir :
 La dame auci qui voet tenir
 Sa chasteté, dont revestir
 Se fait d'anel par beneicoyn
 D'evesque, apres pour nul desir 17830
 Se porra lors descontenir,
 Si trop ne passe sa reson.

Des femmes tiele y ad esté,
 Q'ad fait le vou du chasteté
 Nonpas pour dieu, mais parensi
 Q'elle ert du siecle plus loé,
 Ou pour sotie et nyceté
 D'amour q'elle ot a son amy :
 Mais l'un ne l'autre, je vous dy,
 Dieus endroit soy ne tient cheri, 17840
 Et nientmeinz elle est obligé
 Tenir le vou q'elle ad basti ;
 Dont le guerdoun pent a celluy
 Pour qui son fait ad plus voué.

Mais tieles dames vait blamant
 L'apostre, qant s'en vont vagant
 Par les hosteals de la Cité ;
 Car chambre au dame est avenant
 En dieu priant ou en faisant
 Labour qui soit d'onesteté : 17850
 Au chapellain q'est consecré
 Le moustier est approprié,
 U q'il a dieu ert entendant :
 A moigne et nonne en leur degré

17824 Enfaissant

Leur cloistre serra fermeté
 En continence a leur vivant.
 Ascuns y sont qui d'autre enprise
 Ont vou du continence prise
 Secret parentre dieu et soy :
 C'est une chose que dieus prise, 17860
 Qant om le fait du tiele aprise
 Sanz veine gloire et sanz buffoy ;
 Essample avons du viele loy,
 Le vou Marie fuist en coy,
 U toute grace fuist comprise :
 Mais qui *que* donne a dieu sa foy,
 Combien que ce soit en recoy,
 Il est tenuz a la reprise.

Mais quant du bonne cause avient
 Et *que* la femme bien maintient 17870
 Le vou du sainte Contenance,
 Lors en bon gré dieus le retient.
 Ce dist David, bien me sovient,
 ' Vouetz et rendetz sanz offense
 Le down du vostre conscience :
 Car poy decert la providence,
 Qui molt promet et donne nient.
 Chascuns endroit de soy le pense ;
 Quoy valt a semer la semence
 Du quelle ascun profit ne vient ? 17880

Qe Contenance est belle chose
 La turtre sanz en faire glose
 Nous monstre bien de sa nature ;
 Car tantost *que* la mort depose
 Son madle, soule se dispose,
 Qe jammais jour apres celle hure
 S'assiet sur flour ne sur verdure ;
 Ne jammais puis par envoisure
 Autre compain reprendre n'ose ;
 Ainz puis tant comme sa vie dure, 17890
 Sanz mariage et sanz luxure
 En Contenance se repose.

Mais cestes vieves jolyettes,
 Vestant le vert ove les flourettes
 Des perles et d'enbreuderie,
 Pour les nouvelles amourettes
 Attraire vers leur camerettes,
 A turtre ne ressemblont mye :

17846 servont

17882 enfaire

Mais sur trestoutes je desfie
 La viele trote q'est jolie, 17900
 Qant secches ad les mamelletes ;
 Il m'est avis, quoy q'autre en die,
 Q'ad tiele espouse en compaignie,
 Fols est s'il paie a luy ses dettes.
 Mais quel valt plus, ou mariage
 Ou continence en son estage,
 Saint Augustin fait demander ;
 Si dist *que* l'une le corsage
 Engrosse et l'autre le corage :
 Mais meulx, ce dist, valt engrosser
 Le cuer de l'omme en dieu amer, 17911
 Qe soul le ventre faire enfler ;
 Car l'une enporte l'avantage
 Que ja ne doit enbaraigner,
 Mais l'autre n'en porra durer,
 Qe tout ne soit baraigne en age.
 Tout pleine l'une du tristesse
 Lez fils enporte en sa destresse,
 Et sanz peché ne les conçoit ;
 Mais l'autre plaine de leesce, 17920
 Sanz estre aucunement oppresse,
 Les fils du joye porter doit :
 L'une est *par* servage en destroit,
 Et l'autre est *franche* en son endroit ;
 Labour du siecle l'une blesce,
 Et l'autre, quelle part *que* soit,
 En grant quiete de son droit
 Serra, *que* nul dolour l'adesce.
 L'une est la soule espouse humeine,
 L'autre est l'amie dieu souleine ; 17930
 L'une est en plour, l'autre est en ris ;
 L'une est corrupte et l'autre seine ;
 L'une est de l'omme grosse et pleine,
 L'autre est de dieu enceinte au pitz ;
 L'une fait empler de ses fitz
Parmy le monde les paiis
 Du multitude q'est mondeine,
 Et l'autre *ovesque* dieu toutdis
 Fait empler le saint paradis
 Des *bonnes* almes q'elle meine. 17940
 Sicomme la rose fresche et fine
 Valt plus *que* la poignante espine

17902 endie

Dont elle naist, ensi serra
 Qe continence la divine,
 Selonc que Jerom le diffine,
 Sur mariage plus valdra.
 L'apostre as tous ce *commanda*,
 ' Qui contenir ne se pourra,
 Lors *preigne* espouse a sa covine.'
 Par celle aprise bien moustra 17950
 Qu'il continence en soy pris
 De la plus halte discipline.
 Saint Jerom dist la difference
 Du mariage et continence ;
 Qe l'une valt de l'autre plus,
 Sicomme plus valt qui sanz offense
 En netteté du conscience
Parfait les *oeveres* des vertus,
 De luy qui s'est soul abstenus
 Du peché sanz fait de surplus. 17960
 Savoir poetz par l'evidence
 Au quelle part il ad conclus ;
 Fait ove vertu vait au dessus,
 N'est resonn que le contretence.

Ore dirra de la quinte file de
 Chasteté, quelle ad noun Aspre
 vie, contre le vice de Foldelit.

La quinte file est Aspre vie,
 Q'au fine force Leccherie
 Abat, et Chasteté supporte :
 La char si reddement chastie,
 Qe ja nul jour de sa partie
 Ne laist entrer dedeinz sa porte 17970
 Le Foldelit q'au corps resorte ;
 Ains, qanque Leccherie enhorte,
 Par sa vertu trestout desfie :
 Car du penance q'elle porte
 Le fieu que Leccherie apporte
 Extaingt, q'ardoir ne porra mie.

C'est la vertu qui se decline
 Loign du celer et du cuisine
 U Gloutenie est vitailer,
 Et si retient de sa covine 17980
 Pour luy servir Soif et Famine.
 Cil duy luy serront officier
 Et au disner et au souper,

17952 plushalte

Par queux la char fait enmaigrer
 Et les costés et la peitrine,
 Sique Luxure en son mestier
 N'y truiست surfait pour alumer,
 Dont chasteté soit en ruine.
 Qant Daniel enfant fuist pris f. 100
 Ove tout deux autrez ses amys 17990
 En Babiloigne, nepourqant
 De les delices du paiis
 Ne volt gouter *par* nul devis,
 Ne boire vin pour rien vivant :
 Avint *que* puis le dit enfant
 Ove ses compaigns trestout ardaunt
 Furont en la fornaise mis,
 Mais dieus *lour* fist si bell garant,
 Q'en my la flamme vont chantant,
 Q'ils ne sentoient mal ne pis. 18000
 Qe chasteté n'est accordant
 As grans delices, ainz par tant
 S'en falt deinz brieve acustumance,
 Saint Bernard le vait tesmoignant,
 Qe ja ne serront accordant
 L'une avec l'autre en observance :
 Car l'une acroist la vile pance
 Du Foldelit *par* l'abondance
 De sa delice, et l'autre avant
 Entolt du corps la sustenance 18010
 Pour faire a l'alme *pourvoiance* ;
 Poy cure tout le remenant.
 L'en dist ensi communement,
 ' Retrai le fieu bien sagement
 Et la fumée exteindras ' :
 Ensi je di que tielement
 Retrai ce dont la char esprent
 De les delices, et chalt pas
 Exteindre foldelit porras ;
 Car courser megre ne salt pas, 18020
 Ne si tost male tecche enprent
 Comme fait cil q'est bien gross et
 crass :
 Pour ce, si tu chastes serras,
 Retien bien cest essablement.
 Du saint Ambroise c'est le dit,
 Qe d'omme jun l'escoupe occit

18028 plusfort

- Le vif serpent de sa nature :
 A molt plus fort le jun *parfit*
 Le viel serpent, cel esprit
 Qui nous fist faire forsfaiture, 18030
 Mettra tout a desconfiture
 De sa vertu, q'est chaste et pure ;
 Sique la char par foldelit
 Corrupte n'ert de celle ardure
 Que vient de gule et de luxure,
 Ainz en serra du peché quit.
 C'est la vertu qui petit prise
 Suf oreiller, mole chemise,
 Cote ou mantell du fine leine,
 Ainz ad vestu la haire grise, 18040
 Poignante et aspre, en tiele guise
 Que son charnel delit restreigne,
 Et de bien vivre se constreigne :
 Mais si sa robe q'est forceine
 Au corps soit belle et bien assise,
 Pour eschuir la gloire veine
 La haire que luy est procheine
 Doit garder l'alme en sa franchise.
 C'est la vertu qui n'ad plesir
 Sur mole couche de gisir, 18050
 Ne quiert avoir si tendre lit,
 Dont porra longement dormir
 Et sa tresfrele char norir,
 Pour l'aqueinter du foldelit ;
 Ainz se contient d'un autre plit,
 Sur l'aire ou sur la paille gist,
 Dont tout esquasse le desir
 A penser contre l'esprit ;
 Si tient le corps en grant despit,
 Pour l'alme faire a dieu cherir. 18060
 Vigile, q'est la dieu treschiere,
 Est d'Aspre vie chamberere,
 Dont Sompnolence est forsbanic,
 Q'au Foldelit est *coustumere* ;
 Vigile la deboute arere,
 Qant volt entrer de sa partie :
 Vigile auci q'est d'aspre vie
 Oedive ne doit estre mie,
 Qe Foldelit ne la surquiere ;
 Ainz Contemplacioun la guie, 18070

18036 enserra

Qui la flaielle et la chastie
Ove triste lerne et ove priere.
Les cink sens naturel humein
Sont semblables au polein,
Q'en my le bois s'en court salvage
Tout au plesir sanz selle ou frein :
Mais s'Aspre vie en soit gardein,
Il les refreine a son menage,
Et jusq'a tant q'en son servage
Les puet dancier du bon corage, 18080
Retrait leur la provende et fein ;
Siq'il leur hoste tout le rage,
Si sobrement, *que* sanz oultrage
Ils les puet mener de sa mein.
Iceste file a sa mesure
Est bien armé, dont molt s'assure,
Des deux armures, salvement
Qui valont contre la pointure
Du Foldelit et de Luxure :
Dont le primer adoubement 18090
C'est d'umble cuer oir sovent
De dieu sermon le prechement,
Q'om dist de la seinte escripture ;
Et ce *que* par l'oreille entent
Parface bien et duement ;
Lors est armé de l'une armure.
Dieus son sermon fist ressembler
A l'omme qui voloit semer
Ses champs, dont *part* de la semence
Dessus la roche fist ruer, 18100
U q'il ne pot enraciner :
Et *part* aici par negligence
Chaoit enmy la voie extense ;
L'oiseil del air sanz nul defense
Cela venoient devorer :
Et *part* chaoit entre l'offense
Des ronces, dont la violence
Fist qu'il n'en pot fructefier.
Del dieu sermon atant vous di,
Sicomme du grein qui s'espandi 18110
Sur roche ; car *par* tiel degré
Plusours le sermon ont ol
Et par l'oraille recuilli,
Mais deinz le cuer n'est pas entré ;

18077 ensoit

18115 enad

18154 enfait

U tant en ad de dureté
Q'il ne poet estre enraciné,
Et sanz racine n'est flouri,
Et sanz flour n'est le fruit porté,
Ainz, *comme* sur perre estoit semé,
Sanz bon humour est ensecchi. 1812
Mais l'autre grein, q'enmy la voie
De les oiseals, come vous contoie,
Fuiست mis a dissipation,
C'est qant le deble agaite et proie
Un cristien qui se supploie
D'oïr la predicacion ;
Car lors *par* sa temptacion
L'en tolt la meditacion
Q'ascun profit n'en porte envoie ;
Ainz tourne a sa dampnacion 18130
Q'est dit pour sa salvacion,
Q'il bien oit et mal l'emploie.
Du tierce grain q'ert espandu
Et fuist des ronces confondu,
Le sermon dieu ce signifie :
Qant cristiens l'ad entendu,
Mais ainz q'en oeuvre soit parceru,
Les ronces, dont le siecle allie,
C'est Covoitise ovesque Envie
Ove Foldelit et Leccherie, 18140
Le cuer si fort ont detenu
Qu'il plus avant ne fructefie :
Ces trois semences dieus desfie,
Mais a la quarte il s'est tenu.
Du quarte grain il avoient
Q'en bonne terre le semoit :
Dont prist racine ove la crescance
Q'a cent foitz plus multiplioit.
Ce nous pourporte en son endroit
Del sermon dieu signefiance : 18150
C'est qant *prodhomme* en sa penance
Conçoit du sermon l'entendance
En cuer devolt, *comme* faire doit,
Et puis en fait la circumstance ;
Lors *par* droite fructefiance
Plus a cent foitz loer resçoit.
Grant bien du bon sermon avient
A l'omme qui bien le retient ;

La dieu parole ad grant vigour,
Et grant vertu deinz soy contient :
Car *par* parole soul du nient 18161
Dieus ciel et terre ove leur atour
Tout les crea *comme* creatour ;
Auci nous veons chascun jour
La dieu parole, q'en nous tient,
A no creance sanz erreur
Le corps du *nostre* salveour
Fait *que* du pain en char devient.
As ses disciples qant precha,
Dieus sa parole commenda 18170
De grant vertu, ce m'est avis ;
Car il leur dist *que* par cela
Q'ils son sermon oïront la,
Trestout les avoit esclarciz
Et nettoïé leur espiritz.
Cil qui remembre de ces ditz,
Et bien les causes notera,
Molt doit avoir sermon en pris ;
Car tant *comme* l'omme est meulx appris,
De tant *par* resoun meulx valdra. 18180
Sovent par bon conseil d'amy f. 101
Homme ad vencu son anemy ;
Pour ce bon est conseil avoir
Du saint sermon, *comme* je vous di ;
Car champioun qui s'arme ensi
Meulx en doit faire son devoir.
Une autre armure y a du voir,
Du quoy l'en puet aici valoir
Que Foldelit soit anienty ;
C'est *par* sovent en bon espoir 18190
La passion rementevoir
Que Jhesu Crist pour nous souffri.
Qui porte tiele conuscance,
Le deble ove toute s'alliance
Legierement puet desconfire,
Et garder l'alme en esperance
Du joye avoir sanz fole errance,
Ou de mesfaire ou de mesdire :
Dont cil qui voet estre bon mire
Del alme, falt q'il se remire, 18200
Au fin q'il ait en remembrance
La passioin du *nostre* sire,

Sicomme l'en puet el bible lire
De la figure en resemblance.
Qant Moïses mesna la gent
El grant desert del orient,
D'arreïn fist un serpent forger
Et l'alleva bien haltement,
Si q'om le vist apertement,
Et devant tous le fist porter : 18210
Car soulement pour luy mirer
Fist les pointures resaner,
Qant du venym ly vif serpent
Firont les gentz mordre et plaier :
C'estoit figure et essampler
Portant grant signefiement.
Comme Moïses out eshaulcé
Le serpent q'estoit figuré
Devant le poeple qu'il menoit,
De qui regard furent sané, 18220
Tout autreçy fuist allévé
Jhesus, qant il en croix pendoit :
Dont cil qui point ou mors serroit
Du viel serpent, et penseroit
De luy q'estoit crucifié,
Sa guarison avoir porroit,
Et tous les mails assuageroit,
Des queux avoit le cuer enflé.
Trestoute l'eaue fuist amere
D'estanc, de pus et de rivere 18230
Q'el grant desert d'Egipte estoit ;
Mais Moïses par sa vergiere
Fist tant *que* l'eaue ert douce et cliere,
Dont homme et beste assetz bevoit.
La verge en quelle ce faisoit
La croix verrière figuroit,
Que l'amertume et la misere
Nous tolt, et venque de son droit
Le deble, et u *que* l'omme soit,
Saulf le maintient soubz sa banere.
Qui ceste armure voet comprendre
Et d'Aspre vie bien aprendre 18242
De vivre solonc la vertu,
Du Foldelit se puet defendre ;
Car par resoun doit bien entendre,
Meulx valt penance aspre et agu,

18186 endoit

Dont l'alme soit bien defendu,
 Et estre en ease ovesque dieu,
 Qe de son corps tiele ease prendre
 Dont soit par Foldelit vencu, 18250
 Et comme fals recreant rendu
 Au deable, qui le quiert surprandre.
 Qui list les vies des saintz pieres,
 Oir y puet maintes manieres
 De la nature d'Aspre vie :
 Les uns souleins en les rocheres,
 Les uns en cloistre ove leur confreres,
 Chascun fist bien de sa partie ;
 Cil plour, cist preche, cil dieu prie,
 Cist june et veille, et cil chastie 18260
 Son corps du froid et des misereres,
 Cist laist sa terre et manantie,
 Cil laist sa femme et progenie,
 Eiant sur tout leur almes cheres.
 Par Aspre vie tout ce firont,
 Du Foldelit dont desconfiront
 Les griefs assaltz et les pointures,
 Q'au frele char ne consentiront :
 Ainz qanq'al alme bon sentiront
 Enpristront, et les aventures 18270
 Qant la fortune envoia dures
 Des corporieles impressures,
 Sanz murmur du bon gre suffiront,
 Pour plus avoir les almes pures :
 Houstant trestoutes autres cures
 En corps tant asprement vesquiront.
 C'est la vertu q'est tout divine,
 Et est semblable en sa covine
 Au forte haie du gardin,
 Q'om fait de la poignante espine, 18280
 Par quoy n'y puet entrer vermine
 Ou male beste en nul engin ;
 Ainz est tout saul et enterin,
 Fuil, herbe, fruit, grein et pepin,
 De la morsure serpentine ;
 Sique ly sires, en la fin
 Qant vient, y trouve sain et fin
 Le bien, dont ad sa joye fine.
 La sainte vertu d'Aspre vie
 Est celle quelle en prophecie 18290
 David en son psalter loa,

Disant, par sainte gaignerie
 En doel et triste lermerie
 C'est celle qui ses champs sema,
 Dont qant August apres vendra,
 En grant leesce siera
 Les biens dont s'alme glorifie.
 Si m'est avis sages serra
 Q'ensi se cultefiera,
 Dont si grant bien luy multeplicie. 18300
 En les viels gestes de romeins
 Valeire dist, des citezeins
 Ot un jofne homme a noun Phirin,
 Q'estoit de si grant bealté pleins
 Q'en luy amer furent constreins
 Pres toutes femmes du voisin :
 Mais pour destruire leur engin,
 Siq'au pecché ne soit enclin,
 Coupa ses membres de ses meins,
 Dont Foldelit mist en declin. 18310
 Vei la le fait du Sarasin
 Pour nostre essample plus ne meinz.
 Cil fuist paien q'ensi fesoit,
 Qui Leccherie despisoit
 Tout proprement de sa vertu
 Pour les ordures qu'il veoit
 El vil pecché, dont abhosmoit.
 He, cristien, di, que fais tu ?
 Qant sainte eglise t'ad estru,
 Bien duisset pour l'amour de dieu 18320
 Ta vile char mettre en destroit,
 Dont Foldelit soit abatu :
 Car molt valt peine dont salu
 Celle alme sanz fin prendre doit.
 Ore dirra la descripcioun et la
 commendacion de la vertu de
 Chasteté par especial.
 Des toutes vertus plus privé
 Al alme est dame Chasteté,
 Come celle q'est sa chambreleine ;
 Q'ensi la tiffe et fait parée,
 Dont plus mynote et ascemé 18330
 Appiert de fine bealté pleine,
 Sur toutes autres souveraine :
 Par quoy, sicomme le livre enseinc,
 Dieus est de luy enamouré,

Si prist de luy sa char humeine,
 La quelle au ciel comme son demeine
 A dieu le piere ad presenté.
 O Chasteté, si je bien voie,
 Toutes vertus te donnent voie
 Comme a leur dame, et plus avant
 Trestous les vices loigns envoie 18340
 Toy fuiont, car dieus te convoie
 Et parderere et pardevant :
 Plus que la pere daiamant
 Attrait le ferr, es attraient
 La grace dont vient toute joye.
 Toutes vertus par ressemblant
 Ne sont que lune, et tu luisant
 Es comme solail, qant s'esbanoie.
 O Chasteté, ne m'en doi tere,
 Compaigne as angres es sur terre, 18350
 Mais en le ciel plus noble aici ;
 Dont nulle part te falt a querre
 Meilleur de toy, qui tu requerre
 Averas mestier, si noun celly
 Q'est sur tous autres ton amy ;
 C'est dieus ly touthpuissant, par qui
 Ta volenté par tout puiss faire :
 Nous autres tous crions mercy,
 Mais tu puiss dire grant mercy
 A dieu, qui te ne laist mesfaire. 18360
 O Chasteté, par tiele assisse
 Bonté verraie t'est assisse,
 Qe creatour et creature
 Chascuns endroit de soy te prise,
 Fors soul le deable, a qui tu prise
 As guerre, et par ta confiture
 Tout l'as mis a desconfiture :
 C'estoit qant dieus ove ta nature
 Se volt meller, dont fuist comprise
 La deité soubz ta porture. f. 102
 Quoy dirray plus mais dieus t'onure ?
 Car autre a ce n'est qui suffise. 18372
 Ore dirra compendieusement la
 Recapitulacioun de toute la ma-
 tiere precedent.
 Ore est a trere en remembrance

18339 plusauant

18386 qenfaist

18415 plusfort

Comme je par ordre en la romance
 Vous ai du point en point conté
 Des vices toute la faisance ;
 Primement de la nescance
 Du Pecché, dont en propreté
 Mort vint, et puis par leur degré
 Comment les sept sont engendré,
 Les quelles par droite alliance 18381
 Au Siecle furent marié,
 Comme puis se sont multeplié,
 Tout vous ai dit sanz variance.
 Et puis apres vous dis aici
 De l'omme q'en fuist malbailli,
 Dont l'Alme a dieu se compleigna
 Et comme puis dieus de sa mercy
 Pour la pité q'il ot de luy
 Les sept vertus lors maria 18390
 A Resoun, qui les espousa,
 Et puis de ce qu'il engendra,
 De l'un et l'autre avetz oy.
 Mais ore apres me semblera
 Bon est que l'en aguardera
 L'estat de nous qui susmes cy.
 Ore au final sont engendrez
 Les vices, qui sont malurez,
 Trop se font fort de leur partie ;
 Et d'autre part sont aici neez 18400
 Les vertus, qui sont benurez,
 A resister leur felonnie :
 Sur quoy chascuns autre desfie,
 L'un claime avoir la seignourie
 De l'omme ove tous ses propretés,
 Et l'autre dist qu'il n'avera mie ;
 Ensi la guerre est arrainié,
 U q'il y ad peril assetz.
 La Char se tret trestout as vices,
 Et l'Alme voet que les services 18410
 Soient au Resoun soulement ;
 Mais ore agardons les offices
 Des tous estatz, si les justices
 Ou les malices au present
 Sont plus fort en gouvernement.
 Je dis, ensi comme l'autre gent,
 Qe puis sont fortes les malices,

Sique Pecché communement
Par tout gouverne a son talent
L'escoles et les artefices.

18420

Puisq'il ad dit les *propretés* des
vices et des vertus, sicome vous
avetz oï, ore dirra en *partie*
l'estat de ceux q'ont *nostre* siecle
en *governance*; et *commencera*
primerement a la Court de Rome.

Si nous *parlons* de ces *prelatz*
Qui sont sicome de dieu legatz
Ove la clergie *appartenant*,
Ils sont devenus *advocat*
Du Pecché pour plaider le cas
Encontre l'Alme; et outre tant,
Si nous des Rois soions *parlant*,
Ils vont le pueple *ensi* pilant,
Que tous s'en pleignent *halt* et bas;
Et si nous *parlons* plus avant 18430
Du gent du loy et du marchand,
Je voi peril en toutz *estatz*.

Je croy bien ferm *que* la *franchise*
De luy q'est chief du sainte eglise
Soubz dieu, s'il se *governe* a droit,
Sur tous les autres est *assise*;
Mais ore est changé celle *assise*,
Car ce q'umilités estoit
Ore est orguil, et puis l'en voit,
Ce que largesce estre *souloit* 18440
Ore est tourné du *covoitise*;
Si chasteté a ore y soit,
Ne say si l'en parler en doit,
Car je me tais de celle *enprise*.

Ce que je pense *escrire* yci
N'est pas *par* moy, ainz est *ensi*
Du toute *crisiene* gent
Murmur, *complainte*, vois et cry;
Que tous dient je ne *desdi*,
Q'au court de Rome ore est *regent*
Simon del orr et de l'argent, 18451
Sique la cause al *indigent*
Serra pour nul clamour oï:

18430 plusauant 18439 lenvoit

Qui d'orr n'y porte le *present*,
Justice ne luy ert *present*,
Du charité ne la *mercy*.

Le fils de dieu voloit venir
Pour eslargir et amollir
La loy; mais cils du maintenant
La me font plus estroit tenir: 18460
Dont vuil les causes *enquerir*,
Si leur vois deux pointz *demandant*;
Ou ce q'ils m'en vont *defendant*
Estoit en soi *pecché* devant,
Car lor le doi bien *eschuir*;
Ou si ce *noun*, di lors avant
Pour quoy me vont *establistant*
Pecché de leur *novel* atir.

Ne puet descendre en ma *resoun*
Q'ils du *propre* *imposicion* 18470
Font *establi* *novel* *pecché*;
Ce q'en nul livre nous *lison*,
Que le fils dieu de sa *leçoun*
Par l'evangile en son *decré*
Fist *establi*: car *charité*
N'est que *peril* *multeplié*
Nous soit, *par* quelle *addicion*
Soions plus *serf*; car *rechaté*
Nous ad dieus, dont en *liberté*
Voet bien *que* nous plus *franc* soion.

Du loy *papal* est *estably* 18481
Que tu ne serras point *mary*
A ta *cousine*, et d'autres cas
Plusours *que* je ne *dirrai* cy;
Et dient *que* pour *faire* *ensi*
Mortielement tu *peccheras*:
Lors vuil *que* tu *demanderas*
Si tu *pour* l'orr *que* leur *dorras*
Au court *porras* *trouver* *mercy*:
Certainement *que* si *ferras*, 18490
La *bource* que tu *porteras*
Ferra le pape ton amy.

Mais si ce soit *ensi* *mortiel*,
Comme ils le *dient*, lors au *tiel*
Pour quoy *vuillont* devant la *mein*
Dispenser? Car ly dieus du *ciel*,
Qui plus du pape est *droituriel*;

18443 endoit 18480 plusfranc

Ne puet ce faire, ainz sui *certein*
Que je *congé* *priasse* en *vein*
A dieu pour *freindre* l'endemein 18500
Sa loy et son *precept*, le *quiel*
Fist *establi*; mais ly *romein*,
Si j'ieie d'orr ma *bource* *plein*,
M'ert plus *curtois* et *naturiel*.

Comme l'oisellour plus *tent* ses *rectz*,
Plus *tost* en *serront* *atrapez*
Les *oiseals*, et *par* cas *semblable*
Comme plus *eions* *par* *noz* *decretz*
Diversez *pecchés* *imposez*,
Plus *tost* en *serrerez* vous *coupable*,
Et nous d'asset plus *seignourable*:
Car *tieus* *pecchés* sont *rechatable* 18512
En *nostre* Court, si vous *paietz*;
Dont nous *volons* *que* *nostre* *table*
Soit des *mangiers*, et *nostre* *estable*
Des *grantz* *chivalx* plus *efforciez*.

Quant *nostre* *sire* estoit *mené*
Sus au *montaigne* et ly *malfié*
Du *siecle* luy *moustra* l'onour,
Je lis q'il l'ad tout *refusé*: 18520
Mais nous pour *dire* *verité*
L'avons *resçu*, *sique* *seignour*
Soions en terre le *maiour*;
Car n'est Roy, Prince ne *contour*
Qui nous ne *baiseront* le *pié*,
Et *dorront* *largement* de *leur*
Pour *s'aqueinter* de *nostre* *amour*,
Dont plus *soient* de nous *privé*.

Q'il ne se *duist* *soliciter*
Pour sa *vesture* ou son *manger* 18530
Dieus a saint *Piere* *commanda*,
Ne qu'il deux *cotes* *duist* *porter*:
Mais nous ne *volons* pas *garder*
Le *dieu* *precept* *solonc* *cela*;
Car *pres* ne *loigns* n'y *avera*
Delice que *prest* ne *serra*
Et en *cuisine* et en *celer*,
Et *nostre* *corps* se *vestira*
Des *robes* dont om *perchera*
Plus *que* ne *portont* deux *somer*. 18540

'Ensi *tenons* les *cliefs* es *meins*,

18506 enserront

18510 Plustost enserrerez

18581 plusforte

Dont nous serrons l'argent au *meinz*
Et les *florins*, mais *rerement*
Quant *desserrons* les *coffres* *pleins*
Pour la *poverté* a *noz* *procheins*
Aider; ainçois tout *proprement*
Volons avoir du *toute* *gent*,
Mais de *noz* *biens* n'est qui *repréent*,
Car *noz* *tresors* *serront* si *seintz*,
Que nul ert *digne* a *nostre* *argent* 18550
Toucher. *Veï* la *comme* *noblement*
Nous *susmes* *chief* des *tous* *humeins*!

Les *cliefs* *saint* *Piere* et en *baillie* f.103
Du *ciel*, et nous la *tresorie*
Du *siecle*, qui nous est *meynal*:
El temps *saint* *Piere*, si *voir* *die*,
Cil *usurer* du *Lumbardie*
Ne *fist* *eschange* a *court* *papal*,
N'a *lors* *Requeste* *emprial*
Ne le *brocage* au *Cardinal* 18560
Donneront *voix* a la *clergie*;
N'a *lors* le *pape* en son *hostal*
Pour nul *bargain* *espiritual*
Retint *Simon* en *compaignie*.

Mais nous q'avons la *guerre* *enpris*,
Par quoy *volons* *monter* en *pris*,
Falt que nous *eions* *retenu*
Simon, *sique* *par* son *avis*
Soient *noz* *tresors* *eslargiz*;
Et ce nous *fait* *main* *estendu* 18570
Dire a *Simon* le *bienvenu*,
Car il nous *rent* *bien* *no* *salu*
De ses *florins*, *quant* *vient* *toutdis*:
Droit est, *puisq'il* ad *despendu*,
Que *Peveschié* luy soit *rendu*,
Car nous l'avons *ensi* *promis*.

O *sainte* *croix*, *comme* *celle* *porte*
Grant *vertu*, dont d'enfern la *porte*
Fist *nostre* *sire* *debriser*!
Encore n'est la *vertu* *morte* 18580
En *nostre* Court, ainz est *plus* *forte*,
Les *huiss* des *chambres* *fait* *percer*:
Car *quant* la *croix* y *vient* *hurter*,
Tantost *acurront* *cil* *huissier*,
Et tout *ensi* *comme* *celle* *enhorde*

La font jusques a nous mener,
Voir as curtines voet entrer,
Dont nostre cuer se reconforte.

'Unques le corps du sainte Heleine
Serchant la croix tant ne se peine, 18590

Que nous ovesque nostre Court
Assetz n'y mettons plus du peine
Chascune jour de la semeigne,
Voir la dymenche l'en labourt,
Del croix sercher: chascuns se tourt,
Et pour ce no message court
Par tout le siecle au tiel enseigne,
Et s'il la trouve, l'en l'onourt;
Mais cil q'ove vuide main retourt
N'ad pas de nous sa grace pleine. 18600

'Rende a Cesar ce q'est a luy;
Ce q'est a dieu, a dieu tout si:
Mais nous et l'un et l'autre avoir
Volons, car d'un et d'autre auçi
Portons l'estat en terre yci.
De dieu avons le plain pooir,
Par quoy la part de son avoir
Volons nous mesmes recevoir
Tout proprement, si que nully
En partira, si ce n'est voir, 18610
Que nous porrons aparcevoir
Q'au double nous ert remery.

'Ensi faisons le dieu prouffit,
Que riens laissons grant ne petit
De l'orr que nous porrons attraire;
Car ly prelat nous sont soubit,
Si sont ly moigne ove leur habit,
Q'ils n'osent dire le contraire
Du chose que nous volons faire,
Neis ly curet et ly viscaire: 18620
Leur falt donner sanz contredit
Del orr, dont ils nous pourront plaire,
Ou autrement leur saintuaire
Du no sentence ert entredit.

'Mais du Cesar presentement,
Portons le representement
Car nous du Rome la Cité
Ore avons l'enheritement;
Pour ce volons de toute gent

Tribut avoir par dueté. 18630

Voir ly Judieu en son degré,
Neis la puteine acoustumée,
Ne serront quit du paiement:
Ce que Cesar ot oblié
En son temps, ore avons trové,
Les vices qui vont a l'argent.

'Je truis primer qant Costentin
Donnoit du Rome au pape en fin
Possessioun de la terrestre,
Ly Rois du gloire celestin 18640

Amont en l'air de son divin
Par une voix q'estoit celestre
Faisoit crier, si dist que l'estre
Du sainte eglise ove tout le prestre
Ne serront mais si bon cristin,
Comme ainz estoient leur ancestre,
Pour le venim qui devoit crestre
De ce q'ils ont le bien terrin.

'Le fils de dieu, qant il fesoit
Son testament, sa peas lessoit 18650
Au bon saint Piere, qu'il ama,
Siqu'il ne se contourberoit
Du siecle; et l'autre en tiel endroit

La rescut et molt bien garda,
Que puis apres long temps dura:
Mais ore est changé tout cela;
Le pape claime de son droit
L'onour du siecle, et pour cela
La dieu pes s'est alé pieça,
Q'au jour present nuls ne la voit. 18660

'Saint Piere ne se volt movoir
Par guerre, ainz fist son estovoir
Des bonnes almes retenir;
Mais nous ne volons peas avoir,
Ainz les richesses et favoir
Du siecle pensons acueillir.
Piere ot couronne du martir,
Et nous du rubie et saphir
En orr assiss. Lors di me voir,
La quelle part valt meulx tenir: 18670

N'est pas la mort bonne a souffrir,
Tant comme phisque puet valoir.
'Saint Piere jammais a nul jour

18610 Enpartira

Retint devers luy soldeour
Ou d'armes ou du brigantaille;
Car ne volt estre conquerour
Pour ressembler a l'Emperour
De ses conquestes en Ytaille.
Ainz en priere sa bataille
Faisoit, pour l'alme de l'ouaille 18680
Defendre, ensi comme bon pastour,
Contre malfé; mais d'autre entaille
Ore est que nostre espeie taille,
Du siecle pour avoir l'onour.

'Ly fils de dieu, ce dist l'istore,
Ne vint querir sa propre gloire,
Ainz queist la gloire de son piere
Pour mettre hors du purgatoire
Adam: mais nostre consistoire
Se change tout d'une autre chere; 18690
La terre quiert, q'il tient plus chere
D'Adam, dont arme sa banere,
Et trait le siecle en s'adjutoire,
Lessant les almes a derere:
Que chalt si l'en occie et fiere,
Mais que nous eions la victoire?

'En nostre Court est bien parlé
Comment la cristieneté
Se trouble en guerre et en distance;
Et nous avons sovent esté 18700
Requis que peas et unité
Feissemus d'Engleterre et France.
Mais que n'en donnons l'entendance
Trois causes en font destourbance:
L'une est petite charité;
Car l'autri grief n'est pas grevance
A nous, ainz en toute habondance
Volons tenir le papal sée:

'Une autre cause est ensement,
Ne susmes pas indifferent, 18710
Ainz susmes part a la partie,
Par quoy que nostre arbitrement
Ne se puet faire ovelement:
La tierce cause est bien ose,
Que guerre avons en Romanie,
Dont falt que nostre seignourie
Du siecle soit primerement

18691 pluschere

18694 aderere

Des propres guerres establee:
Ces causes ne nous suffront mie
De faire peas a l'autre gent. 18720

'Et d'autre part faisons que sage,
Q'a nous et puis a no message
La guerre asses plus que la peas
Ferra venir grant avantage
De l'orr; car lor perons brocage
De l'un Roy et de l'autre apres.
Chascuns nous quiert avoir plus pres,
Mais nous nous enclinons ades
Au Roy qui plus del orr engage,
Dont no tresor ait son enress: 18730
Par quoy l'acord volons jammes,
Tant come trovons si bon paiaage.

'Dieus a saint Piere commandoit
Q'il noun du mestre ne querroit
Ne reverence entre la gent:
Je truis auçi par tiel endroit,
Qant saint Jehan enclin estoit
L'angre adourer, cil le defent;
Si dist qu'il son enclinement
A soul dieu q'est omnipotent, 18740
Et noun a autre le ferroit:
Mais nostre Court dist autrement,
Ne voet tenir l'essamplément
Dont l'angel dieus nous essamplloit.

'De l'evangile a mon avis f. 104
Ne faisons point le droit devis;
Car nous ne gardons tant ne quant
L'umilité de dieu le filz;
De dieu le piere ainçois le pris
Tollons, car soul au toutpuissant, 18750
"Sanctus," les angres vont chantant;
Mais nous volons du maintenant
Avoir l'onour sur nous assis,
Et noun du saint par tout avant
Porter, mais tout le remenant
Du sainteté nous est faillis.

'Combien que Piere estoit grant sire,
Ja ne vist om du plom ne cire
Qu'il envoiait sa bulle close;
Ne ja n'orretz chanter ne lire 18760
Q'il fist ses cardinals eslire

18704 enfont

18727 pluspres

Par ses chapeals, qui sont come rose
 Vermaile au point quant se desclose.
 Ainz tout orguil y fuist forclose,
 Ne gule alors roster ne quire
 De sa delice ascune chose
 Savoît, mais ore l'en suppose
 No court est autre, pour voir dire.
 'Voir est en terre a son decess
 Que nostre sire donna pes, 18770
 Mais contre ce nous combatons ;
 Des pechès faisoit il reless,
 Mais nous, qui susmes d'ire engress,
 Pour poy de cause escomengons ;
 Il souffrit mort et passions,
 Et nous encontre ce tuons ;
 Il se tint de poverte pres,
 Et nous la poverte esloignons ;
 Il gaigna poeple, et nous perdons,
 Ensi n'accorderons jammes. 18780
 'L'estat du pape en sa nature
 Ne porra faire forsfaiture
 En tant comme pape, ainz Innocent,
 Qui tient l'estat papal en cure,
 Cil puet mesfaire d'aventure.
 Mais nous, qui susmes chief du gent,
 Q'en terre avons nul pier regent,
 Volons pour l'orr et pour l'argent
 Piler trestoute creature ;
 Car n'est qui pour repaiement 18790
 Nous poet mener en jugement,
 Et c'est ce que nous plus assure.'
 Q'est ce que l'en dist Antecrist
 Vendra? Sainte escripture dist
 Que d'Antecrist le nonn amonte,
 Qui le contraire fait du Crist.
 Quoy quidetz vous, si tiel venist
 Encore? Oyl, par droite acompte
 Orguil humilité surmonte,
 Dont chascun autre vice monte 18800
 Que nostre sire en terre haïst ;
 Siq'au present la foy desmonte
 En nostre court, car nuls tient conte
 Tenir la loy qu'il establïst.
 Sicomme ly scribe et pharisée,

1883B qenpote

Qui jadis s'estoient monté
 Du Moÿsen sur la chaire,
 U la loy dieu ont sermoné
 As autres, mais en leur degré
 Leur faitz furent tout loign derere ;
 Ensi vait ore en no matiere 18811
 Au jour present, car de saint Pierre
 Om monte et prent la digneté,
 Le dyademe et la chymere,
 Mais ja n'en font plus que chymere
 Au remenant la dueté.
 Qant monstre naist du quelque genre,
 Des mals procheins du dois entendre,
 C'est la prenosticacioun ;
 Mais ore qui voet garde prendre, 18820
 Verra comment Orguil engendre
 D'Envie en fornicacioun
 Le monstre de dampnacioun ;
 Dont vient celle hesitacioun,
 Q'en un soul corps om poet comprendre
 Deux chiefs par demonstracioun,
 Et par diverse nacioun
 L'un chief sur l'autre volt ascendre.
 A Rome c'est ore avenu
 Du monstre q'est trop mal venu 18830
 Au bonne gent ; car sainte eglise
 N'ad q'un soul chief pardevant dieu,
 Mais ore ad deux trestout parcrû ;
 Dont la bealté de sa franchise
 Se disfigure et est malmise.
 Si dieus n'en face la juise,
 Au fin que l'un chief soit tollu,
 Le corps, q'en porte la reprise,
 Ensi porra par nulle guise
 Long temps estier en sa vertu. 18840
 Ore dira de l'estat des Cardinals
 au Court de Rome solonc ce que
 l'en vait parlant au temps d'ore.
 Ce dist qui sapience enfile,
 Du bonne mere bonne file,
 Et par contraire il est aici :
 Mais c'est tout voir, qant chief s'avile,
 La part des membres serra vile.
 Au Court de Rome il est ensi

Du chief, vous savetz bien le qui,
 Maisque les membres dont vous di
 Sont Cardinal de nostre vile,
 Des queux le meindre est tant cheri,
 Qu'il quide valoir soul par luy 18851
 Le Roy du France et de Cezile.
 Mais pour ce q'ils ont entendu
 Que povre orguil est defendu,
 Ils se richont par toute voie ;
 Si ont en aide retenu
 Simon, a qui sont molt tenu,
 Car il leur donne et leur envoie,
 Il leur consaille et leur convoie ;
 Tous autres passeront en voie, 18860
 S'ils n'y soient par luy resçu ;
 Simon par tout ferra la voie,
 Nuls y vendra s'il n'ad monoie,
 Mais lors serra le bien venu.
 Le pape as Cardinals dorra
 Certain par aun, mais ce serra
 Sicomme d'enfant qant il ad pain
 Sanz compenage ; car cela
 Que pape donne ne plerra,
 S'ils n'eïont autre chose ou main : 18870
 Et ce serra du privé gaign,
 Que sanz Simon de son bargain
 En nostre Court leur portera ;
 Mais ce n'ert pas un quoy solain,
 Car ja sanz selle le polain
 Ne berbï sanz toison verra.
 Soit comme poet estre en dieu prier,
 Maisque Simon poet espier
 Les dignetés ove la vuïdance,
 Les quelles il falt applier 18880
 As Cardinals, mais supplier
 Estoet ainçois la bienvuïllance
 Du pape, et sur celle aquointance
 Simon ferra la pourvoïance,
 Sicomme partient a son mestier.
 Vei cy comme nostre court s'avance ;
 Par tout quiert avoir la pitance,
 Mais nulle part puet saouler.
 Par leur decretz ont establïz
 Que cil qui porte les proufïtz, 18890
 Auci les charges doit avoir :

A ce compellent leur soubgitz,
 Mais ils sont mesmes enfranchiz
 Nonpas du droit ainz du pooir ;
 Car ils sont prest a resevoir
 Les benefices et l'avoïr
 Du sainte eglise en tous païs,
 Mais ja ne vuïllont remouvoir
 Le pié de faire leur devoir
 Pour nous garder les espiritz. 18900
 Qui savra juer d'ambes meins,
 Si l'une falt, de l'autre au meinz
 Porra juer ; et tielement
 Du gaign les Cardinals romains
 De l'une ou l'autre part certains
 Serront ; car ou l'avancement
 A soy quieront, ou autrement
 Simon leur dorra largement
 Pour ceaux qui sont venus loigntains :
 Car l'aqueïntance a temps present 18910
 Se fait par donn et par present
 En nostre Court de les foreins.
 Mais pour ce q'ils trovont escrit
 Q'om ne doit curer du petit,
 Petite chose n'appetice
 La faim de leur grant appetit,
 Ainz falt q'il soit du grant profit
 Ce dont quieront le benefice :
 Auci Simon n'est pas si nyce
 Du poy donner en son office 18920
 As tiels seignours qui l'espirit
 Du Simonie et d'avarice
 Portont enclos, par quoy justice
 Se tient au peine en leur habit.
 Jadis Naman el terre hebreu
 Grace et pardoun receust de dieu,
 Dont fuist du lepre nettoïez ;
 Mais Gyysi trop fuist deçu,
 Qant il del orr estoit vengu,
 Dont les grantz doums ot acceptez,
 Par quoy sur soy fuist retournez 18931
 Ly mals dont l'autre fuist sanez,
 Mais ore au paine en ascun lieu
 Si la vengeance ont remembrez f 105
 De Gyysi, ainz des tous leez
 Les doums sont donnez et resçu.

N'ont pas mys en oublioum
 En l'evangile la leçon
 De les disciples de Jhesu,
 Quant ils firon contencioum 18940
 Qui serroit mestres et qui noun ;
 Ainz ont ce fait bien retenu,
 Dont trop y ad debat commu.
 Comme Lucifer semblable a dieu
 Volt estre, ensi dissencioum
 Est ore au court de Rome accru :
 Ne falt forsque l'espeie agu
 Et le conseil de danz Simon.
 Du nostre sire truis lisant
 Comment fist prendre un jofne enfant
 Pour essampler les orguillous 18951
 De ses disciples ; eaux voiant
 Le fist venu, ensi disant :
 'Quiconque soit parentre vous
 Qui sanz orguil et sanz corous
 Ne soit du cuer humble et pitous,
 Comme est cist enfes maintenant,
 En ciel ne serra gloriouse.'
 Dont vuil demander entre nous
 Si nostre fait soit acordant. 18960
 Om puet respondre et dire nay,
 Quiconque voet prover l'essay,
 Voiant les Cardinals au Court ;
 De leur pompe et de leur array
 Comme plus recorde plus m'esmay,
 Chascuns y quiet que l'en l'onourt,
 Et pour l'onour chascuns labourt,
 Car s'il est riche, son pris sourt :
 D'umilité parler n'y say,
 Chascuns vers la richesce acourt 18970
 Et du poverte l'en tient court :
 Tous scievent bien que j'en dy vray.
 O comme bien fuist humilité
 Parentre la fraternité
 Qui sont du nostre foy regent !
 Car leur estat et leur degré
 De les disciples dameldée
 Enporte representement.
 Grant bien et grant mal ensement
 Nous porront faire celle gent 18980

18972 iendy

Qui sont si pres du papal sée ;
 Car chascuns de leur reule prent
 De bon ou mal gouvernement
 Par toute cristieneté.
 Dieus ses disciples au precher
 Nonpas pour lucre seculer,
 Ainz pour divine gaignerie,
 Trestout au pié sanz chivacher
 Par tout le monde fist aler :
 Mais nous alons en legacie 18990
 Ove grantz chivals et compaignie,
 Et le subsidie du clergie
 Pour nostre orguil plus demener
 Volons avoir du no maistrie ;
 La bulle q'est du Romanie
 Leur fra somonce de paier.
 Simon Magus en halt vola,
 Dont puis au fin il s'affola,
 Quant sur la roche jus chay.
 Malvoisement il essampla 19000
 Les cardinals, q'ore essampla a
 Chascuns en nostre court d'ensi
 Voler en halt : si ont saisi
 Deux eles, dont les pennes vi
 Du veine gloire ; et sur cela
 Le vent d'orguil fort y feri,
 Que jusq'as nues les ravi
 Si halt que charité passa.
 Mais quant ils sont en halt alez,
 Soudainement sont avalez 19010
 Dessur la Roche au covoitise,
 U le corage ont tout quassez
 De l'orr, dont il y ad assetz ;
 Par quoy perdont la dieu franchise,
 Siq'ils n'ont membre que suffise
 A labourer solonc l'assise
 De l'evangile en les decretz :
 Dont m'est avis trop est malmise,
 Par ce que vole, sainte eglise,
 Meulx valt estier dessus ses piés. 19020
 Sovent avient que fils du pierre
 La mort desire, au fin q'il pierre
 Plus pres d'avoir l'enheritance :
 Au verité si m'en refiere,

19023 Pluspres

Des Cardinals en la maniere
 Plusours desiront la vuidance
 Du sié papal, par esperance
 Que Simon de sa pourvoiance
 Leur fra monter en la chaire,
 Par quoy la vie est en balance 19030
 Du pape, s'il sa garde pance
 Laist du triacle estre au derere.
 Quant le frument port sa racine
 Es champs, lors falt que soit gastine
 La terre, et si porte en avant
 L'urtie et la poignante espine ;
 Et ensi vait la discipline
 En nostre court de maintenant ;
 Car quant ly juge sont truant,
 Lors y vienont trestout suiant 19040
 La court ove toute sa covine,
 Et ly notaire et ly plaidant,
 Et puis trestout le remenant,
 Sicomme pulsain fait la geline.
 Trestous ceaux de la court au meinz,
 Sur queux ly papes tient ses meins,
 Quieront du siecle rescevoir
 L'onour ; voir et les capelleins,
 Ja soient ils des vices pleins,
 Encore quieront ils avoir 19050
 Le noun d'onour pour plus valoir
 Au siecle ; dont en nounchaloir
 Laissent, q'assetz ont bell manoir,
 Quant presde luy porront manoir
 Q'est pape et chief des tous humeins.
 Ore dirra de l'estat des Evesques,
 solonc ce que l'en vait parlant au
 temps q'ore est.
 Sicomme l'en dist communement,
 Ensi dis et noun autrement ;
 Car ce n'est pas de mon savoir
 D'escrire ou dire ascunement 19060
 De les Evesques au present :
 Mais ce q'om dist, ne say si voir,
 Dirrai ; et ce me fait doloir
 Que l'en puet tant aparcevoir

De leur errour, que folement
 Des almes font leur estovoir,
 Des ceaux qui sont souz lour pooir
 Et des leur propres ensement.
 Evesque, par tes faitz primer
 Ton poeple duissetz essampler 19070
 Des tes bons oeuvres pardevant ;
 Et puis le duissetz enfourmer
 De ta clergie et ton precher,
 Pour exciter le bienfaisant ;
 Car si tu soiez contemplant
 Et laiss perir le poeple errant,
 Tu fais defalte en ton mestier ;
 Et si tu soiez bien prechant,
 Quant tes bienfaitz ne sont parant,
 Ja n'en porras fructefier. 19080
 Evesque, lise cest escrit :
 Par son prophete dieus t'ad dit
 Et commandé d'obedience,
 Par halte vois que sanz respit
 Tu dois crier a ton soubgit,
 Qu'il se redresce au penitence ;
 Car s'il piert par ta necligence,
 Dieus chargera ta conscience,
 Comme toy q'es son provost eslit
 Pour acompter en sa presence : 19090
 C'est grant vergoigne a ta science,
 Si ton acompte est inparfit.
 Evesque, om dist, et je le croy,
 Comment les poverez gens pour poy
 De leur errour tu fais despire,
 Et les grantz mals et le desroy
 De ces seignours tu laisses coy,
 Que tu n'en oses faire ou dire :
 Tu es paisible vers le sire,
 Et vers le serf tu es plain d'ire, 19100
 L'un est exempt de toute loy,
 Et l'autre souffre le martire ;
 N'est pas en ce, qui bien remire,
 Ovel le juggedement de toy.
 Prelatz, tu as condicioun
 Noun du pastour, ainz du multoun,
 Quant vois les seignours du paais
 D'avoltre et fornicacioun

19108 Dauoltire (re in pas.)

Peccher sanz ta correccioun.
Du philosopre enten les ditz : 19110
' Prelatz qui n'ad les mals repris
Tant valt comme si les ait cheris
Du fole persuacioun.
Du loy civile truis escriz,
' Cil fait les mals au droit devis
Qui des mals donne occasioun.

Les fils Hely, q'estoit provoire
El temple dieu, ce dist l'histoire,
L'offreude ove tout le sacrefise,
En vestir, en manger et boire 19120
Contre les loys de leur pretoire,
Guasteront sanz avoir reprise

Et puis, qant a ce q'il desire, f. 107
Lors pour l'onour dont il est sire
Tant est du veine gloire pleins,
Q'as ses delices tout s'atire :
C'est cil qui quiert ne le martire
Ne le disaise des corseintz. 19130

Car qant il est en halt montez
Et est primat des dignités,
Lors ses soubgitz desrobbe et pile,
Si mette au vente les pechés,
Sicomme l'en fait boef as marchées,
Ensi son lucre ades compile ;
Dont ses manteals furrez enpile,
Et paist et veste sa famille,
Et ses chivals tient sojournez :
Mais, comme l'en dist, aval la vile 19130
Il laist sa cure povre et vile
Des almes, dont il est chargez.

Julius Cesar en bataille
Jammais as gens de son menaille
Ne dist 'Aletz !' ainz dist 'Suietz !'
Car au devant toutdiz sanz faille
Se tint et fist le commensaille,
Dont tous furont encoragez :
Mais no prelat nous dist 'Aletz !
Veilletz ! junetz ! prietz ! ploretz !' 19140
C'est la parole qu'il nous baille ;
Mais il arere s'est tourne :

Nuls est de son fait essamplez,
C'est un regent qui petit vaille.
En dousze pointz je truis que l'ées
A fol prelat est resemblez :
L'ées est aviers de sa nature,
Brief est et plain d'escharcetés,
Vois ad maiour que corps d'assetz :
Ensi prelat de sa mesure 19150
Ad molt parole et poy fesure,
Poy donne a ceaux dont ad la cure,
Et voelt que molt ly soit donnez.
L'ées n'ad compaigne en sa demure,
Ne l'autre espouse par droiture,
S'il n'est contraire a ses decretz.

L'ées est sanz piés ; l'evesque aici
En son degré n'ad pié, sur qui
Ose a son Prince resister
Pour son defense ne l'autri ; 19160
Ainz laist le poeple estre peri
Et sainte eglise defouler.

L'ées ensemment pour son manger
Les doulices fleurs quiert engorger :
Le fol prelat fait tout ensi ;
Le douls et crass quiert amasser,
Dont fait le corps bien encrasser,
Si boit le tresbon vin flouri.

Et d'autre part l'ées porte au point
Cell aguillon, dont qant il point, 19170
Son propre corps et l'autri blesce :
Cil fol prelat, q'a dieu se joynt,
Del aguillon trop se desjoynt,
Qant il l'autry du point adesce ;
C'est l'aguillon dont l'alme oppresse
Gist par la char q'est felonnesse,
Sicome l'apostre tout au point
En ses epistres le confesse :
Au prelace la clergesse
Meulx serroit, s'ils n'en ussent point.

D'autre aguillon cil fol prelat 19180
De sa vengeance est trop elat,
Qant l'alme d'autri fiert pour poy
De son espirituel estat :
Mais qui du fol fait potestat,
Les soubgitz serront en esfroy.

After 19122 one leaf, containing 192 lines, is lost.

He, fol prelat, avoy ! avoy !
N'est pas la pacience en toy,
Qant ta vengeance l'alme abat ;
Mal fais l'essample de la foy, 19390
Qant l'aguillon de ton buffoy
Pour si petit point et debat.

He, fol prelat, dy moy comment
Que tu me fais ton prechement,
Q'un corps al altre par pité
Le mesfait sanz revengement
Doit pardonner tout plainement,
Et tu d'orguil et cruauté
M'as corps et alme escumengé.
Ne say q'en parle ton decret, 19400
Mais au saint Picre tielement
Bien say dieus dist, que le peché
Septante foitz soit pardonné,
Et ta mercy deux fois n'attent.

Sanz juste cause nepourqant
Sovent nous vais escumengant ;
Mais saint Gregoire la sentence
De ton orguil voit resembler
A foisel de son ny volant :
Car ce sciet om d'experience, 19410
Du quelle part voler commence,
Au fin revole ove l'ele extense
Au propre ny dont fuist issant ;
Et par si faite providence
Retourne deinz ta conscience
Le grief dont tu nous es grevant.

Auci des angles et pertus
Sa belle maison ad construs
L'ées ; et ce doit om ressembler
Au fol prelat, de qui je truis 19420
Qu'il quiert les angles et les puis,
Et ne vait pas le droit sentier ;
Car verité de son mestier
Ne quiert es angles tapisier,
Ainçois se moustre en ses vertus ;
Mais chose q'om ne voet moustrer
L'en fait obscur et anguler,
Si q'en apert ne soit conuz.

L'ées ad maison du cire frele,
Molt ad labour de faire celle, 19430

Ainçois q'il a son pourpos vient ;
Prelat aici qui la tuelle
Fait ainz que moustier ou chapelle,
Du vanité trop luy sovient,
Qant point ne sciet u ce devient ;
Car toute chose est frele et nient
Du quoy le siecle se revele :
Mais fol prelat qui dieu ne crient
Bien quide par l'onour qu'il tient
Toutditz sa joye avoir nouvelle. 19440

Les biens que l'ées porra cuillir
Estroitement les fait tenir
Deinz sa maison en repostaille,
Mais au darrein l'en voit venir
Celuy qui tolt sanz revenir
Et la maison et la vitaille :
Du fol prelat ensi se taille,
Car il pour plegge ne pour taille
De son tresor ne voet souffrir
Que l'en apreste ou donne ou baille : 19450
S'il perde au fin ce n'est mervaille,
Q'as autres voet nul bien partir.

L'ées ensemment hiet la fumée,
Au fin q'il n'en soit enfumée :
Prelat ensi sainte oreisoun,
Q'est a la fume comparé,
S'en fuit, q'il n'ad le cuer paré
Du sainte contemplacioun,
Ainz ad sa meditacioun 19460
En seculiere elacioun
D'orguil et de prosperité ;
Car d'autre fumigacioun
Pour faire a dieu relacioun
Ne puet souffrir la dueté.

L'ées ensemment de tous puours
S'esloigne, ensi q'il les flours
D'ascune part ne soit sentant :
L'evesque ensi de ces seignours
Les grans pechés, les grans erreurs,
Qui sont as toutez gens puant, 19470
Ne voet sentir, ainz s'est fuiant.
O quel prelat, o quel truant,
Q'ensi laist festrer les folours
Sanz medicine tant ne qant !

19400 qenparle

19454 nensoit

N'est pas des cures bien sachant,
Combien q'il soit des curatours.

De l'ées auci je truis escrits
Q'il fuyt les noyses et les cris:
Le fol prelat tout ensemment,
Quant voit noiser ses fols soubgitz, 19480
S'en part et les laist anemys,
Quant il les duist d'acordement
Repaiser amiablement.

Cil n'est ne Piere ne Clement,
Q'ensi laist errer ses berbis;
Le toison de l'ouaile prent,
Mais de la garde nullement
Se voet meller, ainz s'est fufz.

L'en dist, et puet bien estre voir,
Que cil q'ad molt, voet plus avoir; 19490
Et ce piert bien de la clergie:
Ils ont eglise, ils ont manoir,
Mais plainement a leur voloir
Trestout cela ne souffist mie,
S'ils n'eiont la chancellerie
Et la roiale tresorie
Deinz leur office et leur pooir.
Maisq' il en poet avoir baillie
Du siecle dont se glorifie,
De l'autre ne luy poet chaloir. 19500

Pour le phesant et le bon vin
Le bien faisant et le divin
L'evesque laist a nonchalure,
Si quiert la coupe et crusequin,
Ainz que la culpe du cristin
Pour corriger et mettre en cure,

Que mol serras en cause mole; f. 110
Mais si le siecle en soy tribole
Et bruyt d'ascun persecutour,
En tiel chalour lors te rigole,
Et moustre en fait et en parole
Comme ton cuer vole el dieu amour.

Ly serpens, ce nous dist Solyn,
Trestout le corps met en declin
Pour soulement le chief defendre:
Ensi prelat duist estre enclin 19900

19498 enpoet After 19506 two leaves, containing 384 lines, are lost. 19920 seruoit

Pour Crist, q'est chief de tout cristin,
Quant voit abeisser et descendre
Sa loy, par qui devons ascendre,
Car qui voet prelacie enprendre,
Non pour avoir l'onour terrin,
Mais pour prouffit de l'alme aprendre,
L'apostre dist, bien le doit prendre,
Car ce luy vient du bon engin.

De les natures dont je lis
Truis un ensample ensi compris, 19910
Q'un grant piscon y ad du mer,
Qui du pite tant est cheris,
Que quant les autres voit petitiz
De la tempeste periler,
Il laist sa bouche overte estier,
U q'ils porront tout saulf entrer;
Si les recoit comme ses norris
Et salvement les fait garder,
Tanq'il les mals verra passer,
Et lors s'en vont saulfs et garis. 19920

Prelat ensi les gentz menuz,
S'il voit leur Roy vers eaux commuz,
Parmy sa bouche il aidera
Come ses fils et ses retenuz;
Car en ce cas il est tenuz
Q'au parler s'abandonnera:
Et d'autre part quant il verra
Le poeple q'en peccché serra,
Pour ce ne serront destitut;
De bouche overte il priera 19930
A dieu, tanqu'il les avera
En corps et alme restitut.

Ce veons bien que par nature
L'oill soul pour tous les membres plure,
Quant ascun d'eaux se hurte ou blesce:
Ensi l'evesque en sa droiture
Pour ses soubgitz q'il tient en cure,
Qui d'alme ou corps sont en destresce,
Sur tous plus doit avoir tendresce
Et plourer pour la gent oppresse, 19940
Q'est la divine creature:
Car quant prelatz vers dieu s'adresce
Et verse lermes en sa messe,
C'est une medicine pure.

De Samuel j'ay entendu,
Quant fuist requis del poeple hebreu
Qu'il dieu priast en leur aie,
Du charité n'ert esperdu,
Ainz dist que 'Ja ne place a dieu
Que je pour vous ades ne prie, 19950
Dont vostre estat dieus salve et guie.'

Benoite soit la prelacie
Qui tielement ad respondu;
Dont cil q'ore est de la clergie
Porra trover essamplerie,
Quant sa leçon avera parlieu.

Saint Jeremie dist atant:
'O qui ert a mes oels donnant
Des lermes la fonteine amere,
Dont soie au plentée lermoiant 19960
Sur le dieu poeple en compleignant
Leur mort, leur mals et leur misere?'
He, quel pastour, he, quel bealpere,
Eiant compassion si fiere,
Dont pour le poeple fuist plourant!
U est qui plourt en la manere?
Ne say: pitiés s'en vait derere,
Les oils du prelatz sont secchant.

Par son prophete nostre sire
Se pleingt, et dist q'a son martire 19970
Il ot souffert et attendu;
Si agardoit, mais nul remire
Des gentz, qui pour ses mals suspire,
Du sanc qu'il avoit espandu
Dessur la croix en halt pendu.
C'estoit la pleignte de Jhesu,
Et ensi croy q'om porra dire
Au temps present soit avenu;
Car n'est pour homme ne pour dieu
Que nostre prelat se detire. 19980

Valeire conte en son escrit
D'un Roy d'Athenes qui fuist dit
Chodrus, q'adonques guerroia
A ceaux d'Orense, car soubgit
Les voit avoir: et en tiel plit
Son dieu Appollo conscilla,
Devoutement et demanda
Qui la victoire enportera;

19961 encompleignant

Et l'autre a ce luy repondit,
Son propre corps s'il ne lerra 19990
Occire en la bataille la,
Ses gentz serroient desconfit.

Et quant ly Roys oïst ce dire,
Qu'il l'un des deux estuet eslire,
Ou d'estre proprement occis,
Ou souffrir de sa gent occire,
Mieux volt son propre corps despire,
Ainz que ly poeples fuist periz.
Dont changa ses roials habitz
Au jour q'il la bataille ot pris, 20000
Que l'en ne le conoist pour sire,
Si fuist tué des anemys:
Pour la salut que ses soubgitz
Il souffrist mesmes le martire.

D'un tiel paien quant penseras,
Responde, Evesque, quoy dirras?
Voies tu soul pour ta gent morir?
Tu puiss respondre et dire, Helas!
Que tu le cuer si couard as,
Dont tu te voies bien abstenir: 20010
Ainçois lerras trestous perir,
Q'un soul doy de ta main blemir.
Mais es tu donques bons prelatz?
Certes nenil, mais pour cherir
Le corps, qui puis te fra venir
A l'evesché qui tient Judas.

Ne say a qui puiss ressembler
Le fol prelat de son mestier,
Mais sicomme dieus le ressembloit
Au prestre qui se fist passer, 20020
Et puis ly deacne, sanz aider
A l'omme qui naufré gisoit,
Et grant souffraite d'aide avoit:
Chascun des deux les mals veoit,
Mais nuls le voloit socourir,
Tanq'au darrein y survenoit
Uns paiens, qui le socourroit,
Evesque, pour toy vergonder.

Mal fait le poeple q'est nounsage,
Pis font les clerks, qui sont plus sage.
Et meément quant sont pastour 20030
Et laissent deinz leur pastourage

20030 plussage

L'ouaille de leur fol menage
 Tourner en chievre de folour :
 Pour ce dist dieu q'en sa furour
 Il est irrez du grant irrouer
 Sur les pastours de tiel oultrage ;
 Si dist qu'il serra visitour
 Du chievre aici, dont fait clamour
 Danz Zakarie en son langage. 20040

Saint Ysaie aici nous dist :
 'Way vous, prelatz, qui l'espirit
 Du sapience en vous celetz,
 Sique nul autre en ont prouffit !'

Ce n'est pas charité parfit,
 Si vous soietz esluminez,
 Et l'autre en tenebrour veietz
 Errer et ne les socourretz :
 Vo clareté dieus par despit
 Esteignera, car c'est pecchés, 20050
 Qant ordre s'est desordinez
 Et clerc fait contre son escrit.

Way vous, ce disoit Ysaie,
 Qui les cliefs avetz en baillie,
 Les huiss du ciel tout avetz clos,
 Vous n'y entretz de vo partie,
 Et d'autre part ne souffretz mie
 Entrer les autres a repos :
 Enpris avetz malvois pourpos,
 Qant meulx ne gardetz le depos 20060
 Quel dieus en vostre prelacie
 Vous ad baillé, q'arere dos
 Voz almes mettez et les noz :
 Tous devons pleindre vo folie.

Saint Pierre au jour du jugement,
 Qant il a dieu ferra present
 De la Judee qu'il guaigna,
 N'apparra pas tout voidement ;
 Saint Paul, q'aici gaigna la gent,
 Molt bell gaign y apportera, 20070
 Et saint Andreu lors appara,
 Achaie a dieu presentera,
 U tous les saintz serront present :
 Chascuns par ce qu'il conquesta
 Lors sa coronne portera
 En joye perdurablement.

20044 enont

Mais las ! quoy dirrons nous presentz,
 Qui suismes fols et negligenz
 Et point ne pensons de demain ?
 Helas ! comme suismes mal regentz,
 Qant pour noz almes indigentz 20081
 Nul bien apporterons du gaign !
 L'acompte serra trop vilain f. III
 Qant nous vendrons ove vuide main,
 U tout le mond serra presens ;
 Par l'evangile il est certain,
 Grant honte nous serra prochain
 Devant trestous les bones gens.

Puisqu'il ad dit de les Evesques,
 dira ore de les Archedeacnes,
 Officials et Deans.

L'Evesque en ses espiritals
 Ne poet soul porter les travaux ; 20090
 Ses Archedeacnes pour ce tient,
 Ses deans et ses officials,
 Qui plus luy sont especials,
 As queux correccioun partient
 De l'alme, ensi comme meulx covient.
 Mais ils le font ou mal ou nient,
 Car pour les luces temporals
 En tous pais u l'en devient
 Achater poet quiconque vient
 Les vices qui sont corporals. 20100

Le dean, qui son prouffit avente,
 Par tout met les pecchés au vente
 A chascun homme quelqu'il soit,
 Maisqu'il en poet paier le rente :
 La femme, ensi comme la jument,
 Voir et le prestre en son endroit
 La puet tenir du propre droit ;
 Maisque la bource soit benoit,
 Le corps ert quit de celle extente :
 N'ad pas la conscience estroit, 20110
 De l'argent perdre est en destroit,
 Mais du peccché ne se repente.

Si l'omme lais d'incontinence
 Soit accusé, la violence
 Du nostre dean tost y parra ;
 Car devant tous en audience

Lors de somonce et de sentence,
 Sil n'ait l'argent dont paiera,
 Sicomme goupil le huera :
 Mais la coronne, qui l'ira 20120
 De l'evangile la sequence,
 Tu scies quel homme ce serra,
 De son incest nuls parlera,
 C'est un misterie de silence.

Au plus sovent ce veons nous,
 Si huy a moy, demain a vous
 Sont les offices fortunant :
 Pour ce le dean q'est leccherous
 Les prestres qui sont vicious 20130
 A corriger s'en vait doubtant ;
 Car cil par cas qui fuist devant
 Accusé, puis ert accusant,
 Et lors porra de son corous
 A l'autre rendre tant pour tant :
 Ensi s'en vont entrasseurant,
 Ce que l'uns voet ce vuillont tous.

Ensi les prestres redoubtez
 Ensemble se sont aroutez,
 Qe l'un fait l'autre compaignie,
 Nest par qui soient affaitez : 20140
 De tant sont ils le plus haitez,
 Q'ils sont du soy juge et partie,
 Ensi vait quite la clergie.
 Mais d'autre part deinz sa baillie
 Les laies gens sont accusez
 Par covoitise et par envye ;
 Car plus d'assetz q'oneste vie
 Le dean desire les pecchés.

Asses plus fait prouffit puteine
 A nostre dean que la nonneyne ; 20150
 Car pour le lucre et l'avantage
 Que le chapitre ades y meine,
 De tieux y ad, sicomme demeine
 Qe vient du terre et du gaignage,
 Lessont au ferme le putage ;
 Et qui le prent en governage
 Meulx voit des putes la douszaine
 Qe mil des chastes. O hontage
 Des tieus pastours, qui leur tollage
 Pilont par voie si vileine ! 20160

20125 plussouent

Ensi le dean ove ses covines
 Par conjectures et falsines
 Ses berbis, come malvois pastour,
 Par les destours, par les gastines,
 Parmy les ronces et l'espines
 Laist errer, sique chascun jour
 Ils perdont laine, et cil pilour
 Reçoit le gaign de leur erreur,
 Si monte en halt de leur ruines.
 Vei la comme nostre correctour 20170
 Est de maltolt le collectour,
 Tout plain des fraudes et ravines.

Bien te souffist le confesser
 Vers dieu, si tu voldras laisser
 Tes mals par juste repentance ;
 Mais ce ne te puet excuser
 Au dean, qui te vient accuser,
 Pour dire que tu ta finance
 As fait a dieu, ainz ta penance
 Serra del orr, car la quitance 20180
 De dieu ne t'en porra quiter :
 Trop sont les deans du grant puis-
 sance,

Qant il me font desallouance
 De ce que dieus voet allouer.
 Jammais la dieu justice en soy
 Pour un tout soul mesfait, ce croi,
 Deux fois ne pune ; et nequedent,
 Combien q'au prestre tout en coy
 M'ai confessé deinz mon recoy
 Et pris ma peine duement, 20190
 Le dean encore doublement
 Voet outre ce de mon argent
 Avoir sa part, ne sai pour quoy :
 Qant dieus m'ad fait pardonement,
 Ma bource estuet secondement
 Faire acorder le dean et moy.

Ne sai ce que la loy requiert,
 Mais merveille est de ce q'il quiert
 Dedeinz ma bource m'alme avoir :
 A celle eglise se refiert 20200
 Qe d'autre vertu ne me fiert,
 Maisque luy donne mon avoir.
 Des tieus pastours quoy poet chaloir,

20135 servont

20141 plushaitez

Q'ensi laissent a nonchaloir
Ce q'au prouffit de l'alme affiert,
Et pour le lucre rescevoir
De l'orr par tout le decevoir
De leur ypocrisie appiert?

Puisq'il ad dit de les Correc-
teurs du sainte eglise, dirra ore
des perones Curetz de les
paroches.

Malvois essample nous apporte
De les paroches cil qui porte 20210
La cure, qant il sanz curer
Le laist, et des noz biens enporte
La disme, dont il se desporte;
Car ce ne voet il desporter,
Que vainement soy desporter
Ne quiert, mais ce q'il supporter
Des almes doit, point ne supporte:
Dont l'en puet dire et reporter,
Que cil n'est pas au droit portier
Pour garder la divine porte. 20220

Le temps present si vous curetz,
Voeir porras ces fols curetz
Diversement laissant leur cure,
Si vont errant par trois degres:
Ly uns se feigt q'il les decretz
Selone l'escole et l'escripture
Aprandre irra, mais la lettrure
Q'il pense illeques a construire
Ainçois serra des vanités,
De covoitise et de luxure, 20230
Que d'autre bien; c'est ore al hure
L'escole de noz avancez.

Du bonne aprise se descole
Qui laist sa cure et quiert escole,
U qu'il au vice escoloiant
S'en vait, qant celle pute acole,
Dont toute sa science affole.
O dieus, comme cil vait foloiant,
Q'ensi le bien q'est appendant
Au sainte eglise est despendant, 20240
Pour entrer la chaire fole,
U ja nuls clerics serra sachant,

20284 au lourduy

Ainz tant comme plus y vait entrant,
Tant plus sa reson entribole.

Par autre cause auci l'en voit,
Des fols curetz ascuns forsoit,
Qant laist sa cure a nonchaloir,
Et pour le siecle se pourvoit
Service au court par tiel endroit
Q'il puist au siecle plus valoir, 20250
Et ensi guaste son avoir.

Mais le dieu gre n'en puet avoir,
Car nuls as deux servir porroit
Sanz l'un ou l'autre decevoir;
Car cil qui fra le dieu voloir,
Servir au siecle point ne doit.

Cil q'est servant de la dieu court
Et pour servir au siecle court,
Fait trop mal cours a mon avis;
Car le fals siecle au fin tient court 20260
De tous les soens, mais dieus socourt
Du bien sanz fin a ses amys.
N'est pas de l'evangile apris
Cil q'ad de la paroche pris
La cure, s'il a dieu ne tourt
Pour faire ce qu'il ad enpris;
Car clerics qui tient du siecle pris
De sa clergie se destourt.

Clerics avancie n'est passanz vice, f. 113
Qui laist sa cure et quiert service 20270
Du chose que soit temporal,
Dont pile et tolt en son office,
Tout plain d'errour et d'avarice,
Siqu'il offent de double mal:
Vers dieu primer et principal
Mesfait, qant il l'espiritual
Ne cure de son benefice;
Au monde auci n'est pas loial,
Qant il le bien q'est mondial
Mesprunt par fraude et injustice. 20280

La loy ne voet que l'en compiere
Ou par brocage ou par priere
La cure q'est spirituels;
Mais au jour d'uy voi la manere
De celle loy tourner arere.
Ce di pour ces clerics curials,

Qui lettres ont emperials
Pour prier a les cardinals,
Voeir et au pape en sa chaire;
Dont plus profite as tieus vassals 20290
La penne que les decretals,
Qant Simonie est messagere.

Ensi je di des tieus y sont,
Qui de leur cure s'absentont
Pour servir a ces nobles courtz;
Par covoitise tout ce font
D'encress avoir, q'ils esperont
Pour estre encoste les seignours:
Mais ils ne pensont pas allours
Q'il sont des almes curatours, 20300
Ainz q'ils le corps avanceront;
Dont ils laissent s'ouaille a l'ours:
Au fin ne sai de tiels pastours
Coment a dieu responderont.

Des fols curetz auci y a,
Qui sur sa cure demourra
Non pour curer, mais q'il la vie
Endroit le corps plus easera;
Car lors ou il bargaignera
Du seculiere marchandie, 20310
Dont sa richesce multeplicie,
Ou il se donne a leccherie,
Du quoy son corps delitera,
Ou il se prent a venerie,
Qant duist chanter sa letanie,
Au bois le goupil huera.

Ce puet savoir chascun vivant,
Plus que nul bien du siecle avant
La disme, q'est a dieu donne,
Perest en soy noble et vaillant, 20320
Car de la bouche au toutpuissant
La disme estoit saintefie,
Si est le prestre auci sacre;
Dont sembleroit honestete
Que disme et prestre droit curant
Ne duissent estre en leur degre
De la mondaine vanite
Ne marchandie ne marchant.
Et d'autre part qui residence
Fait en sa cure, et ove ce pense 20330

20307 maisqil

Corrompre ce qu'il duist curer
D'incest et fole incontenance,
Trop fait horrible violence,
D'ensi ses berbis estrangler
Pour faire au deable son larder.
He, dieus, comment porra chanter
Sa messe cil qui tielle offense
Ferra? Car pis, au droit juger,
Est l'alme occire q'a tuer
Le corps, q'est plain du pestilence.

Si les curetz maritz ne soient, 20341
Des femmes nepourqant s'esjoient
Trestout en ease a leur voloir;
Dont tiele issue multeploient,
Que si leur fils enheritoient
Et de l'eglise fuissent hoir,
En poy des lieux, sicomme j'esperoie,
D'escheate q'en duist escheoir
Au court de Rome gaigneroient
Les provisours; pour ce du voir 20350
N'en say la cause aparcevoir,
Si l'autre gent ne me disoient.

He, dieus, come sont les charites
Au temps present bien ordinez!
Car qant viels homme ad femme belle
Deinz la paroche et les nuytees
Ne puet paier ses duetes,
Nostre curiet, ainz q'om l'apelle,
Enprent sur soy l'autry querelle, 20360
Si fait le paiement a celle,
La quelle se tient bien paieez.
Vei la le haire et la cordelle,
Dont nostre curiet se flaielle,
Au fin q'il soit de dieu loez.

Les foles femmes mariez,
Qant n'ont du quoy estre acemez
Du queinterie et beal atir,
Lors s'aqueintont des fols curetz
Qui richement sont avancez,
Et par bargaign se font chevir, 20370
Dont l'un et l'autre ad son desir;
La dame avra de quoy vestir,
Et l'autre avra ses volentés.
Des tiels miracles avenir

Soventes fois om poet oïr,
Ne sai si fable ou verités.
Plus *que* corbins ou coufle ou pie
Ensur volant toutdis espie
Caroigne dont porra manger,
Le fol curet de sa partie 20380
Matin et soir sanz departie
Enquerre fait et espier,
U la plus belle puet trover :
Mais lors l'estuet enamourer
A tant de la phisonomie,
Q'il tout l'offrende del autier
Ainçois dorra pour son louer,
Qu'il n'ait le cuill en sa baillie.
Om voit tout gaste et ruïnose
L'eglise q'est sa droite espouse, 20390
De celle ne luy puet chaloir,
Mais *que* s'amie l'amerouse
Soit bien vestue et gloriouse ;
A ce met trestout son pooir :
Du *nostre* disme ensi l'avoir
Degaste en belle *femme* avoir.
O quelle cure perillouse
Pour nous essampler et movoir,
Quant meïne encontre son devoir
Si orde vie et vicieuse ! 20400
Dicus dist, et c'est tout verité,
Que si l'un voegle soit mené
D'un autre voegle, tresbucher
Falt ambedeux en la fossée.
C'est un essample comparé
As fols curetz, qui sans curer
Ne voient pas le droit sentier,
Dont font les autres forsvoier,
Qui sont apres leur trace alé ;
Car fol errant ne puet guider, 20410
Ne cil comment nous puet saner,
Qui mesmes est au mort naufré ?
Comment respondra cil a dieu
Sur soy la cure q'ad receu
Del autry alme gouverner,
Quant il n'ad mesmes de vertu
Q'il de son corps s'est abstenu,
Dont s'alme *propre* puet garder ?

20375 Souentesfois

20383 plusbelle

20412 endonneront

L'en soloit dire en reprover,
'Cil qui sanz draps se fait aler, 20420
Mal *averra* son garçon vestu ;
Ainz quant l'ivern vient *aprocher*,
Ne s'en porra lors eschaper
Du froid, dont il serra perdu.
Et tout ensi perdu serroient
Cil qui l'essample suieroient
De la voeglesce au curatour :
Quant l'un ne l'autre bien ne voient,
Falt q'ambedeux tresbucheroient
Par negligence et fol erreur. 20430
Tiel est le siecle au *present* jour,
Car d'orguil ou de fol amour
Les clerics qui nous conduieroient
Sont plein : ce piert *par* leur atour,
Car qui q'ait paine ne dolour,
Ils se reposent et festoient.
Les bons curetz du temps jadis,
Qui benefice avoient pris
Du sainte eglise, deviseront
En trois parties, come je lis, 20440
Leur biens, siq'au primer divis
A leur altier part en donneront,
Et de la part seconde aideront,
Vestiront et sauf herbergeront
De leur *paroche* les mendis ;
La tierce part *pour* soy garderont :
D'oneste vie ils essampleront
Et leur voisins et leur soubgitz.
Gregoire en sa morale aprise
Dist *que* les biens du sainte eglise 20450
Sont *propre* et due au *povere* gent ;
Mais no curiet d'une autre guise,
Qui du pellure blanche et grise
Et d'escarlate finement
Se fait vestir, dist autrement ;
Que de les biens primerement
Son orguil clayme la reprise,
Mais quant il ad secondement
Vestu s'amyie gaiement,
Au paine lors si tout souffise. 20460
O fols curetz, entendetz ça : f. 113
Osee a vous *prophetiza*

D'orguil et fornicacioun :
'Et l'un et l'autre regnera
En vous,' ce dist, 'et pour cela
De dieu n'avetz avisioun :
Mal faitez vo provisioun :
Car quant de vo mesprisioun
Dieus a reson vous mettera,
Pour faire la conclusioun 20470
Du *vostre* fole abusioun,
Orguil pour vous respondera.'
O fol curiet, di quoy quidetz,
Qui tantes pellicouns avetz
Du vair, du gris, de blanche ermyne,
Dont portes tes manteals fourrez,
Serras tu d'orguil excusez,
Quant dois respondre au loy divine ?
Je croy *que* noun ; ainz en ruine
Iretz, car fole orguil decline 20480
Tous ceaux qui sont de luy privez :
Dont m'est avis *par* reson fine,
Meulx valt ly sacs qui bien define,
Que la pellure au fin dampnez.
O fol curiet, tu puiss savoir,
D'orguil ne dois socour avoir ;
Mais de t'amyie quoy dirras,
Selle au busoigne puet valoir ?
Non voir : de luy ne poet chaloir,
Tant meinz valt *comme* plus l'ameras.
Quoy Salomon t'en dist orras, 20490
Qu'il dist q'amyie entre tes bras
C'est un lieu *pour* ton grange ardoir,
Q'autre *proffit* n'en porteras :
Ton ris se passe et tu plouras,
Siq'en la fin t'estuet doloir.
Puisq'il ad dit des Curetz, dirra
ore des autres prestres Annuelers,
qui sont sans cure.
Ils sont aici *pour* noz deniers
Prestres qui servent volentiers,
Et si n'ont autre benefice, 20499
Chantont par *ains* et *par* quartiers
Pour la gent morte, et sont suitiers
Communement a chascun vice.

20527 Plusque

Molt valt du messe le service,
Mais quant les prestres sont si nice,
Ne say si ly droit Justiciers
Les voet oïr de sa justice ;
Car de luxure et d'avarice
Dieus ne voet estre *parçoniens*.
Jadys le nombre estoit petit
Des prestres, mais molt fuist parfit,
Et plain d'oneste discipline 20511
Sanz orguil ne fol appetit ;
Mais ore ensi *comme* infinit
Om voit des prestres la cretine,
Mais soy sont de la viele line ;
Ainz, *comme* la vie q'est porcine,
Chascun se prent a son delit,
Barat, taverne et concubine :
Ce sont qui tournont la doctrine
Du sainte eglise a malvois plit. 20520
Om dist q'un prestre antiquement
Valoit en soy tout soulement
Plus *que* ne font a ore trois ;
Et nepourquant au jour *present*
Un prestre soul demande et prent
De son stipende le surcrois
Plus *que* ne front quatre ainçois.
Que chalt mais ils eïent harnois
Sicomme seignour du fin argent ?
Si vont oïceus *par* tous les moys, 20530
Tout plain des ris et des gabbois,
Et si despendont largement.
Qui prent louer d'autri vivant,
Par reson doit servir atant,
Ou autrement souffrir destresce
Du loy, si l'en n'est pardonnant.
Quoy dirrons lors du prestre avant,
Qui *pour* chanter la sainte messe
Les biens du mort prent a largesce,
Mais pour luxure et yvresce 20540
Ne puet tenir le covenant
A l'alme ardante peccheresse ?
Je croy le fin de sa lachesce
Serra d'orrible paine ardent.
Comment aici bien priera
Qui point n'entent ce qu'il dirra ?

Car ce nous dist saint Augustin,
 Que dieus un tiel n'escoulera.
 O prestre lays, di quoy serra
 De toy, q'ensi par mal engin 20550
 As pris l'argent de ton voisin
 Pour ton office q'est divin
 Chanter, et tu n'as a cela
 L'entendement de ton latin :
 Trop en serras hontous au fin,
 Qant dieus de ce t'accusera.
 Et d'autre part ce nous ensense
 Uns clerics, que meulx valt innocence
 Du prestre, combien q'il n'est sage,
 Des lettres que celle eloquence 20560
 Qui s'orguillist de sa science
 Et fait des pechés le folage.
 O quel dolour, o quel damage
 De la science en presterage,
 Qant ils de leur incontinence
 Tienont l'escole de putage !
 Ly fols berchiers q'est sanz langage
 Mieulx fait des tieus sa providence.
 Ce dist Clement, q'om doit choisir
 Tiels qui sont able a dieu servir 20570
 En l'ordre qui tant est benoit :
 ' Meulx valt,' ce dist, ' un poy tenir
 Des bons, que multitude unir
 Des mals ' ; et saint Jerom disoit
 Q'un prestre lay meulx ameroit
 Par si q'il saint prodomme soit,
 Q'un clerc malvois, qui contenir
 De les pechés ne se voloit ;
 Mais l'un ne l'autre souffisoit
 A si saint ordre maintenir. 20580
 Ly prestres porra bien savoir,
 Que ja n'ait il si grant savoir,
 En cas q'orguil de ce luy vient
 Dieus ne luy voet en pris avoir,
 Et s'orison pour nulle avoir
 Ne voet otr ; mais s'il avient
 Que prestre ensi comme ly covient
 Son latin sache et se contient
 Solonc son ordre et son devoir,
 Lors, qant bien sciét et bien se tient,

20555 enserras

Dieus sa priere en gré retient, 20591
 Si nous en fait le meulx valoir.
 En s'evangile dieus du ciel
 Dist, prestres sont du terre seel,
 Si sont du monde auci lumere :
 Ce fuist jadis, mais ore tiel
 Ne sont ils point, car naturel
 Est que seel houste et mette arere
 Corrupcion, mais leur manere
 Nous est corrupte et molt amere,
 Et vers dieu prejudiciel ; 20601
 Auci leur vie n'est pas cliere,
 Ainz est obscure et angulere,
 Tout plain du vice corporiel.
 Sicomme le livre nous aprent,
 Seel ces deux pointz en soi comprert ;
 L'un est qu'il quart en bon odour
 Les chars, mais puis secondement
 Toute la terre qu'il pourprent
 Baraigne fait, siq'a nul jour 20611
 Doit mais porter ne fruit ne flour :
 Du seel jadyz ly conquerrou
 Firont semer le tenement
 Dont ils estoient venqueour,
 Pour le destruire sanz retour
 En signe de leur vengeance.
 Au seel pour les gens savourer
 Ne vuil les prestres comparer,
 Combien q'ils soient seel nomé ;
 Mais je les doy bien ressembler 20621
 Au seel q'ensi fait baraigner,
 Dont bonnes mours sont exilé :
 Car ils nous ont ensi salé
 Des vices dont sont mesalé,
 Que nous ne poons droit aler ;
 Car champs du neele q'est semé
 Ne porra porter autre blée,
 Mais tiel dont om l'ad fait semer.
 De mal essample qui survient
 Du prestre grant mal nous avient, 20631
 Que ce nous met en fole errance
 Dont nous doubtons ou poy ou nient
 Les vices ; car qant nous sovient
 Comment d'aperte demoustrance

20592 enfait

Veons du prestre l'ignorance,
 Comment il salt, comment il lance,
 Comment au bordel se contient,
 De son barat, de sa distance,
 De corps de nous est en grevance
 Et l'alme ascun proufit ne tient. 20640
 Jadis soloient sanz offense
 Ly prestre garder pacience ;
 Car dieus leur dist en la manere,
 Que s'om les bat ou fiert ou tence,
 En pees devant la violence
 Souffrir sanz soy meller arere :
 Mais au jour d'uy s'acuns les fiere,
 Plus fiers en sont que nulle fiere,
 Et molt sovent d'inpacience
 Ly prestres, ainz q'il ait matiere, f. 114
 Soudainement plus que fouldrere 20651
 Du maltalent l'assalt commence.
 Responde, o prestre, je t'appelle,
 Di q'est ce q'a ta ceinturelle
 Tu as si long cutel pendu :
 As tu vers dieu pris ta querelle
 Ou vers le deable ? Ne me cele.
 Bien scies dieus maint en si halt lieu
 Que tu ne puiss mesfaire a dieu ;
 Ne tiel cutel unques ne fu 20660
 Q'au deable espande la boelle ;
 Et qant au siecle, bien scies tu,
 A toy la guerre ont defendu
 La viele loy et la nouvelle.
 Mais de nature ensi je lis,
 Qant s'abandonne as fols delitz
 La beste au temps luxuriant,
 Devient plus fiers et plus jolis ;
 Et si d'ascun lors soit repris,
 Combat et fiert du maintenant : 20670
 Ore ay la cause dit atant,
 Dont vont les prestres combatant,
 Au ruyteison qant se sont pris ;
 Si vont oiceus par tout errant,
 Les femmes serchant et querant,
 Dont font corrompre les paiis.
 O prestre, q'est ce courte cote ?

20647 au lourduy

20668 plusfiers

20648 Plusfiers ensont

20679 plusbien

20651 plusque

20712 enboit

L'as tu vestu pour Katelote,
 Pour estre le plus bien de luy ?
 Ta coronne autrement te note. 20680
 Et d'autre part qant tu la note
 Au lettron chanteras auci,
 U est, en bonne foy me di,
 Sur dieu ton penser, ou sur qui ?
 Dieus ad la vois, mais celle sote
 Avera le cuer. He, dieus mercy,
 Comme est l'eschange mal party
 Du chapellain q'ensi s'assote !
 Mais sont ly prestre baratier ?
 Oyl ; et si sont taverner ; 20690
 C'est leur chapelle et leur eglise :
 Du tonel faisoient leur altier,
 Dont leur chalice font empler,
 Si font au Bachus sacrefise,
 Et de Venus en mainte guise
 Dient par ordre le servise,
 Tanque yveresse y vient entrer
 Et prent saisine en la pourprise,
 Que tout engage a la reprise
 Et la legende et le psaltier. 20700
 Aaron dieus ce commandoit,
 Au temps q'il entrer devoit
 Le tabernacle, lors qu'il vin
 Ne autre liquour beveroit,
 Dont il enyverer porroit,
 Du viele loy c'estoit le fin :
 Mais au temps d'ore ly cristin
 Par resonn serroit plus divin ;
 Et nepourqant par tout l'en voit,
 Si prestre au soir ou a matin 20710
 Porra tenir le crusequin,
 Ne laist pour dieu maisq'il en boit.
 Le prestre en s'escusacioun
 Dist, simple fornicacioun
 Est celle, qant fait sa luxure ;
 Si dist qu'il du creacioun
 Pour faire generacioun
 Le membre porte et la nature,
 Comme font ly autre creature.
 Ensi s'excuse et se perjure ; 20720

Car combien q'inclinacioun
Le meyne a naturele ardure,
Il porte un ordre pardessure
Du chaste consecracioun.

Ne sont pas un, je sui certains,
Ly berchiers et ly chapelains,
Ne leur peché n'est pas egal,
L'un poise plus et l'autre meinz :
Car l'un ad consecrez les meins
Et fait le vou d'especial 20730

A chasteté pour le messal,
Qu'il doit chanter plus secretal
A dieu, dont il est fait gardeins
De l'autre poeple en general ;
Par quoy les mals du principal
Del autry mals sont plus vileins.

O prestre, enten quoy Malachie
Te dist, qant tu du leccherie
Ensi te voldras excuser :
Il dist, qant tu de ta folie 20740

A l'autier en pollute vie
Viens envers dieu sacrefier,
Pour ton offrende ensi paier,
Tu fais despire et laidenger
Ton dieu. He, quelle ribaldie !
Tu qui nous duissetz essampler
Pour chaste vie demener,
Serras atteint de puterie.

Le prestre en halt ad le chief rées
Rotond sanz angle compassez, 20750
Car angle signifie ordure,
Mais il doit estre nettoiez,
Decouvert et desvolupez
De toute seculiere cure :

Coronne porte pardessure,
Dont il est Roys a sa mesure,
Depuisq'il est abandonnez
A dieu servir ; car l'escripture
Dist que cil regne a bon droiture
Qui s'est a dieu servir donnez. 20760

Ly prestre auci s'en vont tondant
Entour l'oraille et pardevant,
Sique leur veue et leur oie
Soient tout clier aparceivant
Sanz destourbanche tant ne qant

Le port du nostre frele vie,
Dont ils ont resçu la baillie :
Mais qant ils sont de leur partie
Contagious en leur vivant,
Ne sai quoy l'ordre signifie ; 20770
Mais nous suions leur compaignie,
Et ils vont malement devant.

He, dieus, comme faisoit sagement
Cil qui par noun primerement
Les nomma prestres seculiers !
Car ils n'ont reule en vestement,
Ne reule en vivre honestement
Vers dieu, ainçois come soldoiers
Du siecle sont et baratiars,
A trestout vice communiers 20780
Plus que ne sont la laie gent :
Ensi sont prestre chandelliers
Du sainte eglise et les piliars
Sanz lumere et sanz fondement.

Ore dira de l'estat des Clergons.

Des noz clergons atant vous di,
Primer pour parler de celly
Qui se pourpose plainement
As ordres prendre, cil parmy
Se doit du cuer et corps auci
En sa jovente estroitement 20790
Examiner primerement
S'il porra vivre chastement :

Car lors serra le meulx garni,
Qant il ad bon commencement ;
Et s'il commence malement,
Au fin serra le plus failly.

L'en dist, et resoum le consente,
Du bonne plante et de bonne ente
Naist puis bon arbre et fructuous :
Icest essample represente, 20800
Si clergons soit en sa jovente
De son corps chaste et vertuous,
A dieu servir et curius,
Et qu'il ne soit pas covoitous
A prendre l'ordre pour la rente
Dont voit les autres orguillous,
Lors serra vers dieu graciuous,
Qui sciet et voit le bon entente.

Clercs qui sert deinz la dieu mesoum
Doit estre honneste par resoum ; 20810
Car l'escripture ensi devise,
Disant par droit comparisoum
En resemblance ly clergoum
Fenestre sont du sainte eglise.
Car la fenestre y est assisse
Pour esclarcir deinz la pourprise,
Dont tous voient cils envioum ;
Et ly clergons en tiele guise
As autres doit donner aprise
D'oneste conversacioun. 20820

Mais pour descrire brief et court
Selonc le siecle q'ore court,
L'en voit que clergoum maintenant
Nounpas a la divine court
Pour la vertu del alme tout,
Ainz pour le vice s'est tournant :
Cest doel, car du malvois enfant
Croist malvois homme, puis suiant
Du mal clergon mal prestre sourt ;
Car qant le mal primer s'espant, 20830
Au paine est un du remenant
Qui de sa voie ne destourt.

Ore dira de l'estat des Religions, et commencera primerement a ceux qui sont possessioners.

Si nous regardons entre nous
L'estat de ces Religions,
Primer de les possessioners,
Cils duissent estre curius
A prier dieu le glorius f. 115
Dedeinz leur cloistres et moustiers
Pour nous qui susmes seculiers :
C'est de leur ordre ly mestiers, 20840
Car pour ce sont ils plentevous
Doez des tous les biens pleniars ;
Sique pour querre les deniers
Aillours ne soient covoitous.
Saint Augustin en sa leçon
Dist, tout ensi comme le piscoun
En Feaue vit tantsolement,
Tout autrecy Religions

Prendra sa conversacioun
Solonc la reule du covent 20850
El cloistre tout obedient :
Car s'il vit seculierement,
Lors change la condicioun
Del ordre qu'il primerement
Resceut, dont pert au finement
Loer de sa professioun.

Solonc la primere ordinance
Ly moigne contre la plesance
Du char s'estoient professez,
Et d'aspre vie la penance 20860
Suffriront ; mais celle observance
Ore ont des toutes partz laissez :
Car gule gart tous les entrez,
Que faim et soif n'y sont entrez
Pour amegrir la crasse pance ;
Si ont des pelliçoums changez
Les mals du froid et estrangez,
Que point ne vuillont s'aqueintance.

La viele reule soit manger
Piscoun, mais eist le voet changer, 20870
Qant il les chars hakez menu
Ou bien braiez deinz le mortier
Luy fait confire et apporter,
Et dist que tieles chars molu
Ne sont pas chars, et ensi dieu
Vult decevoir et est deceu :
Car il ad tant le ventre chier,
Q'il laist de l'alme ainçois le pru,
Q'il ait un soul repast perdu, 20880

Ne say qui dance ne qui joute,
Mais bien say, qant sa large joute
Ly moignes tient tout plein du vin,
Par grant revell vers soi l'adjoute
Et dist que c'est la reule joute ;
Ne croi point de saint Augustin,
Ainz est la reule du Robyn,
Qui meyne vie de corbyn,
Qui quiert primer ce qu'il engouste
Pour soi emplir, mais au voisin 20890
Ne donne part, ainz comme mastin
Trestout devore, et mye et crouste.
Tout scievent bien que gloutenie

Serra du nostre compaignie,
Car nous avons asses du quoy
Dont nous mangons en muscerie
Le perdis et la pulletrie,
Ne chalt qui paie le pour quoy ;
Et puis bevons a grant desroy,
Et ensi prions pour le Roy, 20900
Q'est fondour du nostre Abbacie.
Si laissons dormir tout en coy
La charité que nous est poy,
Et faisons veiller danz Envy.

De saint Machaire truis lisant,
Q'il de ses cloistres vit venant
Le deable, q'ot dedeinz esté.
Machaire luy vait conjurant,
Et l'autre dist sa loy jurant,
Q'il ot un poudre compassé, 20910
Le quel au cloistre avoit porté
Et deinz le chaperon soufflé
De ses commoignes, que par tant
Ne serroit la fraternité
Jamais apres en charité
Ainz en Envy descendant.

Del chaperon aval ou pitz
S'est descendu de mal en pis
Le poudre dont ay dit dessure,
Et deinz le cuer racine ad pris ; 20920
Dont moigne sont d'envye espris,
Que l'un de l'autre ne s'assure :
Trop fuist du male confiture
Le poudre, q'a desconfiture
Par force ad charité soubmis ;
Sique d'envie celle ardure
El cuer du moigne par nature
Demoert et demorra toutdis.

Qui bons est, s'il bien se contient,
Droitz est et au resoun partient 20930
Qu'il d'autres bons demeine joye,
Car autrement tout est pour nient.
Saint Jerom dist que ce n'avient
Que de ma part je bien ferroie,
Si d'autry bien envierioie,
Car si bon suy, bons ameroie,
Semblable l'un ove l'autre tient ;
Rose en l'urtie a quoy querroie,

Ou comment je bons estre doie,
Qant male envie au cuer me prient ;
Ly moignes se solt professer, 20940
Qant il le siecle volt lesser ;
Ensi dions que nous lessons,
Mais c'est al oill, car du penser
L'onour et prouffit seculier,
Ce q'ainz du siecle n'avoions,
Dessoubz cest habit le querrons ;
Car nous qui fuismes ainz garçons
Pour sires nous faisons clamer,
La reverence et demandons : 20950
Ensi fuiant nous atteignons
Ce que nous soloit esloigner.

Cil moigne n'est pas bon claustral
Q'est fait gardein ou seneschal
D'ascun office q'est forein ;
Car lors luy falt selle et chival
Pour courre les pais aval,
Si fait despense au large mein ;
Il prent vers soy le meulx de grein,
Et laist as autres comme vilein 20960
La paille, et ensi seignoral
Devient le moigne nyce et vein :
De vuide grange et ventre plein
N'ert pas l'acompte bien egal.

Du charité q'est inparfit,
' Tout est nostre,' ly moignes dist,
Qant il est gardein du manoir :
En part dist voir, mais c'est petit ;
Car il de son fol appetit
Plus q'autres sept voet soul avoir : 20970
A tiel gardein, pour dire voir,
Mieux fuist le cloistre que l'avoir,
Dont tolt as autres le prouffit.
Seint Bernards ce nous fait savoir,
Que laide chose est a veoir
Baillif soubz monial habit.

Ly moignes qui se porte ensi,
Il est sicomme mondein demy,
Si vait bien pres d'apostazie,
Qant il le siecle ad resaisi 20980
Et s'est du cloistre dissaisi.
Ne say du quoy se justefie,
Q'il n'ait sa reule en ce faille :

Ne je croy point que sa baillie
Du terre ne de rente auci
Luy porra faire garantie,
Vers dieu q'avoit sa foy plevie,
Primement qant se rendi.
Jerom nous dist que celle ordure
Que moigne porte en sa vesture 20990
Est un signal exteriour
Qu'il sanz orguil et demesure,
Du netteté q'est blanche et pure,
Ad le corage interieur :
Mais nostre moigne au present jour
Quiert en sa guise bell atour
Au corps, et l'alme desfigure :
Combien q'il porte de dolour
La frocque, il ad du vein honour
La cote fourré de pellure. 21000

En un histoire escript y a
Q'un grant seignour qui dieus ama
S'estoit vestu du vile haire,
Qant Roy Manasses espousa
Sa file ; mais pour tout cela
Volt sa simplece nient retraire,
Ainz s'obeit en son affaire
Plustost a dieu q'a l'omme plaire ;
Dont il tous autres essampla,
Que l'en ne doit au corps tant faire 21010
Dont l'en porroit orguil attraire :
Ne say quoy moigne a ce dirra.

De cest essample, dont dit ay,
Cil moigne puet avoir esmay
Qui pour le mond se fait jolys,
Ne quiert la haire ainz quiert le say
Tout le plus fin a son essay,
Ove la fourrure vair et gris,
Car il desdeigne le berbis ;
L'aimal d'argent n'ert pas oubliz, 21020
Ainz fait le moustre et pent tout
gay
Au chaperon devant le pis :
C'est la simplece en noz pais
Des moignes et de leur array.
Le moigne sa religioinn
Doit garder par discrecioun

21017 plusfin

D'umilité et de simplece ;
Mais ce ne voet il faire noun,
Ainçois il hiet oir le noun f. 116
Du moigne, au quel il se professe ;
Et nepourqant la bercheresse 21031
Estoit sa miere, et sanz noblesce
Par cas son piere estoit garçon :
Mais qant le bass monte en haltesce,
Et la poverte est en richesce,
N'est riens du monde si feloun.

Trop erre encontre le decret
Le moigne qui quiert propreté,
Mais il du propre ad nepourqant
Les grandes sommes amassé, 21040
Dont il son lucre ad pourchacié
Du siecle, ensi come fait marchant,
Et pour delit tient plus avant
A la rivere oiseals volant,
La faulcon et l'ostour mué,
Les leverers auci courant
Et les grantz chivals sojourant,
Ne falt que femme mariée.

Du femme ne say consailler,
Mais je me puis esmerveiller, 21050
Car j'ay de les enfantz oy
Dont nostre moigne pourchacier
Se fist, qant il aloit chacer
Un jour et autre la et cy ;
Mais ils ne poent apres luy
Enheriter ; pour ce vous dy,
Les grandes sommes falt donner
Dont ils serront puis enrichy :
Si charité le porte ensi,
A vostre esgard le vuil lesser. 21060

Mais moigne toutez les delices
Du siecle avoir ne les offices
Ne puet a nous semblablement ;
A luy sont maintes choses vices
Que nous poons a noz services
Avoir a tenir bonnement :
Siqu'il le siecle q'est present
N'ad point, et s'il au finement
Pert l'autre pour ses injustices,
L'en porra dire voirement 21070

21043 plusauant

Que moigne sur toute autre gent
 Ad deux fortunes infelices.
 Ensi les moignes officers,
 Les gardeins et les tresorers,
 Erront du fole governance;
 Et si nous parlons des cloistrers,
 Ils sont des vices parconiers
 De murmur et de malvuillance,
 D'envie et de desobeissance;
 Chascuns s'en fuyt de la penance 21080
 Pour les delices seculiers
 Sanz garder la viele observance:
 Si je dehors voie ignorance,
 Auci voi je deinz les moustiers.
 Ly moigne, ensi comme truis escrit,
 Ne sont pas fait de leur habit;
 Combien q'ils l'ordre eiont resçu,
 Qant ils d'envie ont l'espirit,
 Ne say quoy valdra leur merit.
 Renars qui s'est d'aigneals vestu, 21090
 Pour ce n'est autres q'ainz né fu,
 Ne cil larons q'au benoit lieu
 S'en fuyt, par ce n'est pas parfit;
 Ne moigne auci qui s'est rendu,
 Combien q'il soit en halt tondu,
 Par ce n'est pas prodons eslit.
 Homme fait saint lieu, mais lieu par
 droit
 Ne fait saint homme en nul endroit;
 Ce piert d'essamples, car je lis
 Que Lucifer du ciel chaoit 21100
 En la presence u dieus estoit;
 Si fist Adans de paradis;
 Auci d'encoste dieu le fitz
 Judas perist, q'estoit malditz:
 Par quoy chascun bien savoir doit
 Que par l'abit que moigne ont pris,
 Ne par le cloistre u sont assis,
 Ne serront seint, si plus n'y soit.
 En basses caves se loggieront
 Jadis ly moigne et eshalcieront 21110
 De Jhesu Crist la droite foy;
 Du sac et haire vestu eront;
 Del caue beurent, et mangeront

21129 nemye

Del herbe: mais helas! avoy!
 Ly moigne a ore ensi comme Roy
 En grandes sales a desroy
 Se loggont et delices quieront:
 Grant nombre sont, mais petit voy
 Qui gardont la primere loy 21120
 De ceaux qui l'ordre commenceront.
 Par ceaux fuist nulle femme enceinte,
 De ceaux envie fuist exteinte,
 En ceaux n'iert orguillouse offense,
 Par ceaux silence n'ert enfreinte,
 De ceaux n'ert faite aucune plainte
 Deinz leur chapitre en audience;
 Ainz sobreté et continence
 En unité et pacience
 Du charité ne mye feinte
 Lors gouvernoit leur conscience: 21130
 Chascuns fist autre reverence
 Et servoit dieu en vie seinte.
 Mais ore est autre que ne fu;
 Danz Charité n'ad mais refu,
 Car danz Envie l'ad tué,
 Et danz Hayne y est venu,
 Q'a no covent ad defendu
 Que mais n'y soit danz Unité;
 Danz Pacience est esragé,
 Danz Obeissance s'est alé, 21140
 Qui danz Orguil nous ad tollu;
 Et danz Murmur ad en secré
 Danz Malebouche professé,
 Qui pres tout l'ordre a confondu.
 Mais danz Incest, qant ly pierra,
 Sur les Manoirs visitera,
 Si meyne danz Incontinence
 Ovesque luy, et puis vendra
 Danz Delicat, qui se rendra
 Pour les donner plaine evidence: 21150
 Ces sont les trois par qui despense
 Poverte vient et Indigence,
 Puis vient Ruine apres cela,
 Qui les maisons en sa presence
 Degaste ensi comme pestilence
 Par les Manoirs u qu'il irra.
 Ensi comme Moigne, ensi Canonnier

Ne tient la reule du canonn;
 Mais l'un et l'autre nepourquant
 La fourme de Religium 21160
 Gardont, mais la matiere noun:
 Car de la cloque vont gardant
 Leur heure et leur chapitre avant,
 Et quan'q'ail oill est apparant;
 Mais qant a leur condicioun,
 Le poudre dont ay dit devant
 Toutdis d'envie tapisant
 Demoert dedeinz le chaperoun.
 Mais pour final gouvernement 21169
 Danz Vice est Abbes au present,
 Par quoy danz Gule et danz Peresce
 Sont fait par le commun assent
 Ses chapellains; et ensemment
 Danz Veine gloire se professe,
 A qui nostre Abbes se confesse;
 Danz Avarice ad la richesce,
 Qui danz Almoisme ascunement
 Ne laist a faire sa largesce;
 Ensi danz Conscience cesse,
 Qui soloit garder le covent. 21180

**Puisq'il ad dit des Religious
 possessioners, ore dirra del ordre
 des freres mendiantz.**

Si nous agardons plus avant,
 L'estat du frere mendiant,
 N'ert pas de moy ce que je dis,
 Mais a ce que l'en vait parlant
 Ensur trestout le remenant,
 Cist ordre vait du mal en pis:
 Et nepourquant a leur avis
 Ils dient q'ils a dieu le fils
 Sont droit disciple en leur vivant;
 Mais j'ay del ordre tant enquis, 21190
 Que freres ont le siecle quis
 Et sont a luy tout entendant.
 Mais d'une chose nequedent
 Les freres font semblablement
 Comme les disciples lors fesoient;
 De les disciples indigent
 Un soul n'estoit, ainz tielement

21181 plusaunt

Comme riens eiant trestout avoient:
 A cest essample tout se ploient
 Les freres et se multiploient 21200
 Des biens, mais c'est tout autrement;
 Car les disciples departoient
 As povres gentz ce q'ils tenoient,
 Mais cist le gardont proprement.
 Ils dient, la felicité
 Des freres c'est mendicité,
 Dont vont en ease par la rue:
 Car cil q'ad terre en propreté
 Falt labourer en son degré,
 Mais ils n'ont cure de charue, 21210
 Ainçois ont plus que la value,
 Car riche pecché les salue,
 Qui de ses biens leur ad donné
 Si largement en sa venue,
 Que plus ad celle gent menue
 Que l'autre q'ad ses champs semé.
 Ils nous prechont de la poverte,
 Et ont toutdis la main overte f. 117
 Pour la richesce recevoir;
 La covoitise ils ont coverte 21220
 Deinz soy, dont l'ordre se perverte
 Pour enginer et decevoir;
 Les eases vuillont bien avoir,
 Mais les labours pour nul avoir,
 Ainz vont oiceus comme gent deserte;
 De nulle part font leur devoir:
 Dont m'est avis pour dire voir
 Q'ils quieront loer sanz decerte.
 Ils ont maison celestial,
 Ils ont vesture espirital, 21230
 Ils ont la face simple et seinte,
 Ils ont corage mondial;
 Ils ont la langue liberal,
 Dont la mençoigne serra peinte,
 Ils ont parole belle et quainte
 Dont font deceipte a leur aqueinte,
 Ils sont ministre especial
 Du vice et ont vertu restreinte,
 Ils ont soubz leur simplesce feinte
 Muscé du siecle tout le mal. 21240
 Deux freres sont de la partie,

Qui vont ensemble sanz partie
 Les pais pour environner;
 Et l'un et l'autre ades se plie
 Au fin que bien leur multeplicie
 Du siecle; dont sont mençonger,
 Pour blandir et pour losenger
 Et pour les peccés avancer:
 L'un ad noun frere Ypocresie,
 Qui doit ma dame confesser, 21250
 Mais l'autre la doit relesser,
 Si ad noun frere Flaterie.
 Ipocresie vient au lit,
 Et est pour confessor eslit
 Pour ce q'il semble debonnaire;
 Et quant ma dame ad trestout dit,
 Lors Flaterie la blandist,
 Qui point ne parle du contraire,
 Car ce n'est pas de son affaire,
 Q'il quiert contricioun attraire 21260
 De nul ou nulle, ainz pour profit
 Assolt sanz autre paine faire;
 Et ensi gaigne le doaire
 De sa viande et son habit.
 Le frere qui son luere avente
 Dist a ma dame que jovente
 Du femme doit molt excuser
 La freleté de son entente;
 Dont il sovent plus entalente
 Le peccé faire que laisser, 21270
 Quant pour si poy voet relaisser.
 Mais s'om voldroit des mals cesser,
 Lors sciet le frere et bien le sente
 Que de son ordre le mestier
 Ne serroit plus a nous mestier,
 Et pour ce met les mals au vente.
 Ipocresie tielement
 Du dame et seignour ensemment
 Quiert avoir la confessioun;
 Mais Flaterie nequedent 21280

Par l'ordinance du covent
 En dorra l'absolucioun,
 Car il ad despensacioun
 Solonc recompensacioun,
 Que vient du bource au riche gent,
 Qu'il puet donner remissioun
 Sanz paine et sanz punicioun,
 Pour plus gaigner de leur argent.
 Ensi Flatour et Ipocrite
 Les gentz de noz pais visite, 21290
 Et s'ils par cas vienont au lieu
 U dame Chasteté habite,
 Ipocrisie lors recite
 Du continence la vertu;
 Et s'ils par cas soient venu
 U Leccherie ont aparçu,
 Lors Flaterie au plus l'excite
 Et est du consail retenu;
 Car il s'acorde bien al jeu
 Et prent sa part de la maldite. 21300
 Quant Flaterie professé
 Ad Leccherie confessé,
 Sa penitence luy dorra
 D'incestuose auctorité;
 Car Incest est acompaigné
 Au Flaterie, u qu'il irra:
 Sovent avient il pour cela,
 Quant dame soy confessé a
 Au frere, de sa malvoisté
 Peiour la laist q'il ne trova; 21310
 Mais quant nuls s'en parcevra,
 Tout quidont estre bien alé.
 Frere Ipocrite, u qu'il vendra,
 D'onesteté tout parlera
 Pour soy couvrir de sa parole,
 Dont il les oills avoeglara
 De ces maritz, quant tretera
 Les femmes quelles il affole:
 Car quant il truiet la dame fole,

The following appears on the margin of the MS., opposite ll. 21266-78; the ends of the lines have been cut away by the binder:—

Nota quod super hii . . . que in ista pa . . . secundum commune dictum d . . . | transgressos simp (1) . . . | et non alios mater . . . | tangit: vnde h . . . | qui in ordine . . . | gressi sunt ad . . . | reuertentes prius . . . | in foueam cada . . . | hac eminente . . . | tura cercius pre . . . | niantur.

21282 Endorra

21311 senparceiuera

Il fait sermon de tiele escole 21320
 Qu'il de son ordre la fera
 Sorour: voir dist; mais c'est frivole,
 Car par ce q'il la dame acole,
 Leur alliance se prendra.
 D'incest des freres mendiantz
 Je loo as tous jalous amantz
 Q'il vuillent bonne garde prendre;
 Car tant y ad des limitantz
 Par les hostealx et visitantz,
 Q'au paine nuls s'en poet defendre. 21330
 Mais je vous fais tresbien entendre,
 Q'ils nulle femme forsque tendre
 Et belle et jofne vont querantz;
 Siq'en la femeline gendre
 Sovent avient que frere engendre,
 Dont autre est piere a les enfantz.
 Qui bien regarde tout entour,
 Ipocrisie, Incest, Flatour
 Trois freres sont de grant puis-
 sance;
 N'est tiele dame ne seignour 21340
 Q'al un des trois ne porte amour.
 D'especiale retenance
 Des toutes courtz ont l'aqueintance
 Et des cités la bienvuillance;
 Chascun les prent au confessor:
 Si ont le siecle en governance,
 Mais tant comme dure celle usance,
 N'est qui nous poet mettre en honour.
 Ipocrisie je vous dy,
 Q'ad Flaterie presde luy, 21350
 Vait les pais environner
 Pour sermoner et precher y;
 Et quant il est en halt sailly,
 Lors voet les vices arguer,
 Oiant le poeple en le moustier:
 Mais en la chambre apres disner
 La cause n'irra pas ensi;
 Car lors ne voet il accuser,
 Ainz voet des vices excuser
 Le seignour et la dame auci. 21360
 Ipocresie no bealpiere
 Ove Flaterie son confrere

21396 Plusque

Vont les cités environnant:
 Ipocrisie en sa maniere,
 Pour ce q'il est de simple chere
 Et au saint homme ressemblant,
 Cil irra primer au devant,
 Et l'autre vient apres suiant,
 Qui portera le sac derere;
 Ensi les gens vont conjurant, 21370
 Que tout le plus dur et tenant
 Font amollir de leur priere.
 O comme le frere se contient,
 Quant il au povre maison vient!
 O comme le sciet bien sermoner!
 Maisque la dame ait poy ou nient,
 Ja meinz pour ce ne s'en abstient
 Clamer, prier et conjurer;
 La maile prent s'il n'ait denier,
 Voir un soul oef pour le soupier, 21380
 Ascune chose avoir covient.
 'Way,' ce dist dieus, 'au pautonnier,
 'Qui vient ensi pour visiter
 Maison que povre femme tient!'
 Long temps y ad que j'entendy
 Comment Brocage se rendy
 En l'ordre u q'il se tient prochein:
 Sovent descorde et fait amy,
 Sovent devorce et fait mary,
 Sovent du primer fait darrein, 21390
 Ore est au pié, ore est au mein,
 Ore est a certes, ore en vein,
 Ore ad parfait, ore ad failly,
 Il est trestout du gile plein,
 Dont fait en l'an maint fals bargein,
 Plus que ne vuil conter yci.
 Danz Sephonie en son endroit
 De ceste gent prophetisoit,
 Q'ils de nous autrez les peccés 21399
 Duissent manger: car bien l'en voit
 Que des peccés, comment q'il soit,
 De ceux qui sont leur confessez
 Ils ont leur moustiers eshalciez,
 Et les beals cloistres envolsiez,
 Ne leur fait chose q'estre y doit.
 Trop leur sont peccés beneurez;

21400 lenvoit

R

Car par ce sont il vitaillez
 Du *quant* l'en mangut ou boit.
 Incest, Flatour, Ipocrital, f. 118
 Et cil Brocour d'especial, 21411
 Sont cils qui font les edifices
 De leur moustier conventual,
 De leur clochier, de leur cloistral,
 Les vestementz et les chalices,
 Chascuns endroit de ses offices;
 Mais ils ne serront point si nices
 Q'ils d'orguil leur memorial
 N'estruont deinz les artefices:
 Ensi tout serra fait des vices,
 Que semble a nous celestial. 21420
 Flatour, qui porte le message
 Des freres, pour ce qu'il est sage,
 Mettra le primer fondement;
 Ly confessour de son truage
 Qu'il *print* d'orguil et de putage,
 A luy *partient* le murement;
 La volsure et le pavement,
 La verrure et le ferrement
 Brocage fait; mais le paiaige
 Du carpenter Incest enprent; 21430
 Et l'Ipocrite au finement
 La maison *coevere* a son coustage.
 Del ordre *par* tieux *procurours*
 Sont fait chapitres et dortours,
 Le freitour et la fermerie,
 Les riches chambres as priours,
 Les belles celles as menours,
 Tout pleins du veine queinterie:
 Tant *paront* large herbergerie
 Q'ils tienont en hostellerie 21440
 Des vices toutes les scours;
 Si ont juré la foy plevie
 Q'ils *par* commune compaignie
 Ensemble demourront tous *jours*.
 A Rome il ad esté ote
 L'orguil et la fole heresie
 Des freres, qui vuillont clamer
 D'avoir l'estat du papacie:
 Et d'autre *part* leur felonnie
 L'Empire a cause a remembrer, 21450

2148: dist

El sacrement qant del altier
 Le venym firon entuschier,
 Dont l'Emperour perdit la vie.
 Cil frere qui volt abesser
 Si haltz estatz, s'il volt lesser
 Nous autres, ce ne croi je mye.
 Ensi les files du peché,
 Qui sont en l'ordre *professé*,
 Leur ordre font desordiner,
 Que soloit estre bien reulée; 21460
 Ore est la reule desreulé,
 N'est qui les puet au droit reuler:
 La loy *commune* n'ad poer,
 Car ils ne sont pas seculier,
 Ne sainte eglise en son degré
 Leur privileges attemper
 Ne voet; ensi sanz chastier
 Trestous estatz ont surmonté.
 Ove les Curetz du sainte eglise
 Le frere clayme en sa franchise 21470
 Confession et sepulture
 Des riches gentz; mais celle enprise
 Deinz charité n'est pas comprise;
 Car de les *poverez* il ne cure,
 Soit vif ou mort, car celle cure
 Dont gaign ne vient, *jammes* *procure*:
 Ce piert, car n'est qui nous baptize
 Des freres pour nulle aventure,
 Ensi soubz la simplece oscure
 Veons l'aperte covoitise. 21480
 A les disciples dit estoit,
 Sollicitous *que* nuls serroit
 Ou de manger ou de vestir,
 Mais en quel lieu *que* frere soit,
 Ou soit a tort ou soit a droit,
 Son corps, son cuer et son desir,
 Sa diligence et son conspir,
 Pour ses delices acueillir
 Mette et pourchace a grant exploit:
 Qui *que* son dieu voldra sufr, 21490
 Le frere en ce voet eschuir
 Sa loy garder en tiel endroit.
 En halt estat humilier
 Se doit om, mais contrarier

Le frere voet, qant en escole
 De sa logique puet monter
 En halt divin et noun porter
 Du mestre, dont sa fame vole:
 Lors quiert honour et vie mole,
 Son dortour hiet plus *que* gaiole, 21500
 Et le freitour desdeigne entrer,
 Si clayme avoir sa chambre sole,
 U se desporte et se rigole,
 Comme cil qui quide avoir nul pier.
 Jadyz les freres du viel temps
 Molt plus ameront en tous sens
 A estre bons q'a ressembler:
 Mais si cils q'ore sont *presentz*
 Soient semblable as *bonnez* gentz,
 Del estre soit *comme* puet aler. 21510
 Poverte scievoit bien precher
 As autres et soy avancer:
 Ce piert *par* tout en les coventz,
 Car cil qui ne sciet profiter
 Al ordre du bien seculier
 Ne serra point de les regentz.
 Mal fils ne tret son pris avant
 Par ce qant il fait son avant
 Q'il ad bon pierre, ainz contre soy
 Esclandre quiert plus apparrant: 21520
 Ensi qui fondont leur garant
 Sur saint *Franceis*, pour ce ne croy
 Q'ils pris averont, qant ils sa loy
 Ne gardont, car la droite foy
 Est a les *oeveres* regardant.
Franceis lessa le siecle coy,
 Mais ses confreres q'ore voi
 Des toutes partz le vont querant.
 Om voit monter le nombre ades
 Des freres, mais om voit apres 21530
 Leur viele reule aler en bas
 Et en ruine et en destress.
 Si tu regardes bien du pres
 La multitude et penseras,
 Je say *que* tu merveilleras,
 Et auci tu l'acomparas,
 Qant cil qui duist porter le fess
 De ta charue ensi verras

21568 enestoit

R 2

Aler oiceus le petit pass,
 C'est contre la *commune* pes. 21540
 Je lis *que* nostre sire en terre
 Vint pour les pecheours requerre,
 Et nonpas pour la joute gent;
 Mais no bealpere en son affere
 Voet a son ordre ainçois attrere
 Tiels qui sont jofne et innocent:
 Ove ceaux tient il son *parlement*,
 Qui n'ont *resoun* n'entendement
 Comment lesser ne comment fere:
 Pour ce qant jofne ensi se rent, 21550
 Qant il est viels, puis se repent,
 Et lors commence de mesfere.
 De saint *Franceis* ne croy je mye,
 Ne Dominic de sa partie,
 De les enfantz prist aqaintance
 Par *down* ne par losengerie;
 Ainz prist tiels en sa compaignie
 Qui *par* discrete governance
 Se rendiront al observance
 De sa poverte et sa penance, 21560
 Et lors meneront sainte vie:
 Mais ore ont perdu celle usance,
 Ne chalt mais de la bienfaisance,
 Maisque leur ordre multeplie.
 Des freres lors je suy certains
 Les païs ne furent si pleins,
 Ne la cretine estoit si fiere,
 Poy en estoit, mais furent seintz:
 Ore y ad plus et valont meinz,
 Car la vertu se tourne arere; 21570
 Maisque l'enfant ait riche pierre,
 Sique l'onour del ordre appiere,
 Ja n'iert des vices tant vileins,
 Q'il ne serra del ordre frere;
 Car povre fils de la berchere
 Al ordre ne serra *procheins*.
 Tout *quant* nous trovons escrit
 Fuist fait pour bien et pour profit
 De *nostre* aprise et essamplaire;
 Pour ce l'apostre en son escrit 21580
 Jadyz la fourme nous descrit,
 C'est d'une gent qui vienont plaire

Au ventre, et ont trop debonnaire
Parole, et main tout preste affaire
La beneïçon, mais noun parfit
Pour nostre bienveillance attraire ;
Mais si voes estre sanz contraire,
Fuietz, ce dist, de leur habit.

De ceste gent ensi diffine
L'apostre et dist *que* leur doctrine 21590
N'est mye bonne ; et nepourqant,
Qant la parole ont plus divine,
Lors ont coverte la falsine
De simplece et de fals semblant,
Dont sont les mals ymaginant ;
Si vont au poeple sermonant
Pour lucre et noun pour discipline.
U tiele gent vont limitant,
Mainte maison sont *pervertant*,
Ainz *que* l'en sache leur covine. 21600

Deux nouns je truis d'especial
Que sont al ordre fraternal f. 119
Bien acordantz a mon avis,
C'est Agarreni et Gebal ;
Et l'un et l'autre estoient mal,
Si sont deinz le psaltier escrits,
Dont saint Jerom, sicome je lis,
L'exponement en fist jadyz :
Le primer noun porta signal
Des ceux q'ont fals le cuer ou pitz, 21610
Qui sont *profess* pour faire pis
Soubz l'ombre de leur ordinal.

Cils ne sont point droit citezein
Du sainte eglise, ainz sont vilein
Covert de sainte ypocrisie :
De ton manger se ferront plein,
Si penseront ainz *que* demein
Supplant et false tricherie ;
Et pour court dire ils sont espie,
Dont sainte eglise est trop blemie, 21620
Si sont aici *comme* gent en vein,
Q'au siecle portent nul ate :
Qui plus attrait leur *compaignie*,
Se doit repentir au darrein.

Il estoit dit grant temps y a
Q'un fals prophete a nous vendra,

21608 enüst

Q'ad noun Pseudo le decevant ;
Sicomme aignel se vestira,
Et cuer du loup il portera.
O *comme* les freres maintenant 21630
A Pseudo sont bien ressemblant !
Plus simple sont *que* nul enfant
Dehors, mais qui dedeinz serra
De leur quointise *apercevant*,
Dont vont le poeple decevant,
En leur habit le loup verra.

Cils Pseudo qui l'en nome frere
Ont la parole mençongere
Et se vendont *communement*,
Mais cil q'achat un tiel bealpere 21640
N'en puet faillir q'il n'en comperre :
Et nepourqant au jour *present*
L'en voit plusours du fole gent
Q'achatont leur aquoïnement
Et s'essamplont de leur manere,
Dont suyt meint inconvenient :
Ce dist la *lettre* que ne ment
En une epistre de saint Piere.

Ne say du quelle part eslire
Ceux qui de l'ordre le martire 21650
Et la poverte des fondours
Vuïllont suffrir ; mais *pour* voir dire,
Si tieux soient deinz cest empire,
Ce ne sont point les limitours,
Ainz sont les freres des freitours,
Qui de nuyt portent les labours
Au moustier pour chanter et lire,
Et ne sont point des confessours.
Ainz sont du cloistre *professours*
Pour ceste siecle plus despire. 21660

Molt sont cil frere beneuré
Q'ensi gardont la dueté,
Mais qui font l'ordre malement
Sont sur tous autres maluré :
Primer *perdent* la liberté
Du siecle q'est yci *present*,
Car l'ordre ne voet autrement ;
Et l'autre siecle nullement
Porront avoir, car le peché
De leur folie le defent : 21670

Et ensi sur toute autre gent
Du double peine sont pené.
Mais trop nous grieve, a dire voir,
Que freres ne font leur devoir
Selonc *que* l'ordre leur devise ;
Car s'ensi fuist, n'en puet chaloir,
La bonne pees duist meulx valoir,
Quelle est *par* tout sicomme divise :
Mais ils lessont la bonne enprise
Que des fondours *leur* fuist aprise, 21680
Et se *pernent* a leur voloir ;
Dont trop empire sainte eglise,
Et dont no siecle en mainte guise
Estuet languir matin et soir.

Pour soul les freres dy je mye
Que fortune est ensi faillie,
Ainz di pour tout le remenant
Qui portent noun de la clergie,
Chascuns forsvoit en sa partie,
Sicomme je vous ay dit devant ; 21690
Dont laie gent, q'est nonsachant,
Leur mal essample vait suiant,
Que toute loy s'est *pervertie* :
N'est clerics qui soit du maintenant,
Qui vait noz almes maintenant,
Dont la vertu nous justefie.

Je voi precher les potestatz
Du sainte eglise en tous estatz
Q'om doit les vices eschuir :
Grant bien de leur parole orras, 21700
Mais a leur fait si tu verras,
C'est *comme* mirour dont je me mir ;
Que si dedeinz me voes querir
N'y troveras ne char ne quir,
Ne pié ne main, ne coll ne bras ;
Tout ensi vein verras faillir
Sermon des clerics sanz *parfournir*,
Si tu leur vie sercheras.

Itiels *prechours* de leur semblant
Sont sicomme cierge clier ardent, 21710
Qui donne as autres sa lumere,
Ou sicomme cloque en halt sonnant ;
L'un vait soy mesmes desguastant,
Et l'autre hurte sa costiere :

21710 denhalt

Ensi *prechour* de sa manere,
Ou soit ce prestre ou moigne ou frere,
Grant bien apporte a l'escoulant
Et a soy mesmes *grant* misere,
Qant le contraire fait derere
De ce q'il nous *preche* au devant. 21720

Auci les uns pour *leur* repos
Ont mis leur langes en depos,
Que point ne vuïllont sermonner ;
N'ont pas la bouche a ce desclos,
Ainz, *comme* carbon qui gist enclos
Deinz cendre, font *leur* sens muscer,
Q'au dieu ne vuïllont labourer :
Ainz pour les causes a pleder
Mettont peresce arere doss,
Dont il se porront *proufiter*, 21730
Mais pour les almes avancer
Ils ont ne talent ne pourpos.

Cil q'ad science et point ne cure
De nous *precher*, et en ordure
Sa vie meine nequedent,
Au fume *que* noz oïls obscure
Resemble, qant nous fait lesure
De son malvois essamplément.
L'apocalips qui point ne ment
Dist *que* d'en halt le firmament 21740
L'estoille quelle en sa nature
Au dieu loenge ne resplent,
Cherra, et c'est de tiele gent
La ressemblance et la figure.

Mais sur trestous mal sont eslit
Les fols curetz qui n'ont delit
Fors~~que~~ du siecle a deliter :
De leur essample et leur excit
Sovent nous vient fol appetit,
Dont nous faisons dieu coroucer ; 21750
Et il pour nous en chastier
Le siecle nous fait adverser,
Si nous moleste en chascun plit :
Mais, ainçois q'il du pis grever
Nous face, bon fuist d'amender
Et mal curet et mal soubgit.

Pour bien regarder tout entour
L'estat des clerics au *present* jour

21751 enchastier

Et des Religions auci,
 Du Jacobin, Carme et Menour, 21760
 N'est qui se gart a son honour,
 Des toutes partz sont perverti:
 Mais quant les cleres nous sont failly,
 Ne say desore avant par qui
 Porrans du nostre creatour
 Avoir reless de sa mercy,
 Ainz que nous soions malbailly;
 Et c'est le pis de ma douleur.
 Mais s'aucun m'en soit au travers,
 Et la sentence de mes vers 21770
 Voldra blamer de malvuillance,
 Pour ce que je ne suy pas clers,
 Vestu de sanguin ne de pers,
 Ainz ai vestu la raye mance,
 Poy sai latin, poy sai romance,
 Mais la commune tesmoignance
 Du poeple m'ad fait tout apers
 A dire, que du fole errance
 Les cleres dont vous ay fait parliance
 Encore sont ils plus divers. 21780

Ore q'il ad dit l'estat de ceux qui
 se nomont gens du sainte eglise,
 il dirra en part l'estat de ceux
 qui ont le siecle en governance, et
 commencera primerement a parler
 de l'estat des Empereours au temps
 q'ore est.

Dieus doint que soions bonne gent,
 Car qui regarde au jour present
 Comment le siecle est tribolé,
 Par resoun serra molt dolent;
 Car les mals vont communement,
 Que nul estat ont respité

Mais ne puiss dire tout comment f. 121
 De les batailles proprement 21980
 Que Nabugodonosor fist,
 Tiel fuist son noun, et nequedent
 Fortune estoit de son assent
 Et sur sa roe en halt l'assist.

After 21786 one leaf, containing 192 lines, is lost.

Sur tous Fortune l'alleva,
 Dont son orguil crust et monta,
 Mais quant meulx quide estre au dessus,
 Pour son orguil qu'il demena
 Sodeinement dieus le rua,
 Si q'unques Rois de sus en jus 21990
 N'estoit si fierement confus.
 Car sa figure, comme je truis,
 En une beste se mua,
 Dont de son regne estoit exclus
 Et fuist au bois sept ans depuis,
 U qu'il del herbe pastura.

O tu, qui cest essample orras,
 Deux choses noter en porras:
 L'un est que tu ne dois despire
 Les poveres, quant tu les verras, 22000
 Car n'est si povere qui par cas
 Porra tenir un grant empire,
 Ne ja n'ert homme si grant sire
 Q'aucune foitz ce qu'il desire
 Luy doit faillir de halt en bass:
 Mais si tu voes le mond descrire,
 Ascoulte a ce que m'orras dire,
 Et puis t'avise quoy ferras.

Je truis escript du poeple hebru,
 Disz tribes s'estoient esmu 22010
 Devers Damas pour guerroyer;
 De leur force et de leur vertu
 Quideront tout avoir venqu:
 Mais tout changa leur fol quider,
 L'orguill qui les faisoit aler,
 Car prest leur sont a l'encontrer
 Ly Sirien et ly Caldieu,
 As queux Fortune volt aider;
 Si firon les Hebreus tuer,
 Dont leur orguil ont abatu. 22020

Puis sont en leur orguil levé
 Ly Surien et ly Caldée,
 Mais deinz brief temps se passera;
 Fortune leur changa le dée
 Et desmontoit ce q'ot monté:
 Car l'un a l'autre puis mella,
 Mais les Caldicus alors halça
 Et la victoire leur donna,

21998 enporras

Dont Surien sont avalé;
 Mais leur pris guaires ne dura, 22030
 Car celle qui les fortuna
 Deinz brief les ot desfortuné.
 Quant ly Caldieu furent amont
 Et de Surrie mestres sont,
 Lors moevont guerre contre Perse,
 De leur orguill bataille y font;
 Mais Fortune ove sa double front,
 Quelle est et ert toutdis diverse,
 Lors fuist a les Caldicus adverse,
 Contrariouse et tant perverse 22040
 Q'a celle jour tout perdu ont;
 As Persiens s'estoit converse,
 Mais tost apres sa roe verse
 Par autre guise et les confont.

Quant ly Caldieu sont ensi pris,
 As Persiens lors fuist avis
 Avoir le mond a leur menage;
 Mais celle qui les ot en pris
 Monté, les ad bien tost repris,
 C'estoit Fortune la salvage: 22050
 Car Alisandre ove son barnage
 Les venquist, et en son servage
 Par guerre puis les ad conquis;
 Ore est cil Rois de tiel oultrage,
 Que tout le mond ly rent truage,
 Mais ce ne dura pas toutdis.

Quant Alisandre estoit dessure,
 Et q'il le monde avoit en cure,
 Quidetz pour ce q'il fuist certain
 De la fortune en qui s'assure? 22060
 Non fuist pour voir; ainz en poi d'ure
 Fortune luy changa sa mein,
 Huy luy fist Roys, et l'endemein
 L'enpuisonna, siq'au darrein
 Morut et ot sa sepulture:
 Ore est tourné s'onour en vein,
 Les Regnes sont sanz chevetain,
 Et la conqueste en aventure.

L'en voit sovent, qui bien s'avise,
 Royalme q'est en soy divise 22070
 Covient a estre desolat.
 Lors il avient en tiele guise,

Les gentz du Roy par covoitise
 Començont guerre et grant debat,
 Chascuns volt estre potestat,
 Ce que l'un halce l'autre abat,
 Siq'au darrein par halte enprise
 La grande Rome ove ceaux combat
 Et les venquist, dont leur estat
 Fortune hosta de sa reprise. 22080
 O tu Fortune l'inconstante,
 Du double face es variante,
 L'une est en plour, l'autre est en ris;
 Plus que solaill l'une est luisante,
 Belle et pitouse et avenante
 Et graciouse au droit devis,
 Dont tu regardes tes amys;
 Mais l'autre plus q'enfern volcis
 Perest obscure et malvuillante,
 Dont tu reguardes les chaitis, 22090
 Quant par ta sort les as soubmis
 D'adversité contrariante.

O tu Fortune la nounstable,
 En tous tes faitz es deceivable,
 Car quelle chose que tu fras
 Plus que ly ventz prest changable;
 Quant tu te fras plus amiable,
 Plustost les gentz deceiveras,
 Car qui tu hier en halt montas
 Demein les fais ruer en bass: 22100
 Trop est ta roe ades muable,
 Le dée du quell tu jueras
 Ore est en sisz, ore est en as,
 Fols est q'en toy se tient creable.

O tu Fortune la marage,
 Ore es tout coye au sigle et nage,
 Menable et du paisible port;
 Ore es ventouse, plein du rage,
 Des haltes ondes tant salvage,
 Que l'en ne puet nager au port: 22110
 Tu es d'estée le bell desport
 Flairant, mais plus sodain que mort
 Deviens lutouse et yvernage;
 Tu es le songe quant l'en dort,
 Que tous biens par semblante apport,
 Mais riens y laist de l'avantage.

22096 Plusque

Fortune, endroit du courtoisie
 Tu ne scies point, ainz malnorrie
 Par droit l'en te porra *prover* : 22139
 Car qui *plus* quiert ta compainie
 Et plus te loe et magnifie,
 Tu plus celluy fais laidenger,
 Et qui fuir et aviler
 Te quiert, celluy fais honorer :
 C'est une eschange mal *partie*,
 Ne say reson dont excuser
 T'en puiss, si noun q'au droit juger
 Tu as la voegle maladie.

Fortune, tu as deux ancelles
 Pour toy servir, si volent celles 22130
 Plus q'arondelle vole au vent,
 Si portent de ta court nouvelles ;
 Mais s'au *jour* d'uy nous portent belles,
 Demein les changont laidement :
 L'une est que vole au noble gent,
 C'est Renomé que bell et gent
 D'onour les conte les favelles,
 Mais l'autre un poy *plus* asprement
 Se vole, et ad noun proprement
 Desfame, plaine de querelles. 22140

Cist d'uy *par* tout u sont volant
 Chascune entour son coll pendant
 Porte un *grant* corn, dont ton message
 Par les pais s'en vont cornant.
 Mais entrechange nepourqant
 Sovent font de leur cornage,
 Car Renomé, q'ier vasselage
 Cornoit, huy change son langage,
 Et d'autre corn s'en vait soufflant,
 Q'est de misere et de hontage : 22150
 Sique de toy puet estre sage
 Sur terre nul qui soit vivant.

He, *comme* Fortune *par* tout vole,
 Ore est tressage, ore est tresfole,
 Ore est doulcette, ore est amere,
 Ore est *commune* et ore est sole.
 Mais quiq'en voet savoir l'escole,
 Regarde Rome, a qui fuist mere
 Fortune et la droite *emperere*.
 U est elle ore ? Elle est derere ; 22.60

22133 Jourduy

De Rome nuls ne tient parole,
 Plus *que* l'aignelle a sa berchiere
 Rome est soubgite, et la banere
 Jadis d'onour ore est frivole.

Molt fuist jady la renomée
 De Rome, qant elle ert nomé
 Cité de la paiene gent :
 Troian, q'en ot la digneté,
 Lors moustra sa benigneté,
 Qu'il fist et gardoit ensemment 22170
 La loy du bon gouvernement ; f. 122
 Mais du prouesce et hardement
 Fuist Rome auci la plus loé
 Au temps Cesar le fort regent,
 Du qui noblesce au jour present
 L'en parle et ad toutdis parlée.

Mais ore, *helas* ! nous quoy dirrons,
 Q'en dieu *par* droite foy creons ?
 Si est la Cité malbaillie,
 Dont nous la seignourie avons. 22180

Pour la creance que tenons
 Bien say ce n'est avenu mye,
 Ainz est pour *nostre* fole vie.
 O chiefs du toute *pralacie*,
 Part de la cause a vous donons,
 Et l'Emperour *avera* partie ;
 Ne sai de vous qui pis la guye,
 La coulpe sur vous deux lessons.

O Rome, jady chief du monde,
 Mais tu n'es ore la seconde, 22190
 Ove deux chiefs es sanz chevetein :
 L'un est qui sainte eglise expose ;
 A son poair n'est qui responde,
 Ce piert en toy chascun demein,
 Car s'il avient qu'il t'est *prochein*,
 Lors tolt de toy le flour et grein,
 Et laist la paille deinz ta bonde,
 Et puis se tient de toy forein :
 C'est un des chiefs le *primerein*,
 Par qui Fortune te confonde. 22200

Un autre chief duisset avoir,
 Mais voegles ad les oills *pour* voir,
 Si ad tout sourdes les oreilles ;
 Ne puet oir, ne puet veoir,

22168 qenot

Si mal te vient, q'en poet chaloir ?
 Helas, Fortune, as tes merveilles ;
 C'est l'aigle d'orr qui tu n'esveilles,
 C'est cil qui tient les nefz sanz veilles
 Et les chivalx sanz remouvoir.
 He Rome, jady sanz pareilles, 22210
 N'est ore honour dont t'apareilles,
 Tes chiefs te font le corps doloir.
 Helas ! qant cils qui duissent estre
 Pour tout le mond en chascun estre
 Du corps et alme noz gardeins,
 L'un chivaler et l'autre prestre,
 Laisont noblesce ensi descrestre,
 Nonpas tout soul de les Romeins,
 Ainz de tous autres plus et meinz,
 Nuls est de son estat certein, 22220
 Qant falt l'essample de son mestre :
 Dont vont errant tous les humeinz
 Par quoy prions as joyntez meins
 Remede de la court celestre.

Ore qu'il ad dit de l'estat des
 Emperours, dirra de l'estat des
 Roys.

Après l'Empire la seconde
 Pour gouverner les gentz du monde
 L'estat du Roy fuist ordiné :
 Ly Rois, sicome le livre expose,
 S'il a sa Roialté responde,
 Doit garder toute honesteté : 22230
 De sa primere dueté,
 Doit sainte eglise en son degré
 Defendre, *que* nuls la confonde,
 Et puis doit de sa Roialté
 Selonc justice et equité
 Garder la loy dedeinz sa bonde.

Tiele est la dueté des Roys,
 Amer et servir dieu ainçois,
 Et sainte eglise maintenir,
 Et garder salvement les loys : 22240
 Mais ils font ore nul des trois ;
 Car ils n'ont cure a dieu servir,
 Et d'autre *part* vuillont tollir
 Du sainte eglise, ainz q'eslargir

Ne les franchises ne les droitz ;
 Et nulle loy vuillont tenir
 Mais ce qui vient a leur plesir,
 Sicome dist la *commune* vois.
 Rois sainte eglise trop empire,
 Qant il nient joustement s'aire 22250
 Encontre ascun q'est son prelat,
 Et sur cela luy fait occire :
 Combien q'il soit son lige sire,
 Il duist doubter si saint estat ;
 Qui sainte eglise ensi rebat
 Encontre mesmes dieu combat,
 Mais il ne le puet desconfire ;
 Ainz tant *comme plus* ove luy debat,
 Tant plus serra du guerre mat,
 Qant il son ease plus desire. 22260

Et d'autre *part* trop desavance
 La sainte eglise Rois q'avance
 Clerc a la cure d'eveschée,
 Qui sciet ne latin ne romance,
 Du bible ne de Concordance,
 Ne de Civile ne decret,
 Pour gouverner sa digneté,
 Mais soul pour ce q'il est privé
 Du Roy, pour faire sa plesance
 En la mondaine vanité. 22270
 Rois qui tiel clerq ad avancé
 Ne serra quit de la penance.

O Rois, fai ce que tu porras,
 Que sages soient tes prelatz,
 A ce qu'ils facent leur devoir ;
 Et lors tu les desporterás,
 Que malgré leur ne porterás
 Du sainte eglise ascun avoir :
 Et d'autre part t'estuet savoir,
 Qant dois *coronne* rescevoir, 22280
 D'evesque la resceiverás ;
 Dont m'est avis, pour dire voir,
 Celluy q'onour te fait avoir
 Par reson tu n'avilerás.

O Rois, si je le serement
 Q'au jour de ta coronement
 As fait a dieu et sainte eglise
 Remembre, lors ne say *comment*
 Le dois falser, car Rois qui ment

N'est digne a tenir sa franchise, 22290
Ainz dieus le hiet et le despise ;
Car verité *par* halte enprise
L'appelle et tient en jugement,
Et le met a recreandise :
Pour ce bon est *que* Roy s'avise
Pour la bataille qu'il attend.

O Roys, dieus ne s'agreë mye,
Quant tu franchise ou manantie
Que ton Ancestre a luy donna
Luy voes tollir de ta maistrie ; 22300
Car dont l'eglise est enpovrie,
Jamais ly Roys se richera :
Mais Rois doit bien savoir cela,
Quant l'eglise tient et a
A dieu *partient*, dont courtoisie
Unques n'estoit ne ja serra,
Quant a celluy qui tout bailla
Ne laist avoir sa *pourpartie*.

O Roys, laissez en pes la bonde ;
Combien *que* sainte eglise habonde,
Tu ne t'en dois entremeller : 22311
Du Salomon je truis q'il fonde
Le temple dieu, et a large onde
Des biens le fist *superfluer* ;
Mais je say nulle part trover
Qu'il en tollist un soul denier,
Car la science q'ot *parfonde*
Luy fist toutdis considerer,
Que cil q'au dieu voet guerrier
Ne puet avoir sa pes au monde. 22320

Du Roy d'Egipte truis lisant,
Qu'il ses taillages demandant
Des prestres moeble ne florin
Pour l'amour son dieu Ternagant
Ne volt tollir ne tant ne quant :
C'estoit le fait du Sarazin ;
Avoy pour honte ! o Roy cristin,
N'iert dieus amé plus q'Appolin ?
Q'est ce *que* tu t'en vais pilant
Des prestres, qui sont tout divin ? 22330
Crois tu *par* ce mener a fin
Ta guerre ? Non, jamais *par* tant.
Lysias, qui l'ost de Surrie

22316 entollist

22340 ya

After 22359 two leaves are lost.

22751 ensoit

Menoit soubz sa connestablie,
As tous les ans avoir quida
El temple dieu de la clergie
Tribut : mais dieus ne le volt mie,
Ainçois son angel envoia,
Q'encontre luy le derresna,
Et de son host occis y a 22340
Bien dousze Mil. O la folie,
Si Rois ne s'en essamplera !
Car si dieus lors son temple ama,
S'eglise est ore plus chérie.

O Rois qui piles sainte eglise
Et tols a tort la dieu franchise,
Scies tu *que* dieus t'en ad promis ?
Par son prophete il te devise
La paine q'il t'en ad assise,
Si dist qu'il tournera son vis 22350
Encontre toy *par* tiel divis,
Que tu serras tant esbahis
Du paour et recreandise,
Que si nes uns t'ait poursutz
Tu fuieras. O dieu merciz,
Trop serra dure la reprise.

O Rois, je loo, si tu bien fcs,
Laissez la sainte eglise en pes,
Fai ce q'a ta coronne appent ;

Mais eil q'estoit du sage port, f. 125
C'est Daniel, au Roy report
L'exponement, disant ensi :
'Mane, ton pueple t'ad guerpi ;
Techel, tu n'as bonté par qui
Que dieus t'en voet donner confort ;
Phares, ton regne est departi, 22750
Car dieus voet q'autre en soit saisi,
Et tu serras du pecché mort.'

O Rois, pren garde et te *pourvoic*,
Que tiele *lettre* ne t'envoie
Dieus, qui les Rois tient en justice ;
En trop de vin ne te festoie,
Dont ta luxure multeploie,
Car c'est en Roy trop orde vice :
Et d'autre *part* pour l'avarice

Ne fai a l'orr ton sacrefice, 22760
Car Rois doit estre toute voie
Francs en toutz pointz, mais trop est
nice

Cil Rois q'en servitude esclise,
Et de franchise se desvoie.
Dedeinz la bible escript je lis
D'un Roy qui demandoit jadis
Des quatre de ses chambrelains,
Et *grant* loer leur ad promis,
Qui meulx dirroit au droit divis 22769
Q'est ce *que* plus du force est pleins :
Si *leur* donna trois jours au meinz
D'avisement, dont plus certeinz
Faisent pour dire leur avis.
L'un dist *que* sur trestous humeinz
Du force Roy fuist souverainz ;
Car Roy tous autrez ad soubgiz.

Mais ly secondes respondy,
Que *femmes* sont plus fort de luy ;
Car *femmes* scievont Roy danter :
L'essample veons chascun dy, 22780
Maint Roy en est trop malbailly,
Q'au peine nuls se sciet garder.
Ly tierce dist, q'au droit juger,
Le vin trestout puet surmonter,
Par force quant les ad saisy ;
Car Roy et *femme* en son danger
Retient, et tolt leur force et cuer,
Et tout le membre ovesque auci.

Le quarte dist que verité
Toute autre chose ad surmonté ; 22790
Car verité de son droit fin,
Quant tous serront ovel jugé,
Tout veint la fole vanité
Du Roy, des *femmes* et du vin.
Cil qui ce dist ot le cuer fin
Du sapience et bon engin,
Dont sa response tint en gré
Ly Rois, ensi comme d'un divin.
Bien doit pour ce le Roy cristin
Amer justice et loyalté. 22800
Rois doit la verité cherir
Sur toute chose et obeir,

Ce dist Sidrac ; et nepourquant
Ore voit om Roy tous ceaux haïr
Qui voir dient, mais qui blandir
Luy vuillont, cils serront manant.
Voir dist qui dist *femme* est puissant,
Et ce voit om du maintenant :
Dieus pense de les mais guarir,
Q'as toutes loys est descordant, 22810
Que *femme* en terre soit regnant
Et Rois soubgit pour luy servir.

Rois est des *femmes* trop deçu,
Quant plus les ayme *que* son dieu,
Dont laist honneur pour foldelit :
Cil Rois ne serra pas cremu,
Q'ensi voet laisser son escu
Et querre le bataille ou lit.
Du Roy David je truis escript
Que pour son charnel appetit 22820
Du Bersabée, qu'il ot conu,
Vilainement fuist desconfit ;
Car Rois ne serra ja parfit
Q'est de sa frele char vencu.

Dedeinz la bible qui lira
Des Rois, sovent y *trouvera*
Que pour les mals *que* Rois faisoit
Non soulement dieus se vengra
Sur le Roy mesme, ainz pour cela
Trestout le pueple chastioit ; 22830
Mais *par* contraire en nul endroit
Ne lis qu'il sur le Roy vengoit
Les mals du pueple cy ne la :
Rois est le chief solonc son droit,
Dont si le chief malade soit,
N'est membre qui dolour n'ara.

Ensi le mal du Roy ceux fiert
As queux le pecché point n'affiert ;
Car ce dont Rois son dieu offent
Sovent le pueple le compiert, 22840
Par quoy du Roy, comme bien apiert,
Les pecchés sont trop violent.
Dieu ne se vengra *proprement*
De David q'ot fait folement,
Ainz pour le Roy le pueple quiert :
Bien doit ly Rois estre dolent

22778 plusfort

Quant il au pueple tielement
Pour ses pechés vengeance adquier.
 Le lis, quant David s'aparçoit
 Que sur son pueple tourneroit 22850
 Ce q'il ot mesmes deservy,
Pour le dolour q'il lors avoit
 Dieus la vengeance repaisoit,
 Quant vist coment se repenti ;
 Car tost comme il s'en converti
 Vers dieu, il en trova mercy,
 Dont il son dieu remercioit,
 Et puis se contenoit ensi,
 Qu'il soy et tout le pueple auci
 Al dieu plesance gouvernoit. 22860
 O Rois, retien en remembrance
 Du Roy David la repentance :
 Hostetz de toy le fol desir,
 Qui fait amerrir ta puissance,
 Hostetz de toy fole ignorance,
 Que ta justice fait blemir ;
 Et si tu voes au bien venir,
 D'orguil ne te dois sovenir :
 Pren conseil sage en t'alliance,
 Et sur tout te dois abstenir 22870
 Du covoitise, et lors tenir
 Porras la bonne governance.
 Ly Rois David, comme dist l'auctour,
 Estoit des six pointz essamplour,
 Dont chascun Roy puet essamplir :
 Ly Rois David estoit pastour,
 Ly Rois David estoit harpou, r,
 Ly Rois David fuist chivaler,
 Ly Rois David en son psalter
 Estoit prophete a dieu loer, 22880
 Ly Rois David en doel et plour
 Estoit penant, et pour regner
 David fuist Rois, si q'au parler
 As autrez Rois il fuist mirour.
 Au pastour falt primement
 Q'il ses berbitz discrettement
 Les ruignous houste de les seins :
 Bons Rois covient qu'il tielement
 Deinz son hostell la bonne gent
 Retiene et hoste les vileins. 22890

22856 entroua

Berbis q'est de la ruigne atteins
 Les autres qui luy sont procheins
 Ehtusche : et l'omme q'est present
 Entour le Roy fait plus ne meinz ;
 Des males mours dont il est pleins
 Corrupt les autres malement.
 Au bon harpou falt de nature
 Mettre en accord et attemprure
 Les cordes de sa harpe, ensi
 Que celle corde pardessure 22900
 Ne se descorde a la tenure,
 Et puis q'a l'un et l'autre auci
 Face acorder la corde enemy ;
 Mais au darrein covient a luy
 Qu'il de Musique la droiture
 Bien garde ; et lors ad tout compli,
 Dont cils q'aront la note oy
 S'esjoyeront de la mesure.
 Ensi falt que ly Rois en terre
 Sache attemprer et l'acord fere 22910
 Du pueple dont la governance
 Il ad resçu, siq'au bienfere
 Chascuns endroit de son afere
 Soit temprez en droite ordinance,
 Le seignour soit en sa puissance
 Et la commune en obeissance,
 L'un envers l'autre sanz mesfere :
 Rois q'ensi fait la concordance
 Bien porra du fine attemprance
 La harpe au bonne note trere. 22920
 David bon chivaler estoit
 Du cuer et corps, dont surmontoit
 La force de ses anemys ;
 Quant pour la foy se combatoit,
 Dieus son miracle demoustrait,
 Dont il avoit loenge et pris.
 Car la fortune a les hardis
 S'encline, mais Rois q'est eschis
 A batailler quant il ad droit,
 Il n'est pas de David apris ; 22930
 Mais s'il defende son pais,
 Lors fait cela que faire doit.
 Prophete estoit le bon Davy,
 Loyal, certain, car tant vous dy,

22874 dix

Ce qu'il disoit ne fuist pas fable.
 Rois qui s'essamplera de luy f. 126
 Covient tricher envers nully,
 Car Roys doit estre veritable
 De sa parole, et non changable ;
 Et autrement, s'il soit muable, 22940
 Il ad sa Roialté failly :
 Mais Rois q'en verité s'estable,
 Par ce son regne fait estable,
 Si ert a dieu prochein amy.
 David estoit auci penant,
 Du cuer contrit et repentant,
 De ce qu'il dieu ot offendu,
 Dont fist penance sufficient
 Par quoy soy mesmes tout avant
 Et puis le pueple en sa vertu 22950
 Garist de la vengeance dieu :
 O Rois, ensi covient que tu
 Par repentance eietz garant
 De tes pechés, dont absolu
 Estre porretz, ainz que vencu
 Soietz del ire au toutpuissant.
 Mais au final David fuist Rois,
 Qui bien guardoit les bonnes lois.
 Mais pour retourner a cela
 Des pointz dont vous ay dit ainçois,
 Le temps est ore plus malvois, 22961
 N'est qui David essamplera :
 Pres du pastour ore om verra
 Berbis ruignous, dont trop y a ;
 Et del harpou dient François,
 La harpe est en discord pieça.
 U est qui bien nous harpera ?
 Je ne say dire a ceste fois.
 Pour parler de chivalerie
 De David et sa prophecie, 22970
 Du prouesce et du verité,
 N'est pas a moy que je le die,
 Mais om dist que l'essamplerie
 Du nostre terre en est alé,
 Et que David s'estoit pené
 Pour ses pechés, ore est tourné
 Pour l'ease avoir de ceste vie,
 Et la justice en Roialté

22964 ya

22974 cest

Que David tint, desloyalté
 De mal conseil l'ad forsbanne. 22980
 O Rois, enten, si fretz que sage,
 Danz Tullius t'en fait message,
 Disant que c'est au Roy grant honte,
 Qui par bataille et fier corage
 Tous veint, et soy laist en servage
 Du covoitise, et tant amonte
 Q'il n'est pas Rois a droit acompte :
 Del une part car si l'en conte
 Qu'il ad prouesce et vassallage,
 Del autre part son pris ne monte ; 22990
 Quant covoitise luy surmonte,
 L'onour du Roy se desparage.
 O Rois, d'orguil ton cuer retien,
 De l'escriture et te sovien.
 Dieus dist, 'A la coronne way
 Q'est orguilleuse !' car n'est rien
 Que dieus tant hiet, ce savons bien ;
 Plusours en ont trové l'essay :
 Mais d'autre part tresbien le say,
 O Rois, si voes servir au pay 23000
 Ton dieu, humblesece en toy maintien,
 Comme fist David, ensi le fay :
 L'essample vous en conteray,
 Ascoulte, Rois, et le retien.
 Molt ot David humble esprit,
 Ce parust bien quant il oit
 Semeý, qui luy vint maldire
 En son meschief par grant despit,
 Et il le fist du mort respit,
 D'umilité restreigna l'ire : 23010
 Auci l'en puet de Saül lire
 Qu'il querroit David pour l'occire,
 Pour ce David point ne l'occit,
 Quant ot poer, dont nostre sire
 Puis saisist David de l'empire
 Et Roy Saül fuist desconfit.
 Sicomme la force eschiet du Roy
 Par son orguil et par desroy,
 Ensi s'avance humilité.
 Ce parust en la viele luy, 23020
 Senacherib ove son buffoy
 Quant Ezechie ot manacé

22998 enont

23003 enconteray

Et cil s'estoit humilié,
Dieus son miracle ad demoustré :
Oytante Mil et cynk, ce croy,
Del host paiene il ad tué,
Et puis luy mesme en sa contré
Ses fils tueront en recoy.

O Roys, tu es a dieu conjoynit,
Qant par les meins d'evesque enoint
Es du sainte oile, et pour cela 23031
Remembre a ce que t'est enjoint,

De vertu ne soietz desjoynit,
Car Roys par droit le vice harra :
De sa nature l'oile esta
Mol et perçant, dont Rois serra
Pitous et joust, siq'en nul point
Al un n'al autre falsera ;
Pité joustice attempera,
Qu'il cruauté ne ferra point. 23040

O Rois, si bien fais ton devoir,
Deux choses te covient avoir,
Ce sont pités et jugement,
Ne l'un sanz l'autre poet valoir :
Tu ne te dois tant esmouvoir
Du pité, dont la male gent
Soit inpunie, et autrement
Tu dois sanz pité nullement
Juger de ton roial pooir
Pour nul corous que toi susprent, 23050
Ainz du pité benignement
Fai la malice remouvoir.

Senec le dist q'a Roialté
Plus q'a nul autre affiert pité,
Et le bon Emperour Constant
Nous dist que cil s'est bien prové
Seigneur en droite verité,
Qui du pité se fait servant :
Cassodre auci ce vait disant,
Que tout le regne en ad garant, 23060
U que pités s'est herbergé ;
Et qui la bible en vait lisant
Verra justice molt vaillant,
Qant du mercy serra mellée.

Ly Rois q'est joust et debonnaire
N'estuet doubter le fait du guerre

23060 enad

23062 envait

23086 aguarder

Pour multitude de la gent
Q'au tort vienont pour luy surquere ;
Car mesmes dieu leur est contrere
Et les maldist molt fierement, 23070
Comme Ysate nous aprent :
Ly Machabieus tout ensement,
Q'assetz savoit de tiel affere,
Dist que victoire ne se prent
En multitude, ainçois attend
En dieu, si Roys luy voet requere.

O Rois, si estre voes parfit,
Fai ce pour quoy tu es eslit,
Justice au pueple fai donner ;
Ly Rois qui par justice vit 23080
Ja n'ert du guerre desconfit.
Ce dist David en son psalter,
'Justice et pes s'en vont aler
Comme mere et file entrebaiser' :
Car de justice pes nasquist ;
Pour ce justice est a garder
Au Roy qui voldra pes amer,
Car c'est le chief de son habit.

O Rois, si tu del un oil voies
Les grans honours, les grandes joyes
De ta coronne et ta noblesce, 23091
De l'autre part repenseroies
Comme es chargez diversez voies
De ce dont dieus t'ad fait largesce.
Si tu bien gardes la promesse,
Comme ta coronne le professe,
Et ton devoir n'en passeroies,
Lors sanz faillir, je me confesse,
Les charges passent la richesce,
Si l'un ove l'autre compensoiez. 23100

L'estat du Roy est honorable,
Mais cel honour est descheable
Au siecle qui ne puet durer ;
Car mort que ja n'ert merciable
Ne truiet le Roy plus defensable
Q'un povre vilein labourer,
Et tout ensi naist au primer
Le Roy comme fait le povre bier,
Nature leur fait ressemblable,
Mais soul l'estatz font diverser ; 23110

Dont si ly Rois ad plus poer,
Tant plus vers dieu est acomptable.

Qui plus en halte estage monte,
S'il en cherra, mal se desmonte,
Dont trop se blesce ; et tout ensi
Par cas semblable tant amonte
Ly Rois, qui tous estatz surmonte ;
S'il soit des vices assailly
Et soit vencu, tant plus failly
Serra coupable et malbailly, 23120
Qant a son dieu rendra l'acompte,
Qui la personne de nully
Respite. O Rois, pour ce te dy,
Pren garde a ce que je te conte.

C'est bien resoun, si Rois mal fait,
Que s'alme plus du paine en ait
Q'uns autres de menour degré :
Car si la povre gent mesfait, f. 127
Sur eaux reverte le mesfait,
Dont sont du siecle chastiée ; 23130
Mais si ly Rois fait malvoisté,
N'est qui pourra sa Royauté
Punir, ainz quit de son forsfait
Irra tout a sa volenté,
Tanque la haulte deité
Luy fait ruer de son aguait.

O Rois qui meines vie fole,
Ainçois que l'ire dieu t'affole,
Fai amender ta fole vie ;
Car qant tu vendras a l'escole 23140
U l'alme doit respondre sole,
Ne te valdra chivalerie,
Ne Roialté ne seigneurie,
Ainz la resoun q'as deservie
Du ciel ou d'infernal gaiole
L'un dois avoir sanz departie :
Ore elisetz a ta partie
Le quel te plaist, ou dure ou mole.

Ainz q'autre chose a dieu prioit
Rois Salomon, q'il luy voldroit 23150
Donner ytielle sapience
Par quelle du justice et droit
Son pueple en sauf gouvereroit :
Dont sa priere en audience

23114 encherra

23126 enait

Vint pardevant la dieu presence,
Et pour ce que sa conscience
Au prouffit de son poeple estoit,
Dieus luy donna l'experience
Du bien, d'onour et de science,
Plus q'unques Rois devant n'avoit. 23160

L'essample au Salomon le sage
Loign du memoire ad pris passage,
N'est Rois qui le voet repasser
Pour le tenir deinz son corage,
Ainz prend du poeple son pilage
Et laist justice outrepasser.
Si dieus conseil du losenger
D'entour le Roy ne voet hoster,
Trop avons perdu l'avantage ;
Car chacun jour renouveler 23170
Veons les maïs et adverser,

Dont chascuns sente le damage.
Essample y ad du meinte guise,
Que Rois conseil du covoitise
Doit eschuir, car ce defent
Ly philosopre en son aprise ;
Car tiel conseil honour ne prise
Ne le commun profitement,
Ainz quiert son lucre proprement.
De fals Judas l'essamplément 23180
Bon est que chascun Roy s'avise ;
Car il pour lucre de l'argent
Son Roy trahist au male gent,
Qui puis en suffrit la juise.

Mais cil qui mal conseil dorra,
Ly maïs sur soy revertira,
Qant il meinz quide que ce vient :
Ce dist Sidrac, et de cela
Achitofel nous essampla,
Qant Absolon ove soit retient 23190
Cusy, a qui conseil se tient
Et le pourpos volt garder nient
Q'Achitofel luy consailla ;
Dont il tant anguissous devient,
Q'as ses deux mains le hart enprient
Au propre coll et s'estrangla.

O dieus, qant ly plus seigneurial
Pier de la terre et principal

23173 yad

23184 ensuffrit

Après le Roy n'osent restreindre
 Les mals, ainz sustienont le mal, 23200
 Comment dirront ly communal?
 Ou a qui lors se porront pleindre,
 Qant cils q'après le Roy sont greindre
 N'osent voidire, ainz vuillont feindre,
 Pour doute ou pour l'amour roial?
 N'est verité qui puet remeindre,
 Dont ont oppress le pueple meindre
 Du maint erreur superflual.

**Ore qu'il ad dit l'estat des Roys,
 dirra l'estat des autres seignours.**

Après les Rois pour Regiment
 Seignours om voit diversement 23210
 Par les cités, par les païs,
 Qui sont ensi comme Roy regent,
 Et si ne portont nequedent
 Le noun du Roy, ainçois sont ditz
 Ducs, Princes, Contes et Marchis.
 Chascuns, solonc qu'il ad enpris
 L'onour, doit porter ensemment
 Les charges, dont il m'est avis,
 Seignour doit garder ses soubgitz
 En loy du bon gouvernement. 23220

N'est pas pour ce que dieus n'avoit
 Assetz du quoy dont il porroit
 Avoir fait riche chascun,
 Q'il les gens povres ordinoit;
 Ainz fuist pour ce que dieus voloit
 Essaiier les seignours ensi,
 S'ils ussent leur corage en luy:
 Car qui q'est riche et joust auci,
 Laissant le tort pour faire droit,
 Il ad grant grace deservi, 23230
 Qant pour les biens q'il fait yci
 Les biens sanz fin puis avoir doit.

Ascuns dient q'en Lombardie
 Sont les seignours de tirandie,
 Qui vivent tout au volenté
 Sanz loy tenir d'oneste vie,
 Ainçois orguil et lecherie
 Et covoitise ont plus loé.

23241 nenvuillont

23251 Senvait

23265 enpuet

D'orguil ont sainte eglise en hée,
 Qu'ils la sentence et le decré 23240
 Pour dieu n'en vuillont garder mie,
 Et de luxure acoustumé
 Commune font la mariée
 Et la virgine desflourie.

Et d'avarice, dont sont plein,
 Ils font piler et mont et plein,
 N'est uns qui leur puet eschaper
 Qui soit a leur poer prochein:
 Trestous les vices ont au mein,
 Mais ore, hélas! trop communer 23250
 S'en vait par tout leur essampler;
 Deça et pardela la mer
 Chascuns s'en plaint, pres et longtein,
 Que la malice en seigneurer
 Confont le povre labourer,
 Et le burgois et le forein.

De ces Lombardz om solait dire
 Q'ils sont sur tous les autrez pire
 En gouvernant leur seignourage;
 Mais certes ore, qui remire 23260
 L'estat du siecle pour descrire,
 Om voit plusours de tiel estage,
 Seignours du jofne et du viel age;
 Chascuns en sente le damage,
 Mais nuls en puet trover le mire:
 Si dieus ne pense au tiel outrage
 Rescourre, endroit de mon corage
 Ne sai ce que j'en doie escrire.

Avoy, seigneur, q'es en bon plit
 Sibien d'onour comme de proufit, 23270
 Tu es du deble trop commuz,
 Qant tout cela ne te souffit,
 Ainçois de ton fol appetit
 Pour covoitise d'avoir plus
 Fais guerre, dont serront confus
 Les povrez gens et abatus
 Les droitz: mais seignour q'ensi vit
 Du charité trop est exclus;
 Meulx luy valdroit estre reclus, 23279
 Qant pour son gaign le poeple occit.
 Des tieus seignours le mal avient

23259 Engouernant

23264 ensente

23268 iendoie

Par quoy no siecle mal devient;
 Car seignour ont le poesté
 Du poeple, siq'au gent covient
 La reule que du mestre vient
 Sautr comme par necessité.
 Dont semble que la malvoisté
 Du quoy no siecle est tribolé
 A leur partie plus se tient,
 Des queux la gent est gouverné; 23290
 Ce sont seignours par leur degré:
 Ne sai si je le dirray nient.

Sicomme les grans seignours amont
 De leur erreur malice font,
 Autres y ad, ce semble a moy,
 Ly quel ne Duc ne Prince sont
 Ne Conte, et nepourqant il ont
 Diversement poer en soy,
 Chascuns en son païs, du quoy,
 Ou en apert ou en recoy, 23300
 Le pueple de sa part confont:
 Sique par tout, u que je voy,
 Du justice et de bonne foy
 Entorcioun ad freint le pont.

Mais certes par le mien avis
 De toy me pleigns q'es seignouris,
 Quant outre ce que dieus te donne
 Tenforces nepourqant toutdiz
 D'extorcioun en ton païs
 Piler du povre la personne: 23310
 Qant tu as ce qui te fuisonne,
 Du povre gent qui t'environne
 Ne serroit ton pilage pris;
 Combien que l'autre mot ne sonne,
 Cil dieux vers qui le mal resonance
 Ne lerra tiels mals inpunitz.

Et d'autre part trop mal se guie
 Seignour puissant du seignouric, f. 128
 Qant il les communs baratours
 Pour la petite gaignerie 23320
 Supporte de sa tirannie;
 Dont nous vienont les grans erreurs:
 Car qant seignour sont maintenours,
 La loy commune pert son cours,
 Par quoy le tort se justefie,

Dont la justice est a rebours:
 Tiel seignour et tiels soldeours
 Mettent en doute nostre vie.

O seigneur, qant orguil te prent,
 Enten que Salomon t'aprent, 23330
 Qui dist: 'Le jofne enfant q'est sage,
 Discret, honneste et diligent,
 Combien q'il soit du povre gent
 Et n'ad de rente n'eritage,
 Plus valt endroit de son corage
 Que ly vielardz q'ad seigneurage,
 Qant il est fol et necligent.'
 Poverte en soy n'est pas hontage,
 Si des vertus ait l'avantage,
 Mais la richesse est accident. 23340

Sanz terre valt prodhomme asses,
 Mais sanz prodhomme sont quassez
 La terre et la richesse en vein.
 Ja n'ait malvois tant amassez,
 Qant les vertus luy sont passez,
 De soy n'est autre que vilein;
 Mais l'autre, si richesse au mein
 Luy falt, il puet par cas demein
 Avoir grans terres et cités
 Par les vertus dont il est plein: 23350
 Car les vertus sont plus certein
 Que les richesses maleurez.

Par les vertus om puet acquerre
 Toutes richesses de la terre,
 Mais les richesses nepourqant
 Ne sont en soy digne a conquerre
 Le meindre que l'en porroit querre
 De les vertus, ne tant ne qant.
 O seigneur, qui fais ton avant,
 Pour ce n'es pas a ton devant, 23360
 Que tu fais ta richesse attrere,
 Si des vertus soies faillant;
 Mais cil est riche et sufficient
 Q'est vertuous en son affere.
 Achilles fuist le plus proisé
 En l'ost des Grecs, qant la cité
 De Troie furent assiegant;
 Un autre y fuist q'estoit nomé
 Tersites, le plus maluré;

23326 arebours

Dont dist Orace a son enfant, 23370
 'Meulx vuil *que* toy soit engendrant
 Tersites, mais*que* tu vaillant
 Soies d'Achilles essamplé,
 Qe si fuissetz filz Achillant
 Et a Tersites ressemblant
 De la malvoise renomée.'

O seignour, tu porras savoir
 Par ce q'ai dit que c'est tout voir,
 Quiq'a l'enfant soit pierre ou mere
 De ce ne puet au fin chaloir, 23380
 Maisqu'il de soy porra valoir
 Du sen, du port et de maniere;
 Et ja n'ait om si noble pierre,
 Voir s'il fuist fils a l'Emperere,
 S'il ne se sache au droit avoir,
 Meulx valt le fils de la berchere:
 Car solonc *que* l'en voit matiere,
 Chascuns son pris doit resevoir.

Tous suismes d'un Adam issuz,
 Combien *que* l'un soit au dessus 23390
 En halt estat, et l'autre en bass;
 Et tous au mond nasquismes nudz,
 Car ja nasquist si riches nuls
 Qui de nature ot un pigas.
 O tu q'en servitude m'as,
 Si je meinz ay et tu plus as
 Richesce, et soietz sanz vertus,
 Si tu malfais et je bien fas,
 Dieus changera tes sis en as,
 Tu meinz aras et j'aray plus. 23400

Seigneur de halt parage plain,
 Ne t'en dois faire plus haltain,
 Ne l'autre gent tenir au vil;
 Tous suismes fils de dame Evain.
 Seigneur, tu qui me dis vilain,
 Comment voes dire q'es gentil?
 Si tu le dis, je dy nenil:
 Car certes tout le flom de Nil
 Ne puet hoster le sanc prochain
 De toy, qui te fais tant nobil, 23410
 Et du vilein q'en son cortil
 Labourt pour sa vesture et pain.
 Trop est l'oiseil de mesprisure

23402 plushaltain

Q'au son ny *propre* fait lesure,
 Qu'il duist honestement garder.
 Seigneur aici se desnature,
 Les povres gens de sa nature
 Qu'il fait despire et laidenger;
 Car tous tieux membres pier au pier
 En l'omme povre puet mirer 23420
 Comme mesmes ad ove l'estature
 Tout aici beal, aici plener
 Du sen, du resoun, de parler,
 Et de semblant et de figure.

He, quel orguil te monteroit,
 Seigneur, si dieus *fourmé* t'avoit
 D'argent ou d'orr ou de perrie,
 Sique ton corps ne purriroit:
 Mais certes n'est de tiel endroit,
 Ainz est du vile tay purrie, 23430
 Sicome la gent q'est enpovrie,
 Si viens tu povre en ceste vie,
 Et ton lass fin povre estre doit:
 Si ta richesce n'as partie
 As povres, t'alme au departie
 Poverte as tous les jours resçoit.

Seigneur, ton orguil dieus *reprent*
 En s'evangile, et si t'apprent
 Qe tant *comme* tu soies maieur,
 Te dois tenir plus humblement 23440
 Envers dieu et envers la gent;
 Car ensi fesoit le seignour
 Q'estoit fils au *superiour*,
 Il laissa part de son honour
 Pour toy remonter haltement:
 Fai don*que* ensi *pour* son amour,
 Laissetz l'orguil, laissetz l'erroir,
 Dont es coupable tant sovent.

Oultre mesure il s'est penez
 D'orguil qant se voit enpennez 23450
 Paons, et quide en sa noblesce
 Qu'il est si beals esluminez
 Qe nul oisel de ses bealtés
 Soit semblable a sa gentilesce;
 Et lors d'orguil sa coue dresce
 Du penne en penne et la redresce,
 Et se remire des tous léés,

Trop ad orguil, trop ad leesce;
 Mais au darrein sa joye cesse,
 Qant voit l'ordure de ses piés. 23460
 Al oill primer orguil luy monte
 Molt plus *que* sa noblesce amonte,
 Qant voit sa penne ensi luisant;
 Mais ainçois q'orguil luy surmonte,
 De sa nature la desmonte;
 Qant vers la terre s'est gardant
 Et voit ses piés laid et pesant,
 Ses joyes pert de meintenat;
 Car lors luy semble au droit acompte
 Qu'il est plus vil de son semblant 23470
 Qe nul oisel qui soit vivant,
 Dont son orguil rebat de honte.

O la nature bestial,
 Q'ad ensi le judicial
 De soy pour orguil desconfire,
 En ce qu'il voit d'especial
 L'ordure de ses piés aval,
 Qant vers la terre se remire!
 C'est un essample *pour* descrire,
 Qui *par resoun* doit bien suffire 23480
 A tenir en memorial,
 Par quoy *que* l'omme doit despire
 Orguil, q'or' est en tout empire
 Ove les seignours trop communal.

O seignour, d'orguil je t'appell,
 Qui d'ermyne as furré le pell
 Ove les manteals d'orr et de soie:
 Qant plus te quides riche et bell,
 Remembre toy de cest oisell;
 Envers tes piés regarde et voie 23490
 La terre en quelle tu ta voie
 Par mort irras, si te pourvoie:
 Car la furrure ne drapell
 Ne porteras, ainz tout envoie
 S'en passera ta veine joye;
 Chascuns falt trere a ce merell.
 Q'est ce *que* tu le povre piles,
 Qui tantes robes soul enpiles?
 De ce ne te fais regarder,
 Que dieus te dist en s'evangiles, 23500
 'A qui est ce *que* tu compiles

23470 plusvil

Ce *que* ne puiss au fin garder?'
 Si tu t'en voes au droit penser,
 Qant nud verras le povre aler
 Par les cités et par les villes,
 Tu luy dois vestement donner;
 Car ce *partient* a ton mestier;
 De les vertus que sont gentiles.

Seigneur, tu n'es au droit garni
 Qui tant es richement garni f. 129
 De bell hostel, de beal manoir, 23511
 Et veis la povre gent banny,
 Qui sont sanz hostel et sanz ny,
 Desherbergez contre le soir,
 Ne tu leur fais socour avoir
 De ton hostel ne ton avoir:
 Reguarde aval si verretz y
 L'ostell d'enfern puant et noir,
 U qu'il te covient remanoir,
 Qe posteller est sanz mercy. 23520

O seigneur glous, q'au ventre sers
 Des bons mangiers des vins divers,
 Dont fais emplir ta vile *pannee*,
 Et si n'avez les oils overtz
 Pour regarder le povre envers,
 Qui quiert de toy sa sustienance,
 Pren du paoun la sovenance,
 Regarde aval la pourvoiance
 Qe tu serras viande as vers:
 Car s'ensi fais ta remembrance, 23530
 Je croy q'as povrez la pitance
 Dorras, si tu n'es trop advers.

O seigneur, te sovien et pense
 Q'ovesques toy la loy despense
 Sanz chastier ton *grant* mesfait,
 Et tu verras pour poy d'offense
 Les povrez gens sanz nul defense
 En la prison*ne* estre desfait;
 Mais ja *pour* ce ton pié n'y vait
 Pour visiter, ainz s'en retrait, 23540
 Sique tes biens ne ta *presence*
 N'y voes donner d'ascun bienfait:
 Ly deables, cil qui nul bien fait,
 Chastiera ta negligence.

O seigneur, q'as l'onour terrin,

Voiant la vieve et l'orphanin
 Qui sont *par fraude et par destour*
 Du malice et de mal engin
 Oppress, et tu q'es leur voisin
 Ne fais rescousse a tiel erreur, 23550
 Fai du paon ton mireour,
 Regarde aval le darrein jour,
 U serront juggé tout cristin;
 N'est qui te ferra lors socour,
 Solonc l'effect de ton labour
 T'estuet aler le halt chemin.

Seigneur, si ta puissance voies,
 Fols es si tu ne l'en pourvoies,
 Dont tu le ciel puiss conquerer;
 Car trop irras *par males voies*, 23560
 Si tout au siecle te convoies,
 Et n'as vertu dont resister:
 Pour ce tu dois considerer
 Que tu le ciel puiss achater
 Du bien *present*, si bien l'emploies;
 Mais certes trop es a blamer,
 Qant voes le siecle a toy gaigner
 Et *perdre* si halteines joyes.

Mais preche qui precher voldra,
 De ces seignours ore ensi va 23570
 Sicome l'en vait *par* tout disant;
 Aviene ce q'apres vendra,
 Le seigneur se delitera
 De ceste siecle tout avant.
 Seigneur resemble au fol enfant,
 Qui les folies vait querant,
 Qant n'est qui l'en chastiera;
 Mais cil q'ensi vait seigneurant,
 S'il ainçois ne s'est amendant,
 Dieus en la fin se vengera. 23580

Mais courtement si j'en termine
 Mon conte, a ce q'en ce termine
 La chose appiert, ce poise my,
 Que les seignours ove leur covine
 Par leur maltolt, *par* leur ravine,
 Et d'autres mals q'ils font *parmy*,
 Le mond *sempres* ont malbailly,
 Dont se compleignent chascun dy
 Et l'orphanin et l'orphanine:

23581 entermine

Je loo que cil qui fait ensi 23590
 Repente soy et serve a luy
 Qui les seignours monte et decline.

Ore q'il ad dit de les *grans seignours*,
 Dirra l'estat des autres,
 C'est assavoir des *chivalers* et des
 gens d'armes.

Si vous vailletz *que* je vous die
 L'estat de la chivalerie,
 Ce n'est pas un estat de nient,
 Ainz cil q'en tient la droite vie
 Selonc *que* l'ordre est estable
 Molt *grant* honour a luy *partient*:
 Car chivaler, u qu'il devient,
 De son devoir le droit sustient 23600
 Dont sainte eglise est enfranchie;
 Ou si tirant le droit detient
 Du vierge ou vieve, lors covient
 Que chivaler leur face aie.

Tout ainsi *comme* la sainte eglise
 Vers dieu doit faire sacrefise
 Que nous ne devons dieu offendre
 En l'alme, ensi de tiele aprise
 Les chivalers de leur enprise
 Le *commun* droit doivent defendre,
 Et pour le droit bataille *prendre*, 23611
 Mais ne doivent la main extendre
 Par orguil ne par covoitise;
 Car q'ensi fait est a *repandre*,
 Dont il n'est dignes a *comprendre*
 Ne son honour ne sa franchise.

Chascun estat, le quel qu'il soit,
 Est ordiné par son endroit
 De faire au siecle ascun labour:
 Dont *pour* garder le *commun* droit
 Ly chivalers combatre doit, 23621
 Car ce *partient* a son honour:
 Et de ce furent ordinar
 Remus de Rome Empereour
 Et Romulus, qui frere estoit,
 Au Rome la cité maieur;
 Des chivalers Mil combatour
 Chascun la cité defendoit.

23592 (R) Cestassauoir

Après la mort de Romulus
 Chivalerie ert meintenez, 23630
 Dont l'ordre estoit multepliant;
 Et lors qui plus ot des vertus
 Du greindre honour estoit tenuz,
 Mais a celle heure nepourquant
 Sollempneté ne tant ne qant
 Estoit en l'ordre reseivant.
 Mais ore est autrement en us
 Au novell chivaler faisant,
 Car om luy vait sollempnizant,
 Pour ce q'il doit valoir le plus. 23640

Comment q'il fuisit antiequement,
 Ore est ensi, q'au jour *present*
 Pour faire un novel chivaler
 Sollempneté diverse appent
 Solonc ce *que* le temps *comprnt*
 Du guerre ou peas; mais diviser
 Comment l'en doit sollempnizer
 Ne vult je point tout au plener,
 Q'a ma matiere ce ne pent;
 Mais soul d'un mot je vult *parler*, 23650
 Du quel il covient adouber
 Tout chivaler qui l'ordre *prent*.

Ou soit du peas, ou soit du guerre,
 Cil qui le chivaler doit fere
 Au fin luy donne la colée,
 Et si luy dist, 'Sanz toy retrere
 Soietz *prodhomme* en ton affere.'
 Par ce mot il est adoubé,
 Siq'au *prodhomme* est obligé,
 Dont puis *apres* en nul degré, 23660
 S'au son estat ne voet forsferé,
 Se mellerá du malvoisté;
 Ainçois *par* fine honesteté
 Doit la prouesse d'armes quere.

Mais solonc ce q'om vait *parlant*,
 Des tieux y ad qui meintenant
 Malvoisement font l'observance
 De ce qu'ils ont en covenant:
 Q'au *prodhomme* est appartenant
 Sovent mettont en oubliance, 23670
 Ne quieront point l'onour de France,
 Ainz font a l'ostell demourance
 Et leur voisins vont guerroyant;

Ne leur amonte escu ne lance,
 Maisq'ils eiont la maintenance
 De leur pais *par* tout avant.
 Tiels est qui se fait adouber
 Nonpas pour prouesse avancer,
 Ainçois le fait q'en son pais
 Les gens luy duissent honorer, 23680
 Siq'il les porra rançonner,
 Qant il vers soy les ad soubmis:
 Mais qant les jours d'amour sont pris
 De la querelle, et il compris
 N'y soit, dont porra terminer
 La cause tout a son divis,
 Lors quide avoir *perdu* son pris.
 Vei cy, *comme* vaillant bachelier!

Après nul autre guerre ascoute,
 Mais qant cils de la povre route, 23690
 Q'en son pais luy sont voisin,
 Et l'un fiert l'autre ou le deboute,
 De sa prouesse lors se boute
 Et la querelle *enprent* au fin;
 Dont il voet gaigner le florin
 Et les *presentz* du pain et vin,
 Q'il leur lerra ne grein ne goute,
 Il vit du proie come corbin:
 Tiel soldeour n'est pas divin, f. 130
 Q'ensi la povre gent degloute. 23700

Armure ascune ne querra,
 Maisq'il du langue conquerra,
 Car d'autre espeie ja ne fiert.
 Quiconques bien luy soldera,
Comme vaillant s'aperticera
 As les assisses u qu'il ert;
 De sa prouesse lors appiert,
 Et tant fait *que* le droit y piert
 Par tort, le quell avancera,
 Dont il les larges *doans* conquiert: 23710
 Mais si povre homme le requiert,
 Il se desdeigne de cela.

De la la mer quiconque gaigne
 En Lombardie ou en Espagne
 L'onour, que chalt? Il se tient coy,
 Ne quiert sercher terre foraine;
 Ainz a l'ostell son prou bargaigne,
 Si s'entremet de tiel armoy

U point n'y ad du bonne foy,
 Dont met les povres en effroy 23720
 Qu'il toit le berbis et la laine:
 Si les heraldz luy crient poy
 'Largesse,' il fait nient meinz pour quoy
 Dont povrez gens chascun se plaigne.
 Tiel chivaler q'ensi s'essaie
 L'en nomme un chivaler de haie,
 Car chastell ja n'assiegiera:
 En lieu q'il son penon desplaie
 Sauf est, n'y falt a doubter plaie
 Ne peril dont le corps morra, 23730
 Mais l'alme en grant peril serra.
 Qant il l'assisse ordinera
 Et qu'il l'enqueste desarraie,
 Du maintenue qu'il ferra
 Les poveres gens manacera,
 Qe de sa part chascuns s'esmaie.
 Tiel chivaler mal s'esvertue
 Q'ensi par torte maintenue
 Fait rançonner les povres gens;
 Dont il pourchace champ et rue 23740
 Et largement boit et mangue,
 Mais autre en paie le despens:
 Des marches dont il est regentz
 Cils qui sont povres indigentz
 Ne sont pas de sa retenue;
 Ainçois les riches innocenz,
 Qui font a luy les paiementz,
 Itieux pour son proufit salue.
 Du loy civile il est escrit,
 Nul chivaler, s'il est parfit, 23750
 Serra marchant ne pourchacour:
 Car chivaler q'ad son delit
 En luere, pert son appetit
 A souffrir d'armes le labour.
 Pour ce du loy empereour
 Ly chivalers q'est sanz valour,
 Qui laist les armes pour proufit,
 Perdra, puisq'il est au sojour,
 Son privilege et son honour,
 Qant point comme chivaler ne vit. 23760
 Mais l'autre, qui fait son devoir,
 Grant privilege doit avoir,

23727 nassiegiera

23742 enpaie

23769 cestassauoir

Qu'il ert exempt de l'autre gent,
 Sique la loy n'ara pooir
 De son corps ne de son avoir;
 Dont il doit venir duement
 A nul commun enquerrement,
 N'en autre office ascunement
 Lors serra mis, c'est assavoir
 Maisqu'il poursueie franchement 23770
 Les armes bien et noblement,
 Dont il porra le meulx valoir.
 Du loy Civile est establis,
 Qe qant ly commun serra mis
 Au Gabelle ou posicioun,
 Les biens au chivaler de pris
 Des tieux taillages sont horspris
 Et sont du franc condicioun,
 Qu'il doit avoir remissioun
 Sanz paine ne punicioun, 23780
 Ensi qu'il serra franc toutdis
 As armes pour tuicioun,
 De garder sanz perdicioun
 Le commun droit de son paais.
 Mais d'autre part c'est un decret,
 Le chivaler serra juré,
 Qant l'ordre prent au primerein,
 Q'en champ ne doit fuir un pié
 Pour mort ne pour adverseté,
 Ainz doit defendre de sa mein 23790
 Et son paais et son prochein,
 Car son devoir et son certain
 A soul ce point est ordiné;
 Dont s'il son ordre tient au plein,
 Ja d'autre charge n'ert gardein,
 Ainz ert exempt et honouré.
 Mais cil truant qui point ne vont
 As armes ne s'esjoyeront
 Du privilege au chivaler,
 Qant a l'ostell sojourneront: 23800
 Pour ce de commun loy serront
 Et assissour et officer,
 Ne l'en leur doit pas respiter
 De leur catell ne leur denier,
 Qu'ils pour Gabelle paieront;
 Car qui les armes voet lesser,

Par droit ne serra parçonier
 Al honour que les armes font.
 Ce sciet chascuns en son endroit
 Par tout le monde, quelq'il soit, 23810
 Qui tient estat en ceste vie,
 S'il a son point ne se pourvoit,
 Ainçois s'esloigne et se forsvoit,
 Qant il ad fait l'apostazie,
 Ja puis n'ad garde de folie:
 Ce dis pour la chivalerie,
 Que chivaler garder se doit
 De pourchas et de marchandie,
 Car ces deux pointz n'acordont mie,
 Qui l'ordre en voet garder au droit. 23820
 Mais nepourqant au jour present,
 Si comme l'en dist communement,
 Des chivalers q'ont perdu honte
 On voit plusours, dont sui dolent,
 Qui tant devienont violent
 Du covoitise que leur monte,
 Que leur prouesse riens amonte.
 Mais qant le luere honour surmonte,
 Ne say quoy dire au tiele gent:
 Si je par resoun le vous conte, 23830
 Plus valt berchier au droit acompte
 Qe cil q'en l'ordre ensi mesprent.
 Tiel chivaler bien se remire
 Qu'il n'ara ja mestier du mire,
 Ainçois a l'ostel se repose,
 U qu'il son luere ades conspire
 Et fait les povres gens despire,
 Q'encontre luy nuls parler ose.
 Mais certes c'est vilaine chose,
 Qant vice ad la vertu forsclose 23840
 En chivaler, siqu'il desire
 Le luere, dont il se repose:
 Des tiels y ad comme je suppose
 Plus de quatorsze en cest empire.
 Ne say quoy valt cil chivaler
 Qui point ne se voet essampler
 Des armes, dont il soit vaillant,
 Si comme fuist Gorge, et ressembler
 Ne voet au bon hospiteller
 Saint Julian ne tant ne qant, 23850

23820 envoit

Dont soit les povres herbergant:
 Car chivaler q'est sufficient
 De corps et biens et travailler
 Ne voet, et est sur ce tenant
 D'escharceté, meinz est vaillant
 Que n'est le ciphre a comparer.
 Mais si le chivaler couchour
 Ne quart la reule ne l'onour
 De ce que son estat destine,
 Ore agardons de l'autre tour 23860
 Si cil q'as armes son retour
 Fait, soit honeste en sa covine.
 Il est tout voir q'en ce termine
 Dessur la terre et dessoubz myne
 Om voit que chivaler plusour
 Quieront prouesse outremarine,
 Mais si leur cause fuist divine,
 Bien fuissent digne de valour.
 Siz chivalers sont dit des prus,
 Roys Charles, Godefrois, Arthus, 23870
 Dans Josué, Judas, Davy:
 En tous leur faitz prouesse truis
 Plain des loenges et vertus
 Vers dieu et vers le siecle auci:
 Par ceaux n'estoit orguil cheri
 Ne covoitise, et tant vous dy,
 C'estoit la cause dont vencuz
 N'estoient de leur anemy;
 Et pour ce qu'ils ffront ensi
 Leur noun encore est retenuz. 23880
 C'estoient chivaler au droit
 Et de prouesse en son endroit,
 Et de simplece en sa mesure;
 Dont au present molt bon serroit
 Qe par ceaux l'en essampleroit
 A querre honour sanz mesprisure.
 Des chivalers ore a ceste hure
 Hom voit hardis a demesure,
 Si travaillent a grant exploit
 Et vont querant leur aventure; 23890
 Dont resoun est q'om les honore, f. 131
 Si ce par bonne cause soit.
 O chivaler, je t'en dirray,
 Tu qui travailles a l'essay

Devers Espruce et Tartarie.
 La cause dont tu vas ne say,
 Trois causes t'en diviseray,
 Les deux ne valent une alie :
 La primere est, si j'ensi die
 De ma prouesse enorguillie, 23900
 ' Pour loos avoir je passeray ' ;
 Ou autrement, ' C'est pour m'ameye,
 Dont puiss avoir sa druerie,
 Et pour ce je travailleray.'
 O chivaler, savoir porras,
 Si tu pour tiele cause irras,
 Que je t'en vois cy divisant,
 L'essample point ne suieras,
 Ne d'armes ceaux ressembleras,
 Des queux tu m'as oy contant : 23910
 Car nul puet estre bien vaillant,
 S'il dieu ne mette a son devant ;
 Mais tu, qui pour le siecle vas,
 Si ton pourpos n'es achievant
 Solonc ce que tu vais querant,
 Lors je ne say quoy tu ferras.
 Si tu d'orguil voes travailler
 Pour vaine gloire seculer,
 Dont soietz le superiour
 Des autres, lors t'estuet donner 23920
 Ton garnement et ton denier
 As les heraldz, qu'il ta valour
 Et ta largesse a grant clamour
 Facent crier ; car si l'onour
 Ne te voet celle part aider,
 Lors je ne say quoy ton labour
 Te puet valoir, ainz a sojour
 Assetz te valt meulx reposer.
 Et d'autre part si ta covine
 Soit pour la cause femeline, 23930
 Dont as le cuer enamouré,
 Et sur ce passes la marine,
 A revenir si la meschine
 Ou dame solonc son degré,
 Pour quelle tu t'es travaillé,
 Ne deigne avoir de toy pité,
 Tout as failly du medicine :
 Car ce sachez du verité,

Que tu n'en aras le bon gré
 De la prouesse q'est divine. 23940
 Et nepourqant a mon avis,
 Si plainement a ton divis
 De l'un et l'autre q'ai nomé
 Ussetz le point en toy compris,
 Primer que du loenge et pris
 Sur tous les autres renomé
 Fuissetz et le plus honouré,
 Et q'ussetz a ta volenté
 Le cuer de tes amours conquis,
 Trestout ce n'est que vanité ; 23950
 Car huy es en prosperité
 Et l'endemain tout est failliz.
 Mais d'autre part a tant vous di,
 La tierce cause n'est ensi,
 Pour quelle ly prodhons travaille ;
 Ainz est par cause de celluy
 Par qui tous bons sont remery
 Solonc l'estat que chacun vaille.
 Ton dieu, q'a toy prouesse baille,
 Drois est q'au primer commençaille
 Devant tous autres soit servi ; 23960
 Car chivaler q'ensi se taille
 Pour son loer dieus appaillie
 L'onour terrin, le ciel auci.
 O chivaler, bien te pourpense,
 Avise toy de l'evidence,
 Le quel valt meulx, ou dieu servir,
 En qui tout bien fine et commence,
 Ou pour la veine reverence
 L'onour du siecle poursuir. 23970
 Pour fol l'en puet celluy tenir
 Qui laist le bon et prent le pir,
 Qant il en voit la difference :
 Al un des deux te falt tenir,
 Mais quel te vient plus au plesir
 Je laiss dessus ta conscience.
 Mais dont la chose est avenue
 Ne say, ne dont le mal se muc ;
 Car ce voit bien cil q'ore vit,
 Chivalerie est trop perdue, 23980
 Verrai prouesse est abatue,
 Pour dieu servir trop sont petit :

23973 envoit

Mais d'autre part sanz contredit
 Pour luy servir en chascun plit
 Le siecle ad large retenue ;
 Car d'orguil ou du foldelit
 Au jour present, sicomme l'en dist,
 Chivalerie est maintenue.
 Les chivalers et l'escuiers,
 Qui sont as armes costumiers, 23990
 S'ils bien facent leur dueté,
 Sur tous les autres seculers
 Sont a louer, car leur mestiers
 Du siecle est le plus honouré
 De prouesse et de renommée :
 Mais autrement en leur degré,
 En cas q'ils soient baratiers,
 Lors serront ils ly plus blamé
 Par tout le siecle et diffamé
 Et des privés et d'estrangiers. 24000
 Les armes sont commun as tous,
 Mais tous ne sont chivaleros
 Queux nous voions les armes prendre ;
 Car cil q'est vein et orguillous
 Et du pilage covitois
 N'est digne a tiel honour comprendre.
 Mais ore, hélas ! qui voet attendre
 Et le commun clamour entendre
 Orra merveilles entre nous ;
 L'onour dont l'en souloit ascendre
 En cest estat veons descendre, 24010
 Q'est a tous autres perillous.
 Mais cil q'au droit se voet armer
 Et sur les guerres travailler,
 Estuet a garder tout avant
 Pour la querelle examiner,
 Qu'il ne se face a tort lever,
 Dont ert la cause defendant :
 Et puis falt q'il se soit armant
 Non pour le lucre tant ne qant, 24020
 Mais pour droiture supporter ;
 Car qui les paiis exilant
 Vait et la povre gent pilant,
 Sur tous se doit bien aviser.
 Combien que la querelle soit
 Bien juste, encore il se deçoit
 Qui pour le vein honour avoir,

Ainz que pour sustenir le droit,
 Se fait armer ; ou d'autre endroit,
 S'il arme et tue pour l'avoir 24030
 De les richesses rescevoir,
 De son estat ne son devoir
 Ne fait ensi comme faire doit.
 Pour ce chascuns se doit veoir
 Qu'il sache d'armes tout le voir,
 Car sages est qui se pourvoit.
 Selonc l'entente que tu as,
 Du bien et mal resceiveras,
 Car dieus reguarde ton corage :
 En juste cause tu porras 24040
 Tort faire, car si tu t'en vas
 Plus pour le gaign de ton pilage
 Que pour le droit, lors vassellage
 Par ton maltoit se desparage,
 Que nul honour deserviras :
 Mais si pour droit fais ton voiage,
 Lors pris, honour et avantage
 Trestout ensemble avoir porras.
 Mais certes ore je ne say
 De ces gens d'armes quoy dirray,
 Q'ensi disant les ay oiz : 24050
 ' Es guerres je travailleray,
 Je serray riche ou je murray,
 Ainz que revoie mon paiis
 Ne mes parens ne mes amys.'
 Mais riens parlont, ce m'est avis,
 ' Je pour le droit combateray,'
 Ainz sont du covoitise espris ;
 Mais cil n'est digne d'avoir pris
 Qui d'armes fait ensi l'essay. 24060
 O chivaler qui vas longtein
 En terre estrange et quiers soulein
 Loenge d'armes, ce sachiez,
 Si ton paiis et ton prochein
 Ait guerre en soy, tout est en vein
 L'onour, qant tu t'es eslongez
 De ton paiis et estrangez :
 Car cil qui laist ses duetés,
 Et ne voet faire son certain,
 Ainz fait ses propres volentés, 24070
 N'est resown qu'il soit honourés,
 Combien qu'il soit du forte mein.

Mais qui la guerre au tort conspire,
 Om doit celluy sur tout despire;
 Et nepourquant au present jour
 Veoir porra, qui bien remire,
 Pour le proufit que l'en desire
 Ou pour l'orguil du vein honour
 Chascuns voet estre guerreiour,
 Ou a ce faire consaillour; 24080
 Dont la justice trop empire
 En noz pais par tout entour,
 Trestous en faisons no clamour, f. 132

Mais n'est qui puet trover le mire.
 Quant cils en qui toute prouesce,
 Honour, valour, bonté, largesce
 Et loyalté duissent remeindre,
 Se pervertont de leur noblesce
 Par covoitise ou par haltesce,
 De l'onour seculer atteindre, 24090
 Ne say a qui me doy compleindre;
 Car cils qui sont du poeple meindre
 Tous jours en sentent la destresce:
 Si dieus les mals ne vuille exteindre,
 N'est qui de soy les puet enpeindre
 Au fin que la malice cesse.

Ce veons bien, q'au temps present
 La guerre si commune esprent,
 Q'au paine y ad nul labourer
 Ly quel a son mestier se prent: 24100
 Le prestre laist le sacrement
 Et ly vilains le charner,
 Tous vont as armes travailler.
 Si dieus ne pense a l'amender,
 L'en puet doubter prochainement
 Que tout le mond doit reverser;
 Car quant commun se font lever,
 Lors suit maint inconvenient.

Par orguil et par covoitise
 L'en voit par tout la guerre esprise.
 Helas! mais c'est des cristiens 24111
 Dont est destruite sainte eglise,
 Et la justice en sa franchise
 Ne prent mais garde de les gens.
 Ore est le jour, ore est le temps
 Que nous faillont les bons regens,

24083 enfaisons

Et si nous fait la bone aprise,
 Sique sanz bounns governemens
 Nous vienont les molestemens,
 Dont chascuns sente la reprise. 24120

Mais certes ne puet durer guere
 Cil qui sustient la false guerre
 Et fait la bonne pees perir,
 Ou soit seigneur qui ce fait fere,
 Ou consaillour de tiel affere,
 De malvois fin doivent finir;
 Car ils tollont le sustenir
 Des povres et les font morir,
 Qui voldroient leur pees requere:
 Ne say q'apres doit avenir, 24130
 Mais qui tieux mals nous fait venir
 Est trop maldit en nostre terre.

O cristiene cruauté,
 Q'es pleine de desloyalté,
 Que si commune occisioun
 Sicomme des bestes au marché
 Fais de les hommes sanz pité!
 O cuer plein de confusioun!
 O infernale illusioun,
 Qui tiele horrible abusioun, 24140
 Q'est auci comme desnaturé,
 Fais de ton sanc l'effusioun!
 Ne say a quell conclusioun
 Voies dire que tu crois en dée.

O Covoitise ove ton pilage,
 Di dont te vient ce vasselage
 Du pueple occire: car droiture
 Nulle as, ainz vient de ton oultrage
 Que tu demeines tiele rage.
 Car dieus q'est sire de nature 24150
 La terre ove tout le bien dessure
 Fist a l'umeine creature
 Commun; mais tu comme loup salvage,
 Pour propre avoir plus que mesure,
 Occire fais a demesure
 Ce que fist dieus a son ymage.

Sovent je muse et museray
 Comment a dieu m'excuseray
 Qu'il de sa loy m'ad defendu,
 Disant que l'omme n'occiray; 24160

24093 ensentent

Ainçois me dist que j'ameray
 Ceux qui se sont a luy rendu,
 Et ont baptesme et foy resçu:
 Ensi pensant je suy venu
 Que l'excusacioun ne say.
 Mais ce que dieus de sa vertu
 Crea, je fils de Belzabu
 De mon orguil destrurieray?

Sur tout se pleingt la gent menour
 En disant que du jour en jour 24170
 Le siecle s'en vait enpirant;
 Mais qui voet dire la verrou,
 Ly chivaler de son errour
 Et l'escuier de meintenant,
 Ascuns qui s'en vont guerrioiant,
 Ascuns a l'ostell sojournant,
 Le covoitous et l'orguillour,
 Sont en partie malfesant,
 Par quoy trestout le remenant
 Du siecle est mellé de folour. 24180

Ore q'il ad dit l'estat des chivalers
 et des gens d'armes, dirra de
 ceux qui se nomont gens du loy.

Une autre gent y ad, du quoy
 L'en poet oïr murmur en coy,
 Par les pais communement
 Chascuns se plaint endroit de soi;
 C'est une gent nomé du loy,
 Mais le noun portont vuidement;
 Car loy justice en soy compront,
 Mais n'est celly qui garde en pront,
 Ainz ont colour sanz bonne foy:
 Je prens tesmoign a celle gent, 24190
 Si tort puet donner largement,
 Le droit ne gaignera que poy.
 Iceste gent, ce m'est avis,
 Pour ce qu'ils ont la loy apris,
 Par resonn duissent loy tenir
 Et sustenir en leur pais
 Les drois; mais tant sont esbaldiz
 Du lucre, comme l'en puet oïr,
 Q'ainçois la loy font pervertir,

24188 enprent

Dont font le povre droit perir: 24200
 Car du poverte sont eschis,
 Mais ove le riche ont leur conspir,
 Et pour sa cause maintenir
 Justice et loy mettont au pris.

Si la querelle false soit,
 Et ly plaidour ce sciet et voit,
 Quant doit pleder pour son client,
 Lors met engin comment porroit
 Son tort aider et l'autry droit
 Abatre, dont soubtilement 24210
 Procure le deslayement;
 Et entre ce, ne say comment,
 De la cautele se pourvoit
 Q'il ad au fin le juggedment
 Pour soy. O dieus omnipotent,
 Veï la pledour de male endroit!

Quant la gent povere au pledour vient
 Pour avoir ce q'au loy partient,
 Et priont plaider en leur cas,
 Du charité ne luy sovient; 24220
 Car povere droit, qui donne nient,
 Pour null clamour escoute pas,
 Mais riche tort, qui parle bass,
 Vers luy se tret isnele pass,
 Escoute, et de sa part devient:
 Car jammais pour tes ambesaas
 La juste cause que tu as
 Encontre sisnes ne maintient.

L'en dist en ces proverbiais,
 'L'un covoitous et l'autre fals 24230
 Ils s'entracordont de leger.'
 Maldit soient tieux parigals,
 Car ja nuls ert si desloyals,
 S'il porra largement donner,
 Q'il meintenant pour son denier
 Ne truiest celluy qui voet pleder
 A sustenir trestous ses mals,
 Dont font les povres exiler:
 Loy q'ensi se fait desloyer
 Esclandre donne as courtz roials. 24240

En leur pledant, ce m'est avis,
 Ils ont au point deux motz assis
 Q'a leur estat sont acordant;

C'est 'tort' et 'fort,' dont sont malmis
 Les povres gens de leur païs
 Du tort et fort qu'ils sont faisant :
 Car au tort faire ils sont sachant,
 Et au fort faire ils sont puissant,
 Et si le font *par* tiel divis
 Qe ja n'ert droit si apparant 24250
 Qui contre tort ara garant,
 Qant ils ont la querelle pris.
 Ore aguardetz la charité
 Dont ils se sont confederé ;
 Car s'acun d'eaux soit en debat
 Envers autry de la contrée,
 Qui n'est pas de leur faculté,
 Cil ara d'eux null advocat,
 Qui voet pleder pour son estat,
 Car ne pledont, ce dient plat, 24260
 L'un contre l'autre en leur degré,
 Ensi se sont confederat :
 Maldit soient tiel potestat,
 Vers queux la loy n'ad poesté.
 'Nul trop nous valt,' sicomme l'en
 dist ;
 Mais certes trop y sont maldit
 Des tieux, qui scievont loy offendre,
 Et nepourqant ils ont l'abit
 Du loy : mais c'est un *grant* despit
 Qant sabatiers envoit aprendre 24270
 Son fils ce qu'il ne puet comprendre ; f. 133
 Car sa nature ne son gendre
 De la justice n'est confit,
 Vilain le droit ne voet entendre :
 Maisq'il son lucre porra prendre,
 De la justice tient petit.
 Auci l'en puet trop *mer*vailer,
 Car qui se puet ensi tailler
 Qu'il le mantell tantsoulement
 D'ascun pledour porra porter 24280
 Tanq'a la Court de Westmoustier,
 Il ert certain d'avancement :
 Car ja puis n'ert debatement
 En son païs du povre gent,
 Dont il ne serra *par*çonier
 Et d'une part la cause *pre*nt,

24295 engaigneront

Si gaigne pain et vestement :
 Maldit soient tiel soldoier.
 Phisicien d'enfermeté,
 Ly mires de la gent blescé, 24290
 Sont leez, q'ensi gaigner porront :
 La gent du loy est auci lée,
 Qant voit les autres descordé,
 Car *quique* se descorderont,
 Les gens du loy en gaigneront,
 Et pour cela la joye font.
 O la senestre charité !
 Qui la justice garderont,
 Et d'autry mal s'esjoyeront,
 N'ont pas la loy bien ordiné. 24300
 Et molt sovent, sicomme le mire
 La santé que l'enferm desire
 Met en subtil deslayement,
 Dont il avient q'ainçois empire
 La maladie et la fait pire
 Q'il n'estoit au commencement,
 Pour plus gaigner du pacient,
 Ensi font leur pourloignement
 Les gens du loy, qui bien remire ;
 Mettent en doubte leur client 24310
 Pour plus gaigner de son argent :
 Si ce soit loy je ne say dire.
Quique du perte se complaigne,
 Trestous les *jours* de la semaigne
 Ces gens du loy ont *leur* enress,
 Car qui *pres* d'eaux vent ou bargaine,
 Maisque l'un perde et l'autre gaigne,
 De l'un et l'autre encore ades
 Ils gaigneront, *sique* *jammes*
 N'est uns qui verra leur descress. 24320
 Des toutes *partz* vient leur estraine,
 Quiconque ait guerre, ils en ont pes
 En ceste siecle, mais apres
 Ne say quel *pro*ffit leur remaine.
 Qui pour gabelle ou pour taillage
 Estuet appaier le tollage,
 Ces gens du loy exempciown
 Quieront avoir, si q'avantage
 Nuls puet avoir de leur gaignage :
 Ainz sont du franc condiciown 24330

24322 enont

Plus *que* n'est Conte ne Baroun.
 Car tous a la posiciown
 Paions, mais cils du loy sont sage
 Et ont si faite la resoun,
 Ne say ce q'est leur enchesoun,
 La loy ne gardont ne l'usage.
 Ma reson le me fait sentir,
 Maisque ly Rois volt assentir,
 Puisque plaidours et advocatz
 Par leur maltolt se font richir 24340
 Del bien commun, q'ensi tollir
 Ly Rois doit *par* semblable cas
 Et leur maltolt et leur pourchas :
 Ce q'ont gaigné de leur fallas
 Au bien commun doit revertir.
 O Rois, tu qui les guerres as,
 En tiels le tresor sercheras,
 Si sagement te voels tenir.
 C'est la coustume a Westmoustier,
 Qui voet aprendre le mestier 24350
 Du loy, lors falt en un estage
 De les peccunes halt monter,
 Cest un estage pour conter :
 Bien acordant a celle usage
 Sur les peccunes devient sage,
 Qu'il du peccune l'avantage
 En temps suiant sache amasser
 Pour son prou et l'autry damage :
 Sur les peccunes son corage
 Attorne a la peccune amer. 24360
 Les apprentis en leur degré
 Au commencer sont encharné
 A les assisses pour pleder ;
 Et lors y *per*mont la quirée
 De l'argent que leur est donné,
 Q'ils tous *jours* puis pour le denier
 Scievont bien courre sanz changer ;
 Mais ne dy point sanz foloier,
 Car tort qui *don*ne riche fée
 Leur tolt l'odour du droit sentier, 24370
 Dont sovent les fait forsvoier
 Et courre loigns du charité.
 Et puis apres qant l'apprentis
 Un certain temps ara complis,
 Dont au pleder soit sufficient,

Lors quiert q'il ait la coife assis
 Dessur le chief, et pour son pris
 Le noun voet porter de sergant.
 Mais s'il ad esté pardevant
 En une chose covoitant, 24380
 Des Mill lors serra plus espris ;
 Car lors devient si fameillant,
 Ne luy souffist un remenant,
 Ainz tout devoure le païs.
 Mais ils ont une acoustumance,
 Qant l'apprentis ensi s'avance
 A cell estat du sergantie,
 Luy falt *don*ner une pitance
 Del orr, q'ad *gran*t signefiance :
 Car l'orr qu'il *don*ne signefie 24390
 Q'il doit apres toute sa vie
 Reprendre l'orr a sa partie ;
 Mais ce serra *grande* habondance,
 Qant pour *don*ner la soule mie
 Prent tout le pain, dont ne tient mie
 Le pois ovel en la balance.
 Mais qant a ce je truis escrit,
 En l'evangile dieus nous dist,
 Qe cil qui *don*ne pour l'amour
 De luy, ja ne soit si petit, 24400
 Plus a centfois bien infinit
 Reprendre doit ; mais ly pledour,
 Ce m'est avis, au *pre*sent jour,
 Qui pour le seculier honour
*Don*nent, ne serront a ce plit :
 Mais ils nientmeinz ont le colour,
 Car plus q'ils n'ont *don*né de lour,
 Centfois reseivont de *pro*ffit.
 Mais le *pro*ffit dont sont empli,
 Ne vuil je dire ne ne dy 24410
 Qe *de*par dieu ce leur avient,
 Ainz c'est *de*par le siecle, a qui
 Se *pro*fessont qant l'orr ensi
 Luy *don*nent, dont *leur* coife vient :
 Qui sert au siecle, avoir covient
 Loer du siecle, u qu'il devient,
 Mais qant il ert au plus saisy
 De son *pro*ffit, lors est tout nient ;
 Car a sa part riens luy *part*ient
 Que dieus *pro*mette a son amy. 24420

Sergantz du loy sont sourd et mu
 Avant *que* l'orr eiont resçu,
 Que l'en leur baille *prest* au main :
 C'est un metall de *grant* vertu,
 Q'ensi les sens q'ils ont perdu
 Guarist et les fait estre sain
 Au plée, ne chalt du quel bargain,
 Soit du gentil ou du vilain.
 La main ont toutdis estendu,
 Maisq'ils del orr soient certain, 24430
 Ou soit de pres ou de longtain,
 Chascun serra le bienvenu.

O *comme* le siecle ad poesté,
 Qant tiel miracle ad demoustré
 Sur son sergant q'ensi l'orr donne :
 Car maintenant q'il l'ad donnée,
 Sa langue en ce devient dorré,
 Qe *jammais* puis sanz orr ne sonne.
 La langue q'ensi s'abandonne
 Bien porra porter la coronne, 24440
 Car un soul mot au bon marchée
 Valt d'un escut *que* l'en guerdonne.
 Ensi ly sergant nous rançonne :
 Vei la du loy la charité !

Sergant, mal tiens en ton *pourpens*
 Qe dieus t'ad donné tes cink sens,
 Et langue et reson de parler,
 Qant tes paroles si chier vens,
 Dont se compleignent toutez gens.
 Tu es plus vil *que* l'usurer, 24450
 Car si tu vailles au pleder
 A la montance d'un denier,
 Molt largement del orr en *préms* :
 Si l'autre *perde* et tu gaigner
 Porras, bien te scies excuser,
 Qant tu en as les paiementz.

Rois Salomon ce tesmoigna,
 Qe cil qui peccune amera
 N'est riens plus vil des *tous* mestiers :
 Car *comme* ly boefs q'om vendra 24460
 Cil est a vendre, et pour cela
 Savoir voldroie volentiers
 Parentre vous, o peccuniers, f. 134
 Qant vous vous estes *pour* deniers

24453 enpréms

24456 enas

24459 plusvil

Venduz, qui vous rechatera.
 Cil q'une fois vous ot si chiers,
 Qu'il *par* sa mort fuist rechatiers,
 N'est loy q'il autrefois morra.

En une histoire des Romeins
 Senec reconte et fuist certains 24470
 D'une aventure q'avint la :
 Un *pledour*, qant fuist tout souleins,
 Enfern veoit *par* tout dedeins,

U vist Nero, qui se baigna ;
 Si dist au *pledour*, 'Venetz ça,
 Car gent vendable yci serra ;
 Vous *vous* vendetz a voz *procheins*
 Oultre mesure, et pour cela
 Chascun de vous se baignera
 En cest estang ne plus ne meinz.' 24480

'Way vous,' ce dist saint Ysaie,
 'Q'ensi science avetz cuillie !
 En *vostre* Court le riche tort
 Chascun de vous le justefie
 Pour l'orr avoir ; mais la *partie*
 Q'est *poivre*, la justice dort.'
 He, *comme* les *dons* q'om *vous* apport
 Voz corps *travaillont* sanz desport !
 Dont peine avetz en ceste vie
 Sanz joye avoir apres la mort. 24490
 Quoi valt l'avoir, qant a sauf port
 Ne puet venir ove la navie ?

Ne puet savoir qui n'ad appris
 Du loy les termes ne les ditz,
 Tout porrons *nous* le droit savoir ;
 Pour ce sont ils plus esbaldiz
 Pour remonter le tort en pris,
 Ainz q'om les puet *aparcveoir*.
 Tiels quide au point sa cause avoir.
 Mais qant le meulz de son avoir 24500
 Ad despendu sur tieux amys,
 Lors sentira le decevoir :
 Ensi le droit pert son devoir,
 Dont ils confondont les pais.

Sic*comme* les reetz et les engins
 Soubz les buissons en ces gardins
 Hom tent as petitz oisealx *prendre*,
 Ensi fait il de ses voisins

Qui sciet pleder ; car ly mastins
 Soubtilement ses reetz fait tendre 24510
 Pour attrapper et pour *surprendre*,
 Mandant ses *briefs* pour faire entendre
 Qe s'il n'ait *part* de leur florins,
 Il les ferra destruire ou pendre ;
 Ensi se pourchace a despendre
 Des larges mess et des bons vins.

O come saint Job de ceste gent
 Jadis parla notablement,
 Disant *que* leur *possession*
 Tienont en peas quietement, 24520
 Des tous *permont*, mais nuls *reprent*
 De leur avoir, q'ont au *fuisoun* ;
 N'est chose que les grieve *noun*,
 Ainz ont le siecle a lour *bandoun*,
 Ne dieus leur met chastement.
 Dont en la fin, sicome *lisoun*,
 Lors irront au *perdicoun*,
 Q'ils ont lour ciel ore au *présent*.

L'en porra dire as gens du loy,
 Comme dist Jacob, ce semble a moy,
 Q'en son baston Jordan passoit, 24531
 Mais deinz brief temps a *grant* desroy,
 Tout plein des biens ove beau conroy,
 Riche et manant y revenoit :
 Ensi ly *pledour* orendroit
 Combien q'il povre au *primer* soit,
 Bien tost apres *avera* du quoy
 Si largement, *que* tout q'il voit
 Luy semble a estre trop estroit
 De *pourchacer* souleins a soy. 24540

O vous q'ensi tout devouretz,
 Ce *que* dist Isale orretz :
 'Way vous,' ce dist, 'o fole gent,
 Mesoun as mesouns adjoustetz,
 Et champ as champs y assembletz ;
 Vo covoitise au tout s'extent,
 Comme cil qui volt souleinement
 Avoir la terre *proprement* :
 Mais je vous dy *que* *noun* aretz ;
 Car dieus de son droit jugement 24550
 Vous en promet le vengement,
 Et ce q'il dist ore ascultetz.

24533 couroy

'O vous, dist dieus, je vous di way,
 Les terres vous deserteray,
 Que vous tenetz du fals *pourchas* ;
 Et les *maisoun*s q'avetz si gay,
 Neis un des vous dedeins lerray
 Pour habiter, ainçois chalt pas
 Trestous les fray ruer en bass.'
 O tu *pledour*, qant a ce cas 24560
 Scies tu le *plee* ? Je croy *que* nay.

A celle assisse tout *perdras*,
 Et les damages restorras,
 Dont t'alme estuet paier le pay.
 Cil q'ad *grant* faim et soif auci,
 Et en ce point s'est endormy,
 Et songe qu'il mangut et boit,
 Dont se quide estre repleny,
 Trop est desceu ; et tout ensi
 Soy mesmes ly *pledour* deçoit, 24570
 Car qant plus quide en son endroit
 Avoir tout fait, plus ert destroit
 Du covoitise q'est en luy,
 Et en la fin, *comment* qu'il soit,
 Les biens q'au tort et fort resçoit
 Serront *comme* songes esvany.

Qant a ce point nous dist ly *prestre*
 Qe du malgaign ne poet encrestre
 Le fils apres le *pourchacour* :
 De ces *pledours* ce puet bien estre, 24580
 Qu'ils font *pourchas* a la senestre
 Le fin demoustre la verroux ;
 Om voit le fils a ce *pledour*,
 Ce q'en trente *ans* *par* *grant* labour
 Jadis *pourchaca* son ancestre,
 Il vent en un moment du jour,
 Q'il n'en retient a son sojour
 Ne la Cité ne le champestre.

Cils qui duissent la loy garder
 Et gens du loy se font nomer, 24590
 Ces sont qui plus font a contrere.
 Cassodre le fait tesmoigner,
 Qe cil q'au loy voet contraler
 Entent tous regnes a desfere.
 Mais un petit m'en covient tere,
 Qe d'autres regnes ne sai guere,

24551 enpromet

De ceaux qui sont dela la mer,
Mais je say bien q'en ceste terre,
Si dieus n'amende leur affere,
Le regne en porront tost quasser. 24600

La loy de soy est juste et pure
Et liberal de sa nature,
Mais cils qui sont la loy gardant
La pervertont et font obscure,
Si la vendont a demesure,
Q'a leur marché n'est un marchant
Des povres gens q'est sufficient:
Ce fait les riches malfaisant;
Car bien scievont au present hure
Qe povre gent est sanz garant; 24610
Sique la loy du meintenant
Ne sciet justice ne droiture.

Mais nepourqant je ne dy mye
Q'en ces pledours de leur partie
Tantsoulement demoert le vice,
Dont bonne loy s'est pervertie;
Ainz est en la justicerie,
Qui doivent garder la justice:
Car pour l'amour dame Avarice,
Qant elle vient en leur office 24620
Et ad la main del orr saisie,
Tant les assote et les entice
Qe ly plus sage en est tout nyce,
Par quoy le tort se justefie.

Ore dirra un poy de l'estat des
Jugges solonc le temps d'ore.

Doun, priere, amour, doubtance,
Ce sont qui font la variance
Des Jugges, dont sont corrompu:
Om dist, et j'en croy la parlance,
Q'ore est justice en la balance
Del orr, qui tant ad de vertu; 24630
Car si je donne plus que tu,
Le droit ne te valt un festu;
Car droit sanz doun n'est de vaillance
As Jugges, ainz serras deçu;
Qant il mes douns aront reçu,
Ton droit n'ara vers moy puissance.

Auci si j'eie cause torte,
Maisque des grans seignours apporte

24600 enporront

24623 plassage enest
24657 Enpoet24631 plusque
24682 enad

24648 plusforte

Leur lettres a prier pour moy,
Ly Jugges qui le cuer vain porte, 24640
Au fin que je de luy reporte
Loenge, qant au Court de Roy
Serrai venuz, enprennt sur soy
Ma cause, et fait tourner la loy,
Siq'au droiture ne desporte,
Mon tort ainz contre bonne foy
Avance; et ensi je le voy,
Priere est de la loy plus forte.

Amour les Jugges fleche auci,
Car si je soie au Juge amy 24650
Ou d'alliance ou de lignage,
La loy se tourne ovesque my,
Sique je n'ay voisin le qui f. 135
M'ose enpleder de mon oultrage,
Combien que je l'ay fait damage;
Et s'il le fait, nul avantage
En poet avoir; car j'ay celluy
De qui je clayme cousinage,
Q'est Juge, dont en mon corage
A faire tort sui plus hardy. 24660

Le Juge auci sovent pour doubte
Justice a faire trop redoubte
Contre seignour qui se mesprent;
Car qant uns de la povere route
Se pleingt q'il ad sa teste route,
Ou q'om ses biens luy tolt et prent,
Et quiert son droit en juggement
Vers le seignour, lors nullement
Au povre cry le Juge escoulte:
Et c'est la cause au temps present 24670
Qe mal seignour la povere gent
En tous pais flaielle et boutte.

Ly Jugges qui par covoitise
Des douns avoir pert sa franchise
Au droit jugger, offend son dieu;
Car mesmes dieu, ly halt Justise,
As Jugges toute tiele prise
Par Moÿsen ad defendu:
Si dist que doun ensi resçu
Le cuer du Juge ad corrompu, 24680
Q'il point n'en voit la droite assise,
Et de sa langue en ad tollu

Le voidisant, dont est perdu
Le droit du povre en mainte guise.
Ly Jugges qui laist equité
Pour priere ou pour amisté,
Pour parent ou pour seigneurage,
Trop erre encontre le decré;
Car mesmes dieu l'ad commandé
Qe Juge doit en son corage 24690
La poverte ove le halt parage,
La gentillesce ove le servage,
Qant a justice en loyalté
Trestous juger d'ovel estage:
Tous les fist dieus a son ymage,
Et tous serront ovel jugé.

Saint Jaques dist que vistement
L'en doit oir, mais tardement
Parler: pour ce Senec auci
Nous dist, q'il a son escient 24700
Le Juge tient pour sapient
Qui tost ara la cause oi,
Mais ainz q'il juge ou toy ou luy,
De bon loisir s'avise ensi
Q'il tort ne face en jugement.
Enten pour ce le povre cry,
O Jugges, car cil est failly
Qui la justice au poeple vent.

Ly Juge auci qui pour paour
Laist au feloun et malfesour 24710
Vengance faire en jugement,
Il est de soy cause et motour
Qe ly malvois devient peiour;
Meistre Aristole ensi m'apprent.
L'apostre dist tout ensemment
Qe pour transgressioun du gent
La loy fuist faite, et lors au jour
Ly Jugges ot toutdis present
S'espeie au coste prestement,
Comme du justice executour. 24720

Dieus qui voit toute chose aperte
Dist: 'Way au Juge qui perverte
Justice et porte les falsines,
U la malice gist coverte.'
Du quoy vient la commune perte,
Si fait soudaines les ruines

24750 plussouent

T

De les voisins et les voisines;
Il prent les owes et gelines
Et les capons de la poverte,
Mais a luy q'ad mains argentines 24730
Plus q'as vertus qui sont divines
Ly Jugges ad l'oraille overte.

O Jugges, qui des tiels soldées
Les beals manoirs edifietz,
Qui sont semblable au Paradis,
Di lors si vous par ce quidetz
Q'as tous jours y habiteretz:
Fols es si tiel soit ton avis.
Enten ce que je truis escrits,
Dieus mesmes t'ad pour ce maldis,
Car tu le deable as herbergez 24740
En tes maisouns comme tes amys
Par covenant q'apres toutdis
En son enfern herbergeretz.

O Jugges, qui tant nettement
Ton corps, ta maison et ta gent
Des toutes partz fais conroier,
O comme tant bell vessellement
Et tant honeste garnement,
Q'au plus sovent te fais monder, 24750
Qe tache n'y doit apparer
Dehors, mais pardedeins le cuer
Ordure y est toutdis present,
Du covoitier et fals juger
Scies tu quoy serra ton loer?
Dieus t'en dist, Way! sanz finement.

Cil Jugges folement s'ensense
Qui se fait tendre en conscience
Des choses qui ne valont nient,
Dont quiert a porter l'apparence 24760
Du vray justice en la presence
De la commune u qu'il devient,
Mais qant le grant busoign avient,
Et fals brocage a luy survient,
Lors de justice l'evidence
Oublist, que point ne luy sovient;
Et c'est la cause dont tort vient,
Et fait mainte inconvenience.

Ce q'Ysate depar dieu
Jadis disoit ore est venu, 24770

Des Juges qu'il prophetizoit
 Q'as dons se sont trestout tenu,
 N'est qui de ce s'est abstenu ;
 Par quoy ly povres orendroit
 Ne puet justice avoir ne droit.
 Helas, q'est ce q'om dire doit ?
 Car qant nous avons loy perdu,
 Tout est failly, si q'om ne voit
 Queu part aler, ainz l'en forsvoit,
 Dont grant peril est avenu. 24780
 Par tout ailleurs, ce truis escrit,
 Ad viele usage ou loy escrit,
 Du quoy le poeple est governé ;
 Mais mon pais est trop maldit,
 Ly quel ne d'un ne d'autre vit,
 Ainz y gouverne volenté :
 Ce q'au jour d'uy est adjudé
 Pour loy, demain ert forsjudé,
 Ore est tout bien, ore est desdit ;
 Qant l'en meulx quide en verité 24790
 Avoir sa cause terminé,
 Trestout le fait est inparfit.
 Ensi pour dire courtement
 Le pledour ove le president
 Et l'apprentis et l'attourné
 Le noun portont inproprement
 Du loy ; car loy deins soy comprént
 Verray justice et equité,
 Mais ils la loy ont destourné
 En cautele et soubtilité, 24800
 Dont ils pilont trestoute gent ;
 Si q'om puet dire en verité,
 Ore ad perdu sa charité
 La loy par force de l'argent.
 Om dist que tout estat empire,
 Mais certes nul est ore pire
 Des tous les seculers estat
 Que n'est la loy, dont fais escrire ;
 Car qui voldroit au droit descrire
 Les pledours et les advocatz 24810
 Dirroit merveilles en ce cas ;
 Car quique vent, ils font pourchas,
 Del autry mal leur bien respire ;
 Si dieus socour n'y mette pas,

24787 Jourday

Om puet doubter que leur compas
 Destruiera tout cest empire.
 Ore q'il ad dit de ceaux qui se
 nomont gens de la loy, dirra des
 Viscontes, Baillifs et Questours,
 D'une autre gent, sicome l'en voit,
 La loy commune se pourvoit,
 Qui sont viscontes appellé.
 Visconte jure en son endroit 24820
 La loy solonc justice et droit
 Garder sanz faire falseté,
 Au proufit de communalte :
 Mais om dist q'il s'est perjuré,
 Et qu'il le pueple plus deçoit ;
 Car de nul droit s'est appaié,
 Ainçois q'il soit del orr paié,
 Ne chalt comment il le reçoit.
 Ce sciet om q'au commencement
 Visconte fait son serement 24830
 Et jure q'il primer au Roy,
 Au pueple et puis secondecment,
 Doit servir bien et loyalment,
 Sicome ministre de la loy :
 Mais ore om dist, et je le croy,
 Q'il tout en pieces ad la foy
 Si route, qu'il ascunement
 Retient de ce ne grant ne poy ;
 Car il ne moet, s'il n'ait pour quoy,
 Le pié pour aider a la gent. 24840
 De ces viscontes u serra, f.136
 Qui dire salvement porra
 Q'il son acompte ad bien fourni,
 A l'eschequer qant il vendra,
 Et q'il lors ne decevera
 Le Roy, ou q'il le pueple auci
 Ne pile au tort ? Pour moy le dy,
 Ne say un soul visconte, qui
 Qant a ce point s'escusera :
 Le perjuré met en oubli, 24850
 Maisqu'il de lucre n'ait failly,
 Sa conscience ne faldra.
 Et nepourqant om puet oïr
 Visconte dire q'eschuïr
 Ne puet la perte en son office,

Ou autrement l'estuet blemir
 Sa conscience ; et sanz faillir
 Voir dist, mais il n'est pas si nice,
 Comment que l'alme se chevice,
 Q'il laist pour ce tort ou malice, 24860
 Dont quiert sa perte ades fuir :
 Car conscience ne justice
 Ne cure, maisq'il l'avarice
 De son office puet tenir.
 Le brief que le povre homme
 porte,
 Qant il l'argent ove ce n'apporte
 Pour le visconte desporter,
 Trop longuement puet a la porte
 Hucher, avant ce qu'il reporte
 Le droit qu'il en duist reporter : 24870
 Mais qui les dons voet apporter,
 Pour ce redoit ove soi porter
 L'exploit, voir de sa cause torte :
 Mais qui visconte conforter
 Ne voet del orr, desconforter
 Verra sa cause ensi comme morte.
 N'as pas en vein ton argent mis,
 Dont le visconte as fait amys,
 Car lors aras tu la douszeine 24879
 Des fals questours du deable apris,
 Ly quel, qant scievont bien le pris,
 Que tu leur dorras large estreine,
 Ja n'aras cause si vileine,
 Que perjuré du bouche pleine
 N'en vuillent les ewangelis
 Que ta querelle soit certeine ;
 Sique tu dois avoir la leine,
 Dont autre est sire des berbis.
 O le conspir, o le brocage,
 Dont l'en requiert, prie et brocage,
 Que le visconte aider voldra 24891
 A luy qui d'autri l'eritage
 Demande avoir de son oultrage !
 Car il les larges dons dorra,
 Dont le visconte avoeglara,
 Qui le panell ordeinera
 Des fals jurours a l'avantage
 De luy q'ad tort. O quoy serra,

24870 enduist

T 2

Qant homme ensi pourchacera ?
 Dont n'est celly qui n'ad damage.
 Primerement est dammagée 24901
 Cil q'est au tort desherité,
 Mais c'est en corps tantsoulement ;
 Et l'autre encore est pis grevé,
 Q'ensi la terre ad pourchacé
 De son malvois compassement ;
 Et le visconte nequedent
 N'est pas sanz culpe, ainçois offent,
 Ensi font l'autre perjuré,
 Dont l'alme le repaiement 24910
 Ferra sanz null delayement,
 Qant l'alme leur serra passé.
 Mais le visconte en son bargain,
 Au fin q'il puet avoir le gaign,
 De l'une et l'autre part voet prendre,
 Car lors sciet bien q'il est certain,
 Mais l'une part enemy la main
 Deçoit, ainz q'om le puet apprendre
 Mais il se sciet si bien defendre
 Et par cauteles faire entendre, 24920
 Que nuls n'en puet savoir au plain.
 Ensi se pourchace a despendre,
 Dont il serroit bien digne a pendre,
 Si resoun nous serroit prochain.
 O comme visconte ad grant vertu !
 S'il voet, l'enquete ert tost venu,
 Et s'il ne voet, ne vendra mye,
 Dont meint homme ad esté deçu :
 Car qant visconte ad l'orr resçu
 Pour tort aider de sa partie, 24930
 Lors jeuera la jeupartie
 De fraude, siq'au departie
 Le droit, ainz q'om l'ait aparçu,
 Met en deslay par tricherie
 De son office, ou il le plie,
 Au fin q'il serra tout perdu.
 Ensi pour affermer mon conte
 Sicome la vois commune conte,
 Lors porray dire et bien conter
 Que trop nous grieve le visconte : 24940
 Dont luy falt rendre dur acompte
 Apres la mort a l'eschequer

U pour plegger ne pour guager
Justice ne puet eschaper ;
Ainz ce *que* sa decerte amonte
Son auditour doit allouer,
C'est qu'il *prendra pour* son louer
Honour ou *perdurable* honte.
Des soubz baillifs y ad tout plein
Dont om se pleingt et je m'en pleign,
Car si visconte soit malvois, 24951
Encore sont ils plus vilein ;
Car ils pilont et paile et grein,
Si l'argent ne leur vient ainçois.
Vei la ministre de noz loys,
Qui ja nul jour serront courtois
Envers dieu n'envers leur *prochein* !
En ce pais sont plus *que* trois
Q'ont deservi *par* juste pois
L'onour des fourches plus haltein.
L'en puet bien dire a cel office, 24961
Sicome Crepaldz dist al herice,
'Maldit soient tant seigneurant,'
Qui duissent servir de justice
Et sont ministre d'avarice,
Dont vont la povre gent pilant.
Cuer ont des mals ymaginant,
Mains ont plus *que* le glu tenant,
Piés ont *pour* courre a toute vice,
Et *par* desdeign vont regardant : 24970
Qui duissent estre loy gardant,
Cils sont qui *plus* font de malice.
Semblables sont as enferrals,
U sont les peines eternalis,
Car ils font toutdis la tempeste
D'extorcions, des tartz, des mals ;
Les hommes et les animals
Chascuns en sente la moleste :
Ne valt priere ne requeste
Au fin *que* l'en l'amour adqueste 24980
De ces baillifs, tant sont ribalds,
Ainz falt *que* l'en *leur* donne et preste,
Q'ils ont toutdis malice preste :
Vei la du deable les vassals !
Ce sont cils qui vivent du proie,
Sicome l'ostour qui tolt et proie,

24958, 24968 plus*que*

Ce sciet et l'abbes et l'abesse,
Par qui sovent font leur voie :
Mais si la feste est sanz monoie,
Ne dirront point *que* c'est largesse ;
Ils n'ont ja cure de la messe 24991
Que moigne chante, ainz la *promesse*
Des downs avoir, ce leur fait joye.
Ensi pilont de la simplesce,
Et escorchont par leur destresse
De l'autry quir large courroie.
Trop est de luy q'ensi visite
La visitacion maldite :
Car qant baillif visitera, 24999
N'est maison q'il *pour* dieu respite ;
Comme plus la voit *povere* et despote,
Tant plus d'assetz l'oppressera,
Q'ascune chose enportera ;
La qu'il l'esterling ne porra
Avoir, il *prend* la soule myte :
Sicome goupil q'aguaitera
Sa proie, quelle estranglera,
Si fait baillif u qu'il habite.
L'en dist, et ce n'est fable mye,
Q'om doit seignour *par* la maisnie
Conoistre, et *par* semblable tour 25011
Je croy que si de sa partie
Visconte fuist d'oneste vie,
Ly soubz baillif fuissent meillour.
Mais tiel corsaint, tiel offrendour,
Si l'un soit mal, l'autre est peiour,
Et sur toute la compaignie
Pis font encore ly questour ;
Car leur falsine et leur destour
Fait *que* le tort se magnifie. 25020
Sur ce *que* tu es dependant
Au *perjurer* ils vont pendant
Le charge de leur conscience,
Par ce q'ils l'orr vont reseivant
Pour estre fals et desceivant :
Le *down* souffist a l'evidence,
Car covoitise ove leur dispense
Pour ton argent, *pour* ta despense,
Q'ils point ne mettont au devant
De dieu ne l'amour ne l'offense : 25030

24978 ensente

Mal font de soy la *providence*
Contre la mort que vient suiant.
De ces jurours fals et atteintz f. 137
Encore y ad des capiteins,
Traiciers ont noun, c'est assavoir
Q'ils treront, mais nounpas des meins,
Ainz du malice dont sont pleins,
Le remenant a leur voloir ;
Car s'ils dient le blanc est noir,
Les autres dirront, 'C'est tout voir,'
Et ce vuillont jurer sur seintz : 25041
Ou soit ce fals, ou soit ce voir,
Sicomme Traicier vuillont avoir,
Ensi serra, ne plus ne meinz.
A les assisses et jurées
Qui voet avoir les *perjurez*
Parler covient a ces Traiciers ;
Car a lour *part* ont aroutez
Tous les fals jurours redoubtez,
Qui se vendont pour les deniers 25050
Et se *perjurent* volentiers :
Ce sont du deable soldoiers,
Par queux le tort ad eshalcez
Sur tous les autres seculiers,
Qui sont du fraude costummers
Pour faire abatre loyalties.
Tout ensi comme ly chiens currouz
Est affaité du veneour
De courre au serf ou a goupil,
Tout autrecy ly fals traicour 25060
Les jofnes gens qui sont questour
Affaite et entre a son peril :
Qant nay dirra, dirront nenil,
Qant dist oil, si dirront il,
Du voir font fals, du fals verrouz,
Loyalté mettont en exil
Et felonnie au reconcil :
Maldit soient tiel assissour !
Ly fals questour dont vous endite
Les innocentz au mort endite, 25070
Qui sont sanz culpe d'enditer,
Et les felounz mortieux acquite :
Quiconque son travail aquite
Trop sciet le tort bien aquiter ;

25035 cestassauoir

Ou si le dette est un denier,
Jura *que* c'est un marc entier,
Et si marc soit, dist une myte :
Dire et desdire est son mestier,
Deux langes porte en un testier,
La qui falsine soit maldite. 25080
Loyalté serra desconfit,
Si tu les downs aras confit
A ces jurours, car leur corage
Ad a l'argent tiel appetit,
Q'ils se *perjurent* pour petit,
Ainçois q'ils lerront ton brocage.
Om voit de *nostre* voisinage
Tiel qui se *prend* a cest usage,
Dont il et tout son hostell vit ;
Que *pour* compter du clier gagnage
Sa lange valt *plus* d'avantage 25091
Que sa charue du *proffit*.
Ly povres qui n'ad pas d'argent
Se puet doubter de tiele gent
Au fin q'il n'ara pas son droit ;
Si puet ly riches ensemment,
S'il ne leur *donne* largement,
Car l'un et l'autre en *leur* endroit
Se passeront sanz nul exploit :
Pour ce cil qui le siecle voit 25100
Et ad ou terre ou tenement
Des tieux jurours doubter se doit ;
Car qui s'en garde il est benoit
En ce mal temps q'ore est *present*.
Mais d'autre *part* il me sovient,
Ascuns y ad qui point ne vient
A les assisses, et fait mal
De ce q'au voir jurer s'abstient ;
Car par ce l'autry droit detient,
Dont il duist estre tesmoignal, 25110
Qui sciet le droit original
Et pour le *proffit* voisinial
Jurer ne voet ce q'appartient :
Il est en *part* sicome causal
De l'autry perte especial,
Dont il respondre a dieu covient.
Mais este noble gent vaillant
Quident q'ils serront trop faillant

Par ce q'ensi duissent jurer ;
 Mais je luy fais bien entendant, 25120
 Cil q'au jurer n'est obeissant
 Pour la justice supporter,
 Ainz souffre l'autre fals questier
 Le droit abatre et perjurere,
 Du quoy son proesme est enpirant,
 Il est ensi come parçonier
 Du mal, puisq'il le pot hoster
 Et souffre q'il procede avant.
 Prodhomme ne doit eschuir
 De voir jurer pour sustenir 25130
 Le droit, dont il est mesmes sage ;
 Ainçois se doit plustost offrir,
 Q'en son defalte laist perir
 Le meindre de son voisinage ;
 Combien qu'il soit de halt parage,
 Son parenté ne desparage
 Du voir jurer a l'enquerir,
 Ainz fait tresnoble vassellage,
 Qant droit remonte en son estage,
 Que tort solait en bass tenir. 25140
 Ces clerks dient que le pecché
 Du tort dont homme ad enpesché
 Son proesme, ja n'ert absolu
 Pardevant dieu ne pardonné,
 Ainçois q'arere soit donné
 Tout quanque en ad esté tollu.
 O fals questour, di que fras tu,
 Qui tant droit avetz abatu
 Du false langue perjurée,
 Que ja puis n'ert par toy rendu : 25150
 Je croy ce te serra vendu,
 Que tu quidas avoir gagné.
 En voir disant nully desfame,
 Pour ce vous dy tiele est la fame
 Des pledours, dont ainçois vous dis ;
 Juge et visconte aici l'en blame,
 Et d'autre part ne sont sanz blame
 Ne les questours ne les baillis ;
 Ce duissent estre les amys
 Du droit et sont les anemys, 25160
 Car covoitise les entame ;
 Dont font lour plaintes et lour cris

25146 enad

La gent commune du pais,
 Si font le seignour et la dame.
 O quel dolour la loy nous meine !
 Car gens du loy primer la leine
 Pilont, comme vous ay dit devant,
 Mais l'autre gent est plus vileine,
 Car le visconte ove la douszeine
 Et les baillifs vont escorchant 25170
 Le peal, si que du meintenant
 Nuls est ses propres biens tenant ;
 Et nepourquant, si je me pleigne,
 Ne truis socour ne tant ne qant ;
 La loy, que nous serroit garant,
 Nous est sur tout la plus greveine.

Ore q'il ad dit l'estat de ceaux
 qui sont plaidours et Juges de
 la loy, dirra l'estat des Marchans
 solonc le temps q'ore est.

Dieus solonc la diverseté
 Des terres ad ses biens donné,
 A l'une leine, a l'autre soie, 25180
 A l'une vin, a l'autre blée,
 Et ensi la commodité
 Divide, mais u que je soie,
 Si je du resoun ne forsvoie,
 N'est une terre que je voie
 La quelle de sa propreté
 Des tous ensemble se rejoye ;
 Et c'est pour resonnable voie
 Que dieus ensi l'ad ordiné.
 Si une terre avoir porroit
 Tous biens ensemble, lors serroit 25190
 Trop orgueilleuse, et pour cela
 Dieus establissit, et au bon droit,
 Que l'une terre en son endroit
 Del autry bien busoignera ;
 Sur quoy marchant dieus ordina,
 Qui ce q'en l'une ne serra
 En l'autre terre querre doit ;
 Pour ce qui bien se gardera,
 Et loyalment marchandera,
 De dieu et homme il est benoit. 25200

La loy le voet et c'est droiture,
 Que qui se met en aventure
 De perdre doit aici gagner,
 Qant sa fortune le procure :
 Pour ce vous dy, cil qui sa cure
 Mettre voldra pour marchander,
 Et son argent aventurer,
 S'il gaigne, en ce n'est a blamer,
 Maisq'il le face par mesure
 Sanz fraude ; car pour le denier 25210
 Qui son voisin quiert enginer
 N'ad pas sa conscience pure.
 Tous scievont bien q'om doit precher
 As vices pour les amender,
 Non pour gloser du flaterie
 Les vertueux, car le blamer
 Des mals as bons est le priser ;
 Et pour cela, si je voir die
 As fols ce q'est de leur folie, 25220
 Ly sages oms ne se doit mye
 Par celle cause coroucer ; 138
 Car foy d'encoste tricherie
 Du plus notable apparantie
 Par son contraire est a louer.
 Les bons sont bons, les mals sont
 mals ;
 Dont si l'en preche as desloials,
 Pour ce ne doit il pas chaloir
 As ceaux qui sont en soi loials ;
 Car chascuns solonc ses travaux
 Doit son pris ou son blame avoir : 25230
 Ne sont pas un, pour dire voir,
 Marchant qui pense a decevoir
 Et l'autre qui par ses journals
 En loialté se fait movoir ;
 Tout deux travaillent pour l'avoir,
 Mais ils ne sont pas parigals.
 Del un Marchant au jour present
 L'en parle molt communement,
 Il ad noun Triche plein de guile, 25240
 Que pour sercher del orient
 Jusques au fin del occident,
 N'y ad cité ne bonne vile
 U Triche son avoir ne pile.

25223 plusnotable

Triche en Bourdeaux, Triche en Civile,
 Triche en Paris achat et vent ;
 Triche ad ses niefs et sa famille,
 Et du richesce plus nobile
 Triche ad disz foitz plus q'autre gent.
 Triche a Florence et a Venise
 Ad son recet et sa franchise, 25250
 Si ad a Brugges et a Gant ;
 A son agard aici s'est mise
 La noble Cité sur Tamise,
 La quelle Brutus fuist fondant ;
 Mais Triche la vait confondant,
 Les biens de ses voisins tondant,
 Car il ne chalt par quelle guise,
 Ou soit derere ou soit devant,
 Son propre lucre vait querant
 Et le commun prouffit despise. 25260
 Ascune fois Triche est grossour,
 Mais il ad trop la foy menour
 Endroit de cell avoir du pois
 Quel il engrosse, et au retour
 Le vent par pois du meindre tour
 Q'il n'achata l'avoir ainçois,
 Dont par deceipte le surcrois
 Retient, et l'autre en ad descrois :
 Mais ce que chalt, car son amour
 Triche ad tourné tant sur la crois 25270
 De l'esterling, q'as toutes fois
 Il quiert du bargaign le meillour.
 Triche aici de sa tricherie
 Soventesfois en mercerie
 Decepte fait diversement,
 Q'il ad toutplein du queinterie,
 Des buffles et de musardie,
 Pour assoter la vaine gent,
 Dont porra gaigner lour argent :
 Et si parole bell et gent, 25280
 Et fait leur bonne compaignie
 Du bouche, mais du pensement
 Son lucre quiert soubtilement
 Soubz l'ombre de sa courtoisie.
 Cil q'est estrait de ceste mue
 N'ad mye la parole mue,
 Ainz est crierys plus q'esperver :

25224 alouer

25268 enad

Quant voit la gent q'est desconue,
Lors trait et tire, huche et hue,
Si dist : ' Venetz avant entrer ! 25290
Des litz, courchiefs, penne ostricer,
Cendals, satins, draps d'outre mer :
Venetz, je vous dourray la vieue,
Car si vous vulletz achater,
Ne vous estuet plus loigns aler ;
Vecy le meilleur de la rue !'
Mais bien t'avise d'une chose,
Si voels entrer deinz la parclose,
Que d'achater soietz bien sage ;
Car Triche au point ne se desclose,
Ainçois par sa coverte glose 25301
Te dourra craie pour fourmage.
Tu quideretz par son language
Que celle urtie q'est salvage
Soit une precieuse rose,
Tant te ferrra courtois visage ;
Mais si voels estre sanz damage,
En son papir ne te repose.
Ascune fois Triche est draper,
Mais lors sciet il bien attrapper 25310
Les gens qui quieront la vesture.
Le noun de dieu te voet jurer,
Si tu le drap voes achater,
La marché bonne et la mesure
Te fra donner ; mais je t'assure,
Ce serra tout en aventure,
S'il porra ton argent happer :
Car combien q'il te dist et jure,
Ja son mestier solonc droiture
A toy n'a autre voet garder. 25320
Ce nous dist dieus, et je le croy,
Que cil q'est tenebrous en soy
Hiet et eschive la lumere :
Pour ce qant je le draper voy
Deinz sa maison, lors semble a moi
Q'il n'ad pas conscience cliere :
Car oscure ad la fenestriere
La q'il doit faire sa marchiere,
Q'au paine om voit le vert du
bloy :
Il est aici de sa maniere 25330

25095 plusloigns

Oscure, car nuls de la primere
Parole sciet du pris la foy.
Au double pris par serement
Le drap te met oscurement,
Dont il par tiele oseureté
T'engine plus soubtilement,
Et fait a croire voirement
Qu'il t'ad en ce fait ameisté,
Quant il t'ara plus enginé :
Car il dirra q'il t'ad donné 25340
Pour avoir ton aquoientement,
Siqu'il de toy n'ad riens gaigné ;
Mais la mesure et la marchée
Dirront q'il est tout autrement.
Si Triche est en son drap vendant
As deux deceiptes entendant,
Il est enquire au double plus
En son office deceivant,
Quant il des leines est marchant :
Car lors est Triche a son dessus, 25350
Par les Cités il est resqus,
Par les pais il est conuz,
Il vait les bargaigns pourpernant,
Il ad ses brocours retenuz,
Il fait tourner le sus en jus
Et le derere il met devant.
Triche ad sa cause trop mondeine,
Car l'autry prou toutdis desdeigne
Et quiert son propre lucre ades :
Mais il ad trop soubtile aleine 25360
Quant il l'estaple de la leine
Governe, car de son enress
Lors trete et parle asses du pres ;
Quoique luy doit venir apres,
Il prent yci tant large estreine
Du malvois gaign, dont il jammes,
Si dieus n'en face a luy reless,
N'avra sa conscience seine.
O leine, dame de noblesce,
Tu es des marchantz la duesse, 25370
Pour toy servir tout sont enclin ;
De ta fortune et ta richesce
Les uns fais monter en haltesce,
Les uns fais ruer en declin ;

L'estaple, u que tu es voisin,
N'est pas sanz fraude et mal engin,
Dont om sa conscience blesce.
O leine, ensi comme le cristin,
Einsi paien et Sarazin
Te quiert avoir et te confesse. 25380
O leine, l'en ne doit pas tere
Que tu fais en estrange terre :
Car les marchantz des tous paiis
En temps du peas, en temps du guerre,
Par grant amour te vienont querre ;
Car qui q'al autre est anemys,
Tu n'es jammes sanz bons amys,
Q'en ton service se sont mys
Pour le proufit de ton affere :
Tu es par tout le mond cheris, 25390
La terre dont tu es norris
Par toy puet grande chose fere.
En tout le mond tu es mené
Par terre et mer, mais assené
Tu es a la plus riche gent :
En Engleterre tu es née,
Mais que tu es mal governé
L'en parle molt diversement ;
Car Triche, q'ad toutplein d'argent,
De ton estaple est fait regent, 25400
Et le meine a sa volenté
En terre estrange, u proprement
Son gaign pourchace, et tielement
Nous autres sumes damagé.
O belle, o blanche, o bien delie,
L'amour de toy tant point et lie,
Que ne se porront deslier
Les cuers qui font la marchandie
De toy ; ainz mainte tricherie
Et maint engin font compasser 25410
Comment te porront amasser :
Et puis te font la mer passer,
Comme celle q'es de leur navie f. 139
La droite dame, et pour gaigner
Les gens te vienont bargainer
Par covoitise et par envie.
Eschange, usure et chevisance,
O laine, soubz ta governance

25395 plusriche

Vont en ta noble Court servir ;
Et Triche y fait lour pourvoiance, 25420
Qui d'Avarice l'aquointance
Attrait, et pour le gaign tenir
Il fait les brocours retenir.
Mais quique s'en voet abstenir
Du fraude, Triche ades l'avance,
Siq'en les laines maintenir
Je voi plusours descontentir
Du loyalté la viele usance.
Mais gaigne qui voldra gaigner,
L'en porra trop esmerveiller 25430
En nostre terre a mon avis
Des Lumbardz, qui sont estrange,
Q'est ce q'ils vuillont chalanger
A demourer en noz paiis
Tout aici francs, aici cheris,
Comme s'ils fuissent neez et norriz
Ovesque nous ; mais pour guiler
Moustront semblant come noz amis,
Et soubz cela lour cuer ont mys
De nostre argent et orr piler. 25440
Ces Lombars nous font mal bargain,
Lour paille eschangont pour no grain,
Pour deux biens nous font quatre mais,
Ils nous apportont leur fustain,
Si nous voidont du false main
Nos riches nobles d'orr roials
Et l'esterlings des fins metals ;
C'est un des causes principals
Dont nostre terre est trop baraign ;
Mais si l'en croeroit mes consals, 25450
Ja dieus ne m'aid. si tiels vassals
Nous serroient ensi prochain.
Mais ils scievent de leur partie
Si bien juer la jeupartie
Du brocage et procurement,
Q'ils par deceipte et flaterie
Font enginer la seignourie
De nostre terre a leur talent,
Dont sont privez plus q'autre gent :
Sique l'en dist communement 25460
Q'ils sont de no consail l'espice,
Dont maint peril nous vient sovent,

25397 Maisque

25454 Sibien

Et qui regarde au jour present
Overte en verra la folie.

Huy voy des tiels Lombars venir
Sicome garçon du povre atir,
Qui ainz *que* soit un an passé
Par leur deceipte et leur conspir
Plus noblement se font vestir
Que les burgois de no Cité; 25470
Et s'ils eioint nécessité

Du seigneurie ou d'ameisté,
Ils se scievent ensi chevir
Du fraude et de soubtilité,
Que leur querelle est avancé
Malgré le *nostre* a leur plaisir.

N'est pas *resoun* ce *que* je voi,
Ainçois l'en doit bien dire avoi
As tiels seignours qui *par* brocage
Des *doms* avoir, ou *grant* ou *poy*, 25480
Vuillont *donner* credence ou foy
As tieles gens, qui no damage
Aguaitont pour leur avantage:
Mais c'est *grant* honte au seignourage,
Qui nous duissent garder la loy,
De noz marchantz mettre en servage,
Et enfranchir pour le pilage
Les gens *estranges* trestout coy.

Mais covoitise ad tout soubmis,
Car cil qui *donne* avra d'amys 25490
Et puet son fait au fin mener,
C'est la *coustumme* en mon païs:
Mais qui *prent* garde a mon avis
Des toutes *partz* porra mirer
Et du voisin et d'estranger
Que tricherie en marchander
Toutdis *nous* vient devant le vis;
Et d'autre *part* pour regarder
Les gens qui vivont de mestier,
Trestout sont d'une escole apris. 25500

Ore dira un petit comment
Triche est associé et demoert
entre ceaux qui vivont du mestier
et d'artifice.

Les gens qui vivont d'artefice,

25464 enverra 25469 Plusnoblement
25513 plussouent

Si bien le font solone justice,
Au bien *commun* sont necessaire,
Et mesmes dieu *leur* encherice,
Mais s'ils trichent, c'est une vice
Q'au bien *commun* est trop con-
traire:

Et nepourqant plus *que* notaire
L'en dist *que* Triche en secretaire
Entre les autres tient office,
Et *par* tout guide, u q'il repaire, 25510
Des *compaignons* plus *que* vingt paire,
Qui tous servont dame Avarice.

Triche est Orfevere au plus sovent,
Mais lors ne tient il pas covent,
Qant il d'alconomie allie
Le fin orr et le fin argent;
Si fait quider a l'autre gent
Que sa falsine soit verraie;
Dont le vessell, ainz q'om l'essaie,
Vent et reçoit la *bonne* paie 25520
De l'esterling, et tielement
Del argent q'il corrompt et plaie
Sa pompe et son orguil desplaie,
Et se contient trop richement.

Je ne say point d'especial
Tout dire et nomer le metall
Que Triche ove l'argent fait meller;
Mais bien sai q'il fait trop de mal,
Q'ensi l'argent fin et loyal
De sa mixture fait falser. 25530
Cil q'au buillon voldra bailler
Vessell d'argent pour monoier,
Lors puet il savoir au final
Que triche ad esté vesseller;
Car son vessell et le denier
Ne sont pas d'une touche egal.

Si Triche t'ait coupe ou ceinture
De ton argent *parfait*, al hure
Je loo *que* prest soies a prendre;
Car d'une chose je t'assure, 25540
S'un autre vient en ta demure
Et Triche en poet son gaign *con-*
prendre,

25507 plusque 25511 plusque
25542 enpoet

Il le fait *comme* son *propre* vendre;
Mais il t'en fra depuis entendre
Q'il l'ot bien fait, mais *aventure*
Le fist quasser, dont falt attendre:
Ensi te dist parole tendre,
Et t'en deçoit par couverture.

Si Triche t'ait de son ovreigne
Mis certain *jour*, molt ert *grant* peine
Si deinz le mois avoir porras 25551
Q'il t'ad *promis* deinz la semeine:
Ainz mainte guile et mainte treine
T'en fra, et molt sovent *par* cas
Au fin del tout tu failleras,
Ou autrement tu plederas,
Car si la loy ne luy constreigne,
Du loyalté ne tient il pas.
Ensi fait Triche son pourchas
Du mestier qui l'orfevere meine. 25560

Et des jeualx avient auci
Q'ascune fois Triche est saisi;
Mais lors a les seignours s'en vait,
Et fait le moustre et jure ensi,
Q'ainçois q'il d'eaux serra parti,
Les *grandes* *sommes* il en trait
De leur argent. Mais lors malfait,
Qant il la pierre ad contrefait,
Que ne valt point un parasi,
Et *par* deceipte et *par* aguait 25570
Le vent; car qui q'en soit desfait
Ne chalt, maisq'il soit enrichi.

Je ne say dire tout pour quoy,
Que j'ay oy sovent en coy
Les gens compleindre et murmurer,
N'en say la cause ne ne voi,
Mais *que* l'en dist avoy, avoi!
Que sur tous autres le mestier
Des perriers est a blamer.
N'est Duc ne Conte ne Princer, 25580
Voir ne le *propre* corps du Roy,
Qui s'en porront bien excuser;
Trestous les ad fait enginer
Ly perriers ove son desroy.
Om dist *que* dieus en trois parties
Ad grandes vertus departies;

25563 envrait 25566 entrait

Ce sont, sicome l'en vait disant,
Paroles, herbes et perries;
Par ceaux fait homme les mestries
Et les merveilles tout avant, 25590
Mais ore est autre *que* devant,
Les perriers sont plus plesant
Que les saphirs ne les rubies;
Mais je ne say pas nepourqant
Si celle grace soit sourdant
Ou des vertus ou des sodies.

Triche est auci de *nostre* ville
Riche Espicier; mais il avile
Au plus sovent sa conscience,
Q'il sa balance ad trop soubtile 25600
Du double pois, dont se soubtile f. 140
A faire l'inconvenience
De fraude, dont son fait *commence*;
Car n'est espiece ne semence
Dont il son malvois gain ne pile:
De la balance point ne pense
Dont Micheux en la dieu *presence*
Luy poisera les faitz du guile.

Triche Espiecer du peccché gaigne,
Qant les *colours* vent et bargaigne 25610
Dont se blanchont les femelines,
Et la bealté, q'estoit foraine,
Du viele face q'est baraigne
Fait revenir des medicines,
Siqu'elles pieront angelines:
Et d'autre part de ses falsines
Il fait *que* leechour et putaine
A leur peccché sont plus enclinez,
Q'il *leur* fait boire les racines
Que plus excitent cel ovraigne. 25620

Plus *que* ne vient a ma *resoun*
Triche Espiecer deinz sa *maisoun*
Les gens deçoit; mais qant *avra*
Phisicien au *compaignon*,
De tant sanz nul *comparisoun*
Plus a centfoitz decevera:
L'un la *receipte* ordeinera
Et l'autre la *componera*,
Mais la value d'un *botoun*
Pour un florin vendu serra: 25630

25577 Maisque 25599 plussouent

Einsi l'espiceur soufflera
 Sa guile en nostre chaperoun.
 Phisicien de son affaire
 En les Cités u q'il repaire
 Toutdis se trait a l'aquointance
 De l'espiceur ipotecaire ;
 Et lors font tiele chose faire
 Dont mainte vie ert en balance :
 Car cil qui de leur ordinance
 User voldra d'acoustumance 25640
 Le cirimp et le lettuaire,
 Trop puet languir en esperance
 D'amendement, car tiele usance
 Est a nature trop contraire.
 Phisique et Triche l'Espiceur
 Bien se scievont entracorder ;
 Car l'un ton ventre vuidera
 Asses plus que ne fuist mestier,
 Et l'autre savra bien vuider
 Ta bource, qu'il dissolvera : 25650
 Si l'estomac te poiera,
 L'un dist qu'il t'en alleggera
 Et toldra le superfluer,
 Et si te superfluera
 La bource, bien l'espourgera
 L'ipotecaire en son mestier.
 Meillour estomac ne querroie,
 Si je phisique suieroie,
 Que je n'en scieusse bien honir,
 Ne jamais jour souhaideroie 25660
 Plus riche bource que fuist moie,
 Q'ipotecaire empoverir
 Ne scieust ; car qui que doit languir,
 Voir ou tout perdre ou tout morir,
 Triche Espiceur aucune voie
 N'en chalt, maisq'il puet avenir
 Au fraude, que luy fait venir
 A la richesce de monoie.
 O qui savroit au point descrire
 Phisicien qant il escrire 25670
 Fait la cedula au medicine,
 Comment ove l'espiceur conspire,
 Il duist bien par resoum despire
 De l'un et l'autre la covine :

25661 Plusriche

Car maintefois de leur falsine
 Cil q'est malade a la poitrine
 Un tiel cirimp luy font confire
 Q'auci luy fait doloir l'eschine,
 Pour plus gagner en long termine
 De luy qui sa santé desire. 25680
 Pour plus parler du tricherie,
 En le mestier du pelterie
 Triche est aici trop bien apris :
 Le vein orguil de ceste vie
 Que gist en la burgoiserie
 Des femmes que trop sont cheries,
 Et de les autres du pais,
 De leur Ermyne et de leur gris,
 Dont la fourrure ont acueillie,
 Fait ce que Triche est enrichiz ; 25690
 Mais s'ils portassent le berbis,
 Triche eust sa proie trop faillie.
 Sicomme ma dame la Contesse,
 Solonc q'affiert a sa noblesse,
 Se fait furrer de la pellure,
 Ensi la vaine Escuieresse,
 Voir et la sote presteresse,
 Portont d'ermine la furrure :
 C'est une cause au present hure
 Que de l'argent poi nous demure, 25700
 Dont soloions avoir largesse ;
 Si l'en n'en preigne bonne cure,
 Puet avenir par aventure,
 Ainz q'om le sache, grant destresse.
 Triche est de son mal gain trop lée,
 Qant il la pane en long et lée
 De la furrure fait tirer ;
 Dont qant le mantell ad furrée,
 Et soit des quatre jours usée,
 Lors voit om bien que le furrer 25710
 Est plus eschar que le draper ;
 Mais ce que chalt, quant le denier
 Au Triche serra bien paie :
 Et molt sovent de son mestier
 Viel pour novel nous fait bailler ;
 Ce n'est pas droit ne loyauté.
 Si plus de Triche oïr voldras,
 Triche en tailler aici des draps

25699 Ceste

Est trop subtil et trop sachant ;
 Pour conscience ne laist pas 25720
 Q'il ou par reule ou par compas
 Du drap q'il te serra taillant
 Ne prent le toll, et si faillant
 Soit de son taille et nonvaillant
 Soit le facon, tu paieras
 Molt plus que resoum nepourqant :
 Car Triche, qui'en soit perdant,
 Du malvois gain fait son pourchas.
 Aucune fois Triche est Seller,
 De ce se plaingt qui chivalcher 25730
 D'acoustumance doit sovent ;
 Aucune fois est Sabbatier,
 De ce luy povre labourer
 Se plaingt par tout communement :
 Des tous mestiers que l'en aprent
 Triche est apris et son gain prent,
 Et d'autre part en marchander
 Il sciet le droit experiment,
 Du quoy, a qui, qant et comment
 Il doit son fait faire et lesser. 25740
 Sicome la viele q'est puteine
 Ses jofnes files entre et meine
 Au fait, je voi que Triche ensi
 Ses apprentis primer enseigne
 L'engin, les fraudes et la treine
 De marchander et vendre aici.
 Mais de la vente dont vous dy
 Au double ou treble ert encheri
 Plus que ne valt ; pour ce se peine
 Son dieu et tous les nouns de luy 25750
 Jurer, tanq'il porra l'autry
 Guiler de sa parole veine.
 Ensi ly jofnes apprentis,
 Q'est de son mestre Triche apris,
 Les autres triche en son vendant :
 Ce que luy couste ou cink ou sis
 Il te mettra a dousze ou dis,
 Si jure et dist q'il meinz de tant
 N'el puet donner, s'il trop perdant
 N'en soit ; ensi te meine avant, 25760
 Tanq'il t'avera tant abaubis
 Qe tu luy soies bien creant :

25749 Plusque

25764 plusviels

Ensi deçoit cil jofne enfant
 Tout les plus viels de les paiis.
 Mais combien que l'apprentis jure,
 Ly mestres qui le mal conjure
 Ove l'apprentis primement
 Avra le peché par droiture ;
 Car son estat est au dessure,
 Et il aici le gaign en prent, 25770
 Dont c'est au droit convenient
 Q'il ait les charges ensemment
 De ce dont il les faitz procure :
 Car l'autre est son obedient,
 Son apprentis et son client,
 Soubz sa doctrine et soubz sa cure.
 Mais nepourqant l'en puet entendre,
 Si soul ly mestre volroit vendre
 Et mesmes tricher son voisin,
 Meinz mal serroit, car lors extendre
 Tantsoulement duist et descendre 25780
 Sur soy le mal de son engin :
 Mais qant le jofne marchandin
 Falt estre a sa malice enclin,
 Du guile et sa manere aprendre,
 Pis est ; car ambedeux au fin
 Pecchent, mais solonc le divin
 L'un plus que l'autre est a repvndre.
 Q'est ce que je vous dirray plus,
 Mais que le siecle est trop confus 25790
 Des tieus marchantz especial ?
 Q'entr'eulx ont loyalté refus,
 Si ont le triche retenuz : f. 141
 De luy ont fait leur governal,
 Et de Soubtil le desloial
 Ont fait leur sergant communal,
 Qui vent les choses a leur us :
 Ja Bonne foy deinz leur hostall
 Ne puet entrer apprentisal,
 Car Guile le reboute al huiss. 25800
 Mais sanz deceipte et sanz envie
 El temps du viele accesserie
 Lors il fesoient bonnement,
 Chascuns endroit de sa partie ;
 Loyal furont sanz tricherie
 Leur vente et leur acatement.

25770 enprent

25790 Maisque

Mais ore il est tout autrement,
Si cist dist voir, cil autre ment,
Poy sont du *bonne* compaignie :
Pour ce l'en voit q'au *jour* present 25810
Trestout vait au declinement,
Le mestier et la marchandie.

Jadis qant les marchantz *parloient*
De vingt et Cent, lors habondoient
De richesce et de souffiance,
Lors de *leur* propres biens vivoient,
Et loyalment se contenoient
Sanz faire a nully decevance :
Mais ils font ore *leur* parlance
De mainte Mill; et sanz doubtaunce 25820
Des tieus y ad *que* s'il paioient
Leur debtes, lors sanz chevisance
Ils n'ont quoy *propre* a la montance
D'un florin, dont paier porroient.

En leur hostealx qui vient entrer
Leur sales verra tapicer
Et pour l'ivern et pour l'estée,
Et leur chambres encourtiner,
Et sur leur tables veseller,
Comme fuissent Duc de la Cité. 25830
Mais en la fin qant sont alé
De ceste vie et avalé
Bass en la terre, lors crier
Om puet oïr la niceté
De leur orguil, *que* povreté
Leur debtes covient excuser.

Si tu soies du Triche aqueinte,
Il te dirra parole queinte,
C'est *que* ton orr luy baillerez ;
Il te ferra la forte enpeinte 25840
Du covoitise qu'il ad peinte,
Et dirra *que* tu gagnerez.
Mais je t'en loo *par* ameistez,
Q'ensi *par* conseil t'avisez
Dont n'eietz cause de compleignte ;
Car Cent au tiel bailler porretz,
Que trente *jammis* reverretz
Ne par amour ne *par* constrainte.

L'en voit ascuns de tiele enprise
Qui *par* deceipte et *par* queintise 25850

25846 autiel

25853 senfuient

25863 senvait

25881 Plusquor

Al oill passent tout *leur* voisin ;
Mais ce n'est pas honeste guise,
Qant puis s'en fuioient au franchise
De saint Pierre ou de saint Martin,
Q'attendre n'osent en la fin
Deinz la Cité, mais au chemin
Se mettoient vers la sainte eglise.
Maldit soient tiel pelerin,
Q'ensi vienont au lieu divin
Pour faire au deable sacrefise. 25860

Car tiel y ad qui tout du gré
Aprompte sanz necessité,
Et puis s'en vait ove tout fuir
Au sainte eglise en salveté.
Mais ore oietz la falseté,
Q'il ne se voet de la partir,
Ainz quiert de l'autry bien partir,
Tanq'il *pardoun* porra tenir
Du tierce *part* ou la moytée ;
Et lors se ferra revertir 25870
A son hostell tout *par* loisir,
Et dist *que* tout est bien alé.

L'en dist poverte est chose dure,
Ce sciet qui la poverte endure,
En *part* poverte excuse erreur ;
Mais cil q'est riche a demesure
Et fait enqore mesprisure
Ne puet excuser sa folour.
Mais comme l'en dist au present
jour,

Le riche est ore tricheour, 25880
Plus *que* le povere en sa mesure ;
Car Triche n'ad de dieu paour,
Et d'autre *part* ne porte amour
Envers nulle autre creature.

Roy Salomon ce nous ensense,
Qui molt fuist plain de sapience,
Et dist, 'Qui sa richesce adquiert
Sanz soy blemir en conscience
Molt fait honeste providence :
Mais d'autre voie qui la quiert, 25890
En ceste vie luy surquiert
Vengeance, s'au dieu ne requiert
Pardoun et face penitence,

Ou autrement sa paine affiert
Après la mort, qant dieus le fiert,
Et Palme en paie la despense.
En l'evangile truis escrit,
Dieus nous demande quel profit
Homme ad pour tout le mond gainer,
Qant il en pert son esprit : 25900
C'est un eschange mal confit
Pour chose que ne puet durer.
Mais Triche ainçois en marchander
Quiert le profit de son denier,
Que tout le bien q'est infint ;
Quique luy doit desallouer,
Il *prend* du siecle son louer,
Mais au final ne s'esjoyt.

Ne sai pour quoy je *precherioie*
As tieux marchans del autre joye 25910
Ou autrement de la dolour ;
Car bien scievont, qui multiploie
En ceste vie de monole
Il ad au meinz du corps l'onour :
Dont un me disoit l'autre jour,
Cil qui puet tenir la doulcour
De ceste vie et la desvoie,
A son avis ferroit folour,
Q'après ce nuls sciet la verroure, 25920
Queu part aler ne quelle voie.

Ensi desputont, ensi diont,
Ensi communement reppliont
Ly marchant q'ore sont present ;
Pour bien du siecle, a quel se pliont,
Le bien del alma tout oubliiont,
Du quel ils sont trop indigent :
Et nepourqant qui les reppent,
Tout leur estat par argument
Du marchandie justefiont ;
Al oill respondont sagement, 25930
Mais de si faint excusement
Leur almes point ne glorifiont.

Soubtilement sciet Triche usure
Covrir et faire la vesture,
Siq'en apert ne soit conue ;
Mais s'il sa conscience assure,
Fols est, car dieus la voit dessure

25896 enpaie

Trestoute overte et toute nue ;
Par quoy si Triche ne se mue
De sa falsine et s'esvertue 25940
De loyauté, verra celle hure,
Qant dieus les faitz de tous argue,
Sa fraude serra desvestue,
Dont deble avra la forsfaiture.

Des marchans ore luy alqant
Le siecle blament nepourqant,
Et l'un et l'autre en sa partie
Vait mainte cause enchesonant :
L'un dist arere et l'autre avant,
Mais riens parlont du tricherie 25950
Q'ils mesmes font en marchandie ;
Ainz chascun d'eulx se justefie
Et blamont tout le remenant :
Dont m'est avis que la folie
De jour en jour se multepie
Sanz amender ne tant ne qant.

Ils sont marchans, ils sont mestiers,
Des queux nous avons grans mes-
tiers,
S'ils bien gardassent loyalté ;
Mais Triche est un des parçoniens 25960
Qui tant covoit les deniers
Qu'il point n'ad garde d'equité.
N'est un mestier d'ascun degré
Dont Triche, si luy vient a gré,
N'ait vingt et quatre soldoiers,
Qui le bienfaire ont refusé,
Et ce nous trouble en la Cité
Les burgois et les officiers.

Meistre Aristole ce nous dist,
Que les mestiers sont infint, 25970
Nuls puet nombrer la variance :
Pour ce ne suy je pas parfit
Que tous les mette en mon escrit
D'especiale remembrance.
Mais chascune art en sa substance,
De ce *que* donne sustienance
A luy qui de son mestier vit,
Est *bonne* en *bonne* governance :
Si nuls la mette en male usance,
Pour ce n'est pas l'art inparfit. 25980

25900 enpert

Puisq'il ad dit del *error* de
ceux qui trichent en marchandie
et en l'estat des Artifices, dirra
ore del *error* des Vitailleurs.

L'estat del homme ensi se taille, f. 142

Que sur tout falt avoir vitaille,
Dont l'en porra boire et manger :
Pour ce n'est mie de merveille,
Si je n'oublie ne tressaille
A parler et a raconter
De ceux qui sont dit vitailer ;
Car Triche y est pour consailler,
Q'au fraude chascuns s'apparaille :
Je prens tesmoign du Taverner, 25990
N'est pas sanz guile le celier
Q'il tient dessoubz sa gouvernaille.

Du Taverner fai mon appell,
Qant il le vin del an novell
Ove l'autre viel del an devant,
Qui gist corrupt deinz son tonell
Et n'est ne seïn ne bon ne bell,
De sa falsine vait mellant,
Et ensi le vait tavernant :
Mais qui luy fuist au droit rendant,
La goule par le haterell 26001
As fourches ly serroit pendant,
Car il occit maint entendant
Au boire de si fals revell.

Trop est malvoise la mellée,
Qant le vin est ensi mellé,
Dont cil qui boit ne puet faillir
De deux mals dont serra grevé :
L'un est qant il avra païé
Ce dont nul bien luy puet venir, 26010
Et l'autre que luy fra languir
Et grande enfermeté souffrir,
Et molt sovent l'enfermeté
Le meine jusques a morir.
Qui voet taverner ensi tenir
N'est pas exempt du falseté.

Qant Must vendra primerement,
Molt le vent Triche chierement,
Mais lors sa fraude renouvelle :
Comme cil qui fait trop queintement,

25982 auor

26044 qenboit

26062 envoet

Tout en secré Paqueintement 26021
Ferra du viele et de novelle
Et l'un ove l'autre Must appelle ;
Sovent entrouble sa tonelle,
Si fait crier Must a la gent,
N'en chalt a qui dolt la cervelle,
Maisqu'il sa falseté concelle,
Dont porra gagner de l'argent.

Dieus voit bien la falsine atteinte,
Qant taverner la rouge teinte 26030
Met au vin blanc pour tavernage ;
Mais Triche est tant soubtil et queinte
Q'ensi les deux colours aqueinte
Deinz un vaissell par mariage,
Que qant du blanc voit le visage
Devenir jaune, Triche est sage,
Et du vermail tantost le peinte,
Sicomme l'en fait la viele ymage :
Ensi deçoit son voisinage
Et donne cause de compleignte. 26040

Et si le vin trop rouge soit,
Encore Triche nous deçoit,
Qant le vin blanc fait adjouster,
Et puis le nomme a luy q'en boit
Colour de paille, dont l'en doit
Du colour plus enamourer :
Et pour le terrage attemper
Fait del Oseye entremeller,
Dont porra faire son exploit :
Comme Mareschals qui doit curer
Les maladies du courser, 26051
Ensi fait il de son endroit.

Triche est tout plein de decevance,
Qant il par si fait alliance
Tantz vins divers fait faire unir
D'Espaigne, Guyene et de France,
Voir et du Ryn fait la muance,
Du quoy le gaign puet avenir :
Mais s'il porra fort vin tenir, 26059
Bien sciet del eaue fresche emplir
Sa pynte, et fait tiele attemprance
Dont cil q'au boire en voet venir
Boit l'un ove l'autre, et au partir
Paier luy falt sanz aquitance.

A la taverner qant irray,
Si tast du vin demanderay,
Ly taverner au primerain
De son bon vin me donne essay ;
Mais si mes flaketz empliray,
Qant du bon vin me tiens certain, 26070
Tantost me changera la mein ;
Car tout serra d'un autre grein
Le mal vin que j'enporteray.
Qui plus se fie en tiel prochein
Il doit bien savoir au darrein
Que s'ameisté n'est pas verray.
Si unques Triche au point voldras
Conoistre, tu le conoistras
De son pyment, de sa clarrée,
Et de son novell ypcoras ; 26080
Dont il ferra sa bource crass,
Qant les dames de la Cité,
Ainz q'au moustier ou au marchée
Vers la taverner au matinée
Vienont trotant le petit pass :
Mais lors est Triche bien païé,
Car chascun vin ert essayé,
Maisqu'il vinegre ne soit pas.

Et lors les ferra Triche entendre
Q'ils averont, s'ils vuillont attendre,
Garnache, grec et malvoisie ; 26091
Pour faire les le plus despendre
Des vins leur nomme mainte gendre,
Candy, Ribole et Romanie,
Provence et le Montross escrie,
Si dist q'il ad en sa baillie
Rivere et Muscadelle a vendre ;
Mais il la tierce part n'ad mie,
Ainz dist ce pour novellerie,
Au boire dont les puet susprendre. 26100
D'un soul tonell voir dix maneres
Des vins leur trait, en les chaieres
Qant enseant les puet tenir ;
Et si leur dist, 'O mes treschieres,
Mes dames, faites bonnes cheres,
Bevetz trestout a vo plaisir,
Car nous avons asses laisir.'
Mais lors ad Triche son desir,

Qant il ad tieles chambereres,
Qui leur maritz scievont trichir ; 26110
Car riens luy chalt, qant enrichir
S'en puet, mais'elles soient lieres.

Plus que nul mestre de divin
Sciet Triche toute l'art du vin
Et la decepte et la quintise ;
Il contrefait de son engin
Du vin françois le vin du Rin,
Voir ce que crust en tiele guise
Pres de la Rive de Tamise
Il le fait brusch et le desguise 26120
Et dist Reneys au crusekin :
Si quointement son fait devise,
N'est homme qui tant bien s'avise
Que Triche ne le triche au fin.

Si Triche soit el vin malvois,
Enquore a la commune vois
En la cervoise il est peïour :
Ce di je point pour les François,
Ainçois je di pour les Englois,
De ceux qui boyvent au sojour 26130
De la cervoise chascun jour :
Mais de la povre gent menour,
Qui propre n'ont ne pil ne crois,
Si ce ne soit de leur labour,
Tout cil dient a grant clamour
Le Cervoiser n'est pas curtois.

Ly Cervoiser nous ad emblé
L'argent, qant il du malvois blé
Fait la cervoise malement ;
Qant il le fait en tiel degré, 26140
N'est homme qui luy sache gré,
Et dieus le hiet tout proprement :
Car aici chierement le vent
Comme s'il l'eust fait tout bonnement,
Car bien sciet q'au necessité
Le boire covient a la gent.
Ensi desrobe nostre argent
Et fait de nous sa volenté.

Et s'il avient par aventure
Que la cervoise est bonne et pure, 26150
Le pris en ert si halt assis
Et tant escharce ert la mesure,

26151 enert

U

Que pour compter tout au droiture
 La false mesure et le pris,
 La cervoise ert pres tant cheris
 Sicomme le vin : mais tant vous dis,
 C'est a grant tort et demesure,
 Car la buillie a mon avis
 Ne puet valoir en nul devis
 Au vin, s'il trop ne desnature. 26160
 Voir est, qant Triche Cervoiser
 Pour ton hostel te doit trouver
 Cervoise, lors au commençaille
 Bonne la fra pour acrocher
 Que tu luy soies coustummer,
 Mais puis, qant il en ad la taille,
 Lors as deux fois s'il t'apparaille
 Cervoise bonne, au tierce il faille :
 Mais ja pour tant amenuser
 Ne voet sa paie d'une maille, 26170
 Tout soit ce q'il sovent te baille
 Pres tant du lie comme du elier.
 Ensi comme boire nous covient, f. 143
 Tout ensi de nature avient
 Q'il nous estuet manger aici ;
 Et comme la fraude nous survient
 Du Cervoiser, ensi nous vient
 De le fournier tout autrecy :
 En les Cités je voy tout sy
 La gent commune dire ensy, 26180
 Que loyauté ne voit om nient
 En ces fourniers, ainz est failly ;
 Le pois tesmoigne asses de luy,
 Que son errour trop pres nous tient.
 Jammes fournier garder droit pois
 Verras, si ce n'est sur son pois,
 Dont om luy treine vilement
 Aval la rue ascune fois :
 Mais om ly duist bien pendre ainçois,
 S'il eust droiture en juggement, 26190
 Car pain est le sustienement
 Del homme, et qui le pain offent
 Encontre les communes loys,
 Il tolt les vies de la gent ;
 Dont fuist ce bien convenient
 A pendre un tiel feloun malvois.

26166 enad

Les pains om voit du maint degré,
 Dont solonc la diverseté
 Triche ad diverse tricherie ;
 Mais je n'en say la propreté, 26200
 Forsque de tant que la Cité
 Communement s'en plaingt et crie :
 Mais sa falsine je desfie,
 Qui le frument soubz sa baillie
 Tient en muscet, et la marchée
 Procure a faire plus chérie,
 Siqu'il porra de sa boisdie
 Du pain monter la chiereté.
 Dieus ordina de son divin
 Le pain, la cervoise et le vin 26210
 Pour l'omme, et puis au compernage
 Les grosses chars, dont no voisin
 Qui sont bouchier tout sont enclin
 A tuer ce qui n'est sauvage
 Des bestes, siq'en leur estage
 Les chars vendont au voisinage.
 Mais ils ont Triche a lour cousin,
 Qui toutdis quiert a l'avantage
 Son prou et le commun damage,
 Tant comme porra du mal engin. 26220
 Quiconque vendont du vitaille,
 Ou soit en gross ou par retaille,
 Om dist que Triche ly bochiers
 De son boef et de son ouaille
 Au double plus que ce ne vaille
 Demande, tant est oultragiers ;
 Par quoy les povres communiers
 Maldiont, que tieux vitailleurs
 Ne scievent ce q'est une maille,
 Ainz falt q'om porte les deniers, 26230
 Car autrement les chars mangiers
 Ne serront pas a la pedaille.
 Si l'un soit maigre et l'autre crass
 Des boefs, bien sciet Triche en ce cas
 Du crass les maigres encrasser,
 Et si les vent par fals compas :
 Car son engin ne lerra pas
 Des festus qu'il y fait ficher
 Pour le suët bien attacher ;
 Dont tu qui le dois achater, 26240

Qant a manger servi serras,
 Si n'es plus sages au tailler,
 Tieu fusterie y dois trouver
 Dont ton coutell honir porras.
 Du covoitise que luy tient
 Triche au sovent ses chars detient,
 Qant ne les puet a son voloir
 Tout vendre, dont falsine avient ;
 Car tout cela corrupt devient,
 Dont puis s'afforce a decevoir, 26250
 Ainz q'om s'en puet aparcevoir :
 Mais mainte fois de son espoir
 Faltra, tanque le chien survient ;
 Meilleur marchant n'en puet avoir
 A devourer tiel estovoir,
 Car la caroigne a luy partient.
 Ensi comme dieus nous ad donné
 Dessur les bestes poesté,
 Sique pour nostre sustienance
 Nous les porrons manger en gré, 26260
 Sur les oiseals par tiel degré
 Nous ad granté sa bienvuillance ;
 Par quoy de commune ordonnance
 Pour faire ent nostre pourvoiance
 Les pulletiers sont ordiné :
 Mais Triche plain de decevance
 Les ad trestous en governance,
 N'est uns qui gart sa loyauté.
 Triche ad en son gouvernement
 Les pulletiers qui falsement 26270
 De leur phesant et leur perdis,
 Q'en leur hostell trois jours attend,
 Ne say par quell amendement,
 Les font monter au treble pris :
 Et d'autre part quique s'est mis
 Q'il son pullail des tieux amys
 Achat ou a creance prent,
 S'il n'est plus sage en son avis,
 Del pris serra trop entrepris,
 Quant doit venir au paiement, 26280
 Tout fresch et novel ert clamez
 Le volatill deinz les Cités,
 Que Triche ad en sa garde a vendre :
 Ce que devant dix jours passez

26278 plussage

26315 plussouent

26321 enfalt

U 2

Estoit del oisellour tuez,
 Il dist q'ier soir le fesoit prendre,
 Ensi te jure et fait entendre ;
 Mais ainçois q'il te poet susprendre,
 Dont il del argent soit paieez,
 N'en sciet sa conscience apprendre. 26290
 Si tiel vilain soit a reprendre,
 Entre vous autres agardez.
 Mais de si riches oisellines,
 Perdis, phesans, ploviers et cines,
 Dont Triche ad son mal gain cuilli,
 Ne me chalt gaire en mes quisines ;
 Car sanz delices salvagines
 Je me tendray a bien servi :
 Mais autrement ils m'ont hony,
 Q'ils le chapoum et l'oue aici 26300
 M'ont tant chéri de lour falsines,
 Que maintenant il est ensi,
 Les oes sont pres tant escheri
 Comme jadis furent les gelines.
 D'une autre gent om fait parler,
 Qui sont aici comme vitailer,
 Car ils vendont communement
 Tout quanque l'en porra trouver
 Du boire ensi comme du manger,
 Mesure et pois ont nequedent ; 26310
 Ce sont qui du vitaillement
 Plus servont a la povre gent
 Et portont noun du regratier :
 Mais Triche est chief de lour covent,
 Ce voit om bien au plus sovent
 Qant du ferlyn font le denier.
 Trop est le regratour vilein,
 Qant achatant en son bargein
 Demande large sa mesure,
 Mais qant le vent a son prochein, 26320
 La tierce en falt de son certain,
 Tant falsement le remesure ;
 Ja par balance de droiture
 Ne poise, ne jammes nulle hure
 Te fra mesure a juste mein :
 Poy valt la chose en sa nature,
 Si regratier la tient en cure,
 Dont ne voet gagner au darrein.

Mais pour voidire en cest endroit
As femmes plus partient du droit 26330
Le mestier de Regraterie :
Mais si la femme au faire soit,
Molt plus engine et plus deçoit
Que l'omme de sa chincherie ;
Car endroit soy ne lerra mie
Le prouffit d'une soule mie,
Q'a son voisin ne tient estroit :
Tout perd son temps cil qui la prie,
Car riens ne fait par courtoisie,
Ce sciet qui deinz sa meson boit. 26340

Ore au final pour brief parler,
Tout cil qui vivont de denier
En achatant et en vendant,
Nes un des tous vuill excepter,
Ne gent marchant ne vitailler
Ne regratier, qui tout avant
Au Triche ne soit entendant ;
Qui sciet guiler s'en vait guilant
Chascun vers autre en son mestier,
Dont qui le temps de maintenant 26350
Voit au droit oill considerant,
Il se porra trop mervailer.

Triche est commun en nostre ville,
Qui les burgois pres tous avile
Et fait errer les potestatz
Encontre toute loy civile ;
Dont la fortune nous revile
Et tolt l'onour des tous estatz,
Les haltz ensi comme tu verras
Sont en descord avoec les bass. 26360
Chascun sustient sa propre guile :
Dont je me doubte au tiel compas,
Si dieus ne le redresce pas,
N'est autre qui le reconcile.

De Lucifer l'oppinioun f. 144
Qu'il tint mist a perdicoun
Maintz autrez, qui de son erreur
Tenoient la conclusioun ;
Ensi c'est une abusioun,
Qant un soul homme en sa folour, 26370
De ce qu'il est superieur
Des autres, quiert solein honour,

26378 plus franc

Dont il fait la divisioun
De la Cité : car la destour
Fist Rome, qant elle ert maiour,
Venir a sa confusioun.
En la Cité, u les foreins
Serront plus franc que cils dedeins,
C'est as tous prejudicial ;
Mais quiq'il soit des citezeins 26380

Qui quiert ce mal a ses procheins,
Il erre en son judicial :
Mais qant vient que le governal
Est capitous et desloial
Et se delite es faitz vileins,
Il porra faire trop de mal ;
Mais tout le pis doit au final
Sur soy revertir plus ne meinz.

Le corps ove l'autre membre auci
Ce font un homme, et tout ensi 26390
Le provost ove celle autre gent
Font la Cité ; pour ce vous dy,
Que sicomme l'omme endroit de luy
Sa main, que maladie prent,
Dont tout le corps soudainement
Porroit morir, molt asprement
Detrenche, ainz q'il en soit peri,
L'en duist trencher tout ensement
Le mal burgois molt fierement,
Ainz q'il la ville ait malbailly. 26400

Dieus dist : 'Si l'omme ait main ou pié
Ou oill dont il soit esclandré,
Tantost le doit hoster en voie,
Ainz q'il soit pris en son pecché ;
Car qui du vice est enpesché
Ne puet du ciel entrer la joye.'
Ensi vous di par tiele voie,
Qant Citezein le droit desvoie
Et s'est au tort confederé,
Mieulx valt que l'en le pende ou noie,
Ainz que par luy la gent forsvoie, 26410
Dont soit divise la Cité.

Mais c'est le peiour que je voi,
Poy sont prodomme endroit de soi,
Ainçois malice et guilerie
Vont surmontant la bonne foy,

26397 ensoit

Et le prodomme se tient coy ;
Sique n'est uns de sa partie
Qui nostre Cité justefie,
Et ensi vait la tricherie 26420
Parmy la ville a grant desroy :
Si la fortune nous desfie,
C'est a bon droit, car par envie
Nous avons perdu toute loy.

Mais si tout cils dont vous ai dit
Cy pardevant fuissent au plit
Q'ils tout gardessent loyalté,
La tricherie enquire vit ;
Car le commun du gent petit,
Qui labourier sont appellé, 26430
La sustienont en leur degré,
Que ja nul jour de leur bon gré
Au resoun ne serront soubgit :
Poy font labour, mais grant soldée,
Trois tant plus q'ils n'ont labouré,
Vuillont avoir sanz leur merit.

Trop vait le mond du mal en pis,
Qant cil qui garde les berbis
Ou ly boviens en son endroit
Demande a estre remeriz 26440
Pour son labour plus que jady
Le mestre baillif ne soloit :
Et d'autre part par tout l'en voit,
Quiconque labour que ce soit,
Ly labourier sont de tieu pris,
Que qui sa chose faire en doit,
La q'om jadyz deux souldz mettoit,
Ore il falt mettre cink ou sis.

Les labourers d'antiquité 26450
Ne furent pas acoustumé
A manger le pain du frument,
Ainçois du seve et d'autre blé
Leur pain estoit, et abevré
De l'eaue furent ensement,
Et lors fuist leur festoiment
Formage et lait, mais rerelement
Si d'autre furent festoie ;
De gris furent leur vestement :
Lors fuist le monde au tiele gent 26460
En son estat bien ordiné.

26446 endoit

Mais la coustume et le viel us
Ore est tourné de sus en jus,
Ce sciet il bien q'en ad affaire,
Et c'est la riens que grieve plus.
Car labourer nes un je truis
Es marchés u que je repaire,
Que tous ne soient au contraire,
Dont meulx valsist deux seignours plaire
Q'un soul vilain q'est mal estruis,
Car ce sont cils qui ne sont gaire 26470
Loyal, curtois ne debonnaire,
Si force ne les ait vencuz.

Ly labourer qui sont truant
Voient le siecle busoignant
De leur service et leur labour,
Et que poy sont le remenant,
Pour ce s'en vont en orguillant ;
Ne font sicome leur ancessour,
Car j'ay bien mesmes veu le jour,
Q'au servir souffrirent plusour 26480
Qui font danger du maintenant.
Mais certes c'est un grant erreur
Veoir l'estat superieur
El danger d'un vilein estant.

Me semble que la litargie
Ad endormi la seignourie,
Si qu'ils de la commune gent
Ne pernont garde a la folie,
Ainz souffront croistre celle urtie
Quelle est du soy trop violent. 26490
Cil qui pourvoit le temps present
Se puet doubter procheinement,
Si dieus n'en face son ate,
Que celle urtie inpacient
Nous poindra trop soudainement,
Avant ce q'om la justefie.

Trois choses sont d'une covyne,
Qui sanz mercy font la ravine
En cas q'ils soient au dessus :
L'un est de l'eaue la cretine, 26500
L'autre est du flamme la ravine,
Et la tierce est des gens menuz
La multitude q'est commuz :
Car ja ne serront arrestuz

Par resoun ne par discipline ;
 Et pour cela sanz dire plus,
 Ainz *que* le siecle en soit confus,
 Bon est a mettre medicine.
 He, Siecle, au quoy destournes tu ?
 Par quoy la povre gent menu, 26510
 Q'au labour se deussent tenir,
 Demandont estre meulx repeu
 Que cil qui les ad retenu ;
 Et d'autre *part* se font vestir
 Du fin colour et bell atir,
 Qui sanz orguil et sanz conspir
 Jadis furent du sac vestu.
 He, Siecle, ne t'en quier mentir,
 Si tu ces mals fais avenir,
 Je me compleigns de ta vertu. 26520
 He, Siecle, je ne say quoy dire,
 Mais tous l'estatz que je remire
 Du primer jusques au darrein
 En son degré chascuns empire,
 Ensi le povre come le sire,
 Trestous du vanité sont plein ;
 La povre gent voi plus haltein
 Que celly q'est leur *soverein*,
 Chascuns a son travers se tire ;
 Car ly *seigneur* sont plus vilein 26530
 Et plus ribald *que* n'est vilein,
 Et pour mal faire et pour mal dire.
 Ce que jadis fuist courtoisie
 Ore est tenu pour vilainie,
 Et ce q'om loyalté tenoit
 Om le dist ore tricherie ;
 Du Charité l'en fait Envie,
 Honte est perdu *que* nuls la voit,
 Le tort ad surmonté le droit,
 Largesce est tourné en destroit, 26540
 Et bon amour en leccherie,
 Que nul *prodhomme* en son endroit
 Ne sciet par quelle voie il doit
 Aler pour mener bonne vie.
 Trop est le siecle destourné,
 Que flaterie est allévé,
 Et le voidire est abatu ;
 Et d'autre *part* bonne ameisté

26507 ensoit

26530 plusvilein

26588 ensont

Loign du païs s'en est alé,
 Et pour demourer en son lieu 26550
 Un feint amy voi retenu,
 Qui quiert toutdis son propre preu
 Et fait a la necessité :
 Par tout le siecle j'ay coru,
 Mais mon chemyn ay tout perdu,
 Pour sercher apres loyalté.
 Mais plus enqore se debat f. 145
 Le siecle qui tous biens rebat :
 Sicome l'en dist au present jour,
 Nuls est content de son estat, 26560
 Ne le seigneur ne le prelat,
 Ne la commune, ainz del erreur
 Chascun sur autre fait clamour :
 Le commun blame le seigneur,
 Et le burgois son potestat,
 Et cils qui sont superiour
 Le mettent sur la gent menour,
 Et ensi tout le mond combat.
 Helas, q'om voit au jour present
 Venir le prophetizement 26570
 D'Oseë, qui prophetiza
 Que sur la terre entre la gent
 N'ert sapience aucunement
 Que plect a dieu ; et pour cela
 Dieus dist q'il se coroucera,
 Dont sur les gens se vengera
 Et sur les bestes ensement,
 Voir et poisel le compara
 Ove tout que deinz la mer serra,
 Ensi prendra le vengement. 26580
 Par tout la terre est ore oppresse,
 Et en povrte et en destresse,
 Ce di pour le memorial
 De mon païs, u la noblesse
 Jadis estoit et la richesse,
 Q'alors avoit nul parigal :
 Ne say si par especial
 Les laies gens en sont causal,
 Ou cils qui chantont *nostre messe*, 26590
 Mais tous dient en communal,
 ' Le siecle est mal, le siecle est mal !'
 N'est qui son propre erreur confessé.

Les uns dient, ' Le siecle empire,'
 Les uns, ' Le siecle est a despire.'
 Chascuns le blame en son endroit,
 Chascuns le siecle vient maldire,
 Mais je ne sai ce q'est a dire,
 Que l'en le siecle blamer doit ;
 Et pour cela, si bon vous soit,
 Je pense a demander le droit 26600
 Pour quoy le siecle est ore pire
 Que jadis estre ne soloit :
 Car chascun de sa *part* le voit,
 N'est qui les mals poet desconfire.

Puisq'il ad dit del erreur de tous
 les estatz et comment chascuns
 blame le siecle et excuse soy
 mesmes, il demandera ore le
 siecle de quelle partie est ce dont
 le mal nous vient.

He, Siecle, responetz a moy,
 De ce *que* je demander doy
 La verité tout plain me dy :
 Quelle est la cause et le pour qoy
 Dont l'en parolt si mal de toy ?
 Chascuns le dist tu es failly, 26610
 Chascuns s'en pleingt endroit de ly :
 Bien sai *que* dieus t'ad estably
 Des maintez partz, mais je ne voy
 La cause dont l'en dist ensi,
 Et pour cela, je t'en suppli,
 Respoune, et si m'apren un poy.
 Voirs est q'au ton commencement
 Te fist dieus bien et noblement,
 Des quatre choses t'ordina
 Par son tressaint commandement : 26620
 Du terre y mist ton fondement,
 Et d'eaue puis t'environna,
 Del air auci t'abandonna,
 Et pour toy faire il adjousta
 Le feu, q'est le quart element,
 Et puis lumere a toy donna,
 Et au darrein sur tout cela
 Il t'ad covert du firmament.

He, Siecle, ditez m'en le voir,
 Des tous ceaux je le vuil savoir 26630
 Dont est ce *que* le mal nous vient.
 Mais certes a le mien espoir
 Pour rien q'en puiss aperevoir
 Blamer la terre ne covient ;
 Ainz grant proufit nous en avient,
 Car des grans biens q'en soi contient
 Nous veste et paist matin et soir ;
 Le fruit et flour a luy partient,
 Oisel et beste en soy maintient
 Ove l'erbe qu'il nous fait avoir. 26640
 Mais puis de l'eaue quoy dirray ?
 L'excuserai ou blameray
 Des mals qui nous avons rescez ?
 Par resoun je l'excuseray ;
 Car *parmy* l'eaue piscon ay,
 Et *parmy* l'eaue le surplus
 Du marchandie est avenuz,
 Et *parmy* l'eaue de dessus
 Nous croist la flour et l'erbe en Maii ;
 Issint q'en l'eaue je ne truis 26650
 Du blame, ainçois des grans vertus,
 Dont au bon droit la priseray.
 Et pour plus dire a la matiere
 De la fontaine et la rivere,
 Dont nous ensemble ove l'autre beste
 Bevons, lavons ove lée chere,
 Comme celle q'est a nous treschere,
 N'est Rois qui porra faire feste,
 Si dieus celle eaue ne luy preste ;
 L'eaue est de *nostre* foy la creste, 26660
 En ce q'elle est no baptizere :
 Dont m'est avis *que* la moleste
 Ne vient de l'eaue, ainz elle est ceste
 Q'a nous est la seconde mere.
 Mais quoy del air, est ce causal,
 Par qui nous vient atant de mal ?
 Certainement je dy nenil.
 L'air est de soy si natural,
 Que toute vie en general
 Sanz l'air du mort est en peril ; 26670
 Et d'autre *part* l'air est soubtil,
 Ce scievont tout le volatil,

26635 enavient

Volant amont et puis aval;
L'air est as tous bon et gentil,
Dont nuls puet dire *que* c'est il
Q'au siecle est *pr*judicial.
Et plus avant si je vous die
Del fieu, quel est de sa partie
Du siecle le quart element,
Endroit de luy ne croy je mie 26680
Q'il est coupable du folie;
Ainz *grant* confort nous fait sovent,
Car fieu de sa nature *espr*ent,
Si nous allume clierement,
Et d'autre *part* nous fait ate,
Noz corps eschaffe *bonn*ement,
Si quist et roste no pulment,
Dont sustienons la *nostre* vie.
Bon est le fieu de sa nature,
Qui nous mollist la chose dure, 26690
Dont nous la porrons attemprer,
Et puis forger a no mesure,
Siqu*e* pour conter la droiture
Le fieu devons *par* droit loer:
Et ensi pour determiner,
Le siecle je ne say blamer
Es choses que j'ay dit dessure;
Mais plus avant m'estuet sercher,
Pour la malice seculier
Sercher en autre creature. 26700
He, Siecle, enquire te demande,
Si me *resoun* a mon demande,
Dont vient le mal *que* tant t'enpire?
Le solaill qui *par* tout s'espande
Ne croy je point *que* dieus *commande*
Q'il face mal deinz ton empire;
Ainz fait *grant* bien, qui bien remire,
Car chascun bien de luy respire,
Le pré, le champ, le bois, la lande,
Encontre froid nous est le mire; 26710
Chascuns vers le solaill se tire
Pour le confort quel il nous mande.
Mais quoy, la lune est ce grevable?
Certes nenil, ainz *pr*oufitable,
Q'elle est la mere de moisture,
Si fait la pluie saisonnable,

Dont arbre et herbe et terre arrable
Pernont racine et puis verdure:
La lune aici de sa nature
Nous esclaireist la nuyt obscure 26720
Pour faire ce q'est busoignable.
Comment q'il soit de mesprisure,
La lune endroit de sa mesure
A mon avis est excusable.
Q'est ce *que* plus demanderoie?
Sont ce l'estoilles que je voie,
Dont *nostre* siecle se destourne?
Nay certes, je responderoie.
Dieus, qui l'estoilles multiploie,
Des grandes vertus les adourne; 26730
La nief de nuyt q'est triste et morne,
De ce *que* la tempeste tourne
Par halte mer et la desvoie,
Par les estoilles s'en rettonne
Et au sauf port son *cors* attoune,
Tanq'il ad pris la droite voie.
Quoy de *Saturne* et de *Commete*?
Sont il qui font *nostre* inquiete,
Sicomme les clerics vont disputant,
Et dient deinz *leur* cercle et mete 26740
Que l'un et l'autre est trop replete
De la malice? Et nepourquant
Un soul *prodhomme* a dieu priant f.146
Porra quasser du maintenant
Trestout le pis de leur diete:
Dont n'est avis a mon semblant,
Depuisque l'omme est si puissant,
Nous n'avons garde du planete.
Albumazar dist tielement,
Quant il descrit le firmament, 26750
Que si ne fuist la clareté
De les estoilles *prop*rement,
L'air *pardessoubz* entre la gent
S'espesseroit *par* tiel degré,
Que toute creature née
En duist morir d'enfermeté:
Siqu'il appiert tout clierement,
De dieu, q'ad tous les biens creé,
Sont les estoilles ordiné
Pour *nostre* bien communement. 26760

26756 Enduist

Les arbres qui sont halt ramu
Et semblont d'avoir grant vertu,
Font ils le mal dont l'en se pleigne?
Certes nenil, bien le scies tu;
Ainçois les uns valent au fu,
Les autres valent a l'ovreigne,
Si portent fruit de *leur* demeine,
Dont nous mangons *par* la semeine,
Leur ombre aici nous fait refu 26769
Pour la *chalour* que nous constreigne;
Dont semble a moy *par* reson pleine
De ceaux nul mal nous est venu.
He, quelle part sercher porray,
U la malice trouveray
Par quoy le siecle blamé ont?
Entre les bestes sercheray,
Les queux *noun*resonables say,
Mais beste et oisel mal ne font,
Ainz comme nature leur somont,
Les lions es montaignes sont, 26780
Es arbres sont ly papegay,
Del malvoisté s'excuseront
Du siecle; qui les blameront,
Par *resoun* porront dire nay.
Mal Siecle, enquire je t'oppose,
Si plus y soit aucune chose
Par quoy te vient la malvoisté.
Certes oïl, si dire l'ose:
Beste une y ad, comme je suppose,
A qui dieus ad *resoun* donné, 26790
C'est cil qui tient en son degré
Les bestes soubz sa poesté,
Des tous sa volenté dispose,
Et pour luy soul ad dieus creé
Les elementz q'ay susnomé
Ove tout ce que le siecle enclose.
He, certes *par* le mien avis
Molt est la beste du grant pris,
Qui dieus ad fait si belle grace,
Primer du *resoun* q'il ad mis, 26800
Et puis q'il ad a luy soubmis
Trestout ce que le siecle embrace;
Dont drois est q'il son dieu *regr*ace,
Et son voloir toutdis *par*face

26842 nenvoet

De la *resoun* qu'il ad apris:
Mais autrement je demandasse,
Quoy si ce beste a dieu forsface,
Comment serront ses mals puniz?
A ton demande je responde
Solonc *que* l'escripture exponde: 26810
Quant il son dieu fait coroucer,
Par son peccché devient inmonde
La *prop*rete du tout le monde,
C'est fieu et air et terre et mer,
Trestous le doivent comparer;
Siqu'ils commencent adverser
Au beste q'ensi les confonde;
Dont m'est avis sanz plus parler
Q'a soul ce beste puisse noter
Les mals dont *nostre* siecle habonde.
Ore fait savoir le *noun* du beste 26821
Par qui le siecle ensi tempeste:
Si vous dirray que truis escrit,
C'est cil q'en paradis terrestre
De dieu le pere Roy celeste
Estoit fourmez a grant delit,
Et puis de son saint esprit
A sa semblance l'alme y mist,
Si l'appella comme son domest
Homme; et puis de l'omme prist 26830
Un de ses costes, dont il fist
Femme a l'encress de celle geste.
He, dieus, ore voi je clierement
Que c'est de l'omme soulement,
Et *noun*pas d'autre creature,
Par quoy le siecle au *jour* *pres*ent
Se contient si malvoisement:
Mais certes c'est au bon droiture,
Depuisque dieus cel homme honure
Sur toute beste en sa nature 26840
Du sen, viande et vestement,
Et l'omme n'en voet avoir cure,
Si dieus sa peine luy procure,
N'est pas malvois le jugement.
N'est pas ensi comme nous qui-
dasmes,
Ainçois a molt *grant* tort errasmes
Pour *nostre* siecle desfamer,

Mais cil q'en porte les desfames
 Il tolt de soi les bonnes fames,
 Qant l'autri noun quiert entamer, 26850
 Dont q'il est mesmes a blamer :
 Mais cils qui soy voldront amer
 Au prouffit de leur corps et almes,
 Amendent soy pour l'amender
 Du siecle, qui fait engendrer
 L'erreur des seignours et des dames.

Seint Job nous dist expressement
 Que riens sur terre est accident
 Sanz cause ; et d'autre part je lis
 Escript en prophetizement, 26860
 Que pour le peché de la gent,
 Qui n'ont la dieu science adquis,
 Serra le siecle en plours et cris
 Ove tout ce q'est dedeinz compris ;
 La beste et l'oisell ensement
 Et le piscon en valdra pis,
 Trestous en serront malbaillis
 Pour le mal homme soulement.

Gregoire en sa sainte Omelie,
 De tant q'om ad resoun garnie, 26870
 L'omme a les angles ressembla ;
 Car qui bien vit en ceste vie
 Apres la mort, qant il desvie,
 Ove les bons angles vivera,
 Et d'autre part s'il pechera
 Ove Lucifer tresbuchera,
 U l'angre sont du felonnie :
 Selonc l'effect que l'omme fra,
 Eslire franchement porra
 Ou l'une ou l'autre compaignie. 26880

Gregoire, qui ne volt mentir,
 Dist que l'omme est en son sentir
 Semblable as autres animals,
 En goust et tast, veue et oïr,
 Et en aler, car sanz faillir
 Ce sont les cink sens principals,
 Qui sont as bestes comunals :
 Mais ne porront les bestials
 Leur sens en mal us convertir,
 Puisque nature est doctrinals, 26890

26848 qenporte

26866 envaldra

26867 enserront

26900 plusvaillable

26905 qensaouit

Mais l'omme, qui sciet biens et mals,
 Leur bon us porra pervertir.

Gregoire auci par resemblance
 Nous dist que l'omme en sa crescance
 Est a les arbres ressemblable :
 Du verge croist halte soubstance,
 Et auci du petite enfance
 Croist l'omme ; mais alors sanz fable,
 S'il n'est ensi fructefiable
 En sa nature ou plus vaillable, 26900
 Comme l'arbre en sa fructefiance
 Portant bon fruit et covenable,
 Pour ce que l'omme est resonnable,
 N'en puet avoir nulle excusance.

Gregoire, q'en savoit tout l'estre,
 Dist que les hommes en leur estre
 Sont a les pieres comparé :
 Car l'un et l'autre dieus ly mestre
 Tout d'une essance les fist nestre,
 Mais nonpas d'une equalité ; 26910

Car pieres n'ont du propreté
 Fors soul leur estre en nul degré,
 Ne poont pas sentir ne crestre,
 Mais l'omme est autrement doé,
 Dont il par droite dueté
 Doit autre honour au Roy celestre.

Tout sicomme vous avetz oy,
 L'omme ove les angles ad en luy
 Entendement du resoun cliere,
 L'omme ove la beste ad autrecy 26920
 Le sentement, et puis auci
 Il ad crescance en sa maniere
 Ove l'arbre, et l'estre avec la pierre ;
 Et puisq'il est ove dieu le pierre
 Sur tous les autres plus cheri,
 S'il lors plus vertuous n'appiere
 Des autres, maisq'il le compiere
 Drois est, qant il l'ad deservi.

Mestre Aristotle ly bons cleres,
 Qui des sciences fuist experts, 26930
 En un des livres qu'il faisoit,
 Dont molt notable sont les vers,
 L'omme ensi q'est en soy divers

Le meindre monde il appelloit ;
 Car tout le monde en son endroit f. 147
 L'omme en nature de son droit
 Contient ; de ce nous sumes certz,
 Qant dieus l'umaine char creoit,
 Des elementz part y mettoit,
 N'est qui puet dire le revers. 26940

Des noz parens, Adam, Evein,
 Dieus fist la char nonpas en vein
 Du terre, q'est en soy pesant,
 Et d'eau, q'est a ce prochein ;
 Apres faisoit le sanc humein,
 Quel par les veines vait corant ;
 Et pour ce q'il serroit vivant,
 Del air fuist fait son aspirant ;
 Et puis du feu, q'est le darrein,
 L'omme ad chalour reconfortant : 26950
 Molt estoit dieus no bienvuillant,
 Q'ensi nous fourma de sa mein.

Pour ce si l'omme a dieu forsfait,
 Par son peché trestout desfait
 Et terre et eau et mer et feu ;
 Car dieus se venge du mesfait,
 Et leur nature ensi retrait

Q'ils pour le temps sont comme perdu :
 Dont par resoun bien le vois tu,
 Le siecle endroit de sa vertu 26960
 Du plus et meinz par l'omme vait,
 Et si nul mal soit avenu,
 Ja d'autre chose n'est venu
 Fors soul du mal que l'omme fait.

Mais ore au point voldrai savoir,
 Si l'omme fait bien son devoir
 En gardant le precept divin,
 Lors quel guerdoun doit il avoir
 Plus q'autre beste : di m'en voir.

Il avra guerdoun si tresfin 26970
 Dont nuls porroit conter le fin ;
 Car toutes bestes d'autre lyn
 En leur nature remanoir
 Estuet sanz passer le chemin,
 Mais l'omme, q'ad sen et engin,
 Fait bien ou mal a son voloir.

L'omme ad sa franche volenté,

Solonc que dieus l'ad ordiné,
 Dont puet le bien et mal eslire ;
 Car l'un et l'autre abandonné 26980
 Luy est, par quoy s'il malvoisté
 De sa resoun voldra despire,
 Et l'alme q'est deinz son empire
 Guarder, siq'il son droit n'empire,
 Certain puet estre en son degré
 Q'il avra tout ce q'il desire :
 C'est la promesse nostre sire
 Par son prophete en verité.

Dieus de sa noble curtoisie
 Cela nous dist en prophecie, 26990
 Si l'omme a luy soit obeissant,
 Tout que le siecle ad en baillie
 A grant prouffit luy multeplie
 Sanz nul damage survenant :
 Car de l'espele le trenchant,
 Ne pestilence en occiant
 Lors n'entrera deinz sa partie,
 Ainz tant comme soit a dieu plesant,
 En peas des tous biens habondant
 Doit maintenir joyeuse vie. 27000

Je lis que toute creature
 Chascune endroit de sa nature
 Est au prodhomme obedient ;
 Car le bon angel pardessure
 Du compaignie l'omme assure
 Sicomme son frere proprement,
 Et le mal angel ensemment
 Sicomme soubgit et patient,
 Malgré q'il doit a sa mesure,
 Falt faire le commandement 27010
 Del homme, et ce poons sovent
 Trouver d'essample en l'escripture.

Des elementz auci je lis
 Q'al homme se sont obeiz :
 Car le solail par son degré
 En Gabao, ce m'est avis,
 Sanz soy movoir estoit soubgis
 A la requeste Josué ;
 L'estoille auci s'estoit moustré
 Et as trois Rois abandonné, 27020
 Pour ce q'au dieu furent amys,

26955 feu et mer

Et l'air plain de mortalité
 Fuist par Gregoire resané
 En Rome la Cité jadis.
 Cel element auci de feu
 Fist son service au poeple dieu
 Par nuyt obscure en la semblance
 D'un halt piler, dont ont tenu
 Al grant desert, q'estoit boscu,
 Leur droit chemin sanz variãnce: 27030
 La terre auci de sa soubstance
 A saint Hillaire, qui du France
 Devant le pape estoit venu,
 Portoit honour et entendance,
 Q'encontre luy par obeissance
 Se lieve et l'ad en halt resçu.
 La mer auci ventouse et fiere
 Devint paisible as piés saint Pierre,
 Q'il sur les undes sauf aloit;
 Je lis auci q'en la rivere 27040
 Saint Heliseu par sa priere
 Fist que le ferr amont flotoit.
 Siqu'il apiert en tout endroit
 Que saint prodomme ad de son droit
 Les éléments a sa banere;
 Et d'autre part, u que ce soit,
 Bête et piscon auci l'en voit
 Soubgit en mesme la maniere.
 Qant Daniel el lac aval 27049
 Fuist mis, pour ce n'ot point du mal
 Des fiers lions, ainz fuist tout seins:
 Silvestre auci, q'estoit papal,
 La bouche du dragon mortal
 Au Rome lia de ses meins:
 La Cete auci fuist fait gardeins
 Trois jours son ventre pardedeins
 Du saint Jonas le dieu vassal,
 Sanz mal avoir ou plus ou meinz;
 Du Ninivé les Citezeins
 Qant a ce fait sont tesmoignal. 27060
 Au bon Paul l'eremite auci
 L'oisell y vint et le servi
 Du pain, sicome le dieu message,
 Chascune jour q'il n'en failly.
 Des toutes parts pour ce vous dy,

27093 plussufficant

Les creatures font servage
 A l'omme saint et avantage,
 Mais s'il remue son corage
 Et s'est des pechés endormi,
 L'onour luy tourne a son hontage: 27070
 Et au peril et au damage,
 Sicomme d'essample avons oy.
 Le bon saint angel debouta
 Du paradis, qant il peccha,
 Adam, et puisq'il fuist ruez,
 Cil malvois angel le pena;
 Dathan auci qui murmura
 Fuist de la terre transgloutez;
 La mer ot auci devourez
 Roy Pharaon ses armez; 27080
 Le feu Sodome devoura;
 Auci David par ses pechés
 L'air fist corrompre: ensi voietz
 Q'au malvois homme mal esta.
 Molt est prodomme en soi puissant,
 Car tout est mis a son devant,
 Dont puet le bien et mal eslire
 En ceste siecle soy vivant:
 Maisq'il soit sage gouvernant,
 Les choses que fist nostre sire 27090
 Soubz le povoir de son Empire
 Luy sont soubgit; siq'au voir dire,
 L'omme est tout le plus sufficient
 Apres dieu, et s'il voet despire
 Pecché, tous mals puet desconfire
 En ceste vie et plus avant.
 Encore a demander je pense,
 S'apres la mort ait difference
 Parentre l'omme et son lignage
 Et l'autre beste ove leur semence, 27100
 Qui n'ont ne resoun ne science
 De jugement ne de langage.
 He, autrement serroit hontage,
 Si ce q'est fait al dieu ymage
 Et est doé du sapience,
 Ne deust avoir plus d'avantage
 Que l'autre beste a son passage;
 Trop fuist celle inconvenience.
 Dieus, qui sur tous est gouvernals,

27096 plusaunt

Voet que le corps des animals 27110
 Ove l'alme moerge ensemblement;
 Mais l'omme a ceux n'est parigals,
 Si noun q'il est auci mortals,
 Mais c'est en corps tantsolement;
 Car l'alme vit et puis repret
 Son corps au jour de jugement,
 Et s'il avra laissé les mals,
 Lors l'un et l'autre joyntement
 En joye sanz nul finement
 Vivront en les celestials. 27120
 He, homme, molt es benuré,
 Sur toutes bestes honeuré,
 Que dieus t'ad fait leur capitain,
 Et si bien fais ta dueté,
 Apres la mort t'ad ottrié
 Du ciel la joye plus haltain:
 Du double bien tu es certain, f. 148
 Si bien gouvernes le mondain,
 Le ciel avras enherité;
 Tu scies mal faire ton bargain, 27130
 Si tu n'en prens a toi le gain,
 Trop as resoun desfiguré.
 Mais outre ce di quoy serra,
 Si l'omme ne se gardera
 Pour faire a dieu droite obeissance.
 Je dis que malement l'esta,
 Car sicomme vous ay dit pieça,
 Le siecle ove toute s'alliance
 Luy serront en desobeissance,
 La terre ert sanz fructefiance, 27140
 Et l'air de soy corrumpera,
 Et l'eau en tolt sa sustenance:
 Molt serra plain de mescheance
 Qui contre luy tout ce verra.
 Mais tout cela n'acompteroie,
 Que je pour ce peché lerroie,
 Si l'en porroit apres monter
 De ceste siecle en l'autre joye:
 Mais c'est pour nient, car qui forsvoie,
 La terre ove tout le ciel plener 27150
 Ses pechés devont acuser;
 La terre q'il fist mesuser

27126 plushaltain

27129 en herite

27142 entolt

27147 lenporroit

27185 plusnoblez

Luy jetera du siecle envoie,
 Et dieus son ciel ne voet donner
 Au tiel malvois; dont falt aler
 Jusq'en enfer la halte voie.
 He, beste q'es nounresonnable,
 Comme ta nature est delitable
 Au regard du fol pecheur!
 Tu n'es apres la mort coupable, 27160
 Mais l'autre en peine perdurable
 En corps et alme sanz retour
 Estuet languir pour sa folour;
 Il vit du mort en tenebrou,
 Et moert du vie q'est dampnable,
 Sa vie et mort sont d'un colour:
 Que plain morir ne puet nul jour,
 C'est une paine descordable.
 He, homme q'au peché te donnes,
 A ta resoun trop desresonnes, 27170
 Qant lais le bien et prens le mal;
 Si voes, tu puiss avoir coronnes,
 Et si tu voes, tu t'engarçonnes,
 Car pour eslire es liberal:
 Mais certes trop es desloyal
 Et envers dieu desnatural,
 Qant ta reson si mal componnes,
 Dont pers la vie espirital,
 Et en ta vie temporal
 Trestout le siecle dessaisonnes. 27180
 He, homme, en soul ton corps en-
 closes
 Part des natures que sont closes
 En toute l'autre creature;
 Et si ta resoun bien disposes,
 Tu as en toy plus noblez choses,
 Q'as angles de science pure
 Resembles. He, comme dieus t'onure,
 Qant il ensi t'ad mys dessure,
 Plus que ne sont les rouges roses
 Sur les cardouins en leur nature! 27190
 Car l'alme as a la dieu figure
 Solonc les tistres et les gloses.
 He, homme, beste de peresce,
 Reson de toy n'est pas mestresse,

Quant soubz ta franche poesté
 Tu as du siecle la noblesce,
 Et souffres *que* le mond te blesce,
 Et voes enquire tout du gré
 Blamer le siecle en son degré.
 Tout ce te vient du nycteté, 27200
 Du couardie et de fieblesce :
 Mais si tu fuisses redrescé
 De ta malice et ton pecché,
 Tantost le siecle se redresce.

Pour ce chascuns qui le mal fait
 S'amende, et ce serra bien fait,
 Car deux biens en puet rescevoir :
 L'un est q'il puet de son bienfait
 Le siecle, q'est sicomme desfait,
 Refourmer tout a son voloir ; 27210
 L'autre est *que* nous savons du voir,
 Cil qui bien fait du ciel est hoir :
 Dont m'est avis, puisq'ensi vait,
 Que l'omme ad *propre* le povoir
 De l'un et l'autre siecle avoir ;
 Fols est s'il l'un ne l'autre en ait.

Ore est q'om de commun usage
 Despute, argue et se fait sage,
 Chascuns son argument sustient ;
 Tu dis *que* c'est le seignourage, 27220
 Je di *que* c'est le presterage,
 Du qui no siecle mal devient ;
 Et l'autre dist, mal se contient
 La gent commune et point ne tient
 La dueté de son estage :
 Mais qui du reson soy sovient
 Puet bien savoir *que* c'est tout nient
 D'ensi jangler sanz avantage.

Quant pié se lieve contre teste,
 Trop est la guise deshonneste ; 27230
 Et ensi quant contre seignour
 Les gens sicomme sauvage beste
 En multitude et en tempeste
 Se lievent, c'est un grant erreur ;
 Et nepourquant la gent menour
 Diont *que* leur superiour
 Donnent la cause du moleste,
 C'est de commune le clamour :

27207 enpuet

27216 enait

27255 aviler

Mais tout cela n'est *que* folour,
 Q'au siecle nul remede preste. 27240
 Et pour parler des soverains,
 Qui sont des mals les primereins
 De leur tresfole governance,
 Ils nous prechont ove vuidez meins ;
 Car s'ils nous ont d'un point atteintz,
 De cink ou six leur variance
 Voions, si *que* leur ignorance
 Nous met le plus en fole errance :
 Par quoy le siecle plus ne meinz 27249
 N'amendont, ainz croist la distance ;
 Chascuns blame autre en sa faisance,
 Et chascuns est du blame pleinz.

N'est pas honneste, ainçois est vile
 Maniere, quant prechour revile
 Ce dont est mesmes a viler ;
 Car dieus nous dist en l'evangile,
 'O ypocrite plain du guile,
 Le festu scies considerer
 En l'oill ton frere pour blamer,
 Mais tu ne vois le grant plancher 27260
 Que toy deinz ton oill *propre* avile.'
 Pour ce tu qui nous viens precher
 Pour noz defaltes aculper,
 Primer toy mesmes reconcile.

Trestous savons du verité,
 Quiconque sur l'autri degré
 Met blame par accusation,
 Ce n'est trestout que vanité
 Quant le blamant ne le blamé
 N'en ont ascun amendement : 27270
 Mais plus serroit convenient
 Que l'en amendast duement
 Chascuns sa *propre* malvoisté ;
 Car qui ne se puet proprement
 Amender, je ne say coment
 Q'il ait les autres amendé.

Chascuns souhaide en son endroit
 Que nous eussions le siecle au droit,
 Car tous desirons l'amender ;
 Mais je di *que* tout bien serroit, 27280
 Si chascun de sa part voldroit
 Mais q'un soul homme corriger :

Car ja n'estuet plus loins aler
 Forsq'a soy mesmes commencer ;
 Et si chascuns ensi ferroit,
 Je suy certains sanz nul doubter,
 Plus q'om ne sache divider,
 Le siecle amender l'en verroit.

Chascuns porra penser de soy
 Comment le siecle est en effroy 27290
 Du pecché q'avons maintenu ;
 Mais des tous autres *que* je voi
 Je suy certain *que* plus *que* moy
 Nuls ad mesfait envers son dieu :
 Mais esperance est mon escu
 Par l'aide et mercy de Jhesu,
 Qui je supplie en mon recoy
 Qu'il m'en avra bien absolu,
 Combien *que* soit tard venu
 Au repentir comme faire doy. 27300

Car combien *que* je riens ne vaille,
 Dieus ad tout prestement s'oraille
 Pour ascoulter le peccheour ;
 Et autrement ne fuist merveille,
 Si tout en vein je m'en travaille
 Pour grace quere ne socour :
 Car pour recorder tout entour
 Le grant pecché, le grant erreur,
 Dont j'ay mesfait du commençaille,
 Si la mercy ne soit maiour, 27310
 Bien say q'au paine sanz retour
 Ay deservi que je m'en aille.

Car deinz mon cuer tresbien je sens
 Que ma resoun et mes cink sens
 Ay despendu si folement,
 Q'encontre dieu et son defens
 Le siecle ove tous les elemens
 Ay corrompu vileinement :
 Mais dieus dist, cil qui se repent f.149
 Ne puet faillir d'acordement ; 27320
 Et pour cela je me repens
 Par volenté d'amendement,
 Et me confesse plainement
 Que j'ay esté trop necligens.
 Et quoique soit du remenant,
 Mon poair fray desore avant

27283 plusloins

Un soul chaitif pour amender,
 Par quoy le siecle en son estant
 Porra le meulx valoir de tant,
 De ce que l'ay fait enpirer. 27330
 Mais sur tout je doy consirer,
 Et mettre y tout mon desirer
 A servir dieu q'est toutpuissant ;
 Car si j'ensi puiss exploiter,
 Le siecle me doit prosperer,
 Et puis serray sanz fin joyant.

Jadis trestout m'abandonnoie
 Au foldelit et veine joye,
 Dont ma vesture desguisay
 Et les fols ditz d'amours fesoie, 27340
 Dont en chantant je carolloie :
 Mais ore je m'aviseray
 Et tout cela je changeray,
 Envers dieu je supplieray
 Q'il de sa grace me convoie ;
 Ma conscience accuseray,
 Un autre chançon chanteray,
 Que jady chanter ne soloie.

Mais tu q'escoulter me voldras,
 Escoulte que je chante bass, 27350
 Car c'est un chançon cordial ;
 Si tu la note bien orras,
 Au commencer dolour avras
 Et au fin joye espirital :
 Car Conscience especial,
 Qui porte le judicial,
 Est de mon conseil en ce cas,
 Dont si tu voes en communal
 Chanter ove moy ce chançonnel,
 Ensi chantant dirrez, Helas ! 27360

Puisq'il ad dit comment tout le
 mal dont l'en blame commune-
 ment le siecle vient soulement de
 l'omme peccheour, dirra ore com-
 ment l'omme se reformera et
 priera a dieu.

Helas, chaitif qoy penserai,
 Quant ove moi mesmes tencrai

27341 enchantant

De ma chaitive fole vie ?
 Comme plus en pense, plus m'esmai,
 Car bien recorde que je m'ai
 Corrupt d'Orguil et false Envie,
 De Ire, Accidie et Gloutenie,
 De Covoitise et Leccherie ;
 Ce sont les sept, tresbien le sai,
 Qui sont les chiefs de ma folie, 27370
 Sique peccché par tout me lie
 Sanz nul bonté que je refai.

Deinz mon penser si je me voie,
 Vei la qui vienont en ma voie
 Tous les sept vices capiteines !
 Chascune clayme que je soie
 Le soen, pour ce que je laissoie
 Les loys de dieu pour les mondeines.
 Maldit soient tieles gardeines,
 Q'au fin desaises tant soudeines 27380
 Rendont pour les terrienes joyes,
 Que perillouses sont et veines ;
 Dont ay remors toutes les veines
 Parmy ma conscience coye.

Je voi mes mals en tant diffus,
 Siq'en pensant je su confus
 Par grieffté de ma conscience ;
 Dont je serroie au fin destruis,
 Mais repentance, que je truis
 Deinz ma resoun et ma science, 27390
 M'ad donné meillour evidence :
 C'est que par juste providence
 Je prieray celluy la sus
 Qu'il me pardonne toute offense
 Q'ai fait encontre sa defense,
 Dont soie a sa mercy rescuz.

Enqore helas ! que le peccché
 M'ad deinz le cuer tant enpesché,
 Dont se moustront toutdis avant
 Honte et paour en ma pensé, 27400
 Que tant comme plus m'ai pensés,
 Tant meinz sai faire mon avant.
 Comment vendray mon dieu devant ?
 Car tant ay esté decevant,
 Que, s'il ne m'avra respité,
 Je n'ose prier tant ne qant ;

27364 'enpense

27414 Plusord plusvil plusfals plusfrele

Mais je supplie nepourqant
 Ma dame plaine du pité.
 Je mesme, helas ! ne puiss souffire
 De bien penser ne de bien dire 27410
 Pour honte que me renouvelle.
 Helas ! come je me doi despire,
 Qui suy des tous chaitifs le pire,
 Plus ord, plus vil, plus fals, plus
 frele ;

Mais esperance me repelle
 A toy, ma dame, q'es pucelle
 Et mere aici du nostre sire,
 Tu le leitas de ta mamelle,
 Enpernetz, dame, ma querelle
 Pour la mercy que je desire. 27420

O mire des tous mals, Marie,
 A m'alme q'est ensi marrie
 Donnetz, ma dame, medicine
 Pour la santé que je supplie ;
 Car mon peccché si fort me plie
 Que j'en suy tout a la ruine,
 Si tu, ma dame, ove ta covine
 De la vertu quelle as divine
 Ne guarissetz la maladie, 27430
 Dont je languis a la poitrine,
 Q'est assetz pis que la farcine,
 La quelle fait la char purrie.

Car c'est de l'alme entierement,
 Dont suy naufré si fierement,
 Que si je n'ie bonne cure
 De vous, ma dame, brievement,
 Ne say dont mon relievement
 M'en puet venir par creature :
 Mais tu, ma dame, q'es dessure, 27440
 Si tu me guardes, je m'assure
 Des plaies que me font dolent
 Je guariray sanz aventure ;
 Dont m'alme serra blanche et pure,
 Q'ore est obscure vilement.

Ma dame, j'ay sovent oy
 De toy ce qui m'ad rejoý ;
 Et c'est, cil qui te voet sanz vice
 Servir, de toy serra cheri,
 Voir et mill fois plus remeri

27426 iensuy

Que n'est le port de son service : 27450
 Pour ce comment que me chevice,
 Je ne vuill estre mais si nice,
 Que je ne viene ove plour et cry
 Pour toy servir d'ascun office,
 Dont je porray le benefice,
 Ma dame, avoir de ta mercy.

Bien faire ou dire est a louer,
 Dont l'en desert grace et loer,
 Mais au bienfaire endroit de moy
 Je suy forcin et estrangier, 27460
 Que je n'en ose chalenger
 Ascun merit ou grant ou poy :
 Mais, dame, pour parler de toy
 Et dire j'ay asses du quoy ;
 Car tu, ma dame, au comencer
 Es de la cristienne loy
 La mere, dont no droite foy
 Remaint, que nous devons garder.

Pour ce, ma dame, a ta plesance
 Solonc ma povre sufficance 27470
 Vuill conter ta concepcioun,
 Et puis, ma dame, ta naiscance ;
 Sique l'en sache ta puissance,
 Qui sont du nostre nacioun :
 Les clerics en scievont la leçon
 De leur latin, mais autres noun,
 Par quoy en langue de romance
 J'en fray la declaracioun,
 As lays pour enformacioun,
 Et a les clerics pour remembrance. 27480

Ore dirra de la Concepcioun et de la Nativité de nostre Dame.

Un noble bier estoit jadis,
 Riche et puissant en son pais,
 Et Joachim a noun avoit,
 Qui une dame de grant pris,
 Ensi comme dieus luy ot apris,
 A femme prist et l'espousoit,
 La quelle espouse homme appelloit
 Dame Anne, q'ert en son endroit
 Et belle et bonne au tout devis,
 Q'ascune part om ne savoit 27490

Qui envers dieu meulx se gardoit
 Selonc la loy des Circumcis.

Molt fuist honeste assemblement
 De l'un et l'autre ensemblement,
 Car chascun d'eaux en sa mesure
 Gardoit sa loy noun feintement,
 Ainz envers dieu molt seintement
 Se contenoit sanz mesprisure :
 Et chascun aun d'almoisine pure
 Trestout le gaign de leur tenure 27500
 En trois partz charitousement
 Firont partir, dont la figure [hure
 Nous donne essample au present f. 150
 D'almoisine faire, oietz comment.

La part primere ils departoient
 Au temple et a les clerics q'estoient
 Dedeinz le temple a dieu servir ;
 La part seconde, u mestier voient,
 Al oeps des povrez gens donoient
 Pour la viande et le vestir ; 27510
 Et pour leur mesmes maintenir
 Et leur familie sustenir,
 La tierce part vers soy gardoient :
 Sanz covoitise et fol desir,
 Tansoulement au dieu plesir,
 Leur corps et biens abandonnoient.

Vingt ans ensemble nepourqant
 Estoient sanz avoir enfant,
 Et Joachim pour ce voua
 Que chascun an son dieu devant 27520
 Loigns en Jerusalem avant
 Au temple irroit pour offrir la,
 Au fin que si dieus luy dorra
 Ou file ou fils, quelque serra,
 Pour dieu servir vait promettant
 Q'il deinz le temple l'offrera :
 Dame Anne aici le conferma
 Et de sa part promette atant.

Danz Joachim par cel endroit
 Trois fois en l'aun au temple aloit, 27530
 Dont il avint un aun ensi :
 L'evesque, qui la loy gardoit,
 Quant vint offrir, le refusoit
 Et outre ce luy dist aici :

27475 enscieuont

x

' Avant, beal sire, aletz de cy,
 Q'es loign du grace et du mercy :
 Femme as, mais c'est encontre droit,
 Que nul encess as fait en luy
 Du pueple dieu ; pour ce te dy,
 Ton offre n'est a dieu benoit.' 27540
 Ensi l'evesque sa sentence
 Dist devant tous en audience,
 Dont l'autre estoit trop esbahiz ;
 Car lors furont en la presence
 Des ses voisins, dont il commence
 Penser q'arere en son pais
 Ne volt aler par nul devis ;
 Ainz en secret s'est departiz
 Loigns en desert, u q'il s'apense
 Ove les pastours de ses berbis 27550
 Mener sa vie comme chaitis
 Pour la vergoigne que luy tence.
 Cil q'ot esté de grant honour
 Pour honte ensi devint pastour ;
 Mais dieus, q'au fin luy volt aider,
 Enprist pité de sa douleur,
 Et de son ciel superieur
 Par l'angle qui fuist messagier
 Luy mande, q'il duist retourner
 A son hostell et sa mulier, 27560
 Et si luy dist : ' N'eietz paour,
 Je viens nouvelles apporter,
 Et pour ton cuer reconforter
 Enten que dist le creatour.
 ' Dieus dist q'il voit bien la matiere
 Et le clamour de ta priere
 Ove les almoisnes q'as donné ;
 Si voet que tu t'en vais arere
 Envers ta femme, et la tien chere ;
 Car la divine magesté 27570
 T'ad tiele grace destiné,
 Que de ton corps ert engendré
 La file q'ert de sa maniere
 Sur toutes la plus beneuré,
 Dont tout le siecle serra lée ;
 Et pour ce faites bonne chere.
 ' Dame Anne en soi concevera
 Et une file enfantera,

27574 plusbeneure

Le noun de luy serra Marie,
 La quelle offrir te coviendra 27580
 Au temple, u q'elle habitera,
 Comme celle q'est la dieu amie ;
 Car vierge pure nient blemie
 Dieu servira toute sa vie,
 Siq'en son corps compli serra
 Toute la viele prophecie ;
 Le fils de dieu, q'om dist Messie,
 Parmi sa char s'encharnera.
 ' Que ceste chose serra voir
 Par signe tu le dois savoir : 27590
 En la Cité matin irrez,
 Au porte d'orr te fai moveir,
 Et la dois tu ta femme avoir,
 Dont plus segur estre porrez
 Par ce q'illecoques la verrez :
 Elle ad esté dolente assetz,
 Mais lors doit joye resevoir.
 Qant l'angel ot ses ditz contez,
 Au ciel dont vint s'est remonte
 Et l'autre maint en bon espoir. 27600
 Ore a dame Anne vuil tourner :
 Qant son mary vist destourner,
 Siq'a sa maison ne revint,
 Tiel doel commence a demener
 Que nuls au joye remener
 La pot ; mais celle nuyt avint
 Que l'angle pour conter luy vint,
 Dont elle a tout son cuer devint
 Joyeuse, et prist a mercier
 Son dieu, et lors en peas se tint 27610
 Et la matiere bien retint
 De ce q'elle ad oy conter.
 Ensi dieus de sa providence
 Du confort donna l'evidence
 As ceaux qui ont esté dolent :
 Mais lors leur joye recommence,
 Par quoy chacun l'autri presence
 Covoite asses devotement,
 Et trop leur semble longement
 Ainz q'il vienont ensemblement, 27620
 Dont l'un desire et l'autre pense ;
 Siq'au matin, qant l'aube espent,

27598 angle

La voie au porte chacun prent
 Sanz faire aucune resistance.
 Et l'un et l'autre a cuer reporte
 Les ditz que l'angle leur apporte,
 Par quoy se lievont au matin
 Et s'entrecontront a la porte.
 Si l'un ove l'autre se desporte,
 Drois est, mais puis font leur chemin
 Vers leur hostel, u leur voisin 27630
 Grant joye font au pelerin,
 Q'au sa maison en sauf resorte :
 Ensi menont le jour au fin,
 Mais le secret q'estoit divin
 Ensur trestout les reconforte.
 Qant leur voisin s'en vont partir,
 Lors croist l'amour sanz departir
 De la divine pourvoiance ;
 Qant ils en ont asses leisir, 27640
 Chascun dist autre son pleisir
 Et font sovent la remembrance
 De l'angel dieu et sa parlane,
 Dont ils ont fermé la creance
 Que tout cela doit avenir.
 Dieus de nature en sa puissance
 Leur moustra tant de bienveillance
 Que l'un et l'autre ot son desir.
 Dame Anne, ensi comme dieus voloit,
 De son mary lors concevoit, 27650
 Et puis a terme de nature
 Au dieu plesance elle enfantoit
 Sa belle file, et la nomoit
 Marie, q'est du grace pure
 Sur toute humeine creature :
 Savoir poetz tiele engendrure
 As les parens joyeuse estoit.
 Trois ans la tint a norreture
 Dame Anne, et puis de sa droiture
 L'offri, comme elle ainçois vouoit. 27660
 Au temple dieu s'en vont avant
 Le pierre et miere ove tout l'enfant
 Pour faire a dieu le sacrefise,
 Sicomme promis estoit devant.
 L'evesque en fuist asses joyant,
 Qant tiele offrende y estoit mise ;

27640 enont

27665 enfuist

27696 enparloient

x 2

Il la receust deinz sa pourprise,
 Et par doulcour et bonne aprise
 Au dieu plaisir la vait gardant :
 Mais ore oietz la halte enprise 27670
 Que la virgine avoit enprise,
 Q'estoit miracle apparissant.
 Quinsze degrés y ot du pierre
 Devant le temple en la manere
 Q'om pot par les degrés monter ;
 Dont il avint si que la mere
 Sa file a la degré primere
 Laissa trestoute soule estier :
 Mais dieus, qui la voloit amer,
 Ce que l'enfant n'ot du poer 27680
 Donna de grace la matiere,
 Siqu'il la fist la sus aler
 Jusques au temple et aourer :
 Savoir poetz que dieus l'ot chere.
 Qant les parens tout fait avoient
 Que faire en celle part devoient,
 A leur hostell sont retourné :
 El temple dieu l'enfant lessoint
 Entre les autres qui servoient
 A dieu par droite honesteté ; 27690
 Mais celle estoit la plus amé
 De dieu, et tout la plus loé
 Du pueple, car trestous l'amoient ;
 Mais qant elle ot sept ans passé,
 Tant plains estoit d'umilité f. 151
 Que toutes gens bien en parloient.
 Solonc que l'auctour me descrit,
 D'une coustume truis escrit
 Que la virgine acustuma,
 Q'au point du jour laissa son lit 27700
 Et lors tantost par grant delit
 Au dieu prier s'abandonna ;
 Et en priant continua
 Jusques au tierce, et lors cessa
 Et d'autre labour s'entremist,
 Les vestementz lors enfla,
 Le temple dieu dont aourna,
 Et jusq'au au Nonne ensi le fist.
 Apres la Nonne chascun jour
 Au temple u q'elle ert au sojour 27710

Se mist en contemplacioun :
 Au dieu, vers qui tout son amour
 Ot attouiné, fist sa clamour
 Par droite humiliacioun,
 Ore ert en meditacioun,
 Et ore en supplicacioun
 Requist la grace au createur ;
 C'estoit sa conversacioun,
 C'estoit sa recreacioun,
 C'estoit sa joye et sa douleur. 27720
 Viande nulle volt guster
 Tiels jours y ot, pour plus penser
 En dieu, u tout le cuer ot mys :
 Dont par decerte et par loer
 La volt dieus amer et louer,
 Si luy envoit assetz toutdis
 Les signes de son paradis,
 Des roses et des fleurs de lys,
 Dont ses chapeals puet atiffer ;
 Comme cil q'est ses loyalx amys, 27730
 Sovent son angel ad tramys
 Pour sa virgine visiter.
 Plain quatorsze ans se tint ensi,
 Mais qant cel age ot acompli,
 Secretement sa chasteté
 Vouoit, et promist q'a nully
 Son corps dourroit fors q'a celly
 Par qui son corps luy fuist donné :
 Ensi par droite humilité
 Affermoit sa virginité, 27740
 Dont l'amour dieu ot establi
 Dedeinz le cuer et affermé,
 Et dieus l'amour tient confermé
 Et de sa part le grante aici.
 Mais ore oietz le grant confort,
 Que dieus voloit refaire fort
 Adam, qui chaot par fieblesse,
 Dont ils estoient en descort ;
 Mais il volt faire bonne acort
 Parmy la vierge et sa noblesse, 27750
 Et sicome d'Eve pecheresse,
 Q'ert du peccé la fonderesse,
 Nasquist Orguil, dont vint la mort,
 Ensi volt dieus que par l'umblisse

27780 enfaire

De la virgine se redresse
 La vie q'est tout no desport.
 Dieus, de sa halte providence
 Qui voit le fin ainz q'il commence,
 Pensa de sa virgine prendre
 La nostre char ; mais ce q'il pense 27760
 Volt celer de sa sapience,
 Que deable ne le pot entendre :
 Et pour cela la vierge tendre
 Volt dieus au mariage rendre,
 Et d'autre part pour l'evidence,
 Q'il volt en soy la loy comprendre ;
 Car sanz la loy qant homme engendre,
 N'est pas honneste la semence.

Ore dirra la maniere comment
 nostre Dame fuist espousée a
 Joseph.

Du viele loy c'estoit usage
 Q'a quatorsze ans le mariage 27770
 L'en pot de les pucelles fere :
 Pour ce l'evesque en son estage,
 Q'ot la pucelle en governage,
 Pourpensa soy de cest affere,
 Et l'aide dieu prist a requere,
 Siq'il ne puisse en ce mesfere,
 Ainz q'il porra sanz nul damage
 Son dieu et sa virgine plere ;
 Et lors le pueple fist attrere
 Pour mieulx en faire l'avantage. 27780
 Et qant le temps ert avenu
 Que tout le pueple estoit venu
 Au temple, u que l'evesque estoit,
 La cause dont les ad esmu
 Leur dist, et chargea depar dieu
 Que chascun solonc son endroit
 Devoutement dieu prieroit,
 Q'il demoustrance leur ferroit
 De sa grace et de sa vertu,
 Qui la virgine espouseroit : 27790
 Ensi le pueple tout prioit,
 Envers le ciel coll estendu.
 Chascuns requiert, chascuns supplie,
 Chascuns devoutement se plie

A faire le commandement
 Que leur Evesque preche et crie :
 Vei la tantost, que leur escrie
 La vois d'en halt le firmament,
 Et si leur dist : 'O bonne gent,
 Vous q'estes ore yci present 27800
 Estraitz du sainte progenie
 Le Roy David, certainement
 A l'un de vous l'affaire appent
 D'estre maritz de la Marie.
 Mais ore plus vous conteray,
 Et la maniere enseigneray
 Par quoy conoistre le devetz :
 Chascuns, sicome ainçois dit ay,
 Prende une verge, et puis dirray
 Comment la verge porteretz, 27810
 Et vers le ciel l'adresceretz :
 Mais celle verge que verretz
 Flourie ensi comme l'erbe en Maii,
 C'est cil qui vous espouseretz
 A la virgine. Ore tost aletz ;
 La chose est venue a l'essay.
 Lors celle vois q'ils ont oy
 N'en parla plus, ainz s'esvani,
 Sur quoy l'evesque maintenant
 Bailla sa verge a chascun : 27820
 Chascuns la porte endroit de ly
 De ceaux dont vous ai dit devant,
 Entre les queux trestout avant
 Joseph sa verge fuist portant,
 Que s'en flourist, et lors le cry
 Se lieve, et tous vont escriant,
 'Le vieil Joseph au jofne enfant
 Serra mari, serra mary.'
 Joseph de l'onour fuist hontous
 Et d'espouser molt paourous, 27830
 La vierge aici hontouse estoit ;
 Mais dieus, qui leur fuist gracios,
 Par son saint angel glorious
 De sa mercy leur confortoit,
 Disant que chastes viveroit
 Et l'un et l'autre en son endroit,
 Et lors n'estoient pas doubtous
 Par ce que dieus leur promettoit ;

27798 denhalt

Au mariage s'assentoit
 La vierge ovesque son espous. 27840
 Du viele loy a coustumance
 L'evesque de sa bienvuillance,
 Q'estoit prodhomme en son corage,
 Enprist sur soy la pourvoiance
 De la virgine et l'ordinance
 Des noeces et du mariage.
 Pareill furent de leur parage,
 Mais desparail estoient d'age,
 L'un ot vielesce et l'autre enfance ;
 Nientmeinz solonc le vieil usage 27850
 Fuist fait par juste governage
 Le matrimoine au dieu plesance.
 Qant tout fuist fait de l'espousaille,
 Joseph, q'avoit la vierge en baille,
 Auci sa chasteté voua,
 Et tost apres il s'apparaille
 Vers son pais, dont se consaille
 Ove la virgine et puis s'en va ;
 Dont elle plus n'y sojourna,
 En Nazareth ainz retourna, 27860
 U q'elle a demourer se taille
 Ove ses parens ; mais pour cela
 Sa viele usance ne laissa,
 Car dieus la tint en governaille.
 Bon amour deinz bon cuer reclus
 Du jour en jour croist plus et plus,
 Car qui bien ayme point n'oublie ;
 Par ceste reson suy conclus
 Que bon amour ja n'ert exclus
 Par nulle chose en ceste vie, 27870
 Ainz croist toutdis et multeplie :
 Ce vuill je dire de Marie,
 Q'ot son cuer mys a dieu la sus,
 Et dieus aici de sa partie
 De plus en plus la tint cherie ;
 Ne l'un ne l'autre estoit deçuz.
 O comme l'amour fuist covenable
 De la virgine et honorable,
 Que soulement son dieu desire ;
 Et d'autre part fuist delitable 27880
 Au tout le mond et proufitable,
 Qui la matiere bien consire,
 27841 acoustumance

Car dieus, sicome nous poons lire,
El corps du vierge volt eslire
Son temple, u qu'il en habitable f. 152
Volt estre, et de son halt empire
Vint naistre pour la mort despire
Et donner vie perdurable.

O la mercy du creatour,
Qu'il de son ciel superiour 27890
Voloit descendre au basse terre
Pour faire a sa virgine honour,
Et pour moustrer le grant amour
Q'a les vertus nous volt refere,
Et les pechés mortieux desfere
Que deble ainçois nous fesoit fere!
Dilors, q'est cil qui par doulgour
Ne duist a celle vierge plere,
En qui dieus mist tout son affere
Dont il devint no salveour? 27900

O dame, sanz ta soule grace,
Au fin que je cest ovre enbrace,
Je n'ay savoir pour acompter;
Mais, doule: dame, s'il te place,
Bien sai dieus voet q'en toute place
L'en doit tes oeuvres reconter,
Pour ta loenge et pris monter
Et pour le deable desmonter,
Q'est desconfit de ta manace:
Pour ce, ma dame, je t'en quier, 27910
Mettez le sens dedeinz mon cuer,
Dont ta loenge conter sace.

Ore dirra de la Concepcioun et
de la Nativité nostre seignour, et
en partie de les joyes nostre dame.

Avint un jour de la semeine,
Quant ses pensers la vierge meine
A la divine druerie,
Et deinz sa chambre fuist soleine
Sanz chambrellain ou chambreleine,
Survint un angel de Messie
Et la salue come s'amie,
Et si luy dist, 'Ave, Marie, 27920
Del grace dieu trestoute pleine!
La vierge en fuist molt esbahie,

27922 en fuist

Q'elle ert tout soule et desgarnie,
Et la nouvelle estoit soudeine.

Mais l'angel par confortement
Luy dist molt debonnairement,
'Ma dame, ne vous doubtez pas,
Car dieu le piere omnipotent
Voet pour sauver l'umaine gent
Que tu son fils conciveras 27930
Et de ton corps l'enfanteras,
Virgine nepourquant serras.
Et lors tu dis, 'He, dieus, comment
Puet ce venir?' puisque tu n'as,
Ne jammais eustes n'en avras
D'ascun charnel assemblement.

Ma dame, a ce te respondoit
Saint Gabriel, et te disoit
Que l'esprit de dieu tout coy
Ove la vertu de ciel vendroit, 27940
Qui tout cell oeuvre parlerroit,
Comme cil q'est toutpuissant en soy:
'Et ce qui naistera de toy
Serra nommé le fils du Roy,
C'est Jhesu Crist, a qui l'en doit
Trestout honour et bonne foy.'
Et puis t'en donna signe au quy
Lors ta credence ferme soit.

'Que dieus sur tout est sovercin
Et ad tout ce q'il voet au mein, 27950
Il te moustra verray signal
De ta cousine et ton prochein
Elizabeth, q'estoit barein,
Six moys devant d'especial;
Mais dieus, q'est sire et governal
Sur tout le siecle en general,
Luy ad donné son ventre plein
D'un fils qui molt serra loyal:
Ensi deinz ton memorial
Retien que tout serra certain.' 27960

Quant tu, ma dame, as tout oÿ
Que l'angel dist, la dieu mercy
Lors en louas, dont simple et coic
Tu luy donnas response ensi:
'La dieu ancelle vei me cy,
Soit ta parole toute moye.'

27963 en louas

Quant as ce dit, vers toy se ploie
Saint Gabriel et se desploie
Volant a ciel, si q'apres luy
De nulle part ton cuer s'effroie; 27970
Et c'estoit la primere Joye,
Dont tu, ma dame, es rejoÿ.

Solonc la parole angeline
Jhesum conceustez, et virgine
Après mansistez nette et pure.
Mais quant avint que ta cousine,
Qui d'un enfant ot pris saisine,
Dont elle ert grosse a mesme l'ure,
Vous encontra par aventure,
Dedeinz le ventre a sa mesure 27980
L'enfant de luy vers toy s'acline
Pour faire honour a ta porture
Comme sa demeine creature:
Cestoit miracle assetz divine.

Elizabeth fuist celle mere,
Que le baptistre a sa costere
Dedeinz son ventre lors porta,
Qui reconoist la dieu matiere,
Et fist l'onour a sa maniere,
Ainz que sa miere l'enfanta. 27990
La miere quant sentist cela,
A toy, ma dame, s'escria
Par halte vois et lée chiere,
Si t'ad benoit, que tu pieça
Par l'angel qui toy noncia
Donnas credence a dieu le piere.

Elizabeth quant s'aparçoit,
Par grant devocioun disoit:
'Benoite, dame, soies tu
De par dieus, en bonne heure soit, 28000
Car tout que l'angel noncioit
Est en ton corps ore avenu:
L'enfant deinz moy l'ad bien sentu,
Et par ce je l'ay bien conu.'
C'est un miracle asses benoit
Pour demoustrer la dieu vertu,
Sique, ma dame, en chascun lieu
Tes Joyes vienont par exploit.

O quelle aperte demoustrance!
Jehans, ainz q'il avoit naissance, 28010
Son dieu, auci qui n'estoit né,

Honour et fait reconoissance,
Ainz que sa langue de parlançe
Ascunement estoit doé,
Ainçois qu'il pot aler au péé,
Il s'est el ventre travaillé
Pour faire a dieu sa pourvoiance;
Ainçois q'il vist la clareté,
Il perceust la divinité,
Que la virgine ot en balance. 28020

Itiele chose q'ert nouvelle
Tes Joyes, dame, renouvelle;
Mais puis après grant Joye avetz,
Quant tu sentis soubz ta cotelle
Le vif enfant en ta boëlle,
Qui s'esbanoie a tes costées:
Mais quant ce vient en tes pensées,
Que c'est il par qui commencez
Tous sont, le madle et la femelle,
Lors si tu, dame, soies leez 28030
Nuls se doit estre esmerveillez,
Q'es mere dieu et sa pucelle.

Mais a grant peine om conteroit
Coment Joseph s'esmerveillloit,
Quant vist sa femme grosse et pleine,
Q'il de ce fait privé n'estoit;
Dont par dolour il s'aprestoit
Fuïr, mais l'angel luy restreigne,
Si luy conta trestout l'overeigne.
Mais lors Joseph ses joyes meine 28040
Plus que l'en dire ne porroit,
Et toy servir ades se peyne,
Ma dame, en esperance seine
Q'il le fils dieu nestre verroit.

Ne puet faillir que dieus destine,
Dont il avint q'a ce termine
Joseph de Nazareth passa
Jusq'au Bethlem, u q'il chemine,
Et ad Marie en sa covine,
Q'ensemble ovesque luy ala. 28050
C'estoit au temps q'elle aprocha
Son terme, issint q'elle enfanta
L'umaine essance ove la divine:
Entre les bestes le posa
En une crecche u reposa,
N'ert pas sa chambre lors marbrine.

O cil q'ert Rois sur tout Empire,
 Comme il voloit orguil despire,
 Qant il si povrement nasqui !
 N'est pas orguil ce q'il desire, 28060
 Vers l'asne d'une part se vire
 Et vers le boef de l'autre aici,
 N'estoit courtine presde luy.
 O Rois du gloire, ta mercy,
 Qui viens poverte tiele eslire !
 La miere que te porte ensi
 Scieust nepourqant tresbien de fy
 Qe tu sur toute chose es sire.
 Cil q'estoit de nature mestre
 Solonc nature voloit nestre 28070
 Au due temps ; mais autrement,
 Contre l'usance q'est terrestre,
 Le grief dolour q'ont nostre ancestre
 Al heure de l'enfantement, f. 153
 Ma douce dame, ne te prent,
 Ainz comme solaill son ray estent
 Parmy la verre en la fenestre
 Sanz fendure ou molestement,
 Ensi, ma dame, salvement
 Nasquist de toy le Roy celestre. 28080
 Mais certes, dame, de ta Joye
 Que lors avetz, je ne porroie
 La disme part conter al hure ;
 Car doublement ce te rejoye,
 Qant vif en char pres toy costoie
 Qui ciel et terre est au dessure,
 Et d'aultre part q'il sanz lesure
 Nasquit de toy a sa mesure,
 Comme dieu puissant par toute voie,
 Dont ta virginité fuist pure : 28090
 Lors fuist complie l'escripture,
 Que Rois David de toi psalmoie.
 O dame, bien dois estre lée,
 Qant dieus t'estoit abandonné ;
 Qui fuist ton piere ore est ton fils,
 Qui toy fourma tu as fourmé,
 Qui t'engendra as engendré,
 Il toy crea, tu luy norris,
 Qui tout comprint tu as compris,
 Qui tout gouverne est ton soubgis, 28100

28132 ensioient

De qui l'ancelle avetz esté,
 Ore es la dame : a mon avis
 Nuls puet conter le droit devis,
 Dont tu, ma dame, es honoré.
 O dieus, ta file te conçoit,
 Et puis t'espouse t'enfantoit,
 Et ta norrice estoit t'amie,
 Ta soer en berces te gardoit,
 Et une vierge t'allaitoit,
 Maisque ta miere estoit Marie, 28110
 La tue ancelle ot en baillie
 Ton corps, qui molt sovent te lie,
 Ta creature te portoit :
 Ja puis n'ert tiele chose oïe,
 Car en toute la compaignie
 Forsq'une soule femme estoit.
 O dieus, qui feis trestoute beste,
 Et la salvage et la domestie,
 Et fourmas l'omme a ta semblance,
 Et d'aultre part a toy s'apreste 28120
 Trestoute chose q'est celeste,
 Drois est pour ce q'a ta naissance
 Soit fait aucune demoustrance,
 Dont soit oïe la parlance
 En tous païs de la terrestre,
 Pour meulx avoir la conoissance :
 Mais tout cela de ta puissance
 Fuist fait, sicomme nous dist la geste.

Ore dirra de les merveilles qui
 avlendoront, qant nostre seigneur
 fuist née.

As pastours qui la nuyt veilloient
 Et leur berbis en sauf gardoient 28130
 Un angel dieu vint noncier,
 Et si leur dist q'ils lées en soient,
 Car en Bethlem née trouveroient
 Jhesum, qui doit le mond salver ;
 Et puis oront un Miller
 Des angles doucement chanter,
 'Soit gloire a dieu en halt,' disoient,
 'Et peas en terre soit plener
 As gens qui vuillont peas amer.'
 C'estoit le chançon q'ils chantoient.

Au matin l'endemain suiant 28141
 Tout d'un acord passont avant
 Jusq'en Bethlem, u qu'ils troveront
 Marie, Joseph et l'enfant,
 Q'estoit en ses drapeals gisant
 En un rastell, u bestes eront ;
 Dont ils grant joye desmeneront
 Et leur avision conteront
 As tous qui leur furont devant,
 Et puis a l'ostell retourneront. 28150
 Les ascoultantz s'esmerveilleront,
 Et tu, ma dame, as Joye grant.
 Enqore dieus d'aultre manere
 La nuyt qant il nasquit primere
 Sa deité nous demoustreroit ;
 Car d'une estoille belle et clere
 Au tout le mond donna lumere,
 Et fermement l'establissoit
 Sur la maison u q'il estoit.
 De l'orient lors y venoit 28160
 Trois Rois, q'estoient divinere,
 Chascuns offrende ove soi portoit,
 Q'il a ton fils sacrifioit
 Pardevant toy, sa douce mere.
 En genullant luy font offrens,
 Cest orr et mirre et franc encens,
 En demoustrance par figure
 Qu'il estoit Rois sur toutes gens,
 Et verray dieus omnipotens,
 Et mortiel homme en sa nature : 28170
 L'estoille q'apparust dessure
 Nous signefie en sa droiture
 Q'il sire estoit des elementz.
 O tu sa mere et vierge pure,
 Molt t'esjoistes a celle hure
 Des tiels honours, des tieus presentz.

Ore dirra de la Circumcision
 nostre seigneur et la Purificacion
 de nostre dame.

O tu virgine enfanteresse,
 Par autre voie avetz leesce,
 Qant ton enfant fuist circumcis ;
 Par ce nous moustra grande humblesce,

28190 acoustumance

Qu'il volt bien que la loy expresse 28181
 Fuist en son corps tout acomplis ;
 Mais a ce point estoit finis
 La Circumcision jadis,
 Et par toy q'es no salveresse
 Solonc la loy de ton chier fils
 Ly cristiens baptesme ad pris,
 Au quoy se clayme et se professe.
 Au jour quarante de s'enfance
 Du viele loy a coustumance 28190
 Au temple dieu fuist presenté
 Ton fils, pour garder l'observance
 D'umilité et d'obeissance ;
 Pour ce s'estoit humilié :
 Dont Simeon en son degré
 Le receust a grant chiereté,
 Q'il estoit prestre, et la faisance
 Du temple estoit a luy donné ;
 Mais unqes jour ne fuist si lée,
 Qant om luy dist la circumstance. 28200
 De ses deux mains l'enfant manioie
 Dessur fautier et le conjoye,
 Et puis l'enbrace par loisir
 Et fait honour par toute voie,
 Disant : 'O dieus, puisque je voie
 Ton corps, ore ay tout mon desir ;
 Dont s'il te vendroit au plesir,
 Laissez moy ore en pes morir,
 Qe je n'ay plus que faire doie,
 Car tu es cil qui doit venir.' 28210
 Ma dame, en tiele chose oïr
 Te croist toutdis nouvelle Joye.
 Cil Simeon maint ain devant
 Ot bien oï q'un tiel enfant,
 Q'ert fils au Roy superiour,
 Serroit par grace survenant
 En une vierge, u q'il naiscant
 Sa char prendroit pour nostre amour ;
 Dont lors pria son creatour
 Q'il porroit vivre a celle jour, 28220
 Pour vir le fils au toutpuissant :
 Mais lors, qant il en ot l'onour
 Et tint en bras son salveour,
 Tout le souffist le remenant.

28222 enot

Ton fils, ma dame, soulement
 Ne volt pas estre obedient
 Au loy tenir endroit de soy,
 Ainçois voloit, ensemblement
 Que tu, ma dame, tielement
 Dois loy tenir endroit de toy : 28230
 Pour ce solonc la viele loy,
 Ma dame, au temple trestout coy
 Te viens purer, et nequedent
 Qant a nature il n'ert du quoy ;
 Car sanz corrupcion, je croy,
 Ton fils portas tout purement.
 Qant dieus nasquist, a celle fois
 Roy fuist Herode, a qui les trois,
 Des queux vous ay le conte fait,
 En leur venir furent ainçois, 28240
 La qu'il estoit en son palois ;
 Et luy conteront tout le fait,
 Come par l'estoille chascun vait
 Sercher l'enfant qui fuist estrait
 De dieu le pierre et serroit Rois
 Sur tout le mond : mais par agait
 Herodes qu'il serroit desfait
 Pensa, comme cil q'estoit malvois.
 Herodes, qui fuist plein d'envie,
 A tous les trois requiert et prie 28250
 Q'ils voient cell enfant sercher,
 Et que chascun reviene et die
 Ce q'il ad fait de sa partie ;
 Car il avoit deinz son penser
 Q'il le ferroit tantost tuer.
 Mais dieus, a qui riens puet grever,
 Qant ils leur cause ont acomplie,
 Par songe les fist retourner
 Une autre voie sanz parler
 Au fel tirant, qui dieus maldie. 28260

Ore dirra comment Rois [f. 154

Herodes fist occire les enfantz
 en Bethlem, et comment nostre
 dame et Joseph s'en fuirent
 ovesques l'enfant en Egipte.

Herodes, qant s'est aparçuz
 Comment il ad esté deçuz,

28274 enot

Q'a luy des trois nul retourna,
 Fist a ses privez et ses drus
 Leur lances prendre et leur escutz,
 Et si leur dist et commanda,
 Tous les enfantz q'om tuera
 En Bethlem et environ la :
 Q'il par ce quide estre au dessus
 De luy q'au fin luy venquera ; 28270
 Car celluy qui dieus aidera
 Des tous perils ert defenduz.

Car dieus, qui tint son fils chery,
 Par songe en ot Joseph garny,
 Et si luy dist, 'Pernetz l'enfant,
 Mais que sa mere voise ove luy :
 Aletz vous ent, fuietz de cy
 Jusq'en Egipte tout avant,
 U vuill que soies demourant.
 Et ils s'en vont du meintenant 28280
 Vers la, ou q'ils se sont guari ;
 Mais fals Herode le tirant
 Tua d'enfantz le remenant
 Sanz avoir pité ne mercy.

Drois est que l'en doit acompter
 Pour les miracles reconter
 Que lors en Egipte aveneront,
 Qant tu ma dame y vins primer
 Ove ton enfant pour habiter :
 Car les ydoles tresbucheront 28290
 En tous les temples u q'ils eront,
 Et lieu a ton chier fils doneront,
 Q'a sa puissance resister
 Ne poent, ainz par tout trembleront :
 Les mescreantz s'esmerveilleront,
 Dont tu, ma dame, as Joye au cuer.

Une arbre halte, belle et pleine
 Auci, ma dame, en une pleine
 En celle Egipte lors estoit,
 Dont fuist la fame molt longteine, 28300
 Q'au toute gent malade et seine,
 Qui les racines enbevoit
 Ou autrement le fruit mangoit,
 Santé du corps asses donnoit :
 Dont il avint une semeine
 Que ton chier fils par la passoit,

Et l'arbre au terre s'obeissoit
 Pour l'onorer en son demeine.
 O tu virgine et la dieu miere,
 Que ce t'estoit merveille fiere, 28310
 Qant si foreine creature
 Conoist son dieu en la maniere ;
 Dont ta loenge plus appiere
 Par ton chier fils, q'est dieu dessure :
 Car lors scies tu, de sa droiture
 Q'il estoit sire de nature
 Et puet tourner l'avant derere,
 C'est une chose que t'assure ;
 Sique, ma dame, en chascune hure
 Te vient du Joye la matiere. 28320

Dieus au sovent la malfaisance
 Du male gent par sa souffrance
 Laist pour un temps, mais au darrein
 De sa justice il prent vengeance :
 Pour ce vous di que celle enfance,
 Que cil tirant moertrer vilein
 Faisoit tuer, vient ore au mein :
 Cil q'ad pover du tout humein
 Le fist morir sanz pourvoiance
 Par dolour qui luy fuist soudein, 28330
 Dont cil te manda le certain
 Qui t'ad, ma dame, en remembrance.

Des toutes partz te vient confort,
 Car qui sur tous est le plus fort,
 C'est ton chier fils, t'ad envoiez
 Ses angles, qui te font desport,
 Disantz que tu du lée port
 En Israel retourneretz.
 Je ne say dire les journés,
 Mais qant tu viens a tes privez, 28340
 Qui sont ove toy du bon acort,
 Molt estoit dieus regraciez,
 Qui toy, ma dame, ad remenez,
 Et ton fils ad guari du mort.

Ensi, ma dame, d'umble atour
 En Nazareth fais ton retour,
 Ove tes parens pour sojourner ;
 Et puis avint que par un jour
 Parentre toy, ma dame, et lour
 Au temple dieu t'en vas orer, 28350

Si fais ton fils ove toy mener ;
 Mais qant ce vint au retourner,
 Tes joyes changont en dolour,
 Car tu ne puiss ton fils trover,
 Combien que tu luy fais sercher
 En la Cité par tout entour.
 O dame, je ne doute pas
 Que tu fecis maint petit pass,
 Ainz que poes ton fils avoir,
 Dont tu Joseph auci prias, 28360
 Combien q'il fuist et viels et lass,
 Q'il duist auci son pée movoir,
 S'il te porroit aparcevoir :
 Deux jours serchastes en espoir,
 Que tu, ma dame, riens trovas,
 Mais l'endemain tu puiss veoir
 Q'il ad conclus de son savoir
 Les phariseus et les prelats.

Au tierce jour luy vas trovant
 Dedeinz le temple desputant 28370
 As mestres de la viele loy,
 Qui prou ne scievont a l'enfant
 Respondre, ainz ont merveille grant
 De sa doctrine et de sa foy.
 Tu luy crias : 'Beal fils, pour quoy
 Ne scies tu que ton pierre et moy
 Taloms en grant dolour querant ?'
 Il lieve et puis excuse soy,
 Si vait tout simplement ove toy,
 Du quoy ton cuer fuist molt joyant. 28380

Ton fils te suyt molt humblement
 Et tu t'en tournes bellement
 A Nazareth ton parenté,
 Q'ainçois estoient molt dolent,
 Mais ore ont joye a leur talent,
 Que tu ton fils as retrové.
 Bien tost apres en Galilée
 Ot une feste celebré
 Des noeces, u courtoisement,
 Ma dame, l'en t'avoit prié 28390
 Que ton chier fils y soit mené
 Ove toy, ma dame, ensemblement.
 Le feste ert riche et bien servi,
 Mais que bon vin leur est failly

28334 plusfort

En la maison Archideclin ;
 Dont ton chier fils, qant il l'ot,
 Les potz q'estoient d'eaue empl
 Fist changer leur nature en vin
 Molt bell et bon et fresch et fin,
 Dont tous bevoient en la fin 28400
 Et le rendiront *grant* mercy :
 La moustra *Jhesus* son divin,
 Dont le forein et le voisin
 De l'escouter sont esbahi.
 O dame, qui scieust bien conter
 Tous les miracles au plener
 De ton fils en s'enfantel age,
 Sanz nombre en porroit om trover,
 Qe molt fesoient a loer :
 Des tous ne suy je mye sage, 28410
 Mais q'il ert humble de corage,
 Des tous paiis savoit langage
 Pour *bonnes* gens acompaigner ;
 Mais sur trestous a vo lignage
 Chascun endroit de son estage
 Faisoit *grant* joye demener.

Ore dirra comment nostre sire
 fuist baptizé.

Dieus, qui volt changer en sa guise
 La Sinagoge pour l'Eglise,
 Faisoit la transmutacioun
 Q'estoit du viele loy assisse, 28420
 Sique baptesme serroit prise
 En lieu de Circumcisioun ;
 Par quoy de sa *provisioun*
 Ot un servant, Jehans *par* noun,
 Qui molt estoit de sainte aprise,
 Faisant sa *predicacioun*
 Au pueple pour salvacioun
 Du loy nouvelle et les baptize.
 Oultre le flos Jordan estoit 28430
 Jehan baptist, qui baptisoit
 Prechant au pueple la salu
 Du loy nouvelle, et leur disoit
 Qe cil qui noz pechés toldroit
 Du ciel en terre ert descendu
 Et s'est de *nostre* char vestu ;

28408 enporroit

Et qu'il au pueple soit conu,
 Jehans du doy le demoustroit
 Disant, 'Vey cy l'aiguel de dieu !
 Vei cy qui tout le mond perdu
 De sa mercy reformer doit !' 28440
 Jehan en le desert se tint
 Par *grant* penance, u q'il s'abstint,
 Q'il pain ne vin ne char goustá ;
 Delice nulle a soy retint,
 Du mell salvage ainz se sustint,
 De l'eaue but, que plus n'y a, f. 155
 Toute vesture refusa

Forsque des peals q'om escorcha
 De ces Chameals, car bien sovint
 Q'orguil du ciel l'angel rua, 28450
 Et gule en paradis tua
 Adam, dont nous morir covint.

De son *precher*, de sa penance
 Toutplein des gens a repentance
 Solonc la loy nouvelle attrait,
 Q'a luy vindrent *par* obeissance,
 Et du baptesme l'observance
 Resçoivent, sique son bienfait
 Au loy nouvelle *grant* bien fait.
 Par tous paiis la fame en vait, 28460
 Dont Crist, q'en fist la *pourvoiance*,
 Qui volt refaire no forsfait,
 Vint a Jehan et quiert q'il ait
 Baptesme, dont sa loy avance.

Jehans respont : 'Laissez estier ;
 Baptesme tu me dois donner,
 Qui viens de moy baptesme quere.'
 'Souffretz,' fait Crist, 'de ton parler,
 Car ce *partient* a mon mestier :
 Solonc la loy *par* tout bien fere 28470
 Je viens pour estre debonvere,
 Et pour cela t'estuet *parfere*
 La chose dont je te requier.'

Ensi disant se fait attrere
 En l'eaue, u que de son affere
 Jehans le faisoit baptiser.

La vois de ciel lors descendist,
 Et comme tonaire il *parle* et dist :
 'Vei cy mon tresdous amé fils,

28460 envait

28461 qen fist

U toute ma plaisance gist.' 28480
 Ove ce le ciel d'amont ovríst,
 Et vint y ly saintz esperitz,
 Qui la semblance au droit devis
 D'un blanc collomb lors avoit pris,
 Et pardessus sa teste assist.
 De celle veue estoit suspris
 Jehans, qui puis apres toutdis
 Du *grant* miracle s'esjoyt.

Jehan, q'estoit le dieu amy,
 Long temps devant en fuist garni 28490
 Par l'angel, qui luy fist savoir
 Disant, 'Quant tu verras celluy
 Venir, dessus la teste a qui
 Le blanc colomb vendra seoir,
 C'est le fils dieu, sachez pour voir.'
 De tant fuist il en bon espoir ;
 Mais puis quant dieus le fist ensi
 Siq'il le puet des oills veoir,
 De lors fist il tout son devoir,
 Du quoy la foy soit plus cheri. 28500

Qui toute chose sciet et voit
 Du providence se pourvoit,
 Q'il *par* ses oeuvres volt moustrer
 Q'il fils de dieu le pierre estoit ;
 Dont deux miracles il faisoit,
 Qui molt firon a *merveiller*,
 Les queux bon est a reciter
 Pour sa puissance remembrer
 Et pour despire en leur endroit
 Les mescreantz, qui baptizer 28510
 Ne se voldront, dont excuser
 Ne se porront *par* aucun droit.

Ore dirra en partie des miracles
 que *nostre* seignour faisoit avant
 sa mort.

Un temps avint q'en Bethanie
 Lazar, de Marthe et de Marie
 Qui frere estoit solonc nature,
 S'estoit passé de ceste vie ;
 Dont il avoit la char purrie,
 Car quatre jours en sepulture
 Avoit esté devant celle hure

28490 en fuist

Que *nostre* sire en aventure 28520
 Y vint ; sique de nulle aye
 L'en esperoit : mais qui sa cure
 Puet faire en toute creature
 De son poair la mort desfie.

Quant *nostre* sire y doit venir
 Au monument, gette un suspir,
 Et de ses oills il lermoia
 Et de son corps se laist fremir,
 Si dist, 'Lazar, vien toy issir.'
 Dont l'espirit se retourna 28530
 En luy, qui mort estoit pieça,
 Ses mains et pees om deslia,
 Et il sanz plus du detenir
 Se lieve et son dieu mercia.
 Le pueple trop s'esmerveilla
 Par tout u l'en le puet oír.

Une autre fois bien apparust
 Qe son chier fils dieus reconust,
 Quant cink mill hommes il ameine
 Tanq'en desert, u point n'y ust 28540
 Ascune riens que l'en mangust,
 Et la famine leur constreine ;
 Mais un y ot q'a molt *grant* peine
 Avoit cink pains en son demeine
 Et deux piscons, sicomme dieu
 plust.

La gent s'assist en une pleine,
 Et dieus les faisoit toute pleine
 Par son dous fils, qui lors y fust.

Cil q'est du fuisoun capitein
 Les cink pains de sa sainte mein 28550
 Et les piscons tant fuisonoit
 Que du relef et au darrein
 Des cophins douze trestout plein,
 Et chascun homme asses mangoit :
 Par quoy l'en sciet tresbien et voit,
 N'est uns qui faire ce porroit
 D'ascun poair qui soit humein ;
 Siqu'ils dient et au bon droit,
 Que *Jhesu* Crist en son endroit
 Estoit le fils du sovercin. 28560

Et d'autre *part* communement
 Par tout u q'il estoit present

Il guarist toutes maladies,
 C'estoit de la leprouse gent,
 C'estoit des voegles ensement,
 C'estoit de les forseneries,
 Les gouttes, les ydropesies,
 Les fievres et les parlesies,
 De sa parole soulement
 Faisoit *que* tout furent garies : 28570
 Nuls en pot faire les maistries,
 S'il ne fuist dieus omnipotent.
 O tu virgine, la dieu mere,
 Tu es des autres la primere,
 Qui du verraie experience
 De dieu sentistes la matiere ;
 Quant il entra deinz ta costiere,
 Et puis nasquit sanz violence,
 Et molt sovent en ta presence
 Puis te moustra *bonne* evidence 28580
 Q'il estoit fils de dieu le pierre,
 Et molt sovent *par* audience,
 Dont chascun jour te recomence
 La joye dont tu es pleniere.
 O dame, *pour* tes grandes Joyes,
 Que lors des tantes partz avoies
 Molt *plus que* je conter ne say,
 Je te pry, dame, toutes voies
 Par ta pité que tu me voies ;
 Car s'ensi fais, je guariray 28590
 Des griefs pechés dont languai ay,
 Et vers ton fils m'acorderay,
 O dame, a qui si tu m'envoies
 A sa mercy resceu serray,
 Du quelle faillir ne porray,
 Si tu sa mere me convoies.
 De la *proverbe* me sovient,
 Q'om dist *que* molt sovent avient
 Apres grant joye grant dolour,
 Ainz que l'en sache ou quide nient :
 Pour ce le di q'a toy survient 28601
 Devant le Pasques *par* un jour
 Soudainement le *grant* dolour
 De ton fils, dame, et ton seigneur,
 Dont *pour* conter ce *que* te vient
 Trestout mon cuer deschiet en *plour* :

28571 enpot

Et nepourqant le creatour
 Scieust q'ensi faire le covient.

Ore dirra de la passion de
 nostre seigneur Jhesu Crist.

O Jhesu, je te cry mercy,
 Si te rens *grace* et *grant* mercy. 28610
 Qe tu deignas *pour* nous souffrir ;
 Dont s'il te plaist, beal sire, ensi,
 En ton honour je pense yci
 Conter, *que* l'en le doit oïr,
 La *passion* dont vols morir
Pour nous du male mort guarir :
 Sur quoy, Jhesu, je t'en suppli
 Si *que* j'en puisse ove toy partir,
 Dont m'alme soit au departir
 Sanz paine et sanz dolour auci. 28620
 Les mestres de la viele loy,
 Qui ne scievent respondre a toy,
 Conceivont de leur *propre* envie
 Sanz cause la malice en soy,
 Au fin q'ils ta nouvelle foy
 Puissent quasser en ceste vie,
 Mais ils en ont leur art faillie :
 Et nepourqant *que* l'en t'occie
 Font compasser qant et *pour* quoy ;
 Si font de Judas leur espie, 28630
 Qui leur promet tout son ate,
 Maisq'ils gardent consail en coy.
 Trente deniers il prent de lour,
 Dont il son mestre et creatour f.156
 Vendist *comme* traître desloyal :
 Tout s'acordont du lieu et jour,
 Sur quoy Judas *pour* son seigneur
 Conoistre leur donna signal,
 Si dist q' 'Ove vous a ce journal
 Irray, et qui d'especial 28640
 Lors baisera *comme* *paramour*,
 Celluy tenetz pour principal ;
 C'est cil qui vous en communal
 Querretz pour faire le dolour.'
 Jhesus, qui tout savoit devant,
 De ses disciples au devant
 Mande au Cité pour ordiner

28627 enont

L'ostell u qu'il serroit mangant
 Sa cene, et puis *lour* vait suiant :
 Et qant y vient, lors au primer 28650
 Il mesmes volt *lour* piés laver
 Humilité pour essampler,
 Et puis ove tout le remenant
 S'assist au Cene *pour* manger.
 Qant ce fuist fait, apres souper
 Il s'en vait oultre maintenant.
 Lors prist Jhesus *ovesque* luy
 Piere et Jehan et Jaque auci
 Et laist les autres a derere
 Au ville de Gethsemany ; 28660
 Et si leur dist, 'Attendez y,
 Qe je vois faire ma priere.'
 Et lors passe oultre *ove* *mourne*
 chere
 Si loigns *comme* l'en gette une pere,
 Et as genoils s'est obey,
 Ses mains levez vers dieu son piere ;
 Si luy prioit en la maniere
Comme vous m'orretz conter yci.
 Par ce q'il ot le corps humein
 Et vist sa mort devant la mein, 28670
 Tant durement il s'effroia,
 Du quoy *parmy* le tendre grein
 Du char les gouttes trestout plein
 Du sanc et eaue alors sua ;
 Si dist : 'O piere, entendes ça,
 Fai que la mort me passera,
 Car tu sur tout es *soverein* ;
 Et nepourqant je vul cela
 Que vous vailletz *que* fait serra,
 Car je me tiens a toy certain.' 28680
 Qant ot ce dit, il retournoit
 A ses disciples et trovoit
 Q'ils s'estoient tous endormis,
 Et *par* deux fois les esveilleoit,
 Et vait arere et dieu prioit
 Semblablement *comme* je vous dis.
 Au tierce fois leur dist : 'Amys,
 Dormetz, car je me voi soubmis.
 Vei la qui vient a grant exploit,
 Cil fals Judas, qui m'ad trahis : 28690

28659 aderere

28692 endoit

28727 senvait

Dormetz en peas, car je suy pris,
 N'est qui rescousse faire en doit.'
 Au paine ot il son dit conté,
 Qe cil Judas le maluré
 En route de la male gent
 Y vint trestout devant au pié,
 Si ad son mestre salué,
 Et ove ce tricherousement
 Luy baise ; et lors *communement*
 Sur luy chascuns la main y tent, 28700
 De toutes partz estoit hué,
 Si l'un luy boute, l'autre *prent* ;
 Ensi fuist pris soudainement
 Au venderdy la matinée.
 Au prime tost apres suiant
 Devant Pilat le mescreant
 Ils ont Jhesum ove soy menez,
 Des fals tesmoignes accusant :
 Le corps tout nu luy vont liant
 A un piler, ses oels bendez, 28710
 Et lors luy donnent les collées
 Disant, 'O Crist, prophetisés
 Qui t'ad feru,' et plus avant
 Luy ont d'escourges flaiellez,
 Siq'en son corps n'y ot laissez
 Un point *que* tout ne fuist sanglant.
 Al heure tierce en jugement
 S'assist Pilat, et fausement
 Au mort dampna le corps Jhesu
 Par clamour de la male gent, 28720
 Qui lors pristront un vestement
 Du pourpre et si l'ont revestu,
 Et de l'espine trop agu
 Luy font *coronne*, et le pié nu
 Sa croix luy baillont *proprement*
 A porter, et ensi vencu
 La croix portant s'en vait au lieu
 U qu'il morra vilainement.
 Al heure siste sur le mont
 De Calvarie tout amont 28730
 Firont Jhesum crucifier ;
 Des grosses cloues trois y sont,
 Des deux les mains *traversé* ont,
 Du tierce font les piés ficher ;

Si font la croix ensus lever,
Et deux laroums en reprover
D'encoste luy pendant y vont ;
Eysil et fiel puis font meller,
La soif Jhesu pour estancher ;
Des toutes partz dolour luy font. 28740

Et puis, quant nonne vint a point,
Jhesus, q'estoit en fieble point
Selonc le corps, a dieu pria,
Au fin q'il ne se venge point
De ceaux qui l'ont batu et point ;
Et lors a halte voix cria,
' Hely ! ' et soy recommanda
Au dieu son pere, et en cela
De ceste vie il se desjoynit :
Mais lors tieus signes desmoustra, 28750
Que nuls par droit se doubtera
Q'il n'est ove dieu le pere joynt.

L'eclips encontre sa nature
La cliere jour faisoit oscure ;
La terre de sa part trembloit,
Les grosses pierres par fendure
Sont routes, et la sepulture
De la gent morte overte estoit,
Dont il plusours resuscitoit ;
Le voill du temple, u q'il pendoit, 28760
Se fent en deux a mesme l'ure :
Centurio, qui tout ce voit,
Dist q'il le fils de dieu estoit,
Seigneur du toute creature.

Un chivaler y ot Longis,
Qui du voeglesce estoit soubgis,
A luy bailleront une lance,
Qui de Jhesu le cuer au pitz
Trespere, et lors fuist tout complis
Du passioin la circumstance : 28770
Dont bon Joseph par la suffrance
Du Pilat en droite ordinance
Le corps d'en halt la croix ad pris,
Si l'ad enoigt du viele usance,
Et puis luy ad de pourvoiance
En un sepulcre ensevelis.

Mais lors se lieve par envie
Des males gens la compaignie,

28770 denhalt

Et au Pilat s'en vont pour dire
Comment Jhesus s'avanterie 28780
Faisoit, quant il estoit en vie,
Q'il ot poair a desconfire
La mort, et c'estoit a despire :
' Pour ce nous te prions, beal sire,
Nous vullez donner la baillie
Du corps garder ' : et sanz desdire
Trestout ce que la gent desire
Leur grante, que dieus le maldie.

Et lors quant ils en ont pooir
Del corps garder, pour estovoir 28790
Des chivalers quatre y mettoient,
Qui par trois jours sanz soy movoir
Le garderont matin et soir,
Que ses disciples, s'ils vendroient,
Par nuyt embler ne luy porroient,
As chivalers grant sold donoient,
Siqu'ils bien facent leur devoir,
Et cils tresbien le promettoient ;
Mais contre dieu quant ils guerrioient,
En vein ont mis leur fol espoir. 28800

**Ore dirra de la Resurreccioun
nostre seigneur, et la cause pour
quoy il voloit mesmes devenir
homme et souffrir la mort pour
le peccé de Adam.**

Ore ay du passioin escrit,
Come l'evangile nous descrit ;
Mais de sa Resurreccioun
Savoir porretz. Cil qui nasquit
Par grace du saint esprit
Sanz paine et sanz corrupcioun
De la virgine, et Lazaroun
Resuscita, n'ert pas resoun
Q'il ait son corps du mort soubgit : 28810
Pour ce celle Incarnacioun
Mist a Resuscitacioun
La tierce jour, dont il revit.

Mais cil, qui ne se volt celer,
Quant il s'ad fait resusciter,
Apparust a la Magdaleine,
Puis a Simon volt apparer,

28779 senvont

28789 enont

A Cleophas aici moustrer
Se fist, comme l'escripture enseigne ;
Et que la foy nous soit certeine,
Puis apparust a la douzeine, 28820
Et a Thomas faisoit taster f. 157
Le corps q'il ot du char humeine :
Cil qui ne croit a tiele enseigne
Ne say dont se puet excuser.

O Jhesu Crist, endroit de moy
Que tu es le fils dieu je croy,
Qui de la vierge as pris naissance,
Et du baptesme aici la foy
Confesse en ta nouvelle loy ;
Et outre ce j'ay ma creance 28830
Que tu ta mort et ta penance
Souffris pour no deliverance
Du deable, qui nous eust a soy
Soubgit ; et puis je n'ay doubance
Q'au tierce jour de ta puissance
Resuscitas le corps de toy.

Mais tu, q'es Rois du tout celestre
Et d'infernal et du terrestre,
A grant merveille je me pense
Coment, beal sire, se puet estre 28840
Que tu deignas en terre nestre
Et donner mesmes ta presence,
Q'es plain du toute sapience,
Par qui tout bien fine et commence ;
Et puisque tu es si grant mestre,
Q'est ce que de ta providence
N'eussetz destourné la sentence
Du lance que te fiert au destre ?

Deux causes, sire, en ce je voi,
Q'a mon avis sont plain du foi, 28850
L'un est justice et l'autre amour.
Justice voelt que chascun Roy
Droiture face et tiene loy ;
Pour ce covint que cell erreur
Qui vint d'Adam nostre ancessour
Soit redrescé d'ascun bon tour :
Mais quant a ce Adam de soy
N'ot le poair, q'ainçois maint jour
Le deable come son pecheour
Le prist et tint a son desroy. 28860
Pris fuist Adam ove sa covine

Par jugement du loy divine,
Dont faire estuet redempcioun ;
Car dieus ne voit pas par ravine
Tollir du deable la saisine,
Ainçois fist paier la rançon.
Par qui fuist ce ? Par l'angel noun ;
Car ce n'eust pas esté resoun,
Depuis'Adam fist la ruine :
Dont dieus de sa provision 28870
Fist faire sans corrupcioun
Un autre Adam de la virgine.
Icest Adam en s'engendrure
Sanz culpe estoit du forsfaiture
Que le primer Adam faisoit ;
Pour ce pot il de sa droiture
La rançon faire a sa mesure,
Ou autrement de son endroit
Combatre au deable pour son droit :
Mais l'un et l'autre il enpernoit, 28880
Le corps qu'il ot de no nature
Au croix pour no rançon paioit,
Comme cil qui nostre frere estoit
Et née de la virgine pure ;

Et pour parler de sa bataille,
Son esprit faisoit merveille,
Car il enfern ot assiegez,
Dont par vertu les murs assaille,
Sa croix ou main, dont fiert et maille,
Tanqu'il les portes ad brisez, 28890
Et s'est dedeinz au force entrez ;
Dont il Adam ad aquitez,
Si tient le mestre deable en baillie
Des ferrs estroitement liez ;
Et puis au corps s'est retournez
Malgré le deble et sa merdaille.

Quant dieus q'estoit victorials
Ot despuillé les enferrals,
Jusq'au sepulcre retournoit,
Comme cil q'estoit celestials ; 28900
Le corps q'ainçois estoit mortals
Au tierce jour resuscitoit.
Miracle de si halt endroit
Unques nul homme ne faisoit,
Car c'estoit tout luy principals
Qui nostre foy plus affermoit :

Y

Dont soit le noun de luy benoit,
Q'ensi rechata ses vassals.

Puisqu'il ad dit de la Passioun
nostre seignour Jhesu Crist, dirra
ore de la Compassioun nostre
dame.

O vierge et mere dieu Marie,
Bien sai que tu n'es departie, 28910
Qant ton chier fils sa passioun
Souffrist, ainçois en compaignie
Y es; si que de ta partie
T'estuet avoir compassioun:
Dont en ma contemplacioun,
Ma dame, sanz elacioun,
Que ta loenge en soit ote,
J'en frai la declaracioun,
Si que ta meditacioun

Me puist aider en ceste vie. 28920

Mais certes je ne puiss suffire
De cuer penser, de bouche dire:
Le cuer me falt tout en pensant,
Pour raconter ne pour descrire
La grant dolour, le grant martire
Que lors avetz pour ton enfant;
Car unques femme n'ama tant,
Ne unques femme un autre amant
Avoit de si treshalt empire;
Plus ert pour ce le doel pesant 28930
De toi, ma dame, al heure qant
Om luy voloit a tort occire.

Matin qant ton enfant fuist pris
Et ses disciples sont fulz,
Tu, dame, lors y aprochas;
En suspirant ove plours et cris
Tu viens devant tes enemys
En la presence de Pilas:
Mais lors y ot nuls advocatz,
Ma dame, pour pleder ton cas 28940
A l'avantage de ton fils,
Dont par dolour sovent palmas;
Mais autre mercy n'y trovas
Forsq'ils vous ont, dame, escharniz.

28917 ensoit
28941 f. in ras.

28923 enpensant
28955 enes

28936 Ensuspirant
28960 enpert

O dame, ce n'estoit merveille,
Qant tu ne troves que te vaille
Pour ton fils aider en destresce,
Si lors ta paine s'apparaille;
Car la puante gent merdaille 28950
Pour reviler ta gentillesce
Mainte parole felonnesse
Plain de dolour et de tristesse
Te distront en leur ribaldaille;
Des males gens auci la presse
Tant fuist, que tu en es oppresse:
Vei la dolente commençaille!

He, dame, enquire autre dolour
Te croist, que ly fals tourmentour
Ton fils escourgent au piler,
Siq'il en pert sanc et suour, 28960
Dont fuist sanglant par tout entour,
Et tu, ma dame, n'as poer
Ascunement de luy aider:
Nuls ne s'en doit esmerveiller
Si lors te change la colour,
Car chascun cop de l'escourger
Te fiert, ma dame, en ton penser
Solonc l'estat du fin amour.

Tristesse enquire et marrement
Te vienont trop espesement, 28970
Ma dame, qant tu poes otr
Pilat donner le juggement,
Et puis, ma dame, toy present
Laiissa le pueple covenir;
Lors vient en toy le sovenir,
Q'asses de doel te fait venir,
Pensant de son avienement,
Et q'il nasquit sanz fol desir;
Pour ce ne duist il pas souffrir
A ton avis si grant tourment. 28980

He, dame, enquire croist ta peine,
Qant vois venir en la champeine
Des gens sanz nombre et estraier
Des citezeins et gent foreine:
Chascuns endroit de soy se peine
Comme puet venir et aprocher,
Ton fils et toy pour esgarder,

La qu'il venoit sa croix porter
Jusques au mont par tiele enseigne
Que l'en luy deust crucifier: 28990
En tiele chose consirer,
Ma dame, lors te falt aleine.

Bien tost apres lors voies tu
Les tourmentours, q'ont estendu
Ton fils pour attacher au crois:
Lors escrias, 'O fils Jhesu,
Je te suppli de ta vertu,
Laiissetz morir ta mere ainçois.'
Ensi disant deux fois ou trois
Palmas, et a chascune fois, 29000
Qant le poair t'ert revenu,
Tu dis, 'Helas!' a basse vois,
'Helas, Pilat! helas, malvois!
Helas! mon joye ay tout perdu.'

He, dame, pour mirer au droit
La fourme comme l'en estendoit,
Ton fils qant fuist crucifié,
Dont veine et nerf, u que ce soit,
Trestout au force debrisoit,
Tant sont tirez en long et lée, f. 158
Et tous les joyntz par leur degré 29011
Alors s'estoient desjoigné,
O qui ta paine conteroit
Que lors te vient en la pensée?
Le corps q'il ot ensi pené
Ton cuer pena de tiel endroit.

Mais sur trestout te multepie
Le doel, qant ton chier fils se plie
Dessus la croix et haltement
Cria et laiissa ceste vie. 29020

La vois que tu, ma dame, ote
Avetz t'estonne fierement,
Dont tu pasmas asses sovent:
Son cuer fendu ton cuer poursent,
La mort de luy toy mortefie;
Son corps morust, ton corps s'extent
Comme mort gisant piteusement,
Car toute joye t'est faillie.

Du mort qui t'ad fait departir
De ton amy tu voes partir, 29030
Q'a vivre plus tu n'as plesance;
Par quoy la Mort te vient saisir,

Mais Vie ne le voet souffrir,
Ensi commence la destance;
Mort vient et clame l'aqueintance,
Et Vie a soy trait la balance,
Que l'un prent l'autre va tollir:
Ensi toy falt la sufficance,
Que pour le temps tu n'as puissance
De vivre tout ne tout morir. 29040
He, dame, bien prophetiza
Saint Simeon, qui toy conta
Comment l'espeie a sa mesure
Ta dolente alme passera.
O dame, ce signefia
Compassioun de ta nature,
Que lors t'avient a mesme l'ure
Qant ton enfant la mort endure:
L'espeie lors te tresperra,
Par quoy la mort te corust sure, 29050
Mais dieus, q'avoit ta vie en curc,
De sa puissance l'aresta.

He, qui dirroit ta paine fiere,
Qant il tourna vers toy sa chiere,
Et a Jehan tout ensemment,
Et si vous dist en la maniere,
'Vei ci ton fils, vei ci ta mere!'
O comme l'eschange fuist dolent,
Qant pour ton fils omnipotent
Il te fait prendre ton client! 29060
Si prens en lieu de ta lumere
La lanterne en eschangement;
Du quoy je n'ay mervaillement
Si celle espeie lors te fiere.

Si toute paine et le martire
Que le martir et la martire
Souffriront unques a nul jour
Fuiissent en un, ne puet souffire
Pour comparer ne pour descrire,
Dame, au regard te ta dolour. 29070
Car celle paine q'ert de lour
C'estoit la paine exteriour,
Que soulement le corps empire,
Mais ta paine ert interieur,
Dont t'alme sente la tristour
Plus que nul homme porroit dire.
Ce partient, dame, a ton devoir

Pour dolour et tristesse avoir
 Plus *que* nulle autre en terre née;
 Car tu scies, dame, bien du voir 29080
 Ce que nul autre puet savoir,
 Endroit de sa divinité
 Q'il est fils de la trinité,
 Et qu'il de toy s'est encharné.
 Pour ce, qant tu luy poes veoir
 Morir solonc l'umanité,
 Le doel que lors tu as mené
 N'est cuer qui le puet concevoir.
Quique remaint, *quique* s'en vait,
 Presde la croix sanz nul retrait, 29090
 Ma dame, tu te tiens ensi
 En compleignant le *grant* mesfait
 Des males gens, qui tout sustrait
 Le fils dieu, qui de toy nasqui:
 Mais cil qui lors eust tout of
 Le dolour et la pleignte aici,
 Que lors *par* toy sont dit et fait,
 Il porroit dire bien de fy
 Que ja de nulle ou de nully
 Ne receust cuer si *grant* deshait. 29100
 Un temps gisoies en pasmant,
 Un autre temps en lermoiant,
 Ore en suspir, ore en compleignte;
 Et molt sovent vas embraçant
 La croix, u tu ton fils pendant
 Reguars, du sanc dont goutte meinte
 T'ad du vermail, ma dame, teinte
 Des plaies que *par* grief destreinte
 Vienont d'en halt la croix corant:
 O tu virgine et mere seinte, 29110
 Le dolour de la *femme* enceinte
 A ta dolour n'est ressemblant.
 Mais puis, qant Joseph dependoit
 Ton fils de la u qu'il pendoit,
 Pitousement tes oels levoies;
 Et qant son corps au terre estoit,
 Ton corps d'amour s'esvertuoit
 Pour l'enbracer, u tu le voies,
 Et embraçant tu luy baisoies,
 Et en baisant sur luy pasmoies, 29120
 Sovent as chald, sovent as froit;

29079 Plus*que* 29092 Encompleignant

Sovent ton douls fils reclamoies,
 Des lermes tu son corps muilloies,
 Et il ton corps du sanc muilloit.
 Tant come tu as son corps *pre-*
sent,
 Enqore ascun confortement
 En as; mais deinz brieve heure
apres,
 Qant Joseph en son monument
 Le mist, lors desconfortement
 Te vient, ma dame, asses de *pres*: 29130
 Dont tu Joseph prias ades
 Q'il *pour* ton cuer remettre en pes
 Toi ove ton fils ensemblement
 Volt sevelir, *sique* *jammes*
 En ceste vie u que tu es
 Ne soietz mais entre la gent.
 Mais ce, nientmeinz *que* tu prias,
 Joseph dedist, dont qant veias
 Sanz toy ton fils enseveli,
 Novel dolour recommenças, 29140
 Dont tu crias, ploras, pasmas,
 Et regretas la mort de luy
 Q'ert ton enfant et ton amy,
 Sovent disant, 'Helas, aymy!
 O si je ne reverray pas
 Mon fils! Helas, o dieu mercy!
 Fai, sire, que je moerge yci
 Pour la pité que tu en as.'
 La mort, ma dame, *pour* certain
 A toy lors eust esté *prochein*, 29150
 Si ton chier fils *par* sa tendresse
 N'eust envoié tout prest au mein
 De dieu son piere sovereign
 Ses angles, qui *par* *grant* humblesce
 Te font confort a la destresse,
 Si te dient joye et leesce,
 Q'au tierce jour tout vif et sein
 Verras ton fils; et ensi cesse
Par leur nouvelle la tristesse
 En bon espoir de l'endemein. 29160

Puisq'il ad dit de la Compas-
 sion de nostre dame, dirra ore

29109 denhalt 29127 Enas 29148 enas

de les joyes quelles elle avoit
 apres la Resurreccion de son
 chier fils.

He, dame, comment conterois
 Deinz brief de la soudeine Joie
 Que lors te vient au tierce jour?
 Qant l'espirit revient sa voie
 D'enfern, u q'il ad pris sa proie
 Et aquité nostre ancessour,
 Et sur tout ce comme droit seignour
 Du mort au corps fait son retour,
 Et puis le lieve et le convoie
 A ses amys *par* tout entour, 29170
 Et ceaux qui furent en erreur
 En droite foy les supplé et ploie.
 O dame, si ton fils appiere
 A toy pour moustre la maniere
 Q'il s'est levez du mort en vie,
 Drois est *que* soietz la primere
 Ainçois *que* Jaque, Andreu ne Pierre,
 Et ensi fuist, n'en doubte mie,
 Dont tu, ma dame, es rejoÿe.
 Pour celle Joye je te prie 29180
 Houstetz, ma dame, la misere
 De moy, et *par* ta courtoisie
 En alme et corps sanz departie
 Me fai joyous, tresdoulce mere.
 Apres sa Resurreccion
 Mort fuist mis en soubjeccion,
 Q'aincois avoit de nous poer;
 Dont qant tu as inspeccion,
 Ma dame, ta refeccion
 De molt *grant* joye estoit plener; 29190
 Siq'en avant n'estuet parler
 De pleindre ne de suspirer
 Ne d'autre tiele objection:
Par quoy desore vuil conter
 Tes joyes, dont porray monter,
 Ma dame, en ta *proteccion*.
 He, dame, molt te confortas f. 159
 Qant ton fils mort vif revoias,
 Qui puis apres au Magdaleine,
 Puis a Simon et Cleophas 29200

29211 enas

29215 enporte
29228 enavalant

Se moustra, dont chascuns son cas
 Te vient conter a tiele enseigne;
 Puis apparust il al unszeine
 De sa doctrine et leur enseine,
 Et sur ce dist a saint Thomas
 Qu'il tasteroit sa char humeine
 Pour luy remettre en foy certeine,
 Qui pardevant ne creoit pas.
 He, dame, ce n'estoit petit,
 Qant tiele chose te fuist dit, 29210
 Grant Joye en as et *grant* ple-
 sance;
 Car lors scies tu sanz contredit
 Que les apostres sont parfit
 Du droite foy sanz mescreance;
 Chascuns en porte tesmoignance,
 Et si dient par grande instance,
 'No seignour q'estoit mort revit,
 Mort est vencu de sa puissance.'
 Les mescreantz en ont grevance,
 Et tu, ma dame, en as delit. 29220

Puisq'il ad dit de la Resurre-
 cion, dirra ore de l'Ascencion
 nostre Seignour.

Jhesus, qui tout volt confermer,
 Que nous devons *jammes* douter
 Q'il estoit fils au toutpuissant,
 Ainçois q'om doit *par* tout conter,
 Sa char humeine fist monter
 Au ciel, dont il venoit devant:
 L'apostre tous et toy voiant,
 Vint une nue en avalant,
 Dont il se clost, si q'esgarder
 Ne luy poetz de lors avant: 29230
 Chascuns s'en vait esmerveillant,
 Et tu, ma dame, a leescer.
 Qant il montoit, en mesme l'ure
 Dieus envia par aventure
 Deux hommes, dame, toy present,
 Qui portont blanche la vesture
 Et furent du belle estature,

29219 enont
29231 senvait

29220 enas

Et si dient curtoisement :
 'O vous du Galileë gent,
 A quoy gardetz le firmament? 29240
 Cil *Jhesus* qui s'en vait dessure,
 A son *grant* Jour de Juggement
 Lors revendra semblablement
 Pour juger toute creature.
 Cil qui t'ad guarì des tous mals,
 C'est ton chier fils, les deux vassals
 A ton honneur, ma dame, envoit,
 Pour toy conter *comme* tes foials,
 Que cil q'ainçois estoit mortals
 Sa char humeine lors montoit 29250
 A dieu son pere, u qu'il estoit
 Et a sa destre s'asseoit.
 O dame, q'es de tiels consals
 Privé, bien dois en ton endroit
 Grant Joye avoir, qant de son droit
 Ton fils estoit de ciel Royals.
 O dame, je n'en sui doubtans,
 De ciel furent les deux sergantz,
 Qui viennent de la court divine
 Pour ceaux qui la furent estantz 29260
 Faire en la foy le meulx creantz,
 Et pour toy conter la covine,
 Comment ton fils ot pris saisine
 De ciel: et lors chascuns t'encline,
 Et puis s'en vont en halt volantz
 Vers celle court q'est angeleine.
 Ton fils, q'ensi la mort termine,
 Nous moustra bien q'il est puis-
 santz.
 En ceste siecle se rejoue
 Chascune mere, s'elle voie 29270
 Son fils monter en *grant* honneur;
 Mais tu, ma dame, d'autre voie
 Bien dois avoir parfaite Joye,
 Voiant ton fils *superiour*,
 De ciel et terre *Empereour*;
 Des tous *seignours* il est *seignour*,
 Des Rois chascuns *vers* luy se ploie:
 Et ce te fait de jour en jour
 Tenir les Joyes au sojour
 Et hoster toute anguisse envoie. 29280

29241, 29296 servait

29265 servont

29312 serva

Puisqu'il ad dit de l'Ascension
nostre seignour, dirra ore de l'avenement
 du saint esprit.

L'en doit bien trere en remembrance
 De *nostre* foy la pourtenance
 Comme il avint: *pour* ce vous dis,
 Cil qui nous tient en *governance*,
 Ainz q'il morust, de sa plesance
 A ses apostres ot promis
 Que *depar* dieu leur ert tramis
 De ciel ly tressaintz *esperitz*,
 Par qui serront en la creance
 De toute chose bien apris: 29290
 Sur quoy le temps q'il ot assis
 Attendent en *bonne* esperance.
 O dame, q'en scies tout le fait,
 Tu n'as pas joye contrefait,
 Ainz fuist certain et beneuré;
 Dont *par* conseil chascuns s'en vait
 De les apostres en aguait
 Ove toy, ma dame, en la Cité,
 Et la se sont ils demouré,
 Sicomme ton fils l'ot assigné, 29300
 En esperance et en souhait
 Du temps qant serront inspiré
 De l'esprit leur avoué,
 Par qui bonté serront *parfait*.
 Ensi *comme* ton fils leur *promist*,
 Bien tost apres il avenist;
 Dieus ses apostres visita,
 L'esprit saint il leur *tramist*,
 Qui de sa grace replenist
 Leur cuers et tout esclumina; 29310
 Diverses langues leur moustra
 Semblable au *flamme* que s'en va
 Ardant, dont chascun s'esbahist
 Primérement, mais puis cela
 La mercy dieu chascuns loa,
 Car toute langue il leur *aprist*.
 Qant tieles langues ont rescez,
 De maintenant leur est infuz
 La grace, dont chascuns parloit
 En langue des Latins et Greus, 29320
 De Mede et Perce et des Caldeus,

D'Egipe et d'Ynde en leur endroit;
 Car terre soubz le ciel n'avoit,
 Dont le language ne parloit
 L'apostre, qui fuist droit Hebreus:
 Du quoy *grantment* s'esmerveilloit
 La multitude quelle estoit
 Des autres, q'en sont trop confuz.
 Ensi de grace repleniz
 Cils qui de dieu furent apris 29330
 S'accordont *par* commun assent,
 Que l'un de l'autre soit partis
 La foy precher en tous pais
 Pour convertir la male gent:
 Sur quoy chascuns sa voie *prent*
 Par tout le mond *communement*;
 Neis un des tous y est remis,
 Ma dame, ove toy *que* soulement
 Jehans, qui debonnairement
 Pour toy servir t'estoit soubgis. 29340

Ore dirra comment *nostre* dame
 se contint en la compagnie de
 Jehan Evangelist apres l'Ascen-
 sion.

Après l'assumpcion complie
 Jehan, ma dame, ades se plie
 Pour toy servir et honorer:
 Honeste en fuist la compagnie,
 L'un vierge a l'autre s'associe
 Ensemblement a demourer.
 Lors, dame, tu te fais aler
 En la Cité pour sojourner
 La *que* tu pues a garantie
 Pres du sepulcre hostell trouver, 29350
 Pour y aler et contempler
 A ta divine druerie.
 Car ja n'estoit ne ja serra
 Cuer qui si fort enamoura
 Du fin amour en esperance,
 Comme tu, ma dame; et pour cela
 Unques celle heure ne passa,
 Que tu ton fils en remembrance
 N'eussetz *par* droite sovenance,
 Comme fuist conceu, *comme* ot naissance,

29328 qensont

29344 enfuist

Comme Gabriel te salua, 29361
 Comme se contint puis en s'enfance,
 Comme d'eaue en vin fist la muance,
 Comme Lazaroun resuscita.
 De tieles choses tu te penses,
 Et puis apres tu contrepenses
 De sa penance et dure mort;
 Mais d'autre *part* qant tu repenses
 Son relever, lors tu compenses
 Ta peine ovesque ton desport, 29370
 Mais au darrein te vient plus fort
 La Joye q'en ton cuer resort,
 Qant tu l'Ascension pourpenses;
 Car lors te vient si *grant* confort,
 Que *par* tresamoureux enhort
 Te semble a estre en ses presences.
 Sovent tu vais pour remirer
 Le lieu u qu'il se fist monter,
 Guardant aval et puis dessure f. 160
 Par amoureuse suspirer; 29380
 Ma dame, et lors t'en fais aler
 Par fin amour qui te court sure
 Pour sercher deinz sa sepulture,
 Si tu luy poes par aventure
 En l'un ou l'autre lieu trover.
 Tu es sa mere de nature,
 Et d'autre *part* sa creature,
 Si q'il te falt a force amer.
 Combien *que* t'alme fuist divine
 Et ta pensée celestine, 29390
 Ma dame, enqore a mon avis
 De tiel amour que je destine
 Pour la tendresse femeline
 Ton tendre cuer estoit surpris:
 Car j'en suy tout certains et fis,
 L'amour que portas a ton fils
 Estoit de tiele discipline,
 Que tout le monde au droit devis
 Ne tous les seintz de paradis
 N'en porront conter la covine. 29400
 Mais si d'amour soietz venu,
 Enqore il t'est bienvenu
 Que n'es amie sanz amant;
 Car ly trespuissant fils de dieu

29371 plusfort

29395 iensuy

Q'en toy, ma dame, estoit conceu,
 C'est ton amy et ton enfant,
 Qui vait de toy enamourant
 Sur toute rien que soit vivant :
 Loial est il, loiale es tu,
 Ce que tu voes il voet atant ; 29410
 Bien fuist l'amour de vous seant,
 Par qui tout bien nous est venu.
 Ma dame, tu as avantage,
 Qe sanz ta *lettre* et ton message,
 Ainz seulement de ta pensée,
 Ton amy savoit le corage
 De toy et tout le governage
 Et en apert et en celée :
 Dont il te savoit molt bon gré,
 Par quoy sovent en son degré 29420
 T'envoia de son halt estage
 Son angel, qui t'ad conforté :
 Si tu soies enamourée
 D'un tiel amy, tu fais *que* sage.
 La dame que voet estre amye
 A tiel amy ne se doit mye
 Desesperer ascunement ;
 Car quoy q'om pense ou face ou die,
 Sa sapience est tant garnie
 Q'il le sciet tout apertement ; 29430
 Le ciel ove tout le firmament,
 La terre ove tout le fondement,
 Tout fist au primere estable.
 He, dame, tu fais sagement
 D'amer celluy qui tielement
 De son sens nous gouverne et guie.
 Ton amy, dame, est aici fort,
 Q'au force il ad vengu la mort,
 Et tous les portes enferrals
 Malgré le deble et son acort 29440
 Rompu, pour faire le confort
 A ceaux q'ainçois furent mortals :
 Unques Charles Emperials
 N'estoit ensi victorials,
 Ne si forcibles de son port.
 Dont m'est avis q'uns tiels vassals,
 Ma dame, *parmy* ses travals
 Digne est d'amour et de desport.

29454, 29476 Plusque

Enquore pour parler ensi
 De la bealté de ton amy, 29450
 Lors m'est avis par droit amer
 Que tu, ma dame, as bien choisy ;
 Car il sur tout est enbelly
 Plus *que* l'en porroit deviser :
 Trestous les angles au primer,
 Et cils qui dieus glorifier
 Voldra, par te sont esjoy ;
 Car ils n'ont autre desirer,
 Fors soul sa face remirer
 Pour la bealté q'ils trovent y. 29460
 Et si nous parlons de richesse,
 Ma dame, unques nulle Emperesse
 Un autre amy si riche avoit ;
 Car ciel et terre ove leur *grandesse*,
 La mer ove tout sa *parfondesse*,
 Le firmament q'ensus l'en voit,
 Trestout ce *partient* a son droit ;
 N'y ad richesse en nulle endroit
 Dont ne puet faire sa largesce.
 He dame, quoy q'avenir doit, 29470
 D'un tiel amy qui se pourvoit
 Par povreté n'avra destresce.
 De gentillesce pour voir dire,
 Ma dame, tu scies bien eslire
 Un amy gentil voirement
 Plus *que* nul *homme* puet souffire
 Pour raconter ne pour descrire :
 Car dieu le pierre est son parent,
 Q'avant trestout commencement 29480
 L'engendra mesmes proprement
 Egal a luy deinz son empire,
 Et puis la char q'il de toy *prent*
 Estoit née du royale gent :
 Vei la *comme* il est gentil sire !
 Et pour parler de curtoisie,
 Lors est asses que je vous die
 Que ton amy soit plus curtois
 Que nuls qui maint en ceste vie ;
 Car il est de la court norrie 29490
 U *jammais* vilains ne malvois
 Entrer porra nul jour du moys,
 S'il par la grace dieu ainçois

Ne laissè toute vilainie.
 He, dame, tu as bien ton chois,
 Si bien norry qant tu luy vois,
 A qui tu mesmes es amye.
 Mais ton amy et ton vassal
 Est il, ma dame, liberal ?
 Certainement je dy *que* voir
 De sa franchise natural 29500
 A nous trestous en general
 Donna le meulx de son avoir,
 C'estoit son corps, dont vie avoir
 Nous fist, et puis de son pooir
 Le mondein ove l'espírital
 Nous ad donné pour meulx valoir.
 He, dame, ne te puet doloir
 D'avoir si bon especial.
 De treble joye a mon avis
 Ton cuer, ma dame, est rejoiz, 29510
 En ciel, en terre, en creature ;
 En ciel pour ce *que* tes amys
 Y est du pres son pierre mys,
 Comme cil q'est toutpuissant dessure :
 C'est une chose que t'assure
 Qu'il est aici de ta nature,
 Par ce q'en toy sa char ad pris
 Et toy laissa virgine pure ;
 Dont resoun est *que* l'en t'onure
 Pour l'onour de ton noble fils. 29520
 A plus sovent de jour en jour
 D'en halt le ciel superior
 Ses angles t'ad fait envoyer,
 Pour reporter la *grant* doulcour
 De vo tresfin loyal amour,
 Q'est entre vous sanz deviser.
 He, dame, de tiel messenger,
 Par qui te voloit visiter,
 Q'ert de sa maison angelour,
 Grant joye porretz demener, 29530
 Q'ensi te fesoit honurer
 De son celestial honour.
 En terre aici te fais joyr,
 Car des apostres pues oir
 Chascune jour de la semeigne,
 Comme ils les gens font convertir,

29493 No

29521 plussouent

29522 Denhalt

Pour queux ton fils voloit morir :
 Dont tu, ma dame, as Joye pleine,
 Car *par* cela tu es certeine
 La mort ton fils ne fuist pas veine, 29540
 Qant tiel effect vois avenir ;
 Du quoy ton cuer grant Joie meine
 Pour la salut du vie humeine,
 Quelle autrement devoit perir.
 La nuyt *que* ton chier fils nasquit
 Molt fuist certain *que* l'angel dist,
 Qe peas a l'*omme* soit en terre ;
 Car ainz q'il mort *pour* nous souffrit,
 La terre en soy lors fuist maldit,
 Mais ton chier fils q'est debonnere 29550
 La faisoit de sa mort refere,
 Et l'*omme*, ainçois qui *par* mesfere
 Au deable avoit esté soubgit,
 Remist en grace de bienfere.
 He, dame, de si bon affere
 Ton cuer en terre s'esjoyt.
 Depuis *que* l'*omme* ot offendu
 Son dieu, de lors fuist defendu
 Qu'il eust pover sur creature,
 Sicomme devant avoit eeu ; 29560
 Car par peccché luy fuist tollu
 Ce qu'il ainçois ot de nature :
 Mais qant ton fils morust, al hure
 Lors fuist redempt la forsfaiture,
 Dont la franchise estoit rendu
 A l'*omme*, siq'en sa mesure
 De toutes bestes a dessure
 Il fuist le seconde *après* dieu.
 Et ensi fuist reconcilé
 Le forsfait et l'iniquité 29570
 Entre autre creature et nous ; f. 161
 Dont m'est avis en verité
 Qe ton cuer, dame, en son degré
 Du creature estoit joyous :
 Car ton chier fils, q'est gracios,
 Le ciel, la terre et nous trestous,
 Et chascun creature née,
 Ma dame, pour l'amour de vous
 Ad du novell fait glorious,
 Dont son noun soit glorifié. 29580

Ore dirra de la mort et de la
Assumpcion de nostre Dame.
He, dame, comment conteroie
Ce que je penser ne pourroie ?
Car certes je ne puiss suffire,
Si toute langue serroit moie,
Pour reconter la disme joye,
De jour en jour q'en toy respire,
Depuis ce que ton fils et sire
A dieu le piere en son empire
S'estoit monté la halte voie :
Mais sur tout, dame, pour voir dire,
Q'ove luy fuisset ton cuer desire 29591
Par fin amour qui te convoie.
Et pour ce, dame, ton amy,
Ton chier fils et ton chier norri,
Qui ton desir trestout savoit,
Au temps qu'il avoit establi
Volt bien que tout soit acompli
Ce que ton cuer plus desiroit :
Par quoy, ma dame, en son endroit
Comme ton loyal amy faisoit, 29600
Ne t'avoit pas mys en oubli,
Ainz son saint angel t'envoioit,
Par qui le temps te devoist
Q'il voet que tu vendretz a luy.
Sicomme l'escript nous fait conter,
Ma dame, pour droit acompter,
Depuis le temps que ton chier fils
Fuiست mort et q'il te volt laisser
Derere luy pour demourer,
Dousze ans sur terre tu vesquis ; 29610
Mais lors de ciel il t'ad tramis
Son angel, q'ad le terme mis,
Quant tu du siecle dois passer
Pour venir a son paradis,
U tu, ma dame, apres toutdis
Dois ton chier fils acompaigner.
Cell angel, dame, te desporte
Par une palme q'il t'apporte,
Q'en paradis avoit crescance,
Au fin que qant tu serres morte, 29620
De les apostres un la porte
Devant ton fertre en obeissance ;
Car au jour tierce sanz penance

Morras, ce dist, par l'ordinancé
De dieu, q'ot fait ouvrir sa porte,
U dois entrer en sa puissance.
Ensi te mist en esperance
Cel angel, qui te reconforte.
Qant as entendu le message,
Dieu en loas du bon corage, 29630
Et outre ce tu luy prioies
Q'ascun de l'enfernal hostage,
Qant tu serres sur ton passage
Des oels mortielx jammes ne voies ;
Et puis prias par toutes voies
Disant : 'O dieus, qui tu m'envoies
Tes saintz apostres au terrage
Du corps dont nestre tu deignoies.'
Tout fuist granté ce que voloies,
Et l'angel monte en son estage. 29640
O dame, cil qui toy fist nestre
D'un ventre viel, baraigne et flestre,
Volt ore aici contre nature
Miracle faire ensi comme mestre,
Par quoy ton fin de la terrestre
Volt garder comme sa propre cure ;
Si fist venir par aventure
Tous ses apostres en une hure,
Q'ainçois en mainte diverse estre
Furont dispers, et il dessure 29650
Te vint garder en sa mesure
Ove grant part de sa court celestre.
Ton fils te dist en confortant,
'O mere, vei cy ton enfant !'
Et tu, ma dame, d'umble atour
Luy ditz, 'Beal fils, je me comunt
A toy,' ensi sovent disant,
'Mon fils, mon dieu, mon crea-
tour !'
Ton corps morust sanz nul dolour,
Et maintenant si bon odour 29660
Par toute la maisoun s'espant,
Que cils qui furont la entour
Sont repleniz du grant douçour,
Loenge et grace a dieu rendant.
Qui toute chose en soi comprennent,
Il mesmes t'alme enporte et prent
Des angles tout environné,

Et a son piere en fait present,
U toutes joyes du present
Sont a ton oeps apparaillé ; 29670
Et puis par grant solemneté
Les saintz apostres ont porté
Ton corps jus'q'a l'enterrement :
Mais ainz que fuissetz enterré,
Maint grant miracle y ot moustré
Pour convertir la male gent.
Ensi come ils ton corps portoient,
Les males gens q'envie avoient
Le pensont a deshonnouer ;
Dont a ton fierre s'aroutoient, 29680
Ruer au terre le voloient,
Du quoy leur vint grant encombrer ;
Les uns commençont avoegler,
Les autres ne poont houser
Leur mains du fertre u s'aherdoient,
Si leur covint mercy crier
Et les apostres de prier,
Ainz q'ils de riens gariz en soient.
Ton corps des cendals bel atournent,
En terre metton et adournent 29690
Du Josaphat en la valée ;
Puis leur dist dieus q'ils n'en retour-
nent,
Mais q'en la place ades sojournent
Trois jours ; car lors en verité
Prendroit le corps resuscité
Pour mener en sa deité.
Ensi l'apostre ne s'en tournent,
Ainz a grant joye ont demouré
Pour estre a la sollempneté ;
Le dieu precept en ce parfournent.
Ma dame, au jour q'il ot promis 29701
Vint ove ses angles infiniz
Pour ton saint corps resusciter ;
Dont en ton corps l'alme ad remis,
Et si te dist comme bons amys,
O mere, molt de toy louer :
'Virgine sanz nul mal penser,
Ore est le temps du guerdonner,
Que tu m'as de ton lait nourris :
Venetz la sus enhabiter, 29710

Q'en joye sanz determiner
Serras tu, mere, et je ton fils.
'Du vie mere es appelée,
La mort en toy n'ad poesté,
Tenebres ne te pourront prendre,
Q'en toy fuist la lumere née ;
Je mys en toy ma deité,
Pour ce ton corps ne serras cendre.
O belle vierge, fresche et tendre,
Qui ciel ne terre pot comprendre 29720
Tu portas clos en ta costée :
Ore est que je le te vuil rendre,
Venetz ove moy la sus ascendre,
U que tu serras coronnée.
'Sicome du joye as repleny
Le mond, q'ainçois estoit peri,
Et celle gent q'estoit perdue,
Ma belle mere, tout ensi
Le ciel amont, qant vendretz y,
S'esjoyera de ta venue. 29730
O tu m'espouse, o tu ma drue,
Tu es la moye et je suy tue,
Ore serra ton desir compli.'
Ensi parlant le corps remue,
Montantz en halt dessus la nue,
L'espouse ovesque son mary.
De molt grant joye et melodie
La court de ciel fuist replenie,
Qant voient venir la virgine :
De ce ne me merveille mye, 29740
Car mesmes dieu la meine et guie
Et de son ciel l'ad fait saisine,
Et la coronne riche et fine
De la richesce que ne fine
Assist dessus le chief Marie ;
Sique sanz fin de sa covine
Ert dame de la court divine,
U tout honour luy multeplice.
Les saintz apostres qui ce viron
Pour tesmoigner le fait escrivont, 29750
Rendant loenge a leur seignour :
Mais au merveille ils s'en partiron,
Car l'un de l'autre s'esvaniron
Trestout en un moment du jour ;

Chascuns regarde soy entour,
Et se trovent sanz nul destour
En les pais dont ils veniront ;
U qu'il prechont leur salveour,
Et par miracles de l'errour
Au droite foy les convertiront. 29760

Ore dirra les causes par [f. 162
quoy nostre dame demoura si
longement en ceste vie apres le
decess de son treschier fils.

O bon Jhesu, ne te desplace,
D'un riens si je toi demandasse,
Q'ascuns s'esmerveillont pour quoy,
Qant tu montas ta halte place,
Que lors, monseigneur, de ta grace
N'eussetz mené ta mere ove toy
Sanz plus attendre ; car je croy
Sanz resonnable cause en soy
Le terme ne s'en pourloignasse :
Dont certes, sire, en bonne foy 29770
Trois causes pense en mon recoy,
Les queux dirray, maisq'il te place.

Qant tu ascendis a ton piere,
Si lors eussetz mené primere
Ta mere ove toy conjointement,
Les angles de ta Court plenera,
Qui n'en savoient la manere,
Ussont ceu mervaillement,
Voiant si fait avienement
D'un homme et femme ensemblement,
De toy et de ta douce mere ; 29781
Dont n'eussont seeu certainement
A qui de vous primerement
Ussont moustré plus bonne chere.

Une autre cause a mon avis,
Depuisque tu, sire, es son fils,
Qui scies trestoute chose avant,
Par bonne reson ascendis
Primerement en ton pais
Comme son amy et son enfant, 29790
Ensi que fuissetz au devant
Apparaillant et ordinant
Son lieu par si tresbon devis,

29772 masqil

Siq'a ta mere en son venant
Trestous luy fuissent entendant,
Sibien les grans comme les petis.

O Jhesu, mesmes tu le dis,
Tesmoign de tes evangelis,
En terre pour leur conforter
A tes apostres as promis, 29800
Q'apres que d'eaux fuissetz partiz,
Voldretz en ciel apparailler
Lour lieus. O, qui lors puet doubter,
Qant tu l'ostell vols arraier
Pour ceaux qui furent tes soubgis,
Que tu tout autrement amer
Ne voes ta mere, et ordiner
Pour celle qui t'avoit norriz ?

La tierce cause est molt notable
As toutes gens et proufitable, 29810
Q'elle ert derere toy laissé,
Car elle estoit si bien creable,
Par quoy no foy la plus estable
De sa presence ert confirmé.
Car combien que par leur degré
Les autres furont doctriné,
Dont ils toy furont entendable,
Nientmeinz en ta divinité
Ne poont estre si privé
Comme celle en qui tu es portable.

Sicomme le livre nous devise, 29821
La droite foy de sainte eglise
Fuiست en ta mere seulement
Après ta mort reposite et mise,
Jusques atant que la franchise
De l'espirit omnipotent
Par son tressaint avienement
Donnoit le clier entendement
As autres par sa bonne aprise : 29830
Pour ce molt fuist expedient
Que tu ta mere, toy absent,
Laissas derere en tiele guise.

O Jhesu, qui tout es parfit,
Par ces trois causes que j'ay dit
Certainement, sicome je pense,
Tu le mettoies en respit,
Q'ainçois ta mere n'ascendist :

Mais tu, q'es toute sapience,
Qant temps venoit de ta science,
Lors de ta sainte providence 29840
Le corps ovesque l'espirit
De la virgine en ta presence
Montas ove toute reverence
Pour ton honour et son proufit.

O dame, q'es par tiele assisse
En halte gloire et joye assisse,
Tu fais par tout les joyes crestre :
Les angles en ont joye prise,
Qant leur cité, q'estoit divise,
Que Lucifer ot fait descrestre, 29850
Voient si noblement recrestre
Par toy, ma dame, et par ton estre ;
Et d'autre part en leur franchise
Par luy qui deigna de toi nestre
As restitut la gent terrestre,
Qui sont redempt de la juyse.

O vous, douls fils et douce mere,
Q'ensemble tante paine amere
Souffristes en la terre yci,
Drois est q'en mesme la manere 29860
Après vo paine et vo misere
Soietz ensemble rejoÿ.

O fils et mere, ensi vous pry,
Par la douleur dont je vous dy
Mettetz ma douleur loign derere,
Et pour voz joyes vous suppli,
Me donnetz celle joye aici,
Que vous avetz toutdis plenera.

O dame, tout le cuer me donne,
Pour le grant bien q'en toi fuisonne 29871
Que nullement me duisse taire
Pour toi louer, de qui l'en sonne
Loenge ; dont je m'abandonne,
Ma dame, a ta loenge faire,
Q'es belle et bonne et debonnaire.

Ton fils t'ad donné le doaire
De ciel ovesque la coronne ;
Maisqu'il te porroit, dame, plaire,
Trestout le plus de mon affaire
Mette a l'onour de ta personne. 29880
Grant bien nous est, dame, avenu,

29848 enont

Ton fils t'ad mis en si halt lieu,
U tu le mond poes survoier ;
Et es aici si pres de dieu,
Que qant peril nous est esmeu,
Tantost y viens pour socourer
A nous, qu'il deigna rechater :
Car tout ensi comme tu primer
Portas au monde no salu,
Ensi t'en fais continuer. 29890
C'est ce qui me fait esperer
Que je ne serray pas perdu.

O dame des honours celestes,
Pour celle joye u vous y estes
Remembre de nous exulés
En ceste vall plain de tempestes,
Plain du misere et des molestes,
Dont suimes tous jours travaillez,
Gardetz nous, dame, et defendetz,
Et qant nous prions tes pités, 29900
Entendetz, dame, a noz requestes ;
Car en ce suimes asseurez
Que tous les nouns dont es clamez
Sont merciabes et honestes.

Puisqu'il ad dit des joyes et
dolours nostre dame, dirra ore les
propretés de ses nouns.

O dame, pour la remembrance
De ton honour et ta plesance
Tes nouns escrivre je voldrai ;
Car j'ay en toy tiele esperance,
Que tu m'en fretz bonne alleggance,
Si humblement te nomerai. 29910
Pour ce ma langue enfileraï,
Et tout mon cuer obeierai,
Solonc ma povre sufficance
Tes nouns benoitz j'escriveray,
Au fin que je par ce porray,
Ma dame, avoir ta bienveillance.

O mere et vierge sanz lesure,
O la treshumble creature,
Joye des angles gloriose,
O merciabable par droiture, 29920
Restor de nostre forsfaiture,

29886 yviens

Fontaine en *grace* plentevoue,
 O belle Olive fructuose,
 Palme et Cypresse precieuse,
 O de la mer estoille pure,
 O cliere lune esluminouse,
 O amiable, o amourouse
 Du bon amour qui toutdis dure.
 O rose sanz espine dite,
 Odour de balsme, o mirre eslite, 29930
 O fleur du lys, o turturelle,
 O vierge de Jesse confite,
 Commencement de no merite,
 O dieu espouse, amye, ancelle,

29936 plusbelle

O debonaire columbelle,
 Sur toutes belles la plus belle,
 O gemme, o fine Margarite,
 Mere de mercy l'en t'appelle,
 Tu es de ciel la fenestrelle
 Et porte a paradis parfite. 29940
 O gloriose mere dee,
 Vierge des vierges renommee,
 De toy le fils dieu deigna nestre;
 O temple de la deite,
 Essample auci de chastite,

.

A few leaves are lost at the end of the MS.